







**B 12**

6

33


**BIBLIOTECA NAZIONALE  
CENTRALE - FIRENZE**

**1.000 - 5-944**



M. TULLII  
CICERONIS  
EPISTOLARUM  
AD  
FAMILIARES  
LIBRI XVI.

*Cum Selectis variantibus Lectionibus.*



VENETIIS,  
Sumptibus Heredis Nicolai Pezzana

MDCCLXXA

B<sup>o</sup>. 12. 6. 83

M. T.  
C I C E R O N I S  
V I T A ,

Edita a P. Manutio .



**Q**UAE ad Epistolarum primi Libri cognitionem non parum conduxerit vita, & casuum auctoris cognitio, eam complectar paucissimis. M. Tull. Cic. Arpini natus, Roma, quo puer perductus fuerat, tantum in discendo profecit, ut in causis dicendis primum locum consecutus sit; tantumque veritatis, & Respublica studio potuit, ut omnes honores suo ordine obtinuerit. In Consulatu autem sic sese gessit, ut non minus vera gloria in toga meruerit, quam alius quispiam in armis, liberavit enim Urbem ab incendio, & civitatem a cade conjuratorum, Catilina duce, in quos cum animadvertisset, & Catilina jam in praelio cecidisset, primus in toga triumphavit; primusque Parens Patriae appellatus est, erectis ejus gloriae perpetuis monumentis. Quae res illi invidia non parum peperit, praesertim apud Casarem, & paulo post apud Clodium, virum appropinque nobilem, qui captus amore Pompejae uxoris Caesaris, in domo ejus in veste muliebri deprehensus est, temerasse festa Bonae, maribus non ad-eunda, Dea, ob quam rem in jus vocatus, negavit se tunc in Urbe fuisse; citatus autem Cicero in eum testis, asseruit, Clodium eo die secum Romae fuisse, quod idem & alii praetari viri testati sunt; Clodius tamen, iudicibus corruptis pecunia absolutus est. Caesar autem uxorem repudiavit, quod diceret, donum Caesaris non solum crimine, sed etiam suspitione criminis vacare debere; in Clodium ut Cic. incommodaret, nihil gravius egit, Ad Clodius ultionis aus-

ditate, a Patribus ad plebem per adoptionem transiit: factusque Trib. plebis. Cicero diem dixit, quod nobilissimus civis necasset indicta causa. Erant autem tunc Consules L. Piso, Caesaris socer, & P. Gabin. qui provinciarum spe, Clodii conatibus favebant. Quod intelligens Cicero, cum neque a Pompejo, neque ab aliis amicis satis tutaretur, aufugit: absensque damnatus est a Clodio: ut, bonis ejus publicatis, quadringentis millibus passuum ab Italia igni, & aqua illi interdiceretur; qui vero eum hospitio suscepisset, exul esset, & de suo amitteret omnia: additumque rogationi est, ne quis de eo reducendo referret, disputaretur, aut pedibus in sententiam iret; quæ omnia populus sciuit, atque approbavit maxima, ut semper fuit, animorum mutabilitate. Clodius ita exulis villas diripuit, incendit: domum in palatio a fundamentis demolitus est, & in area templum Libertatis construxit: fortunas omnes hæcæ subiecit; nec tamen in tota illa auctione sector quispiam repertus est. Cicero in Macedoniam aufugit, ubi a Plancio benigne exceptus est. Clodius autem ob victoriam insolentior factus, etiam Pompejum in publica concione contumeliis proscidit; querens, ut populus, quod Pompejus is esset, responderet; (*Quis uno digito caput scaberet: quis vir verum quæreretur?*) & similia. Qua contumelia irritatus Pompejus, fretusque Lentuli auctoritate, ad quem proxima sunt Epistolæ, & qui Cicero amicoissimus fuit, auctor fuit Tito Annio Tribuno plebis, ut rogationem ad populum ferret de Cicerone revocando. Qua res ingentes turbas concitavit; Clodius enim cum factione sua tribunitiæ obstitit rogationi; eoque obniente aliquamdiu nihil agi potuit; certatumque est interim in publico armis; tribunitiaque potestas violata est; multi quoque interfelli, adeo ut Q. Cicero, Marci frater, inter cadavera latitans, sit servatus. Postremo Pompejus ingenti bonorum manu, ad l. ipsum ex tota Italia collecta, Clodium foro expulit: auxilioque fuit, ut populus sine aliquo majore notu rogaretur. Numquam major populi Romani de reliqua re consensus fuisse dicitur, neque ~~non~~ magnum alias totius

lia-

*Italiæ studium, quæ ad hoc ipsum Romam con-  
fluxerat : ut non magis eleganter , quàm vero  
Cicero postea gloriatus sit , ( Italiæ se humeris  
ab exilio reportatum . ) Senatus caritate , &  
benevolentia cum populo certavit , decrevitque ,  
ut publice laudarentur civitates , quæ Ciceronem  
humâniter accepissent , ut domus , & villæ ejus  
publico instaurarentur sumptu . Rediit sexto de-  
cimo mense postquam Urbe eiektus fuerat , in Se-  
natuque aliquantulum floruit , quo tempore ad  
Lentulum primi Libri Epistolas scripsit . Deinde  
Ciliciam , post Lentulum , & Appium Claudium  
Pulchrum , Provinciam obtinuit : unde reversus  
bella civilia inter Casarem , & Pompejum offen-  
dit orta , quæ res effecit , ut triumphare non po-  
tuerit . Diu autem ad concordiam utrumque fru-  
stra hortatus , Pompejum tandem secutus est .  
Quo victo , & occiso , per Dolabellam generum  
suum Casari reconciliatus , cum in foro locus non  
esset , ad Philosophiam se contulit . Tandem , Ca-  
sare occiso , cum libertatis publica gratia , ejus  
percuissores tutareur , & in Marcum Antonium  
Casaris vindicem , Philippicas habuisset , post-  
quam Antonius , Lepidus , & Augustus Trium-  
viratum iniissent , ab Antonio , aliis conniven-  
tibus , proscriptus est , & in fuga deprehensus ,  
capite , & manu , qua Philippicas scripserat ,  
truncatus est .*



E J U S D E M  
H I S T O R I A  
D E P T O L E M Æ O R E G E

*Ad intelligentiam primi Libri.*



EX Ægypti Ptolemæus, cognomen-  
to Auletes, quia tibiis canere  
præter dignitatem regiam solitus  
esset, pater Ptolemæi qui magna  
Pompejum occidit, & Cleopatrz,  
horissimæ feminz, ejectus ab Ægy-  
ptiis propter flagitia, maximeque  
ob æterbissimam intolerabilium tributorum exa-  
ctionem, Romam venit, consulatum gerentibus  
P. Lentulo, & Q. Metello: queritur injuriam,  
pro sua, pro majorum societate, veterrimoque, ac  
perpetuo erga populum Rom. studio suppliciter  
orat, ut restituatur: nec impetrat magno he-  
gotio, vel Pompeji gratia, regis causam adju-  
vantis, eique non solum amicitia, Mithridati-  
co bello contracta, sed etiam hospitio conjun-  
cti: vel, quod ejus regis quem senatus ac po-  
pulus Rom. biennio ante socium, amicumque  
appellasset, injurias ulcisci, non modo justum,  
sed exemplo etiam utile, speciosumque videba-  
tur. Accedebant merita, nani (ut a Varrone  
scriptum Plinius memorat) Pompejo circa Ju-  
dæam bellum gerenti, octo equitum millia Pto-  
lemæus nullo reipublicæ sumptu, præsidio mise-  
rat. His de causis fit S. C. referente consule P.  
Lentulo, ut sortiantur consules uter eum in re-  
gnum reducat. Prior exiit fors Lentuli simul  
cum administratione Ciliciæ. Nam Hispania,  
quæ Metello Nepoti ejus collegæ obtigit, longe  
ab Ægypto remota, cum reductione regis Ale-  
xandrini conjungenda non fuit. Hujus & S. C.  
& fortis in oratione in Pisonem mentio fit his  
verbis; Auderet Gabinus, si non acerrime fu-  
reret, quam provinciam P. Lentulus, cum &  
auctoritate senatus & sorte haberet, interposita  
re-

religione deposuisset, eam sibi tum adsciscere, cum, etiam si religio non impediret, mos maiorum tamen, & exempla, & gravissima legum poenae vetarent. Postea per C. Catonem, tribunum plebis obiecta senatui religio est, prolato & Sibyllinis verbis oraculo, ne rex cum multitudine reducatur, si fiat, malo publico futurum. Tum sic alterum S. C. referente Marcellino consule, regem cum multitudine reduci periculosum reipublicae videri, deinde, quis sine exercitu reducat, deliberatur. Alii cum honorem Lentulo, quem jam antea & S. C. & sortis beneficio acceperat, conservabant, alii Pompejo mandandum, alii aliter censebant, varietas opinionum rem extraxit, Catonis vero tribuni plebis audacia disturbavit penitus, atque perversavit. Nam, & ab initio tribunatus, ut Fenestella docet apud Nonium, concionibus aliquis invidiam regi, ac Lentulo concitavit, & mox, lege etiam de abrogando Lentulo Ciliciae imperio promulgata, animos eorum, qui Lentulo favebant, minore cura ad summum timorem traduxit: Pompejum vero in lenatu asperere, & acerbe accusatum eo redegit, ut consilium reducendi regis abscideret. Itaque rex desperato senatus auxilio, confugit ad Gabinium Syriae proconsulem, a quo, promissis decem talentorum millibus, Pompejo etiam qui eo anno cum Crasso consul fuit, admodum pro eo contendente, facile impetravit ut restitueretur. Ex quo postea Gabinius maiestatis accusatus, quod provinciae suae finibus contra legem Corneliam de maiestate excessisset, corruptis iudicibus absolutus est; mox tamen de repetundis in iudicium vocatus, defendente, Pompeji rogatu, Cicerone, qui priore iudicio accusaverat, odio maxime prioris iudicii damnatus, publicatis bonis, in exilium abiit, quem postea dictator Caesar restituit. Hinc illa in eum oblique coniecta in oratione, quam habuit in senatu, contra collegam ejus, L. Pisonem, Scipionem, fauces suos, exercitum populi Romani, nomen, interdictumque deorum immortalium, responsa sacerdotum, auctoritatem senatus, iussa populi, nomen, ac dignitatem imperii regi Aegypti.

vendidit : in Ægyptum venit ; signa contulit  
cum Alexandrinis ; cepit Alexandriam . Atque  
hoc in loco fœdant Appiani negligentiam dissi-  
mulare non possum , qui Gabinium , Pompejo  
tertio consule , de maiestate damnatum pu-  
tat ; in quo dupliciter peccat , primum tempo-  
ris , deinde criminis inscientia . Nam Gabinus  
biennio ante Pompeji tertium consulatum , Do-  
mitio & Appio COS. damnatus est , non de  
maiestate ( quo crimine , corruptis iudicibus ,  
evasit ) sed de repetundis , odio maxime iudicii  
de maiestate , quod corruptum esse constabat .  
Utrunque docet Dionis historia lib. XXXIX.  
cui si fides abrogatur , ipse certe non reselleretur  
Cicero , quo ego , præsertim in rebus , illius  
ætate gestis , locupletiores testes non quero .  
Is in epistola XVI. ad Atticum , lib. IV. &  
lib. III. ad Q. fratrem epist. IV. prorsus  
patescit *Ἐπίτομα* Appiani . Pulsus est  
Ptolemæus e regno post quatuor fere annos quam  
regnare cœperat , Romamque venit P. Lentulo ,  
Q. Metello COS. quod quidem e Ciceronis A-  
graria in Rullum licet conicere ; in qua non  
hunc Auletem Ptolemæum , sed alium regnare ,  
Alexandro rege mortuo , indicat his verbis ,  
cum qui regnum illud hoc tempore teneat , ge-  
nere regio non esse , video inter omnes conve-  
nire . De Aulete nunquam ita loqueretur , de  
quo in oratione pro domo ; cuius , inquit , cum  
patre , avo , maioribus societas populo Romano  
iuncta est . Præterea socius , & amicus populi  
Romani , Cæsare consule , appellatus est , quod  
ipse Cæsar scriptum reliquit libro III. De bel-  
lo civil. & Cicero epist. XVI. lib. II. ad Atti-  
cum idem significat , ut videatur paulo ante re-  
gnum accepisse , quod societate statim , atque  
amicitia populi Romani confirmandum curavit .  
Quod si rex fuit ante Cæsarem consulem , nec  
fuit consule Cicerone , ut ex ejus Agraria ora-  
tione ostendimus , sequitur , ut quarto fere aut  
tertio regni anno eiectus Romanus venerit , quo  
anno ( ut dixi jam ) consulatum gerebant Spin-  
ther Lentulus & Metellus Nepos , id quod non  
modo Livius , ut ex epitome dignoscitur , &  
Dio , sed Strabo etiam , gravis auctor , signifi-  
cat ,



cas, cum ejectionem ait esse Ptolemæum, Gabinio Syriam obtinente; eique successisse Archelaum, Gabinii familiarem, uxore ducta trium Ptolemæi filiarum maxima Berenice; quam postea cum Archelao restitutus a Gabinio Ptolemæus interemit. Honor autem ille societatis & amicitie pop. Rom. a Ptolemæo, sicuti a reliquis quoque regibus non mediocriter expetitus, causam attulit, ut anno proximo ab Ægyptiis eiceretur; emit enim societatem a Cæsare consule ejusque genero Pompejo, ut Svetonius prodidit, sex prope talentorum millibus; quæ sunt, nummo nostro, scutorum tricies & sexcenta millia; communi lingua, tres milliones & sexcenta millia, quam pecuniam mutuatus a fœneratoribus, & amicis, quorum e numero fuit C. Rabirius Posthumus, quem postea Cicero defendit, intolerabilia tributa, ut creditoribus satisfaceret, Ægyptiis imposuit, ex quo multitudine concitata pulsus est. Neque vero tantam pecuniam Cæsari primum a Ptolemæo datam, ut ei regnum societate, & amicitia Populi Rom. confirmaretur, deinde Gabinio, ut exactus restitueretur, quisquam mirabitur, qui ex annuis Ægypti vestigalibus quantum caperet, animadverterit; capiebat enim talentorum duodena millia quingena, id est, scutorum septuagies, quingena millia; quantum hodie universi Galliarum regni, quod omnium regnorum fructuosissimum habetur, annua tributa non conficiunt. Mirum etiam quod a Varrone traditum scripsit Plinius, hunc Ptolemæum, Pompejo circa Judæam res gerente, octona millia equitum sua pecunia toleravisse, mille convivas, totidem aureis potoriis mutantem vasa cum ferculis, laginasse.

# P. MANUTIUS...

**E** Pistola, quas Familiares vocant, scriptae sunt omnes post consulatum, ante exilium, in exilio, post exilium. Ante exilium quinque. Prima omnium, quae Pompeio Magno inscribitur; altera, Q. Metelli Celeris ad Ciceronem; tertia, Ciceronis ad eum; quarta, ad C. Antonium; quinta, ad P. Sextium: quae in libro quinto omnes leguntur. In exilio, ad Terentiam uxorem quinque lib. XIV. Post exilium reliquae omnes. Ad Lentulum lib. I. diversis temporibus, id est, toto triennio, scriptae sunt: sex quidem prima, gerentibus consulatum Marcellino, & Philippo: septima & octava Pompeio, & Crasso: nona Domitio, & Appio: quod ex earum argumentis, & observatione cognoscitur historia.



M. TULLII  
CICERONIS  
EPISTOLARUM

Ad Familiares  
LIBER PRIMUS.  
ARGUMENTUM.

P. Cornelio Lentulo Spintheri, gentis patriciæ & Ciliciam proconsulari imperio administranti, scribit Cicero de Officio suo erga ipsum, in curanda Regis Ptolemai redactione: deinde, quia rem non perficiat, excusationem affert, Est autem excusatio multiplex; & quia Rex ipse a Pompejo resisti cupiat, & quia Pompejus idem cupere videatur, & quia Consulares totam rem odio habeant; postremo quia ipse, cum Lentulo debeat, auctoritatis in causa regis non satis habeat.

I. M. T. C. P. LENTULO PROCOS. D.



GO omni officio; ac potius pectore te erga te, ceteris satisfacio omnibus; mihi ipse nunquam satisfacio: tanta enim magnitudo est tuorum erga me meritorum; ut, quoniam tu, nisi perfecta re, de me non conquiesci, ego, quia non idem in tua causa efficio, vitam mihi esse acerbam putem. In causa hæc sunt: Hammonius regis legatus aperte pecunia nos oppugnat; res agitur per eosdem creditores, per quos, cum tu aderas, agebatur. Regis causa; si qui sunt, qui velint, qui pauci sunt, omnes rem ad Pompejum deferri volunt; senatus religionis calumniam; non religione, sed malevolentia, & illius regis largitionis invidia comprobatur. Pompejum & hortari, & orare, etiam liberius accusare, & monere, ut magnam infamiam fugiat, non desistimus, sed plane nec precibus nostris, nec admonitionibus reliquit locum. Nam cum

in sermone quotidiano, tum in senatū, palam sic egit causam tuam, ut neque eloquentia maiore quisquam, neque gravitate, nec studio, nec contentione agere potuerit, cum summa reificatione tuorum in se officiorum, & amoris erga te sui. Marcellinum tibi esse iratum, scis. Is, hac regia causa excepta, ceteris in rebus se acerrimum tui defensorem fore ostendit. Quod dat, accipimus; quod instituit referre de religione, & saepe jam retulit, ab eo deduci non potest. Res ante Idus acta sic est, nam hae Idibus mane scripsi. Hortensii, & meae, & Luculli sententia cedit religioni de exercitu; (teneri enim res aliter non potest) sed ex illo S. C. quod te referente factum est, tibi decernit ut regem reducas; quod commodum Reipubl. facere possis, ut exercitum religio tollat, te auctorem senatus retineat. Crassus tres legatos decernit, nec excludit Pompejum; censes enim etiam ex iis, qui cum imperio sunt; Bibulus tres legatos ex iis, qui privati sunt, huic assentiuntur reliqui consulares, praeter Servilium, qui omnino reduci negat oportere; & Volcatium, qui Lugo referente, Pompejum decernit, & Afranium, qui assentitur Volcatio; quae res auget suspicionem Pompeji voluntatis; nam advertebatur, Pompeji familiares assentire Volcatio. Laboratur vehementer; inclinata res est. Libonis, & Hypsaei non obscura concursatio & contentio; omniumque Pompeji familiarium studium, in eam opinionem rem adduxerunt, ut Pompejus cupere videatur; cui qui nolunt, iidem tibi, quod cum ornasti, non sunt amici. Nos in causa auctoritatem eo minorem habemus, quod tibi debemus. Gratiam autem nostram extinguit hominum suspicio, quod Pompejo se gratificari putant. Ut in rebus multo ante, quam profectus es, ab ipso rege, & ab intimis ac domesticis Pompeji clam exulceratis; deinde palam a consularibus exagitatis, & in summam invidiam adductis, ita versamur. Nostram fidem omnes, amorem tui absentis praesentes tui cognoscent. Si esset in iis fides, in quibus summa esse debebat, non laboraremus. Vale.

*Scribit, quid actum sit in Senatu de causa regia; ostendit, de Pompejo se bene sperare, ab ejus familiaribus timere; Tribuni pl. ne quid moliri contra possint, provisum esse.*

## II. M. T. C. P. LENTULO S. D.

**I**Dibus Januariis in senatu nihil est confectum; propterea quod dies magna ex parte consumptus est altercatione Lentuli consulis, & Caninii tribuni pl. Eo die nos quoque multa verba fecimus, maximeque visi sumus senatum commemoratione tuæ voluntatis erga illum ordinem commovere. Itaque postridie placuit, ut breviter sententias diceremus; videbatur enim reconciliata nobis voluntas senatus esse; quod tum dicendo, tum singulis appellandis, rogandisque perspexeram. Itaque, cum sententia prima Bibuli pronuntiata esset, ut tres legati regem reducerent; secunda Hortensii, ut tu sine exercitu reduceres; tertia Volcatii, ut Pompejus reduceret, postulatum est, ut Bibuli sententia divideretur; quatenus de religione dicebat, cuique rei jam obsisti non poterat, Bibulo assensum est, de tribus legatis, frequentes ferunt in alia omnia. Proxima erat Hortensii sententia, cum Lupus tribunus pleb. quod ipse de Pompejo retulisset, contendere cœpit, ante se oportere discessionem facere, quam consules; ejus orationi vehementer ab omnibus reclamatum est: erat enim & iniqua, & nova; Consules neque concedebant, neque valde pugnabant; diem consumi volebant; id quod est factum; perspiciebant enim, in Hortensii sententiam multis partibus plures ituros; quamquam aperte Volcatio assentirentur; multi rogabantur, atque idipsum consulibus invitis, nam ii Bibuli sententiam valere cupierunt. Hac controversia usque ad noctem ducta, senatus est dimissus, & ego eo die casu apud Pompejum cœnavi: natusque tempus hoc magis idoneum, quam unquam antea, quod post tuum discessum is dies primus ho-

## EPIST. FAMIL.

4  
 Nestissimus nobis fuerat in senatu, ita sum cum illo locutus, ut mihi viderer animum hominis ab omni alia cogitatione ad tuam dignitatem tuendam traducere: quem ego ipsum cum audio, prorsus eum libero omni suspitione cupiditatis: cum autem ejus familiares omnium ordinum video, respicio id, quod jam omnibus est apertum, totam rem istam jampridem a ceteris hominibus, non invito rege ipso, consiliisquæ ejus esse corruptam. Hæc scripsi ad xv. Kal. Febr. ante lucem; eo die senatus erat futurus: nos in senatu (quemadmodum spero) dignitatem nostram, ut potest in tanta hominum perfidia & iniquitate, retinebimus. Quod ad popularem rationem attinet, hoc videmus esse consecuti, ut nequid agi cum populo aut salvis auspiciis, aut salvis legibus, aut denique sine vi possit. De his rebus, pridie quam hæc scripsi, senatus auctoritas gravissima intercessit: cui cum Cato, & Catinus intercessissent, tamen est perscripta: eam ad te missam esse arbitror. De ceteris rebus, quidquid erit actum, scribam ad te; & ut quam rectissime agantur, omni mea cura, opera, diligentia, gratia providebo. Vale.

## A R G U M E N T U M.

Commendat A. Trebonium amicum suum splendidum Equitem Romanum. Hujus autem generis Epistolarum quatuor partes solent esse: ut amicum nostrum ostendamus eum, quem commendamus: ut bonum utrum, & diu, qui commendetur: ut aequitatem rei, de qua scribitur; deinde ut cum beneficii memorem futurum, simulque nos ipsos significemus, quæ in hac Epistola non plane omnia sunt expressa.

### III. M. T. C. P. L E N T U L O S. D.

47  
**A**ulo Trebonio; qui in tua provincia magna negotia, & ampla, & expedita habet, multos annos utor valde familiariter: is cum antea semper & suo splendore, & nostra, ceterorumque amicorum commendatione, gratissimus in provincia fuit; tum hoc tempore propter

Præ eum in me amorem, nostramque necessitudinem, vehementer confidit; his meis litteris, se apud te gratiosum fore: quæ ne spes eum fallat, vehementer te rogo: commendoque tibi ejus omnia negotia, libertos, procuratores, familiam; in primisque, ut, quæ T. Appius de ejus re decrevit, ea comprobēs, omnibusque rebus eum ita tractēs, ut intelligat nostram commendationem non vulgarem fuisse. Vale.

## ARGUMENTUM.

*Laudat officium suum, tum subjungit de calumniis adversariorum, per quos fletur, quo minus res conficeretur. A Senatu ostendit se bene sperare: sed eam habitum iri non nisi post multos dies: vim timet: post emo loco, Senatū, & populum bene sentire de Lentulo significat.*

## IV. M. T. C. P. LENTULO S. D.

**A**D xvi. Kalend. Febr. cum in senatu pulcherrime staretis, quod jam illam sententiam Bibuli de tribus legatis pridie ejus diei fregimus, unumque certamen esset relictum; sententia Volcatii, res ab adversariis nostris extracta est variis calumniis; causam enim frequenti senatu; in magna varietate, magnaque invidia eorum, qui a te causam regiam alio transferebant, obtinebamus. Eo die acerbum habuimus Curionem; Bibulum multo justiores, penè etiam amicum. Caninius, & Cato negarunt se legem ullam ante comitia esse laturōs. Senatus haberi ante Kalend. Febr. per legem Pupiam (id quod scis) non potest: neque men- se Febr. toto, nisi perfectis, aut rejectis legationibus. Hæc tamen opinio est pop. Rom. à ruis invidis atque obtrectatoribus nomen inducum fidei religionis; non tam ut te impedi- rent, quam ut ne quis propter exercitus cupiditatem Alexandriam vellet ire; dignitatis autem tuæ, nemo est quin existimet habitam esse rationem ab senatu. Nemo est enim, qui nesciat, quo minus discessio fieret, per adversarios tuos

tuos esse factum; qui nunc populi Rom. nomine, re autem vera sceleratissimo latrocinio, si qua conabuntur agere, satis provisum est, ut ne quid salvis auspiciis, aut legibus, aut etiam sine vi agere possint. Ego neque de meo studio, neque de nonnullorum injuria scribendum mihi esse arbitror. Quid enim aut me ostentem, qui, si vitam pro tua dignitate profundam, nullam partem videar tuorum meritorum assecutus? aut de aliorum injuriis querar, quod sine summo dolore facere non possum? Ego tibi a vi, hac praesertim imbecillitate magistratuum prestare nihil possum: vi excepta, possum confirmare, te & senatus, & populi Rom. summo studio, amplitudinem tuam retenturum. Vale.

### ARGUMENTUM.

*Semper exorditur a commemoratione officii sui. Subjungit de Catonis Tribuni pl. lege promulgata, ut Lentulus de Cilicia revocaretur. Causam regiam a Pompeio depositam significat, quo majorem spem habere Lentulus debeat.*

V. M. T. C. P. LENTULO S. D.

**T**Ametsi mihi nihil fuit optatius, quam ut primum abs te ipso, deinde a ceteris omnibus quam gratissimus erga te esse cognoscerem; tamen afficior summo dolore, ejusmodi tempora post tuam professionem esse consecuta, ut & meam, & ceterorum erga te fidem & benevolentiam absens experirere. Te videre, & sentire eandem fidem esse hominum in tua dignitate, quam ego in mea salute sum expertus, ex tuis literis intellexi. Nos cum maxime consilio, studio, labore, gratia, de causa regia niteremur, subito exorta est nefaria Catonis promulgatio, quae nostra studia impediret, & animos a minore cura ad summum timorem traduceret; sed tamen in hujusmodi rerum perturbatione, quamquam omnia sunt metuenda, nihil magis quam perfidiam timemus; & Catoni quidem, quoquo modo se res habet, profecto resistimus. De Alexandrina re, causa-

que



que regia tantum habeo polliceri , me tibi absenti , tuisque presentibus cumulate satisfacturum ; sed vereor , ne aut eripiatur nobis , aut deferatur : quorum utrum minus velim , non facile possum existimare . Sed , si res coget , est quiddam tertium , quod neque Selicio , neque mihi displicebat ; ut neque iacere regem pateremur , nec , nobis repugnantibus , ad eum deferri ; ad quem prope jam delatum esse existimatur , a nobis agentur omnia diligenter : ut neque , si quid obtineri poterit , non contendamus , neque , si quid non obtinuerimus repulsi esse videamur . Tuæ sapientiæ , magnitudinisque animi est , omnem amplitudinem , & dignitatem tuam in virtute , atque in rebus gestis tuis atque in tua gravitate positam existimare : si quid ex iis rebus , quas tibi fortuna elargita est , nonnullorum hominum perfidia detraxerit , id maiori illis fraudi , quam tibi futurum . A me nullum tempus præmittitur de tuis rebus , & agendi , & cogitandi , utorque ad omnia Q. Selicio , neque enim prudentiorem quemquam ex tuis , neque fide majorem esse iudico , neque amantiorem tui . Hic quæ agantur , quæque acta sint , ea te , & litteris multorum , & nuntiis cognoscere arbitror : quæ autem posita sunt in conjectura , quæque mihi videntur fore , ea puto tibi a me scribi oportere . Posteaquam Pompejus apud populum ad viii. Idus Februar. cum pro Milone diceret , clamore , convitioque jactus est , in senatuque a Catone asperere , & acerbe , omnium magno silentio , est accusatus , visus est mihi vehementer esse perturbatus . Itaque Alexandrina causa , quæ nobis adhuc integra est , ( nihil enim tibi detraxit senatus , nisi id , quod per eandem religionem dari alteri non potest ) videtur ab illo plane esse deposita . Nunc id speramus , idque molimur , ut cum rex intelligat , se se , id quod cogitabat , ut a Pompejo reducat , assequi non posse , & , nisi per te sit restitutus , desertum se , atque abjectum fore , proficiscatur ad te ; quod sine ulla dubitatione , si Pompejus paulum modo ostenderit sibi placere , faciet ; sed non

ſti hominis tarditatem, & taciturnitatem: nos tamen nihil, quod ad eam rem pertineat, prætermittimus; ceteris injuriis, quæ propoſitæ ſunt à Catone, facile, ut ſpero, reſitemus. Amicum ex conſularibus neminem tibi eſſe video, præter Hortenſium, & Lucullum: ceteri ſunt partim obſcurius iniqui, partim non diſſimulanter irati. Tu fac animo forti, magnoque ſis, ſperesque fore, ut fracto impetu leiſſimi hominis, tuam priſtinam dignitatem, & gloriam conſequare. Vale.

## A R G U M E N T U M.

*Tota videtur eſſe conſolatoria Epiſtola: conſolatur enim Lentulum ex comparatione temporum ſuorum: cum in exitium pulſus, brevi tamen, & patriam, & dignitatem recuperavit. Brevis eſt Epiſtola, quia Pollio ad Lentulum ibat, omnia narraturus.*

## VI. M. T. C. P. LENTULO S. P. D.

Quæ gerantur, accipies ex Pollione, qui omnibus negotiis non interfuit ſolum, ſed præſuit. Me in ſummo dolore, quem in tuis rebus capio, maxime ſcilicet conſolatur ſpes, quod valde ſuſpicio fore, ut infringatur hominum improbitas, & conſiliis tuorum amicorum, & ipſa die, qua debilitantur cogitationes & inimicorum, & proditorum. Facile ſecundo loco me conſolatur recordatio meorum temporum, quorum imaginem video, in rebus tuis: nam, etſi minore in re violatur tua dignitas, quam mea ſalus afflicta ſit: tamen eſt tanta ſimilitudo, ut ſperem, te mihi ignoſcere, ſi ea non timuerim, quæ ne tu quidem umquam timenda duxiſti. Sed præſta te cum, qui mihi a teneris (ut Græci dicunt) unguiculis eſ cognitus, illuſtrabit (mihi crede) tuam amplitudinem hominum injuria. A me omnia ſumma in te ſtudia, officiaque expecta; non fallam opinionem tuam. Vale.

## ARGUMENTUM.

*Lentuli litteris respondet, de Alexandrina re scribit, quid Pompejo, ipsique videatur; ut tamen totum illud consilium Lentuli sapientie permittat. Adjungit de Milone, & Clodio, de statu Republicæ, de filia nuptiis.*

VII. M. T. C. P. LENTULO PROCOS. S. D.

**L**Egi tuas litteras, quibus ad me scribis, gratum tibi esse, quod crebro certior per me fias de omnibus rebus, & meam erga te benevolentiam facile perspicias. Quorum alterum mihi, ut te plurimum diligam; facere necesse est, si volo is esse, quem tu me esse voluisti, alterum facio libenter, ut, quoniam intervallo locorum, & temporum disiuncti sumus; per litteras tecum quam sæpiissime colloquar. Quod si varius fiet, quam ut expectabis, id erit causæ, quod non ejus generis meæ litteræ sunt, ut etiam audeam temere committere: quoties mihi certorum hominum potestas erit, quibus recte dem, non prætermittam. Quod scire vis qua quisque in te fide sit, & voluntate: difficile dictum est de singulis. Unum illud audeo, quod ante tibi sæpe significavi, nunc quoque, re perspecta, & cognita; scribere: vehementer quosdam homines, & eos maxime, qui te & maxime debuerunt, & plurimum juvare potuerunt, invidisse dignitati tuæ: simillimanque in re dissimili, tui temporis nunc, & nostri quondam fuisse rationem, ut, quos tu reipubl. causa læseras, palam te oppugnant, quorum auctoritatem, dignitatem, voluntatemque defenderas; non tam memores essent virtutis tuæ, quam laudis inimici. Quo quidem tempore, ut perscripti ad te antea, cognovi Hortensium percupidum tui, studiosum Lucullum, ex magistratibus autem L. Racilius & fide & animo in te singulari; nam nostræ propugnatio, ac defensio dignitatis tuæ, propter magnitudinem beneficii tui, fortasse plerisque officii majorem auctoritatem habere videatur, quam sententiæ: præterea quidem de consularibus nemini possum aut Rudii erga te aut

aut officii , aut amici animi esse testis , etenim Pompejum , qui mecum sepiissime , non solum a me provocatus , sed etiam sua sponte , de te communicare solet , scis temporibus illis non saepe in senatu fuisse . Cui quidem litteræ tuæ , quas proxime miseras , quod facile intellexerim , perjucundæ fuerunt ; mihi quidem humanitas tua , vel summa potius sapientia , non jucunda solum , sed etiam admirabilis visa est ; virum enim excellentem , & tibi tua præstanti in eum liberalitate devinctum , non nihil suspicantem , propter aliquorum opinionem suæ cupiditatis , te ab se abalienatum , illa Epistola retinuiſti . Qui mihi cum semper tuæ laudi favere visus est , etiam ipso suspiciosissimo tempore Caniniano , tum vero lectis tuis litteris perspectus est a me , toto animo de te , ac de tuis ornamentis , & commodis cogitare . Quare ea , quæ scribam , sic habeto , me , cum illo re saepe communicata , de illius ad te sententia , atque auctoritate scribere : quoniam S. C. nullum extat , quo reductio regis Alexandrinæ tibi adempta sit : eaque , quæ de ea scripta est , auctoritas , cui scis Intercessum esse , ut ne quis omnino regem reduceret , tantam vim habet , ut magis iratorum hominum studium , quam constantis senatus consilium , esse videatur : te posse perspicere , qui Ciliciam , Cyprumque teneas , quid efficere , & quid consequi possis , & si res facultatem habitura videatur , ut Alexandriam , atque Ægyptum tenere possis , esse & tuæ , & nostri imperii dignitatis , Ptolemaide aut aliquo propinquo loco rege collocato , te cum classe , atque exercitu proficisci Alexandriam ; ut , cum eam pace , præditiisque firmaris , Ptolemæus redeat in regnum : ita fore , ut per te restituatur , quemadmodum senatus initio censuit , & sine multitudine reducatur , quemadmodum homines religiosi Sibyllæ placere dixerunt . Sed hæc sententia sic & illi , & nobis probabatur , ut ex eventu homines de tuo consilio existimatuſos videremus : si cecidisset , ut volumus , & optamus , omnes , te & sapienter , & fortiter ; sin aliquid esset offensum , eosdem illos & cupide , &

tenie-

temere fecisse, dicturos. Quare quid assequi possis, non tam facile est nobis quam tibi, cui prope in conspectu Ægyptus est, judicare: nos quidem hoc sentimus: si exploratum tibi sit, posse te illius regni potiri, non esse cunctandum; sin dubium, non esse conandum. Illud tibi affirmo, si rem istam ex sententia gesseris, fore, ut abiens a multis cum redieris, ab omnibus collaudere: offensionem esse periculosam propter interpositam auctoritatem, religionemque video, sed ego te, ut ad certam laudem adhortor, sic a dimicatione deterreo, redeoque ad illud, quod initio scripsi, totius facti tui iudicium non tam ex consilio tuo, quam ex eventu homines esse facturos. Quod si hæc ratio rei gerendæ periculosa tibi videbitur; placebat illud, ut, si rex amicis tuis, qui per provinciam imperii tui pecunias ei credidissent, fidem suam præstitisset, & auxiliis eum tuis, & copiis adjuvares; eam esse naturam, & regionem provinciæ tuæ, ut illius redditum, vel adjuvando confirmares, vel negligendo impedires. In hac ratione quid res, quid causa, quid tempus ferat, tu facillime, optimeque perspicies; quid nobis placuisset, ex me potissimum putavi te scire oportere. Quod mihi de nostro statu, de Milonis familiaritate, de levitate, & imbecillitate Clodii gratularis; minime miramur, te tuis, ut egregium artificem, præclaris operibus lætari. Quamquam est incredibilis hominum perversitas. (graviori enim verbo uti non libet) qui nos, quos favendo in communi causa retinere potuerunt, invidendo abalienaverunt: quorum malevolentissimis obtreccionibus nos scito de veteri illa nostra, diuturnaque sententia prope jam esse depulsos: non nos quidem, ut nostræ dignitatis simus obliti, sed ut habeamus rationem aliquando etiam salutis: poterat utrumque præclare, si ei set fides, si gravitas in hominibus consularibus: sed tanta est in plerisque levitas, ut eos non tam constantia in republ. nostra deleat, quam splendor offendat. Quod eo liberius ad te scribo, quod tu non solum temporibus iis, quæ per te sum adeptus, sed jam olim nascenti prope

nostræ laudi, dignitati, virtutique præfuisse; simul quod video, non, ut antehac putabam, novitati esse invisum meæ, in te enim homine omnium nobilissimo, similia invidorum vitia perspexi: quem tamen illi esse in principibus facile sunt passi, evolare altius certe noluerunt. Gaudeo tuam dissimilem fuisse fortunam: multum enim interest, utrum laus imminuatur, an salus deseratur, me meæ tamen ne nimis pœniteret, tua virtute perfectum est, curasti enim, ut plus additum ad memoriam nominis nostri, quam ademptum de fortuna videretur. Te vero moneo, cum beneficiis tuis, tum amore incitatus meo, ut omnem gloriam, ad quam a pueritia inflammatus fuisti, omni cura, atque industria consequare: magnitudinemque animi tui, quam ego semper sum admiratus, semperque amavi, ne unquam inflectas cujusquam injuria. Magna est hominum opinio de te, magna commendatio liberalitatis, magna memoria consulatus tui; hæc profecto vides, quanto expressiora, quantoque illustriora futura sint, cum aliquantum ex provincia, atque ex imperio laudis accesserit. Quanquam te ita gerere volo, quæ per exercitum, atque imperium gerenda sunt, ut hæc multo ante meditare: huc te pares, hæc cogites, ad hæc te exerceas, sentiasque id, quod quia semper sperasti, non dubito quin adeptus intelligas, te facillime posse obtinere summum, atque altissimum gradum civitatis. Quæ quidem mea cohortatio, ne tibi inanis, aut sine causa suscepta videatur, illa me ratio movit, ut te ex nostris eventibus communibus admonendum cūctarem, ut considerares in omni reliqua tua vita, quibus crederes, quos caveres. Quod scribis, te velle scire, qui sit reipubl. status: summa dissensio est, sed contentio dispar. Nam qui plus opibus, armis, potentia valent, profecisse tantum mihi videntur stulticia, & inconstantia adversariorum, ut jam etiam auctoritate plus valerent. Itaque, perpaucis adversantibus, omnia, quæ ne per populum quidem sine seditione se assequi posse arbitrabantur, per senatum consecuti sunt: nam & stipendium Cæsari

huius decretum est, & decem legati: & ne lege Sempronia succederetur, facile perfectum est. Quod ego ad te brevius scribo, quia me status hic reipublicæ non desecat: scribo tamen ut te admoneam, quod ipse litteris omnibus a pueritia deditus, experiendo tamen magis, quam discendo, cognovi, id ut tu rebus tuis integris discas, neque salutis nostræ rationem nobis habendam esse sine dignitate, neque dignitatis sine salute. Quod mihi de filia, & de Crassipede gratularis, agnosco humanitatem tuam, speoque, & opto nobis hanc conjunctionem voluptati fore. Lentulum nostrum, eximia spei summæ virtutis adolescentem, cum ceteris artibus, quibus studuisti semper ipse, tum in primis imitatione tui fac erudias: nulla enim erit hac præstantior disciplina, quem nos, & quia tuus, & quia te dignus est filius, & quia nos diligit, semperque dilexit, in primis amamus, carumque habemus. Vale.

## ARGUMENTUM.

*Tota est Epistola contra mores immutatos, & hoc non sine artificio, ut intelligat Lentulus, iam sibi nihil sperandum de Rege reducendo.*

VIII. M. T. C. P. LENTULO PROCOS.  
S. P. D.

DE omnibus rebus, quæ ad te pertinent, quid actum, quid constitutum sit, quid Pompejus susceperit, optime ex Emplatorio cognosces; qui non solum interfuit his rebus, sed etiam præfuit, neque ullum officium erga te hominis amantissimi, prudentissimi, diligentissimi prætermisit. Ex eodem de toto statu rerum communium cognosces, quæ quales sint, non facile est scribere: sunt quidem certe in amicorum nostrorum potestate, atque ita, ut nullam mutationem unquam hac hominum ætate habitura res esse videatur. Ego quidem, ut debeo, & ut tute mihi præcepisti, & ut me dignitas, utilitasque cogit, me ad ejus rationes adjungo, quem tu in meis rationibus tibi esse

ad-

adjungendum putasti, sed te non praterit, quam sit difficile sensum in republ. præsertim rectum, & confirmatum deponere. Verumtamen ipse me conformo ad ejus voluntatem, a quo honeste dissentire non possum: neque id facio, ut forsitam quibusdam videor, simulatione. Tantum enim animi inductio, & mehercule amor erga Pompejum, apud me valet, ut, quæ illi utilia sunt, & quæ ille vult, ea mihi omnia jam, & recta, & vera videantur. Neque, ut ego arbitrator, errarent ne adversarii quidem ejus, si, cum pares esse non possent, pugnare desisterent. Me quidem etiam illa res consolatur, quod ego is sum, cui vel maxime concedant omnes, ut vel ea defendam, quæ Pompejus velit, vel taceam, vel etiam (id quod mihi maxime lubet) ad nostra me studia referam litterarum: quod profecto faciam, si mihi per ejusdem amicitiam licebit. Quæ enim proposita fuerant nobis, cum & honoribus amplissimis, & laboribus maximis perfuncti essemus, dignitas in sententiis dicendis, libertas in republica capeßenda, ea sublata tota, sed nec mihi magis, quam omnibus; nam aut assentiendum est nulla cum gravitate paucis; aut frustra dissentiendum. Hæc ego ad te ob eam causam maxime scribo, ut jam de tua quoque ratione meditere; commutata tota ratio est senatus, judiciorum, rei totius publicæ: otium nobis exoptandum est, quod ii, qui potiuntur rerum, præstaturi videntur, si quidam homines patienter eorum potentiam ferre potuerint. Dignitatem quidem illam consularem fortis, & constantis senatoris, nihil est quod cogitemus; amissa est culpa eorum, qui a senatu, & ordinem conjunctissimum, & hominem clarissimum abalienarunt. Sed ut ad ea, quæ conjunctiora rebus tuis sunt, revertar, Pompejum tibi valde amicum esse cognovi, & eo tu consule, quantum ego perspicio, omnia, quæ voles, obtinebis, quibus in rebus me ille sibi affixum habebit; neque a me ulla res, quæ ad te pertineat, negligetur, neque enim verebor, ne sim ei molestus; cui jucundum erit etiam propter id ipsum, quod me esse gratum videbit. Tu velim tibi ita persuadeas, nullam rem esse minimam,



man, quæ ad te pertineat, quæ mihi non carior sit, quam meæ res omnes, idque cum sentiam, sedulitate inhiñet ipse satisfacere possum; re quidem ipsa ideo mihi non satisfacio, quod nullam partem tuorum meritorum non modo referenda, sed ne cogitanda quidem gratia consequi possum. Rem te valde bene gessisse iunior erat: expectabantur litteræ tuæ, de quibus eramus jam cum Pompejo locuti; quæ si erunt allatæ, nostrum studium exstabit in conveniendis magistratibus, & senatoribus. Cetera quæ ad te pertinebunt, cum etiam plus contenderimus, quam possumus, minus tamen faciemus, quam debemus. Vale.

## ARGUMENTUM.

*Quærenti Lentulo, cur cum inimicis in gratiam redierit, causas exponit consilii sui: & ostendit, velle se rationem tam salutis habere, quam dignitatis, & eorum obsequi voluntati: a quibus de se optime meritis honeste dissentire non potest. Pomp. jam autem maxime significat.*

## IX. M. T. C. P. LENTULO IMP. S. B

**P**erjucundæ mihi fuerunt litteræ tuæ: quibus intellexi, te perspicere meam in te pietatem; quid enim dicam, benevolentiam? cum illud ipsum gravissimum, & sanctissimum nomen pietatis levius mihi meritis erga me tuis esse videatur. Quod autem grata tibi mea erga te studia scribis esse, facis tu quidem abundantia quadam amoris, ut etiam grata sint ea, quæ prætermitti sine nefario scelere non possunt: tibi autem multo notior, atque illustrior meus in te animus esset, si hoc tempore omni, quo sejuncti fuimus, & una & Romæ fuisset; nam in eo ipso, quod te ostendis esse facturum, quodque & in primis potes, & ego a te vehementer expecto, in sententiis senatoriis, & omni actione, atque administratione reipubl. floruissemus: de qua ostendam equidem paulo post, qui sit meus sensus, & status, & rescribam tibi ad ea, quæ quæris, sed certe

& ego te auctore amicissimo, ac sapientissimo, & tu me consiliario fortasse non imperitissimo, fidei quidem, & benevolo, certe usus esses. Quamquam tua quidem causa, te esse imperatorem, provinciamque bene gestis rebus cum exercitu victore obtinere, ut debeo, lator: sed certe, qui tibi ex me fructus debentur, eos uberiores, & prastantiores præsens capere potuisses: in eis vero ulciscendis, quos tibi partim inimicos esse intelligis propter tuam propugnationem salutis meæ, partim invidere propter illius actionis amplitudinem, & gloriam, mirificum me tibi comitem præbuissem. Quamquam ille perennis inimicus amicorum suorum, qui tuis maximis beneficiis ornatus, in te potissimum fractam illam & debilitatam vim suam contulit, nostram vicem ultus est ipse sese: ea est enim conatus, quibus patefactis nullam sibi in posterum non modo dignitatis, sed ne libertatis quidem partem reliquit. Te autem, etsi mallet in meis rebus expertum, quam etiam in tuis, tamen in molestia gaudeo, eandem fidem cognoscere hominum, non ita magna mercede, quam ego maximo dolore cognoram, de qua ratione tota jam videtur mihi exponendi tempus dari, ut tibi rescribam ad ea, quæ quaris. Certiorem te per litteras scribis esse factum, me cum Cæsare, & cum Appio esse in gratia, teque id non reprehendere adscribis. Vatinium autem scire te velle ostendis, quibus rebus adductus defenderim, & laudarim. Quod tibi ut planius exponam, altius paulo rationem meorum consiliorum repetam, necesse est. Ego me, Lentule, initio rerum, atque actionum earum non solum meis, sed etiam reipubl. restitutum putabam: &, quoniam tibi incredibilem quendam amorem, & omnia in te ipsum summa, ac singularia studia deberem, reipubl. quæ te in me restituendo multum adjuvisset, eum certe me animum merito ipsius debere arbitrabar, quem antea tantummodo communi officio civium, non aliquo erga me singulari beneficio, debitum præstitissem. Hac me mente fuisse, & senatus ex me, te consule, audivit, & tu in nostris sermonibus, colloutionibusque,

hufque, ipfe vidifti: etfi jam primis temporibus illis, multis rebus meus offendebarur animus; cum te agente de reliqua noſtra dignitate, aut occulta nonnullorum odia, aut obſcura in me ſtudia cernebam. Nam neque de monumentis meis ab iis adiutus es, a quibus debuifti; neque de vi nefaria, qua cum fratre eram domo expulſus, neque hercule in iis iſtis rebus, quæ quamquam erant mihi propter rei familiaris naufragia neceſſaria, tamen a me minime putabantur, in meis damnis ex auctoritate ſenatus reſarciendis; eam voluntatem, quam expectaram, præſtiterunt. Quæ cum viderem, (neque enim erant obſcura) non tamen tam acerbam mihi hæc accidebant, quam erant illa grata, quæ fecerant. Itaque, quamquam & Pompejo plurimum, te quidem ipſo prædicatore, ac teſte, debebam, & eum non ſolum beneficio, ſed amore etiam, & perpetuo quodam iudicio meo diligebam, tamen non reputans quid ille veller, in omnibus meis ſententiis de republ. priſtinis permanebam. Ego, ſedente Cn. Pompejo, cum, ut laudaret P. Sextium, introiſſet in urbem, dixiſſetque teſtis Vatinius, me fortuna, & felicitate C. Cæſaris commotum, illi amicum eſſe coepiſſe, dixi, me eam Bibuli fortunam, quam ille aſſictam putaret, omnium triumphis, victoriisſque antepferre, dixique eodem teſte alio loco, eodem eſſe, qui Bibulum exire domo prohibuiſſent, & qui me coegiſſent. Tota vero interrogatio mea nihil habuit aliud, niſi reprehensionem illius tribunatus: in quo omnia dicta ſunt libertate, animoque maximo de vi, de auſpiciis, de donatione regnorum; neque vero hæc in cauſa modo, ſed conſtanter ſape in ſenatu: quin etiam, Marcellino, & Philippo coſs. nonis April. mihi eſt ſenatus aſſenſus, ut de agro Campano, frequenti ſenatu, idibus Majis referretur. Num potui magis in arcem illius cauſæ invadere, aut magis obliviſci temporum meorum, & meminiffe actionum? hæc a me ſententia dicta, magnus animorum motus eſt factus, cum eorum, quorum oportuit, cum

illorum etiam, quorum numquam putaram. Nam, hoc S. C. in meam sententiam facto, Pompejus, cum nihil mihi ostendisset se esse offensum, in Sardiniam, & in Africam profectus est: eoque itinere Lucam ad Cæsarem venit: ubi multa de mea sententia questus est Cæsar: quippe, qui etiam Ravennæ Crassum ante vidisset, ab eoque in me esset incensus: sane moleste Pompejum id ferre constabat. Quod ego cum audissem ex aliis, maxime ex meo fratre cognovi: quem cum in Sardina Pompejus paucis post diebus, quam Luca disceserat, convenisset; Te, inquit, ipsum cupio: nihil opportunius potuit accidere: nisi cum Marco fratre diligenter egeris, dependendum tibi est, quod mihi pro illo spondidisti. Quid multa? questus est graviter sua merita commemoravit, quid egisset sapissime de actis Cæsaris cum ipso meo fratre: quidque sibi is de me recepisset, in memoriam redegit: seque, quæ de mea salute egisset, voluntate Cæsaris egisse, ipsum meum fratrem testatus est: cuius causam, dignitatemque mihi ut commendaret, rogavit, ut eam ne oppugnarem, si nollem, aut non possem tueri. Hæc cum ad me frater pertulisset, & cum ante tamen Pompejus ad me cum mandatis Vibullium misisset, ut integrum mihi de causa Campanæ ad suum reditum reservarem: collegi ipse me, & cum ipsa quasi republ. sum collocutus, ut mihi tam multa pro se perpeso, atque perfuncto, concederet, ut officium meum, memoriamque in benemeritos animum, fidemque fratribus mei præstarem: eumque, quem bonum civem semper habuisset, bonum virum esse pateret: in illis autem meis actionibus, sententiisque omnibus, quæ Pompejum videbantur offendere, certorum hominum, quos jam debes suspicari, sermones referebantur ad me: qui cum illa sentirent in republ. quæ ego agebam, semperque sensissent, me tamen non satisfacere Pompejo, Cæsaremque inimicissimum mihi futurum, gaudere se dicebant. Erat hoc mihi dolendum, sed multo magis illud, quod inimicum meum (meum autem? immo vero legum, judiciorum, orii,

patriæ, bonorum omnium) sic amplexabantur, sic in manibus habebant, sic fovebant, sic, me præsentem osculabantur, non illi quidem ut mihi stomachum facerent (quem ego funditus perdidit) sed certe ut facere se arbitrantur. Hic ego quantum humano consilio efficere potui, circumspèctis rebus omnibus, rationibusque subductis, summam tecum cogitationum mearum omnium, quam tibi, si potero, breviter exponam. Ego si ab improbis, & perditis civibus republ. teneri viderem, sicut & meis temporibus scimus, & nonnullis aliis accidisse accepimus, non modo præmiis, (quæ apud me minimum valent) sed ne periculis quidem compulsus, (quibus tamen moventur etiam fortissimi viri) ad eorum causam me adjungerem, ne si summa quidem eorum in me merita constarent. Cum autem in republ. Cn. Pompejus princeps esset (vir is, qui hanc potentiam, & gloriam maximis in republ. meritis, & præstantissimisque rebus gestis esset consecutus, cujusque ego dignitatis ab adolescentia fautor, in prætura autem, & in consulatu adjutor etiam existissem) cumque idem auctoritate, & sententia per se, consiliis, & studiis tecum me adjuvisset, meumque inimicum unum in civitate haberet inimicum; non putavi famam inconstantis mihi pertimescendam, si quibusdam in sententiis paulum me immutasset, meamque voluntatem ad summi viri, de meque optime meriti dignitatem ageregassem. In hac sententia complectendus erat mihi Cæsar, ut vides, in conjuncta causa, & dignitate. Hic multum valuit cum vetus amicitia, quam tu non ignoras mihi, & Quinto fratri cum Cæsare fuisse, tum humanitas ejus, ac liberalitas, brevi tempore & litteris, & officiis perspecta nobis, & cognita. Vehementer etiam res ipsa publica me movit: quæ mihi videbatur contentionem (præsertim maximis rebus a Cæsare gestis) cum illis viris nolle fieri, & ne fieret, vehementer recusare. Gravissime autem me in hanc mentem impulit, & Pompeji fides, quam de me Cæsari dederat, & fratris mei, quam Pompejo. Erant præterea

hæc anima advertenda in civitate, quæ sunt apud Platonem nostrum scripta divinitus. **QUALES** in republ. principes essent, tales reliquos solere esse cives. Tenebam memoria, nobis consulibus ea fundamenta facta ex Kal. Jan. confirmandi senatus, ut neminem mirari oporteret, nonis Decemb. tantum vel animi fuisse in illo ordine, vel auctoritatis. Idemque memineram, nobis privatis usque ad Cæsarem, & Bibulum cons. cum sententiæ nostræ magnum in senatu pondus haberent, unum fere senium fuisse bonorum omnium. Postea, cum tu Hispaniam citeriorem cum imperio obtineres, neque resp. consules haberet, sed mercatores provinciarum, & seditionum servos, ac ministros, iecit quidam casus caput meum, quasi certaminis causa, in mediam contentionem, dissensionemque civilem. Quo in discrimine, cum mirifica senatus, incredibilis Italiæ totius, singularis bonorum omnium consensus in me tuendo extitisset, non dicam, quid acciderit, (meliorum est enim, & varia culpa) tantum dicam brevi, non mihi exercitum, sed duces defuisse; in quo, ut jam sit in iis culpa, qui me non defenderunt, non minor est in iis, qui reliquerunt: & si accusandi sunt, qui pertimuerunt, magis etiam reprehendendi, qui se time re simularunt. Illud quidem certe nostrum consilium jure laudandum est, quod meos cives, & a me servatos, & me servare cupientes, spoliatos ducibus, servis armatis objici noluerim, declararique maluerim, quanta vis esse potuisset in consensu bonorum, si iis pro me stante pugnare licuisset, cum afflictum excitare potuissent: quorum quidem animum tu non perspexisti solum, cum de me ageres, sed etiam confirmasti, atque tenuisti. Qua in causa (non modo non negabo, sed etiam semper, & meminero, & prædicabo libenter) usus es quibusdam nobilissimis hominibus fortioribus in me restituendo, quam fuerant iidem in tenendo. Quæ in sententia si constare voluissent, suam auctoritatem simul cum salute mea recuperassent; recreatis enim bonis viris consulari tuo, & constantissimis atque optimis a-

tio-

tionibus tuis excitatis, ( Cn. Pompejo præsertim ad causam adjuncto, cum etiam Cæsar rebus maximis gestis, singularibus ornatus & novis honoribus, ac judiciis senatus, ad auctoritatem ejus ordinis adjungeretur ) nulli improbo civi locus ad remp. violandam esse potuisset. Sed attende, quæso, quæ sint consecuta. Primum illa furra muliebrium religionum; qui non pluris fecerat Bonam deam, quam tres sorores, impunitatem scelerum est eorum sententiis assecutus, qui cum tribunus pleb. pœnas a seditioso cive per bonos viros judicio persequi vellet, exemplum præclarissimum in posterum vindicandæ seditionis de republ. sustulerunt iidemque postea non meum monumentum; ( non enim illæ tranubie meæ, sed operis locatio mea fuerat: monumentum vero senatus ) hostili nomine, & cruentis iniustum litteris esse passi sunt. Qui me homines quod saluum esse voluerunt, est mihi gratissimum: sed vellem, non solum salutis meæ, quemadmodum medici; sed etiam, ut aliptæ, virium & coloris rationem habere voluissent. Nunc, ut Apelles Veneris caput, & summa pectoris politissima arte perfecit, reliquam partem corporis inchoatam reliquit; sic quidam homines in capite meo solum elaborarunt, reliquum corpus imperfectum, ac rude reliquerunt. In quo ego spem fefelli non modo invidorum, sed etiam inimicorum meorum, qui de uno acerrimo, & fortissimo viro, meoque judicio, omnium magnitudine animi, & constantia præstantissimo, Q. Metello L.F. quondam falsam opinionem acceperunt: quem post reditum dicitant fracto animo, & demisso fuisse. Est vero probandum, qui & summa voluntate cesserit, & egregia animi alacritate abfuerit, neque sane redire curaret. Eum ob id ipsum fractum fuisse animo, in quo cum omnes homines, tum M. illum Icaurum, singularem virum, constantia & gravitate superasset. Sed, quod de illo acceperant, aut etiam suspicabantur, de me idem cogitabant, abiectione animo me futurum: cum resp. majorem etiam mihi animum, quam

unquam habuisset, daret : quæ jam declarasset, sese non potuisse me uno cive carere, cumque Metellum unius tribuni pl. rogatio, me universa resp. duce senatu, comitante Italia, promulgantibus omnibus, referente consule, comitiis centuriatis, cunctis ordinibus, hominibusque incumbantibus, omnibus denique suis viribus recuperasset. Nec vero ego mihi postea quidquam assumpsi, neque hodie assumo, quod quemquam malevolentissimum jure possit offendere : tantum enitor, ut neque amicis, neque etiam alienioribus opera, consilio, labore desim. Hic meæ vitæ cursus offendit eos fortasse, qui splendorem, & speciem hujus vitæ intuentur, sollicitudinem autem, & laborem perspicere non possunt. Illud vero non obscure queruntur in meis sententiis, quibus orhem Cæsarem, quasi desciverim a pristina causa. Ego autem cum illa sequor, quæ paulo ante proposui, tum hoc non in postremis, de quo cœperam exponere. Non offendes eundem bonorum sensum, Lentule, quem reliquisti ; qui confirmatus consulatu nostro, nonnunquam postea interruptus & afflictus ante te consulem, recreatus abs te totus est ; nunc ab iis, a quibus tuendus fuerat, derelictus : idque non solum fronte, atque vultu ( quibus simulatio facillime sustinetur ) ii declarant, qui tum nostro illo statu optimates nominabantur, sed etiam sententia sæpe jem tabellæque docuerunt. Itaque tota jam sapientium civium ( qualem me & esse, & numerari volo ) & sententia & voluntas mutata esse debet ; id enim jubet idem ille Plato, quem ego auctorem vehementer sequor : Tantum contendere in rep. quantum probare tuis civibus possis, vim neque parenti, neque patriæ asferre oportere. Atque hanc quidem ille causam sibi ait non attingendæ reip. fuisse, quod cum offendisset populum Atheniensem prope jam desipientem senectute : cumque cum nec persuadendo, nec cogendo regi posse vidisset, cum persuaderi posse diffideret, cogi fas esse non arbitraretur. Mea ratio fuit alia, quod neque desipiente populo, neque integra re mihi ad

con.



consulendum ; capefferem ne republ. impil-  
catus tenebar : sed letatus tamen sum , quod  
mihi liceret in eadem causa utilia , & cuivis  
bono recta defendere . Huc accessit commemo-  
randa quædam , & divina Cæsaris in me , fra-  
tremque meum liberalitas , qui mihi , quascun-  
que res gereret , tuendus esset : nunc in tanta fe-  
licitate , tantisque victoriis , etiam si in nos non  
is esset qui est , tamen ornandus videretur . Sic  
enim te existimare velim , cum a vobis meæ sa-  
lutis auctoribus discesserim , neminem esse , cu-  
jus officiis me tam esse devinctum non solum  
confitear , sed etiam gaudeam . Quod quoniam  
tibi exposui , facilia sunt ea , quæ a me de Va-  
tino , & de Crasso requiris . Nam de Appio  
quod scribis , sicut de Cæsare , te non reprehen-  
dere , gaudeo tibi consilium probari meum . De  
Vatino autem , primum reditus intercesserat in  
gratiam per Pompejum , statim ut ille prætor  
est factus , cum quidem ego eius petitionem  
gravissimis in senatu sententiis oppugnassem :  
neque tam illius lædendi causa , quam defen-  
dendi , atque ornandi Catonis : post autem Cæ-  
saris , ut illum defenderem , mira contentio est  
consecuta . Cur autem laudari , peto a te ,  
ut id a me neve in hoc reo , neve in aliis re-  
quiras : ne tibi ego idem reponam , cum ve-  
neris ; tamen possim vel absenti . Recordare cu-  
nim , quibus laudationem ex ultimis tertis mi-  
seris , nec hoc pertinueris , nam a me ipso lau-  
dantur . & laudabuntur iidem . Sed tamen de-  
fendendi Vatinii fuit etiam ille stimulus , de  
quo in iudicio cum illum defenderem , dixi me  
facere quiddam , quod in Eunuchoparasitus sua-  
deret militi :

*Ubi nominabit Phædriam , tum Pamphilam  
Continuo si quando illa dicit , Phædriam  
Comeffatum intromittamus : tu , Pamphilam  
Cantatum provoemus , si laudabit hæc  
Illius formam : tu huius contra : denique  
Par pro pari referto , quod eam mordeat .*

sic petivi a iudicibus , ut quoniam quidem  
nobiles homines , & de me optime meriti ,

B 5. nimis

nimis amarent inimicum meum, meque inspec-  
 tante sæpe cum in senatu modo severe sedu-  
 cerent, modo familiariter, atque hilare ample-  
 xarentur; quoniamque illi haberent suum Pu-  
 blium, darent mihi ipsi alium Publium, in quo  
 possem eorum animos mediocriter lacessitus le-  
 viter repungere. Neque solum dixi, sed etiam  
 sæpe facio, diis hominibusque approbantibus.  
 Habes de Vatinio: cognosce de Crasso. Ego cum  
 mihi cuni illo magna jam gratia esset, quod  
 ejus omnes gravissimas injurias, communis con-  
 cordiæ causa, voluntaria quadam oblivione con-  
 triveram; repentinam ejus defensionem Gabi-  
 nii, quem proximis superioribus diebus acer-  
 rime oppugnasset, tamen, si sine ulla mea con-  
 tumelia suscepisset, tulissem, sed cum me dis-  
 putantem, non lacessentem, lacessisset, exar-  
 si, non solum præsentem, credo, iracundia,  
 (nam ea tam vehemens fortasse non fuisset)  
 sed cum inclusum illud odium multarum ejus  
 in me injuriarum, quod ego effudisse me om-  
 ne arbitrabar, residuum tamen insciente me  
 fuisset, omne repente apparuit. Quo quidem  
 tempore ipso quidam homines, & iidem illi,  
 quos sæpe nutu, significationeque appello, cum  
 se maximum fructum cepisse dicerent ex liber-  
 tate mea, meque tum denique sibi esse visum  
 reipubl. qualis fuisset, restitutum; cumque ea  
 contentio mihi magnum etiam foris fructum  
 tulisset: gaudere se dicebant, mihi & illum  
 inimicum, & eos qui in eadem causa essent,  
 numquam amicos futuros. Quorum iniqui ser-  
 mones cum ad me per homines honestissimos per-  
 ferrentur: cumpe Pompejus ita contendisset, ut  
 nihil umquam magis, ut cum Crasso redirem  
 in gratiam, Caesarque per litteras maxima se mo-  
 lestia ex illa contentione affectum ostenderet:  
 habui non temporum solum rationem meorum,  
 sed etiam naturæ. Crassusque ut quasi tellata  
 populo Rom. esset nostra gratia, pene a meis  
 laribus in provinciam est profectus: nam cum  
 mihi condixisset, cœnavit apud me in mei ge-  
 neri Crassipedis hortis. Quamobrem ejus cau-  
 sam (quod te scribis audisse) magna illius  
 commendatione susceptam, defendi in sena-  
 tu,

tu, sicut mea fides postulabat. Accepisti quibus  
 Tebus adductus, quamque rem, causamque de-  
 fenderim, quique meus in republ. sit pro mea  
 parte capeſſenda ſtatus. De quo ſic velim ſta-  
 tuas, me hæc eadem ſenſurum fuiſſe, ſi mihi  
 integra omnia, ac libera fuiſſent. Nam neque  
 pugnandum arbitrarer contra tantas opes, ne-  
 que delendam, etiam ſi id fieri poſſet, ſum-  
 morum civium principatum: neque permanen-  
 dum in una ſententia, converſis rebus, ac bo-  
 norum voluntatibus immutatis, ſed temporibus  
 aſſentiendum. Nunquam enim præſtantibus in  
 republ. gubernanda viris fundata eſt in una  
 ſententia perpetua permanſio; ſed ut in navi-  
 gando tempeſtati obſequi artis eſt, etiamſi por-  
 tum tenere non queas: cum vero id poſſis, mu-  
 tata velificatione aſſequi, ſtultum eſt eum te-  
 nere cum periculo cuſſum, quem ceperis, po-  
 tius quam eo commutato, quo velis tamen per-  
 venire: ſic, cum omnibus nobis in adminiſtran-  
 da republ. propoſitum eſſe debeat ( id quod a  
 me ſæpiſſimè dictum eſt ) cum dignitate utrum,  
 non idem ſemper dicere, ſed idem ſemper ſpe-  
 ctare debemus. Quamobrem ut paullo ante po-  
 ſui, ſi eſſent omnia mihi ſolutiſſima, tamen in  
 republ. non alius eſſem, atque nunc ſum. Cum  
 vero in hunc ſenſum & alliciar beneficiis ho-  
 minum, & compellar injuriis: facile patior  
 ea me de republ. ſentire, ac dicere, quæ ma-  
 xime cum mihi, tum etiam reipubl. rationi-  
 bus putem conducere. Apertius autem hæc ago  
 ac ſapius, quod & Quintus frater meus lega-  
 tus eſt Cæſaris, & nullum meum minimum di-  
 ctum, non modo factum, pro Cæſare interceſ-  
 ſit, quod ille non ita illuſtri gratia exceperit,  
 ut ego eum mihi devinctum putarem. Itaque  
 ejus omni & gratia, quæ ſumma eſt, & opibus,  
 quas intelligis eſſe maximas, ſic fruor, ut meis.  
 Nec mihi aliter potuiſſe videor hominum per-  
 ditorum de me conſilia frangere, niſi cum præ-  
 ſidiis iis, quæ ſemper habui, nunc etiam po-  
 tentium benevolentiam conjunxiſſem. His ego  
 conſiliis ſi te præſentem habuiſſem ( ut opinio  
 mea fert ) eſſem uſus eiſdem. Novi enim tem-  
 perantiam, & moderationem naturæ tuæ: no-

vi animum cum mihi amicissimum, tum nulla in ceteros malevolentia suffusum, contraque cum magnum & excelsum, tum etiam apertum & simplicem. Vidi ego quosdam in te tales, quales tu eosdem in me videre potuisti: quæ me moverunt, movissent eadem te profecto. Sed, quocumque tempore mihi potestas presentis tui fuerit, tu eris omnium moderator consiliorum meorum: tibi erit eidem, cui salus mea fuit, etiam dignitas curæ. Me quidem certe tuarum actionum, sententiarum, voluntatum, rerum denique omnium socium, comitemque habebis: neque mihi in omni vita res tam erit ulla proposita, quam ut quotidie vehementius te de me optime meritum esse latere. Quod rogas, ut mea tibi scripta mittam, quæ post discessum tuum scripserim; sunt orationes quædam, quas Menocrito dabo, neque ita multæ, ut pertimescas. Scripsi etiam (nam etiam ab orationibus disiungo me fere, referoque ad mansuetiores Musas, quæ me maxime, sicut jam a prima adolescentia delectant (scripsi igitur Aristotelico more, quemadmodum quidem volui, tres libros in disputatione ac dialogo, de oratore: quos arbitror Lentulo tuo fore non inutiles; abhorrent enim a communibus præceptis, & omnem antiquorum & Aristotelicam, & Isocraticam rationem oratoriam complectuntur. Scripsi etiam versibus tres libros de temporibus meis: quos jam pridem ad me misissem, si esse edendos putassem; sunt enim testes, & erunt sempiterni meritorum tuorum erga me, meæque in te pietatis; sed quia verebar, non eos qui se læsos arbitrarentur, (etenim id feci parce & molliter) sed eos, quos erat infinitum bene de me meritis omnes nominare: Quos tamen ipsos libros, si quem, cui recte committam, invenero: curabo ad te perferendos. Atque istam quidem partem vitæ; consuetudinisque nostræ totam ad te deferro, quantum litteris, quantum studiis, veteribus nostris delectationibus, consequi poterimus, id omne ad arbitrium tuum, qui hæc semper amasti, libentissime conferemus. Quæ aut me de tuis rebus domesticis scribis, quæque

mi-

mihi commendas, ea tantæ mihi curæ sunt, ut me nolim admoneri, rogari vero sine magno dolore vix possim. Quod de Quinti fratris negotio scribis, te priore ætate, quod morbo impeditus in Ciliciam non transferis, conficere non potuisse, nunc autem omnia facturum, ut conficiam, id scito esse ejusmodi, ut frater meus vere existimet, adjuncto isto fundo, patrimonium fore suum per te constitutum. Tu me de tuis rebus omnibus; & de Lentuli tui, nostrisque studiis, & exercitationibus, velin quam familiarissime certiores, & quam sapissime facias, existimesque neminem cuiquam neque cariores, neque jucundiores umquam fuisse, quam te mihi; idque me, non modo ut tu sentias, sed ut omnes gentes, etiam ut posteritas omnis intelligat, esse facturum. Appius in sermonibus antea dictitabat, postea dixit etiam in senatu palam, sese, si licitum esset, legem curiatam ferre, sortiturum esse cum collega provinciam: si curiata lex non esset, se paraturum cum collega, tibi que successurum: legem curiatam consuli ferri opus esse, necesse non esse: se, quoniam ex S. C. provinciam haberet, lege Cornelia imperium habiturum, quoad in urbem introisset. Ego quid ad te tuorum quisque necessariorum scribat, nescio: varias esse opiniones intelligo. sunt, qui patent, posse te non decedere, quod sine lege curiata tibi succedatur; sunt etiam qui, si decedas, a te relinqui posse qui provinciam præsit. mihi non tam de jure certum est (quamquam ne id quidem valde dubium est) quam illud, ad tuam summam amplitudinem, dignitatem, liberalitatem, qua te scio libentissime solere frui, pertinere, te sine ulla mora provinciam successoris concedere; præsertim cum sine suspitione tuæ cupiditatis non possis illius cupiditatem refutare. ego utrumque puto meum esse, & quod sentiam, ostendere, & quod feceris, defendere.

Scripta jam Epistola superiore, accepi tuas litteras de publicanis, quibus æquitatem tuam non potui non probare: felicitatem autem, quod vellem, consequi petuisses, ne ejus ordinis,

nīs, quem semper ornasti, rem aut voluntatē offendere. Equidem non desinam tua decreta defendere. Sed nosti consuetudinem hominum; scis quam graviter inimici illi ipsi Q. Scævola fuerint. Tibi tamen sum auctor, ut, quibus rebus possis, cum tibi ordinem aut reconcilies, aut mitiges; id etsi difficile est, tamen mihi videtur esse prudentiæ tuæ. Vale.

### ARGUMENTUM.

*Jocosa est Epistola, & salibus referta; extra jocum aut se exisse gratias Lentulo, Cili-  
ciam administranti: hortatur, etiam, ut Ro-  
mam redeat.*

X. M. T. C. L. VALERIO JURIS-  
CONSULTO. S. D.

Ur enim tibi hoc non gratificer, nescio, præsertim cum his temporibus, audacia pro sapientia libeat uti. Lentulo nostro ego per litteras tuo nomine gratias diligenter; sed tu velim desinas jam nostris litteris uti, & nos aliquando revisas, & ibi malis esse, ubi alio quo numero sis, quam istic, ubi solus sapere videre. Quamquam qui istinc nunc veniunt, partim de superbum esse dicunt, quod nihil respondeas, partim contumeliosum, quod male respondeas. Sed jam cupio tecum coram jocari. Quare fac, ut quamprimum venias: neque in Apuliam tuam accedas, ut possimus saluum te venisse gaudere: nam illo si veneris, tamquam Ulysses, cognosces tuorum neminem. Vale.

## LIBER II.

## ARGUMENTUM.

*Quatuor partes habet hæc Epistola. Primum, accusatus a Curione, quod minus sæpe scriberes, excusationem offert, cum officii sui commemoratione. Deinde dolorem suum ex illius absentia, & ex ejusdem dignitate lætitiâ narrat. Tertio loco ad laudem, & virtutem hortatur. Postremo commendat illi suam sententiam. Misit autem Cicero in Asiam hæc omnes Epistolas ad Curionem Quasstorem, præter ultimam, quæ incipit, Sera gratulatio, quam scripsit in Provincia Romana ad Curionem Tribunum plebis.*

I. M. T. C. CURIONI. S. D.

**Q**Uamquam me nomine negligentia suspectum tibi esse doleo, tamen non tam mihi molestum fuit accusari ab te officium meum, quam jucundum requiri: præsertim cum, in quo accusabar, culpa vacarem: in quo autem desiderare te significas meas litteras, præ te ferres, perspectum mihi quidem, sed tamen dulcem & optatum amorem tuum. Evidem neminem prætermisi, quem quidem ad te perventurum putarem, cui litteras non dederim. Etenim quis est tam in scribendo impiger, quam ego? a te vero, bis, terve ad summum, & eas per breves accepi. Quare si iniquus es in me iudex, condemnabo eodem ego te crimine: sin me id facere noles, te mihi æquum præbere debebis. Sed de litteris hætenus: non enim vereor, ne non scribendo te expleam; præsertim si in eo genere ludium meum non aspernabere. Ego, te abfuisse tandiu a nobis, & doleo, quod carui fructu jucundissimæ consuetudinis tuæ: & lætor, quod absens omnia cum maxima dignitate es consecutus; quodque in omnibus tuis rebus, meis optatis fortuna respondeat. Breve est, quod me tibi præcipere meus incredibilis in te amor cogit. *Tanta est expectatio vel animi,*

mi, vel ingenii tui, ut ego te obsecrare, obtestarique non dubitem, sic ad nos confirmatus revertare, ut, quam expectationem tui concitasti, hanc sustinere, ac tueri possis. Et, quoniam meam tuorum erga me meritorum memoriam nulla unquam delebit oblivio, te rogo ut memineris, quantacumque tibi accessiones fient & fortunæ, & dignitatis, eas te non potuisse consequi, nisi meis puer olim fidelissimis, atque amantissimis consiliis paruisses. Quare hoc animo in nosse debebis, ut ætas nostra jam ingravescens in amore, atque in adolescentia conquiescat sua. Vale.

## A R G U M E N T U M.

*Consoletur Curionem in obitu patris, sequæ illi parentis futurum loco pollicetur.*

## II. M. T. C. CURIONI S. D.

**G**ravi teste privatus sum amoris summi erga te mei, patre tuo clarissimo viro: qui, cum suis laudibus, tum vero te filio superasset omnium fortunam, si ei contigisset, ut te ante videret, quam e vita discederet. Sed spero nostram amicitiam non egere testibus: Tibi patrimonium dii fortunent; me certe habebis, cui carus æque sis, & perjucundus, ac fuisti patri. Vale.

## A R G U M E N T U M.

*Dissuadet a muneribus dandis in funere patris; dari autem populo solebat gladiatorum munus.*

## III. M. T. C. CURIONI S. D.

**R**uptæ studium non defuit declarandum munerum tuo nomine; sed nec mihi placuit, nec cuiquam tuorum, quidquam te absente fieri, quod tibi, cum venisses, non esset integrum. Meam quidem sententiam aut scribam ad te postea pluribus: aut, ne ad eam meditere, imparatum te offendam, coramque contra istam



rationem, meam dicam: ut aut te in meam sententiam adducam, aut certe testatum apud animum tuum relinquam, quid senserim: ut, si quando (quod nolim) displicere tibi tuum consilium cœperit, possis meum recordari. Brevi tamen sic habeto, in eum statum temporum tuum reditum incidere, ut iis bonis, quæ tibi natura, studio, fortuna data sunt, facilius omnia, quæ sunt in republ. amplissima, consequi possis, quam muneribus; quorum neque facultatem quisquam admiratur, (est enim copiarum, non virtutis) neque quisquam est, quin satietate jam defessus sit. Sed aliter atque ostenderam, facio, qui ingrediar ad explicandam rationem sententiæ meæ. Quare omnem hanc disputationem in adventum tuum differo. Summa scito in expectatione te esse, eaque a te expectari, quæ a summa virtute, summoque ingenio expectanda sunt. Ad quæ si es, ut debes, paratus (quod ita esse confido) plurimis, maximisque muneribus & nos amicos, & cives tuos universos & republ. afficies. Illud profecto cognosces, mihi te neque cariorum, neque jucundiorum esse quemquam. Vale.

## A R G U M E N T U M.

*Mortatur Curionem ad studium summae laudis, quod, exoriente jam bello civili, timeat, ne se ad improbos cives deserta Republ. conferat, quod evenit: grandi etiam ære alieno a Casare liberatus, a Senatu ad populum transit.*

## I V. M. T. C. C U R I O N I. S. D.

**E** Pistolarum genera multa esse non ignoras: sed unum illud certissimum, cujus causa inventa res ipsa est, ut certiores faceremus absentes, si quid esset, quod eos scire aut nostra, aut ipsorum interesset. Hujus generis litteras a me profecto non expectas: tuarum enim rerum domesticarum habes & scriptores, & nuntios: in meis autem rebus nihil est sane novi. Reliqua sunt Epistolarum genera duo, quæ

quæ me magnopere delectant : unum familiare & jocosum : alterum severum & grave . Utrum me minus deceat uti , non intelligo . Jocerne tecum per litteras ? civem mehercule non puto esse , qui temporibus his ridere possit . An gravius aliquid scribam ? quid est quod possit gravius a Cicerone scribi ad Curionem , nisi de republica ? atque in hoc genere hæc mea causa est , ut neque ea , quæ nunc sentio , velim scribere . Quamobrem , quoniam mihi nullum scribendi argumentum relictum est , utar ea clausula , qua soleo , teque ad studium summæ laudis cohortabor . Est enim tibi gravis adversaria constituta , & parata , incredibilis quædam expectatio : quam tu una te facillime vinces , si hoc statueris , quarum laudum gloriam adamaris , quibus artibus ex laudes comparantur , in iis esse elaborandum . In hanc sententiam scriberem plura , nisi te tua sponte satis incitatum esse considerem ; & hoc quidquid attigi , non feci inflammandi tui causâ , sed testificandi amoris mei . Vale .

#### ARGUMENTUM.

*Gratulatur Curioni , quod & Roma non sit , ubi multa contra Remp. committantur ; & ibi sit , ubi ex recte factis magnam laudem consequatur : postremo eum ad suscipiendam Remp. hortatur .*

V. M. T. C. CURIONI S. D.

**H**Æc negotia quomodo se habeant , ne epistola quidem narrare audeo tibi : etsi , ubicumque es ( ut scripsi ad te antea ) in eadem es navi : tamen , quod abes gratulor , vel quia non vides ea , quæ nos , vel quod excelso , & illustri loco sita sit laus tua in plurimorum & sociorum , & civium conspectu : quæ ad nos nec obscuro , nec vario sermone , sed & clarissima , & una omnium voce perfertur . Unum illud nescio , gratulerne tibi , an timeam , quod , mirabilis est expectatio redditus tui : non quod verear , ne tua virtus opinioni hominum non respondeat : sed mehercule , ne , cum veneris , non habeas jam ,  
quod

quod cures, ita sunt omnia debilitata, jam prope, & extincta. Sed hæc ipsa, nescio, rectene sint litteris commissa; quare cetera cognosces ex aliis. Tutamen, siue habes aliquam spem de republ. siue desperas; ea para, meditare, cogita, quæ esse in eo cive, ac viro debent, qui sit rempublicam afflictam & oppressam miseristemporibus, ac perditis moribus in veterem libertatem, ac dignitatem vindicaturus. Vale.

## A R G U M E N T U M.

*Commendat summo studio T. Annium Milonem ad petitionem consulatus: Et ut impetret quod vult, nihil omittit, quod in genere commendatio requiri possit.*

VI. M. T. C. CURIONI. S. D.

**N**ondumerat auditum te ad Italiam adventare, cum Sex. Julium Milonis mei fratrem, cum his ad te litteris misi; sed tamen, cum appropinquare tuus adventus putaretur, & te jam ex Asia Romam versus profectum esse constaret, magnitudo rei fecit, ut non vereremur, ne nimis cito mittereinus, cum has ad te quamprimum perferri litteras magnopere vellemus. Ego, si mea in te essent officia solum; Curio, tanta quanta magis a te ipso prædicari, quam a me ponderari solent, verecundius a te, si qua magna res mihi petenda esset, contenderem. GRAVE est enim homini prudenti petere aliquid magnum ab eo, de quo se bene meritum putet; ne id quod petat exigere magis quam rogare, & in mercedis potius quam beneficii loco numerare videatur. Sed quia tua in me, vel nota omnibus, vel ipsa novitate meorum temporum clarissima, & maxima extiterunt: ESTQUE animi ingenui, cui multum debeas, eidem plurimum velle debere: non dubitavi id a te per litteras petere, quod mihi omnium esset maximum, maximeque necessarium. Neque enim sum veritus, ne sustinere tua in me vel innumerabilia beneficia non possem, cum præsertim considerem nullam esse gratiam tantam, quam non vel capere animus meus in accipiendo, vel in remu-

nerando, cumulandoque illustrare possit. Ego omnia mea studia, omnem operam, curam, industriam, cogitationem, mentem denique omnem in Milonis consulatu fixi, & locavi, statuique in eo me non officii solum fructum, sed etiam pietatis laudem debere querere. Neque vero cuiquam salutem ac fortunas suas tantæ curæ fuisse unquam puto, quantæ mihi sit honos ejus, in quo omnia mea posita esse decrevi. Huic te unum tantum adjumento esse, si valueris, posse intelligo, ut nihil sit præterea nobis requirendum. Habemus hæc omnia, bonorum studium conciliatum ex tribunatu propter nostram (ut spero te intelligere) causam: vulgi, ac multitudinis propter magnificentiam munerum, liberalitatemque naturæ, juventutis, & gratiosorum in suffragiis, propter ipsius excellentem in eo genere, vel gratiam, vel diligentiam, nostram suffragationem si minus potentem, ac probatam tamen, & justam, & debitam, & propterea fortasse etiam gratiosam. Dux nobis, & auctor opus est, & eorum ventorum, quos proposui, moderator quidam, & quasi gubernator; qui si ex omnibus unus optandus esset, quem tecum conferre possemus, non haberemus. Quamobrem si memorem, si gratum, si bonum virum vel ex hoc ipso quod tam vehementer de Milone laborem, existimare potes, si dignum denique tuis beneficiis judicas, hoc a te peto, ut subvenias huic meæ sollicitudini, ut huic meæ laudi, vel (ut verius dicam) prope salutem tuum studium dices. De ipso T. Annio tantum tibi polliceor, te majoris animi, gravitatis, constantiæ, benevolentiae erga te, si complaciti hominem volueris, habiturum esse neminem. Mihi vero tantum decoris, tantum dignitatis adjunxeris: ut eundem te facile agnoscam fuisse in laude mea, qui fueris in salute. Ego, ni te videre scirem, cum hæc ad te scriberem, quantum officii sustinerem, quantopere mihi esset in hac petitione Milonis cuncti non modo contentione, sed etiam dimicatione elaborandum, plura scriberem. Nunc tibi omnem rem, atque causam, meque tibi totum commendo, atque trado. Unum hoc sic habeto, si a te hanc rem impetravero, me pene plus tibi, quam ipsi

Mi

Miloni, debiturum. Non enim mihi tam mea  
suis cara fuit, in qua præcipue sum ab illo  
adjutus, quam pietas erit in referenda gratia ju-  
cunda: eam autem unius tui studio me assequi  
posse confido. Vale.

## A R G U M E N T U M.

*Hanc Epistolam scripsit in Cilicia Proconsul. Gra-  
tulatur Curioni de Tribunatu pl. Hortatur ad  
boni civis officium. De sacerdotio Curionis qua-  
dam interserit. Postremo rogat, ne quid sibi  
temporis prorogari ad Provincia administra-  
tionem patiatur.*

VII. M. T. G. PROCOS. CURIONI  
TRIB. PLEB. S. D

11 **S**era gratulatio reprehendi non solet, præ-  
sertim si nulla negligentia prætermissa est:  
longe enim absum: audio sero. Sed & tibi gra-  
rur, & ut sempiternæ laudi tibi sit iste tri-  
bunatus, exopto, teque hortor, ut omnia guber-  
nes, & moderere prudentia tua; ne te auferant  
aliorum consilia. Nemo est qui sapientius tibi  
suadere possit te ipso, nunquam labere, si te  
audies. Non scribo hoc temere, cui scribam,  
video, novi animum, novi consilium tuum,  
non vereor ne quid timide, & stulte facias,  
si ea defendas, quæ ipse recta esse senties.  
Quod in id reipublicæ tempus non incideris,  
sed veneris, (iudicio enim tuo, non casu, in  
ipsum discrimen rerum contulisti tribunatum  
tuum) profecto vides quanta vis in repub. tem-  
porum sit, quanta varietas rerum, quam incerti  
exitus, quam flexibiles hominum voluntates,  
quid insidiarum, quid vanitatis in vita non  
dubito quin cogites. Sed, amabo te, cura, &  
cogita nihil novi, sed illud idem quod initio  
scripsi, tecum loquere, te adhibe in consi-  
lium, te audi, tibi obtempera. Alter, qui  
melius dare consilium possit, quam tu, non facile  
inveniri potest; tibi vero ipse certe nemo me-  
lius dabit. Dii immortales, cur ego non adsum,  
vel spectator laudum tuarum, vel particeps, vel  
se-

socius, vel minister consiliorum? tametsi hoc minime tibi deest, sed tamen efficeret magnitudo, & vis amoris mei, consilio te ut possem juvare. Scribam ad te plura alias, paucis enim diebus eram missurus domesticos tabellarios: ut quoniam sane feliciter, & ex mea sententia rempub. gessimus, unis litteris totius ætatis res gestas ad Senatum perferiberem. De sacerdotio tuo quantam curam adhibuerim, quamque difficili in re atque causa, cognosces ex iis litteris, quas Thrasoni liberto tuo dedi. Te, mi Curio, pro tua incredibile in me benevolentia, meaque item in te singulari, rogo atque oro, ne patiare mihi quidquam ad hanc provincialem molestiam temporis prorogari: præsens tecum egi, cum te tribunum plebis isto anno fore non putarem: itemque petivi sæpius per litteras, sed tum quasi a Senatore nobilissimo, & adolescente gratiosissimo, nunc a tribuno pl. & a Curione tribuno, non ut decernatur aliquid novi (quod solet esse difficilius) sed ut ne quid novi decernatur, & ut S. C. & leges defendas; eaque mihi conditio maneat, qua profectus sum: hoc te vehementer, etiam atque etiam rogo. Vale.

ARGUMENTUM.

*Leviter Calium obiurgat, qui commentarium mississet refertum levissimis rebus. Tum hortatur ad amicitiam Pompeji, emergente belli civilis initio. Addit de suo in provinciam itinere: in extremo, ne sibi Provincia tempus prorogetur.*

VIII. M. T. C. PROCOS. M. COELIO FUSO S. D.

**Q**uid? tu me hoc tibi mandasse existimas, ut mihi gladiatorum compositiones, ut vadimonja dilata, & Ciceroni compilationem mitteres, & ea quæ nobis, cum in Romæ sumus, narrare nemo audeat? Vide, quantum tibi meo iudicio tribuam. (nec mehercule injuria; *παλιγκωτέρον* enim te adhuc neminem cognovi) ne illa quidem curo mihi scribas, quæ maximis in rebus reipub. geruntur quotidie, nisi quid ad me ipsum pertinebit: scribent alii, mul-

mihi nunciabunt: perferet multa etiam ipse rumor. Quare ego nec praterita, nec presentia abs te, sed, ut ab homine longe in posterum prospiciente, futura expecto: ut ex tuis litteris cum formam reipubl. viderim, quale ædificium futurum sit scire possim; neque tamen adhuc habeo, quod te accusem; neque enim fuit, quod tu plus providere possis, quam quivis nostrum, in primisque ego, qui cum Pompejo complures dies nullis in aliis nisi de republ. sermonibus versatus sum, quæ nec possunt scribi, nec scribenda sunt. Tantum habeto, eivem egregium esse Pompejum, & ad omnia, quæ providenda sunt in republ. & animo, & consilio paratum. Quare da te homini: complectetur, mihi crede: jam iidem illi & boni, & mali cives videntur, qui nobis videri solent. Ego, cum Athenis decem ipsos dies fuisset, multumque mecum Gallus noster Caninius, proficiscebar inde pridie nonas Quint. cum hoc ad te litterarum dedi. Tibi cum omnia mea commendatissima esse cupio, tum nihil magis, quam ne tempus nobis provinciæ prorogetur, in eo mihi sunt omnia. Quid, quando, & quomodo, & per quos agendum sit, tu optime constitues. Vale.

## A R G U M E N T U M.

*Gratulatur Calio, quod superatis competitoribus, Ædilis Cursilis designatus sit.*

IX. M. T. C. PROCOS. M. COELIO RUFO. ÆDILI CUR. DES. S. D.

**P**rimum tibi ut debeo gratulor, & laetorquetum, presenti, tum etiam sperata tua dignitate, ferius, non negligentia mea, sed ignorantia rerum omnium. In his enim sum locis, quo & propter longinquitatem & propter latrocinia tardissime omnia perferuntur; & cum gratulor, tum vero quibus verbis tibi gratias agam, non reperio, quod ita factus sis, ut dederis nobis, quemadmodum scripseras ad me, quem semper ridere possemus. Itaque cum primum audiui, ego ille ipse factus sum, (scis quem dicam) egique omnes illos adolescentes, quos ille jactabat: diffi-

antia  
sa

adduxi, satis probe ornatum auxiliis, & quadam auctoritate apud eos, qui me non notant, nominis nostri multum est enim in his locis: Hicne est ille, qui urbem? quem senatus? nosti cetera. Cum venissem ad Amanum, qui mons mihi cum Bibulo communis est, divisus aquarum divortii, Cassius noster, quod mihi magnæ voluptati fuit, feliciter ab Antiochia hostem rejecerat. Bibulus provinciam acceperat, interea cum meis copiis omnibus vexavi Amanenses, hostes sempiternos: multi occisi, capti, reliqui dissipati, castella munita, improviso adventu capta, & incensa. Ita victoria iusta imperator appellatus apud Isum (quo in loco sæpe, ut ex te audiui, Clitarchus tibi narravit Dariûm ab Alexandro esse superatûm) adduxi exercitum ad infestissimam Ciliciæ partem. Ibi quintum, & vigesimum jam diem aggeribus, vineis, curribus oppugnabam oppidum munitissimum Pindenissum tantis opibus, tantoque negotio, ut mihi ad summam gloriam nihil desit, nisi nomen oppidi, quod si, ut spero, cepero, tum vero litteras publice mittam. Hæc ad te in præsentî scripsi, ut speres te assequi id, quod optasti. Sed, ut redeam ad Parthos, hæc ætas habuit hunc exitum satis felicem: ea, quæ sequitur, magno est in timore. Quare, mi Rufe, vigila, primum, ut mihi succedatur: sin id erit ut scribis, & ut ego arbitror, spissus, illud quod facile est ne quid mihi temporis prorogetur. De Repub. ex tuis litteris, ut antea tibi scripsi, cum præsentia, tum etiam futura magis expecto. Quare, ut ad me omnia, quam diligentissime perscribas, te vehementer rogo. Vale.

## A R G U M E N T U M.

*Suum declarat Urbis desiderium, & pantheras ait non posse capi, quas Calius Pætilius petierat, ut in suis ludis populo ostendat.*

XI. M. T. C. IMP. COELIO ÆDILI  
C U R. S. D.

**P**utaresne unquam accidere posse, ut mihi verba decissent? neque solum ista vestra



oratoria; sed hæc etiam levia nostratia? desunt autem propter hanc causam, quod mirifice sum sollicitus quidnam de provinciis decernatur. Mirum me desiderium tenet urbis, incredibile meorum atque in primis tui; satietas autem provinciarum; vel quia videmur eam famam consequuti, ut non tam accessio quærenda, quam fortuna metuenda sit, vel quia totum negotium non est dignum viribus nostris, qui majora in republica onera sustinere & possimus, & soleamus, vel quia belli magni timor impendet, quod videmur effugere, si ad constitutam diem decedemus. De pantheris per eos, qui venari solent, agitur mandato meo diligenter, sed miræ paucitas est, & eas, quæ sunt, valde ajunt quæri, quod nihil cuiquam insidiarum in mea provincia, nisi sibi, fiat. Itaque constituisse dicuntur in Cariam ex nostra provincia decedere, sed tamen sedulo sit, & in primis a Patifcho. Quidquid erit, tibi erit, sed quid plane esset, nesciebamus: mihi mehercule magnæ curæ est ædilitas tua; ipse dies me admonebat; scripsi enim hæc ipsis Megalensibus. Tu velim ad me de omni reipublicæ statu, quam diligentissime perscribas, ea enim certissima putabo, quæ ex te cognovero. Vale.

#### ARGUMENTUM.

*Litteras a Calio, requirit de rebus urbanis, & hortatur eum, ut urbanos, potius magistratus sequatur, quam provinciales.*

XII. M. T. C. IMP. COELIO ÆDILI  
CUR. S. D.

**S**ollicitus equidem eram de rebus urbanis: ita tumultuose conciones, ita molestæ quinquatrus afferebantur; nam citiora nondum audiebamus: sed tamen nihil me magis sollicitabat, quam in his molestiis non me, si qua ridenda essent, ridere tecum; sunt enim multa, sed ea non audeo scribere. Illud moleste fero, nihil me adhuc his de rebus habere tuarum litterarum. Quare, etsi, cum tu hæc leges, ego jam annum munus confecero, tamen obvia mihi velim sint litteræ tuæ, quæ me erudiant de

de omni repub. ne hospes plane veniam : hoc melius, quam tu facere nemo potest. Diogenes tuus, homo modestus, a me cum Philone Pessinunte discessit: iter habebant ad Dejotarum regem, quamquam omnia nec benigna, nec copiosa cognorant. Urbem mi Rufe cole, & in ista luce vive: omnis enim peregrinatio (quod ego ab adolescentia iudicavi) obscura, & sordida est iis, quorum industria Romæ potest illustris esse. Quod cum probe scirem, utinam in sententia permansissem, cum una mehercule ambulatiuncula, atque uno sermone nostro omnes fructus provinciæ non confero. Spero me integritatis laudem consequutum: non erat minor ex contemnenda, quam ex conservata provincia spes triumphi, in qua satis gloriose triumpharem, si non essem tamdiu quidem in desiderio rerum mihi charissimarum. Sed, ut spero, propediem te videbo: tu mihi obviam mitte epistolas te dignas. Vale.

## A R G U M E N T U M.

*Respondet Epistola Cælii, quæ sexta est, lib. 8.  
Eam lege, si huius argumentum, atque etiam interpretationem quæris.*

XIII. M. T. C. IMP. COELIO ÆDILI  
C U R. S. D.

**R** Aras tuas quidem, ( fortasse enim non perferuntur ) sed suaves accipio litteras. Vel quas proxime acceperam, quam prudentes, quam multi & officii, & consilii! Etsi omnia sic constitueram mihi agenda, ut tu admonebas, tamen confirmantur nostra consilia, cum sentimus, prudentibus, fideliterque suadentibus idem videri. Ego Appium ( ut sæpe te cum loquutus sum ) valde diligo: meque ab eo diligi statim ceptum esse, ut simultatem deposuimus, sensi. Nam, & honorificus in me consul fuit, & suavis amicus, & studiosus studiorum etiam meorum. Mea vero officia ei non defuisse, tu es testis, quoniam *καρπὸν ἔσθ' ἔμμοι*, ut opinor, accidit Phania, & mehercule etiam plaris cum feci, quod te amari ab eo sensi, jam me Pompeji totum esse scis; Brutum

a me amari intelligis. Quid est causæ, cur mihi non sit in optatis, complecti hominem florentem ætate, opibus, honoribus, ingenio, liberis, propinquis, affinibus, amicis, collegam meum præsertim, & in ipsa collegii laude, & scientia studiosum mei? Hæc eo pluribus scripsi, quod mihi significabant tuæ litteræ subdubitare te, qua essem erga illum voluntate: credo te audisse aliquid, falsum est (mihi crede) si quid audisti; Genus institutorum, & rationum mearum dissimilitudinem nonnullam habet cum illius administratione provinciarum. Ex eo quidam suspicari fortasse sunt, animorum contentione, non opinionum dissensione, me ab eo discrepare: nihil autem feci unquam, neque dixi, quod contra illius existimationem esse vellem. Post hoc negotium autem, & temeritatem nostri Dolabellæ, deprecatorem me pro illius periculo præbeo, erat in eadem Eoisola veteranus civitatis. Gaudebam sane, & congelasse nostrum amicum lætabar otio. Extrema pagella pupugit me tuo chirographo: quid ais? Cæsarem nunc defendit Curio? quis hoc putaret præter me? nam, ita vivam, putavi. Di immortales, quam ego risum nostrum desidero! Mihi erat in animo, quoniam jurisdictionem confeceram, civitates locupletaram publicanis etiam superioris lustri reliqua sine sociorum ulla querela conservaram; privatis summis, infimis fueram jucundus, proficisci in Ciliciam nonis Maii: &, cum primum æstiva attigissem: militaremque rem collocassem, decedere ex S. C. Cupio ædilem videre, miroque desiderio me urbs afficit, & omnes mei, tuque in primis. Vale.

## A R G U M E N T U M.

*Commendat Fabium a quinque rebus, bonitate, doctrina, ingento, modestia, amicitia sua.*

XIV. M. T. C. IMP. COELIO ÆDILI  
CUR. S. D.

**M**arco Fabio, viro optimo, & homine doctissimo, familiarissime utor, mirificeque cum diligo, cum propter summum ejus ingenium summamque doctrinam, tum propter singularem modestiam; ejus negotium sic velim suscipias, ut si esset res mea. Novi ego vos magnos patronos, hominem occidat oportet, qui vestra opera uti velit; sed in hoc homine nullam accipio excusationem, omnia relinques, si me amabis, cum tua opera Fabius uti volet. Ego res Romanas vehementer exspecto, & desidero, in primisque quid agas, scire cupio: nam jamdiu propter hyemis magnitudinem nihil novi ad nos afferebatur. Vale.

## A R G U M E N T U M.

*Scribit de supplicationibus suis; de nuptiis filiae, & P. Cornelii Dolabella, de civilibus discordiis, de rationibus, quibus adductus C. Coelium, Quasiorem suum, Provinciae praeponeret. Respondet Calpi tribus Epistolis, quae sunt in Libro octavo.*

XV. M. T. C. IMP. COELIO ÆDILI  
CUR. S. D.

**N**on potuit accuratius agi, neque prudentius quam actum est a te cum Curione de supplicatione; & mehercule confecta res est ex mea sententia (cum celeritate, tum quod is, qui erat iratus competitor tuus, & idem meus assensus est ei, qui ornavit res nostras divinis laudibus. Quare scito, me sperare ea, quae sequuntur, ad quae tu te para. Dolabellam a te gaudeo primum laudari) deinde etiam amari; nam ea, quae speras Tulliae meae prudentia temperari posse, scio cui Epistolae tuae respondeant; quid si meam leges, quam ego tum ex tuis litteris misi

ad Appium ? sed quid agas ? sic vivitur : quod actum est , Dii approbent : spero fore jucundum generum nobis . Multum in eo tua nostra humanitas adjuvabit . Respublica me valde sollicitat ; faveo Curioni , Cæsarem honestum esse cupio , pro Pompejo emori possum , sed tamen ipsa república nihil mihi est carius , in qua tu non valde te iactas ; districtus enim mihi videris esse , quod & bonus civis , & bonus amicus es . Ego , de provincia decedens , quaestorem Coelium prapofui provinciae : puerum , inquis ? at quaestorem , at nobilem adolescentem , at omnium fere exemplo , neque erat superiore honore unus , quem praeficerem . Pontinus multo ante discesserat , a Q. fratre impetrari non poterat , quem tamen si reliquisset , dicerent iniqui , non me plane post annum , ut Senatus voluit ex provincia decessisse , quoniam alterum me reliquisset . Fortasse & illud adderent , Senatum eos voluisse provinciis praesse , qui antea non praefuissent , fratrem meum triennium Asiae praefuisse . Denique nunc sollicitus non sum : si fratrem reliquisset , omnia timerem : postremo , non tam mea sponte , quam potentissimorum duorum exemplo , qui omnes Cassios , Antoniosque complexi sunt , hominem adolescentem non tam allicere volui , quam alienare nolui ; hoc tu meum consilium laudes necesse est ; mutari enim non potest . De Ocella parum plane ad me scripseras , & in actis non erat . Tuae res gestae ita notae sunt , ut trans montem Taurum etiam de Matrimonio sit auditum . Ego , nisi quid me Etesiae morabuntur , celeriter , ut spero , vos videbo . Vale .

## A R G U M E N T U M .

*Huius Epistola apertum erit argumentum , si legas Epistolam Coelii , quae ante ultimam est lib. 8. cui hac respondet .*

XVI. M. T. C. COELIO AEDILICUR. S. D.

**M**agno dolore me affecissent tuae litterae , nisi jam , & ratio ipsa depulisset omnes molestias , & diuturna desperatione rerum obduruis-

duruisset animus ad dolorem novum : sed ta-  
 men quare acciderit , ut ex meis superioribus  
 litteris id suspicâre quod scribis , nescio .  
 Quid enim fuit in illis , præter querelam tem-  
 porum , quæ non animum meum magis solici-  
 tum haberent , quam tuum ? nam non eam co-  
 gnovi aciem ingenii tui , quod ipse videam ,  
 te id ut non putem videre . Illud miror , ab-  
 duci potuisse te , qui me penitus nosse debe-  
 res ; ut me existimares , aut tam improvidum ;  
 qui ab excitata fortuna ad inclinatam , & pro-  
 pe jacentem desciscerem , aut tam inconstan-  
 tem , ut collectam gratiam florentissimi homi-  
 nis effunderem ; a meque ipso deficerem , &  
 quod initio , semperque fugi , civili bello in-  
 teresset . Quod est igitur meum triste consi-  
 lium ? ut descenderem fortasse in aliquas soli-  
 tudines . Nosti enim non modo stomachi mei ,  
 cujus tu similem quondam habebas , sed etiam  
 oculorum in hominum insolentium indignitate  
 fastidium . Accedit etiam molesta hæc pompa  
 lictorum meorum , nomenque Imperii , quo ap-  
 pellor : eo si onere carerem , quamvis parvis  
 Italiæ latebris contentus essem , sed intus hæc  
 nostra laurus non solum in oculos , sed jam  
 etiam in voculas malevolorum : Quod cum ita  
 esset , nihil tamen unquam de professione , nisi  
 vobis approbantibus , cogitavi . Sed hæc præ-  
 diola tibi nota sunt : in his mihi necesse est  
 esse , ne amicis molestus sim . Quod autem in  
 maritimis facillime sum , moveo nonnullis sus-  
 picionem , velle me navigare ; quod tamen for-  
 tasse non nollent , si possem ad otium : nam ad  
 bellum quidem , qui convenit ; præsertim con-  
 tra eum , cui spero me satis fecisse , ab eo , cui  
 tamen satisfieri nullo modo potest . Deinde  
 sententiam meam tu facillime prospicere po-  
 tuisti jam ab illo tempore , cum in Cumanum  
 mihi obviam venisti , non enim te celavi ; sed  
 nonne tum prævidisti , quam abhorream ab ur-  
 be relinquenda ? quod cum audissem , nonne  
 tibi affirmavi , quidvis me potius perpessurum ,  
 quam ex Italia ad bellum civile exiturum ?  
 quid ergo accidit cur consilium mutarem ? non-  
 ne omnia potius , ut in sententia permanerem ?

Credas hoc mihi velim ( quod putote existima-  
re ) ex his miseriis nihil aliud me querere ,  
nisi ut homines aliquando intelligant , me ni-  
hil maluisse quam pacem ; ea desperata , nihil  
tam fugisse quam arma civilia ; hujus me con-  
stantiæ puto fore , ut nunquam pœniteat . Et  
enim memini in hoc genere gloriari solitum  
esse familiarem nostrum Q. Hortensium , quod  
nunquam bello civili interfuisset : hoc nostra  
laus erit illustrior , quod illi tribuebatur igna-  
viæ , de nobis id existimari posse non arbitror .  
Nec me ista terrent , quæ mihi a te ad timorem  
fidissime , atque amantissime proponuntur . Nul-  
la est enim acerbitas , quæ non omnibus , hac  
orbis terrarum perturbatione impendere videat-  
ur : quam quidem ego a republica meis priva-  
tis , & domesticis incommodis libentissime , vel  
ipsis istis , quæ tu me mones , ut caveam , re-  
demissem . Filio meo , quem tibi carum esse  
gaudeo , si erit ulla respublica , satis amplum  
patrimonium relinquam memoriam nominis  
mei : sin autem nulla erit , nihil accidet ei se-  
paratim a reliquis civibus . Nam quod rogas ,  
ut respiciam generum meum , adolescentem op-  
timum , mihi que carissimum an dubitas , cum  
scias quanti cum illum , tum vero Tulliam me-  
am faciam , quin ea me cura vehementissime so-  
licitet ? & eo magis , quod in communibus mi-  
seriis hac tantum oblectatur specula . Dolabel-  
lam meum , vel potius nostrum , fore ab iis mo-  
lestiis , quas liberalitate sua contraxerat , libe-  
rum , velim quæras , quos ille dies sustinuerit ,  
in urbe dum fuit , quam acerbos sibi , quam mi-  
hi ipsi socero non honestos . itaque neque ego  
hunc Hispanientem casum exspecto , de quo mi-  
hi exploratum est ita esse , ut tu scribis : nec  
quidquam astute cogito , si quando erit civitas ,  
erit profecto nobis locus : sin autem non erit ,  
in easdem solitudines tu ipse ( ut arbitror ) ve-  
nies , in quibus nos consedisse audies . Sed ego  
fortasse varicinator , & hæc omnia meliores ha-  
bebunt exitus . Recordor enim desperationes eo-  
rum , qui senes erant , adolescente me : ego eos  
fortasse nunc imitor , & utor ætatis vitio , ve-  
lim ita sit , sed tamen togam prætextam texi

Oppio ,

Oppio, puto, te audisse. Nam Curtius noster dibaphum cogitat; sed eum infector moratur. Hæc aspersi, ut scires, me tamen in stomacho solere ridere. De Dolabella quod scripsi, suadeo videas tamquam si res tua agatur. Exterum illud erit; nos nihil turbulenter, nihil temere facimus, te tamen oramus, quibuscumque erimus in terris, ut nos, liberosque nostros ita tueare, ut amicitia nostra, & tua fides postulabit. Vale.

## A R G U M E N T U M.

*Respondet ad omnes partes Epistola Caninii; Deinde altera Epistola roganti, ut se Bibulo commendet, causas affert, quare id facere debeat: se tamen illi morem gessisse confirmat.*

XVII. M. T. C. IMP. CANINIO SALUSTIO PROCOS S. D.

**L**itteras a te mihi stator tuus reddidit Tarsi, ad xvi. Kal. Sex. His ergo ordine, ut videris velle, respondebo. De successore meo nihil audiui: nec quemquam fore arbitror, quin ad diem decedam: nulla causa est; præsertim sublato metu Parthico, commoraturum me nusquam sane arbitror. Rhodum, Ciceronem causa puerorum, accessurum puto; neque id tamen certum est. Ad urbem velim quam primum venire: sed tamen iter meum reipublicæ, & rerum urbanarum ratio gubernabit. Successor tuus non potest ita maturare ullo modo, ut tu me in Asia possis convenire. De rationibus referendis non erat incommodum te nullam referre, quam tibi scribis a Bibulo fieri potestatem: sed id vix mihi videris per legem Juliam facere posse, quam Bibulus certa quadam ratione non servat, tibi magnopere servandam censéo. Quod scribis, Apamea præsidium deduci non oportuisse, videbam idem ceteros existimare, molesteque ferebam de ea re minus commodos sermones malevolorum fuisse. Parthi transierint necne, præter te, video dubitare neminem; itaque omnia præsidia, quæ magna, & firma paraveram commotus hominum non dubio sermone, dinisi. Ratio-



nes mei quæstoris nec verum fuit me tibi mittere: nec tum erant confectæ: eas nos Apameæ deponere cogitabamus. De præda mea, præter quæstores urbanos, idest populum Romanum teruncium nec attigit, nec tacturus est quisquam. Laodiceæ me prædas accepturum arbitror omnis pecuniæ publicæ, ut & mihi, & populo cautum sit sine vecturæ periculo. Quod scribis ad me de drachmis cccclxxx nihil est, quod in isto genere cuiquam possim commodare; omnis enim pecunia ita tractatur, ut præda a præfectis, quæ autem mihi attributa est, a quæstore curetur. Quod quæris, quid existimem de legionibus, quæ decreta sunt in Syriam, antea dubitabam venturæ ne essent; nunc mihi non est dubium: quin, si antea auditum erit, otium esse in Syria, venturæ non sint. Marium quidem successorem tarde video esse venturum; propterea quod Senatus ita decrevit, ut cum legionibus iret. Uni Epistolæ respondi; venio ad alteram. Petis a me, ut Bibulo te quam diligentissime commendem; in quo mihi voluntas non deest: sed locus videtur esse tecum ex-  
postulandi; solus enim tu ex omnibus, qui cum Bibulo sunt, certiozem me numquam fecisti, quam valde Bibuli voluntas a me sine causa abhorreret. Permulti enim ad me detulerunt, cum magnus Antiochiæ metus esset, & magna spes in me, atque in exercitu meo, solitum dicere, quidvis se perpeti malle, quam videri eguisse auxilio meo. Quod ego officio quæstorio te adductum reticere de prætore tuo non moleste ferebam: quamquam quemadmodum tractare, audiebam. Ille autem, cum ad Thermum de Parthico bello scriberet, ad me litteras numquam misit, ad quem intelligebat ejus belli periculum pertinere: tantum de auguratu filii sui scripsit ad me; In quo ego misericordia commotus, & quod semper amicissimus Bibulo fui, dedi operam, ut ei quam humanissime scriberem; ille, si omnibus est malevolus (quod numquam existimavi) minus offendor in me; sin a me est alienior, nihil tibi litteræ meæ proderunt. Nam, ad Senatum quas Bilulus litteras misit, in iis, quod mihi cum  
illo

illo erat commune, sibi soli attribuit; se a-  
 turasse, ut cum quaestu populi pecunia permu-  
 taretur. Quod autem meum erat proprium, u-  
 alariis transpadanis uti negarem, id etiam po-  
 pulo se remisisse scribit, quod vero illius era-  
 solius, id. mecum communicat. Equitibus auxi-  
 liariis, inquit, cum amplius frumenti postula-  
 remus. Illud vero pusilli animi; & ipsa male-  
 volentia jejuni, atque inanis, quod Ariobar-  
 zanem, quem Senatus per me regem appellavit,  
 mihiq; commendavit, iste in litteris non re-  
 gem, sed regis Ariobarzani filium appellat.  
 Hoc animo qui sunt deteriores sunt rogati;  
 sed tibi morem gessi; litteras ad eum scripsi,  
 quas cum acceperis, facies, quod voles. Vale.

## A R G U M E N T U M.

*Suadet, ut decedens proponat Provincia. Quæ-  
 storem potius, quam Legatū; quod ipse quo-  
 que postea fecit. Vide Epist. 15. hujus Libri.*

XVIII. M. T. C. IMP. Q. THERMOPHIL-  
 P R Æ T. S. D.

**O**fficium meum erga Rhodum, ceteraque  
 mea studia, quæ tibi, ac tuis præstiti;  
 tibi homini gratissimo, grata esse; vehementer  
 gaudeo, mihiq; scito in dies majori curæ esse  
 dignitatem tuam, quæ quidem a te ipso inte-  
 gritate, & clementia tuâ sic amplificata est, ut  
 nihil addi posse videatur: sed mihi magis ma-  
 gisq; quotidie de rationibus tuis cogitanti pla-  
 cet illud meum consilium; quod initio Aristoni  
 nostro, ut ad me venit, ostendi, graves te su-  
 scepturum inimicitias, si adolescens potens, &  
 nobilis a te ignominia affectus esset, & hercle  
 sine dubio erit ignominia. Habes etiam nemi-  
 nem honoris gradu superiorem. Ille autem, ut  
 omittam nobilitatem, hoc ipso vincit viros  
 optimos, hominesque innocentissimos legatos  
 tuos, quod & quaestor est, & quaestor tuus.  
 Nocere tibi iratum neminem posse perspicio,  
 sed tamen tres fratres, summo loco natos,  
 promptos, non indisertos, te nolo habere ira-  
 tos, præsettini jure, quos video deinceps tri-  
 bunos plebis per triennium fore. Tempora au-

tem reipubl. qualia futura sint, quis scit? Mihi quidem turbulenta videntur fore, cur ego te velim incidere in terrores tribunicios? praefertim cum sine cuiusquam reprehensione legatis quaestorem possis anteferre; qui si dignum se maioribus suis praeberit, ut spero, & opto, tua laus ex aliqua parte fugit, sin quid offenderit, sibi totum, nihil tibi offenderit. Quae mihi veniebant in mentem, quae ad te pertinere arbitrabar; quod in Ciliciam proficiscebam, existimavi me ad te reportere scribere. Tu quod egeris, id velim Diis approbent, sed, si me audies, vitabis inimicitias, & posteritatis otio consules. Vale.

## A R G U M E N T U M.

*Ostendit optatiorem sibi Quaestorem obtinere neminem potuisse: & hortatur, ut maturus in Provinciam venire, antequam ipse decedat.*

XIX. M. C. T. IMP. COELIO CALVO,  
L. F. QUÆST. S. D.

**C**Um optatissimum nuncium accepissem, te mihi quaestorem obtigisse, eo iucundior mihi eam sortem sperabam fore, quo diutius in provincia mecum fuisses: magni videbatur interesse, ad eam necessitudinem, quam nobis fors tribuisset, consuetudinem quoque accedere. Postea cum mihi nihil neque a te ipso, neque ab ullo alio de adventu tuo scriberetur, verebar, ne id ita caderet (quod etiam nunc vereor) ne antequam tu in provinciam venisses, ego de provincia decederem. Accepi autem a te mihi sas litteras in Cilicia, cum essem in castris, ad xii. Kal. Quintil. scriptas humanissime, quibus facile, & officium, & ingenium tuum perspicui possit: sed neque unde, neque quo die datae essent, aut quo tempore te expectarem, significabant: nec is, qui attulerat, a te acceperat, ut ex eo scirem, quo ex loco, aut quo tempore essent datae. Quae cum essent incerta, existimavi tamen esse faciendum, ut ad testatores meos, & liatores cum litteris mitterem, quas si satis opportuno tempore accepi-

cepisti, gratissimum mihi feceris, si ad me in Ciliciam quamprimum veneris. Nam quod ad me Curius, consobrinus tuus, mihi, tu scis, maxime necessarius, quod item C. Virgilius, propinquus tuus familiarissimus noster, de te accuratissime scripsit, valet id quidem apud me multum, sicuti debet hominum amicissimorum diligens commendatio: sed tuæ litteræ, de tua præsertim dignitate, & de nostra conjunctione, maximi sunt apud me ponderis. Mihi quæstor optatior obtingere nemo potuit. Quamobrem quæcumque à me ornamenta in te proficiscuntur, ut omnes intelligant a me habitam esse rationem tuæ, majorumque tuorum dignitatis: sed id jam facilius consequar, si ad me in Ciliciam veneris; quod ego, & mea, & reipublicæ, & & maxime tua interesse arbitror. Vale.



## LIBER III.

### ARGUMENTUM.

*Totus est hic liber ad Appium P. Clodii fratrem, cum quo post inimicitias, in gratiam redierat. In hac autem epistola scribit de duobus Appii liberis, Phania, & Cilice; interferit quadam de sua benevolentia; In extremo commendat Valerium Jurisconsultum cum joco familiari.*

I. M. T. C. - APPIO PULCHRO IMP. S. D.

**S**I ipsa resp. tibi narrare posset quomodo sese haberet, non facilius ex ea cognoscere posses, quam ex liberto tuo Phania: ita est homo non modo prudens, verum etiam, quod vidi, curiosus. Quapropter ille tibi omnia explanabit: id enim mihi & ad brevitatem est aptius, & ad reliquas res providentius. De mea autem benevolentia erga te, etsi potes ex eodem Phania cognoscere, tamen videantur etiam aliquæ mez partes. Sic enim tibi persuade, carissimum te mihi esse, cum propter multas suavitates ingenii, officii,

officii, humanitatis tuæ, tum quod ex litteris tuis, & ex multorum sermonibus intelligo, omnia, quæ a me perfecta sunt in te; tibi accidisse gratissima. Quod cum ita sit, perficiam profecto, ut longi temporis usuram, quæ carulus, intermissa nostra consuetudine, & gratia, & crebritate, & magnitudine officiorum meorum sarciam: idque me, quoniam tu ita vis; puto non invita Minerva esse facturum; quam quidem ego si forte de tuis sumpsero, non solum Pallada, sed etiam Appiada nominabo. Cilix, libertus tuus, antea mihi minus fuit notus, sed ut mihi reddidit a te litteras plenas & amoris, & officii, mirifice ipse suo sermone subsequutus est humanitatem litterarum tuarum: jucunda mihi ejus oratio fuit, cum de animo tuo, cum de sermonibus, quos de me haberes quotidie mihi narraret: quid quæris? bi-duo factus est mihi familiaris, ita tamen ut Phanium valde sim desideraturus; quem cum Romam remittes (quod, ut putabamus, celestiter eras factururus) omnibus ei de rebus, quas agi, quas curari a me voles, mandata des velim. L. Valerium jurisconsultum valde tibi commendo, sed ita, etiamsi non est jurisconsultus: melius enim ei cavere volo, quam ipse aliis solet; valde hominem diligo; est ex meis domesticis, atque intimis familiaribus. Omnino tibi agit gratias, sed idem scribit, meas litteras maximum apud te pondus habituras: id eum ne fallat, te etiam atque etiam rogo. Vale.

#### ARGUMENTUM.

*Cum esset Appio successer in Cilicia administratione creatus, rogat eum, ut Provinciam sibi quam maxime aptam, explicatamque tradat, quo sit ei facilius administrandi ratio.*

IL. M. T. C. PROCOS. APPIO PUL-  
CHRO IMP. S. D.

**C**Um & contra voluntatem meam, & præter opinionem accidisset, ut, mihi cum imperio in provinciam proficisci necesse esset: in multis, & variis molestiis, cogitationibusque  
meis

meis hæc una consolatio occurrebat , quod nãque tibi amicioꝝ quam ego sum quisquam posset succedere : neque ego ab ullo provinciam accipere , qui mallet eam mihi quam maxime aptam , explicitamque tradere . Quod si tu quoque eandem de mea voluntate erga te spem habes ; ea te profectio numquam fallet . A te maxime pro nostra summa conjunctione , tuaque singulari humanitate , etiam atque etiam peto , & quaeso , ut quibuscumque rebus potes ( potes autem plurimis ) prospicias , & consulas rationibus meis . Vides ex S. C. provinciam esse habendam , si eam , quoad ejus facere poteris , quam expeditissimam mihi tradideris , facilius erit mihi quasi decursus mei temporis ; quid in eo genere efficere possis , tui consilii est : ego te , quod tibi veniet in mentem mea interesse , valde rogo . Pluribus verbis ad te scriberem , si aut tua humanitas longiorem orationem expectaret ; aut id fieri nostra amicitia pateretur ; aut res verba desideraret ; ac non pro se ipsa loqueretur . Hoc velim tibi persuadeas , si rationibus meis a te provisum esse intellexero , magnam te ex eo , & perpetuam voluptatem esse capturum . Vale .

## A R G U M E N T U M .

*Petit , quod in proxima superiori epistola , ut in tradenda Provincia commodet sibi quam maxime potest : precipue ne numerum militum imminuat .*

## III. M. T. C. PROCOS. APPIO PULCHRO IMP. S. D.

**A** Dixi . Kal. Jun. Brundisium cum venissem , Q. Fabius legatus tuus mihi præstiterat , eaque me ex tuis mandatis monuit , quæ non modo mihi , ad quem pertinebant , sed universo senatui venerant in mentem , præsidio firmiori opus esse ad istam provinciam : censebant enim omnes fere , ut in Italia supplementum meis , & Bibuli legionibus scriberetur . Id cum Suspicius C O S. passurum te negaret , multa nos quidem questi sumus , sed tantus consensus Senatus fuit , ut mature proficisceremur .

mur, parendum ut fuerit; itaque fecimus. Nunc, quod a te petii litteris iis, quas Romæ tabellariis tuis dedi, velim tibi curæ sit quæ successori conjunctissimo, & amicissimo commodare potest is, qui provinciam tradit ut ea pro nostra constantissima voluntate erga te, cura, ac diligentia tua complectare, ut omnes intelligant, nec me benevolentiori cuiquam succedere, nec te amicali potuisse provinciam tradere. Ex iis litteris, quarum exemplum ad me misisti, quas in Senatu recitari voluisti, sic intellexeram, permultos a te milites esse dimissos, sed mihi Fabius idem demonstravit, id te cogitasse facere, sed cum ipse a te discederet, integrum militum numerum fuisse. Id si ita est, pergratum mihi feceris, si istas exiguas copias, quas habuisti, quam minimum immi- nueris, qua de re S. C. quæ facta sunt, ad te missa esse arbitror. Equidem pro eo quanti te facio, quidquid feceris approbabo: sed te quoque confido ea esse facturum, quæ mihi intel- liges maxime esse accommodata. Ego C. Pon- tinium, legatum meum Brundusii expectabam, eumque ante Kal. Jun. Brundisium venturum arbitror, qui cum venerit, quæ primum navi- gandi nobis facultas data erit, ea utemur. Vale.

## A R G U M E N T U M.

*Expectari a se scribit L. Clodium cum Appii mandatis; mutuam benevolentiam, ejusque causas commemorat.*

IV. M. T. C. PROCOS. APPIO PUL-  
CHRO IMP. S. D.

**P**Ridie Non. Jun. cum essem Brundusii, lit-  
teras tuas accepi, quibus erat scriptum, L.  
Clodio mandasse, quæ illum mecum loqui vel-  
les; eum sane expectabam, ut ea, quæ a te af-  
ferret, quamprimum cognoscerem. Meum stu-  
dium erga te, & officium, tametsi multis jam  
rebus spero esse cognitum, tamen in iis maxi-  
me declarabo quibus plurimum significare po-  
tuerō, tuam mihi existimationem, & dignita-  
tem carissimam esse. Mihi & Q. Fabius Virgi-  
lianus,

lianus, & C. Flaccus L. F. & diligentissime M. Octavius Cn. F. demonstravit, me a te plurimi fieri, quod egomet multis argumentis jam antea judicaram, maximeque illo libro augurali, quem ad me amantissime scriptum suavissimum misisti. Mea in te omnia summa necessitudinis officia constabunt: nam cum te ipsum, ex quo tempore tu me diligere cœpisti, quotidie pluris feci, tum accesserunt etiam conjunctiones necessarium tuorum: duos enim duarum ætatum plurimi facio; Cn. Pompejum, filix tuæ socerum, & M. Brutum, generum tuum. Collegi quoque conjunctio, præsertim tam honorifice a te approbata non mediocre vinculum mihi quidem attulisse videtur ad voluntates nostras copulandas. Sed, si Clodium convenero, ex illius sermone ad te scribam plura, & ipse operam dabo, ut te quamprimum videam. Quod scribis manendi tibi causam eam fuisse ut me convenires, id mihi, ne mentiar, gratum est. Vale.

## A R G U M E N T U M.

*Agit Appio gratias, quod operam dederit, ut expeditissimam provinciam traderet. Deinde rationem exponit itineris sui, quo certius de congressu statuere Appius possit.*

V. M. T. C. PROCOS. APPIO PULCHRO IMP. S. D.

**T**Ralles veni ad vi. Kal. Sex. ibi mihi præsto fuit L. Lucilius cum litteris, mandatisque tuis, quo quidem homine neminem potuisti nec mihi amiciores, nec, ut arbitror, ad ea cognoscenda, quæ scire volebam, aptiores, prudentioresve mittere; ego autem & tuas litteras legi libenter, & audiavi Lucilium diligenter. Nunc quoniam & tu ita sentis (scribis enim, quæ de nostris officiis ego ad te scripserim etsi ea jucunda fuerint, tamen quoniam ex alto repetita sint, non necessaria te putasse: & revera confirmata amicitia, & perfecta fide commemoratio officiorum supervacanea est eam partem orationis prætermittam. Tibi tamen agam, ut debeo, gratias: animadverti enim & didici ex tuis litteris, te omnibus in rebus habuisse rationem,

ut



ut mihi consuleres, restitueresque, & preparares quodammodo omnia, quo mea ratio facilior, & solutior esse posset. Hoc tuum officium cum mihi gratissimum esse dicam, sequitur illud, ut te existimare velim mihi magnæ curæ fore, atque esse sumprimum, ut ipse tu, tuique omnes deinde etiam ut reliqui scire possint, me tibi esse amicissimum; quod quibus adhuc non satis est perspectum, ii mihi nolle magis hoc animo nos esse, quam non intelligere videntur: sed profecto intelligent: neque enim obscuris personis, nec parvis in causis res agitur: sed hoc fieri melius quam dici, aut scribi, volo. Quod itinerum meorum ratio te nonnullam in dubitationem videtur adducere, visurusne me sis in provincia: ea res sic habet. Brundisii cum loquerer cum Phania liberto tuo, veni in eum sermonem, ut dicerem me libenter ad tam partem provinciae primum esse venturum, quo te maxime velle arbitrarer; tunc mihi ille dixit, classe te velle decedere: perfore accommodatum tibi, si ad Sidam maritimam partem provinciae, navibus accessissem. Dixi me esse facturum: itaque fecissem, nisi mihi L. Clodius hoster Corcyrae dixisset, minime id esse faciendum; te Laodiceæ fore ad meum adventum. Erat id mihi multo brevius, multoque commodius, cum praesertim te ita malle arbitrarer: tua ratio postea est commutata, nunc quid fieri possit, tu facillime statues, ego tibi meum consilium exponam. Pridie Kal. Sex. puto me Laodiceæ fore: ubi per paucos dies, dum pecunia accipietur, quæ mihi ex publica permutatione debetur, commorabor. Deinde iter faciam ad exercitum: ut circiter Id. Sext. putem me ad Iconium fore, sed si quid nunc me fallit in scribendo, (procul enim aberam ab re ipsa, & locis) simul ac progredi cœpero, quam celeratim poterō, & quam creberrimis litteris faciam, ut tibi nota sit omnis ratio dierum, atque itinerum meorum. Oneris tibi imponere nec audeo quidquam, nec debeo; sed quod tuo commodo fieri possit, utriusque nostrum magni inter-

intèrest, prius ut te conveniam quam decedas: quam facultatem si quis casus eripuerit, mea tamen in te omnia officia constabunt, non secus, ac si te vidissem. Tibi de nostris rebus nihil sum ante mandaturus per litteras, quam desperato coram me tecum agere posse. Quod te a Scævola petiisse dicis, ut, dum tu abesses, ante adventum meum provinciæ præset: cum ego Ephesi vidi, fuitque mecum familiariter triduum illud, quo ego Ephesi commoratus sum, nec ex eo quidquam audivi, quod sibi a te mandatum diceret; sane vellem potuisse obsequi voluntati tuæ, non enim arbitror no-  
luisse. Vale.

## A R G U M E N T U M.

*Ostendit non per se, sed per Appium fuisse, quo minus congregarentur: nihil tamen de sua erga illum benevolentia detractum.*

V. M. T. C. P R O C O S. A P P I O P U L -  
C H R O I M P. S. D.

Cum meum factum cum tuo comparo, etsi non magis faveo in nostra amicitia tuenda, quam tibi, tamen multo magis meo facto delector, quam tuo. Ego enim Brundisii quæsi ex Phania (cujus mihi videbar, & fidelitatem erga te perspexisse, & nosse locum, quem apud te is teneret) quam in partem provinciæ maxime putaret te velle, ut in succedendo primum venirem, cum ille mihi respondisset, nihil me tibi gratius facere posse, quam si ad Sidam navigassem: etsi minus dignitatis habebat ille adventus, & ad multas res mihi minus erat aptus; tamen me ita dixi esse facturum. Idem ergo cum L. Clodium Corcyræ convenissem, hominem ita tibi conjunctum, ut mihi, cum illo cum loquerer tecum loqui viderer: dixi ei me ita facturum esse, ut in eam partem, quam Phania rogasset, primum venirem; tunc mihi ille cum gratias egisset, magnopere a me petivit ut Laodicæam protinus irem: te in prima provincia velle esse, utquam primum decederes: quin, nisi ego successor essem, quem  
tu

tu cuperes videre, te, antea quam tibi successum esset, decelsurum fuisse, quod quidem erat consentaneum cum iis litteris, quas ego Romæ acceperam; ex quibus perspexisse mihi videbar, quam festinares decedere. Respondi Clodio, me ita esse facturum, ac multo quidem libentius, quam si illud esset faciendum quod promiseram Phaniæ; itaque & consilium mutavi, & ad te statim mea manu scriptas litteras misi; quas quidem ex tuis litteris intellexi, satis mature ad te esse perlatas. Hoc ego meo facto valde delector, nihil enim potuit fieri amantius: considera nunc vicissim tuum. Non modo ibi non fuisti, ubi me quamprimum videre posses; sed eo discessisti, quo ego te ne persequi quidem possem triginta diebus, qui tibi ad decedendum lege, ut opinor, Cornelia, constituti essent; ut tuum factum illis, qui quo animo inter nos simus, ignorant, alieni hominis, (ut levissime dicam) & fugientis, congressum; meum vero conjunctissimi, & amicissimi esse videatur. Ac mihi tamen antequam in provinciam venirem redditæ sunt a te litteræ, quibus etsi te Tharsum proficisci demonstrabas, tamen mihi non dubiam spem mei conveniendæ afferebas: cum interea, credo equidem malevoli homines (late enim patet hoc vitium, & est in multis) sed tamen probabilem materiem nostri sermonis, ignari meæ constantiæ, conabantur alienare a te voluntatem meam: qui te in forum Tharsi, agere, statuere multa, decernere, judicare dicerent: cum posses jam suspicari, tibi esse successurum: quæ ne ab iis quidem fieri solerent, qui brevi tempore sibi succedi putarent. Horum ego sermone non movebar, quin etiam (credas mihi velim) si quid tu ageres, leviori me putabam molestia, & ex annua provincia, quæ mihi longa videretur, prope jam undecim mensium provinciam factam esse gauderam, si absenti mihi unius mensis labor detractus esset. Illud (vere dicam) me moveret, in tanta militum paucitate abesse tres cohortes, quæ sint plenissimæ, nec me scire ubi sint. Molestissime autem fero, quod te ubi visurus sim, nescio: eoque ad te tardius scripsi, quod quo-

quotidie te ipsum expectabam, cum interea ne litteras quidem ullas accepi, quæ me docerent quid ageres, aut ubi te visurus essem. Itaque virum fortem, mihiq; in primis probatum, Antonium præfectum evocatorum, misi ad te, cui, si tibi videretur, cohortes traderes; ut dum tempus anni esset idoneum, aliquid negotii gerere possem, in quo tuo consilio ut me sperarem esse usurum, & amicitia nostra, & litteræ tuæ fecerant, quod ego ne nunc quidem despero, sed plane quando, aut ubi te visurus sim, nisi ad me scripseris, ne suspicari quidem possum. Ego, ut me tibi amicissimum esse & æqui & iniqui intelligant, curabo; de tuo in me animo iniquis secus existimandi videris non nihil loci dedisse, id, si correxeris, mihi valde gratum erit. Et, ut habere rationem possis, quo loco me, salva lege Cornelia, convenias: ego in provinciam veni pridie Kal. Sex. iter in Ciliciam facio per Cappadociam; castra movi ab Iconio pridie Kal. Sept. Nunc tu & ex diebus, & ex ratione itineris, si putabis me esse conveniendum, constitues, quo loco id commodissime fieri possit, & quo die. Vale.

## A R G U M E N T U M.

*Querelam Appii refellit, contraque ipse queritur, & ostendit, se juxta queri, virtutem extollens contra inanem arrogantiam nobilitatis.*

VII. M. T. C. PROCOS. IMP. APPIO  
PULCHRO S. D.

**P**luribus verbis ad te scribam, cum plus otii nactus ero: hæc scripsi subito, cum Bruti pueri Laodiceæ ex me convenissent, & se Romam properare dixissent: itaque nullas his, præterquam ad te, & ad Brutum dedi litteras. Legati Appiani mihi volumen a te plenum querelæ iniquissimæ reddiderunt; quod eorum ædificationem litteris meis impedissem. Eadem epistola petebas, ut eos quamprimum ne in hyemem inciderent ad facultatem ædificandi liberarem; & simul peracute querebare, quod eos tributa exigere vetarem prius, quam ego re cognita permisissim;

etiam doctrina, plurimo rerum usu: addo urbanitatem, quæ est virtus, ut Stoici rectissime putant: ullam Appietatem, aut Lentulitatem valere apud me plus, quam ornamenta virtutis existimas? Cum ea consequutus nondum eram, quæ sunt hominum opinionibus amplissima: tamen ista vestra nomina numquam sum admiratus: viros eos, qui ea vobis reliquissent, magnos arbitrabar. Postea vero quam ita, & cepi, & gessi maxima imperia, ut mihi nihil neque ad honorem, neque ad gloriam acquirendam deesse putarem; superiorem quidem numquam, sed parem vobis me speravi esse factum. Nec mehercule aliter vidi existimare vel Cn. Pompejum, quem omnibus, qui unquam fuerunt, vel P. Lentulum, quem mihi ipsi ante pono: tu si aliter existimas, nihil errabis, si paulo diligentius: ut quid ἔξουκ, quid sit εὐγγύεια intelligas Athenodorus Sandonis filius quid de his rebus dicat, attenderis. Sed ut ad rem redeam, me tibi non amicum modo, verum etiam amicissimum existimes velim: profecto omnibus meis officiis efficiam: ut ita esse vere possis judicare; tu autem si id agis, ut minus mea causa, dum ego absum, debere videaris, quam ego tua laborarim; libero te ista cura.

παρ' ἐμοί γε γὰρ ἔμοι,   
 Οὐκ ἐπιτίσσει, μάλιστ' ἀντιπύρετος ζεύς.

Sin autem natura est φιλαίτιος, illud non perficies, quominus tua causa velim, hoc adsequere, ut quam in partem accipias, minus laborem. Hæc ad te scripti liberius, fretus conscientia Officii mei, benevolentiaque, quam a me certo iudicio susceptam, quoad tu voles, conservabo. Vale.

#### A R G U M E N T U M.

*Querulis Appii litteris respondet, cum excusatione sui facti: ipsumque Appium aut imprudentem significat, qui sermonibus iniquorum crediderit, aut nimis astutum, qui ea, quæ ipsi in mentem veniant, aliis attribuat.*

VII. M. T. C. PROCOS. APPIO PULCHRO IMP. S. D.

**E**T si, quantum ex litteris tuis intelligere potui, videbam te hanc epistolam, cum ad

ad urbem esses, esse lecturum, refrigerato jam levissimo sermone hominum provincialium, tamen, cum tu tam multis verbis ad me de improborum oratione scripsisses, faciendum mihi putavi, ut tuis litteris breviter responderem. Sed prima duo capita epistolæ tuæ tacita mihi quodammodo relinquenda sunt. Nihil enim habent, quod aut definitum sit, aut certum, nisi, me vultu, & taciturnitate significasse tibi non esse amicū; idque præ tribunali, cum aliquid ageretur, & nonnullis in conviviis intelligi potuisse. Hoc totum nihil esse possum intelligere, sed cum sit nihil, nec quid dicatur quidem intelligo; illud quidem scio, meos multos, & illustres, & ex superiore, & ex æquo loco sermones habitos cum tua summa laude, & cum magna significatione nostræ familiaritatis, ad te vere potuisse deferri. Nam quod ad legatos attinet, quid a me fieri potuit aut elegantius aut iustius, quam ut sumptus egentissimarum civitatum minuerim sine ulla imminutione dignitatis tuæ, præsertim ipsis civitatibus postulanti-  
bus, nam mihi totum genus legationum tuo nomine proficiscentium notum non erat. Apameæ cum essem, multarum civitatum principes ad me detulerunt, sumptus decerni legatis nimis magnos, cum solvendo civitates non essent. Hic ego multa simul cogitavi, primum, te hominem non solum sapientem, verum etiam ( ut nunc loquimur ) urbanum non arbitraber genere isto legationum delectari, idque me arbitror Synnadis pro tribunali multis verbis disputavisse. Primum, Appium Clodium senatui, Populoque Romano non Myndensium testimonio ( in ea enim civitate mentio facta est ) sed sua sponte esse laudatum. Deinde me ista vidisse multis accidere, ut eorum causa legationes Romam venirent, sed his legationibus non meminisse ullum tempus laudandi, aut locum dari, studia mihi eorum placere, quod in te benemerito grati essent, consilium totum videri minime necessarium, si autem vellent declarare in eo officium suum, laudaturum me, si quis suo sumptu functus esset officio; concessurum, si legitimo, non permissurum, si infinito.

Quid

Quid enim reprehendi potest ? nisi quod addis, visum esse quibusdam edictum meum quasi consultum ad istas legationes impediendas esse accommodatum . Jam non tam mihi videntur injuriam facere ii , qui hæc disputant , quam si cujus aures ad hanc disputationem patent , Romæ composui edictum ; nihil addidi nisi quod publicani me rogarunt , cum Samum ad me venissent , ut de tuo edicto totidem verbis transferrem in meum . Diligentissime scriptum caput est , quod pertinet ad minuendos sumptus civitatum : quo in capite sunt quædam nova , salutaria civitatibus , quibus ego magnopere delector . Hoc vero ex quo suspicio nata est , me exquisivisse aliquid in quo recesserem , translatitium est , neque enim eram tam desipiens , ut privatæ rei causa legari putarem ; qui , & tibi non privato , & pro re non privata sua , sed publica , non in privato , sed in publico orbis terræ consilio , idest in senatu , ut gratias agerent , mittebantur . Neque , cum edixi , nequis injussu meo proficisceretur , exclusi eos , qui me in castra , & qui trans Taurum persequi non possent , nam idest maxime in tuis litteris irridendum : quid enim erat , quod me persequerentur in castra ? Taurum ne transirent , cum ego Laodicea usque ad Iconium iter ita fecerim , ut me omnium illarum diocesum , quæ eis Taurum sunt , omniumque earum civitatum magistratus , legationesque convenirent ? Nisi forte postea cœperunt legare ; quam ego Taurum transgressus sum , quod certe non ita est : cum enim Laodiceæ , cum Apameæ , cum Synnadis , cum Philomeli , cum Iconii essem , quibus in oppidis omnibus commoratus sum ; omnes jam istius generis legationes erant constitutæ . Atque hoc tamen te scire volo , me de ipso sumptu legationum aut minuendo , aut remittendo decrevisse nihil , nisi quod principes civitatum a me postulassent , ne in venditionem tributorum , & illam acerbissimam exactionem , quam tu non ignoras , capitum , atque ostiorum , inducerentur sumptus minime necessarii . Ego autem , cum hoc suscepissem , non solum iustitia , sed etiam misericordia adductus ut levarem miseriis perditas

civitates ; & perditas maxime per magistratus suos non potui in illo sumptu non necessario negligens esse. Tu , cum istiusmodi sermones ad te delati de me sunt , non debuisti credere ; sin autem eo genere delectaris , ut quæ tibi in mentem veniant , aliis attribuas , genus sermonis inducis in amicitiam minime liberale . Ego , si in provincia de tua fama detrahere unquam cogitasset , non ad generum tuum Lentulum , neque ad libertum tuum Brundusii , neque ad præfectum fabrum , Corcyræ , quem in locum me venire velles , retulisset . Quare potes , doctissimis hominibus auctoribus , quorum sunt de amicitia gerenda præclarissime scripti libri , genus hoc totum orationis tollere : Disputabant , ego contra differebam . Dicebant , ego negabam . An mihi de te nihil esse dictum unquam putas ? ne hoc quidem , quod , cum me Laodiceam venire voluisses , Taurum ipse transisti ? quod iisdem diebus meus conventus erat Apameæ , Synnadiis , Philomeli , tuus Tarsi ? non dicam plura , ne in quo te objurgem , id ipsam videar imitari : illud dicam , ut sentio : si ista , quæ alios loqui dicis , ipse sentis , tua summa culpa est : sin alii tecum hæc loquuntur , tua tamen , quod audis , culpa nonnulla est , mea ratio in tota amicitia nostra constans , & gravis reperietur . Quod si quis me astutiores fingit , quid potest esse callidius , quam cum te absentem semper defenderim , cum præsertim mihi usuventurum non arbitrarer , ut ego quoque absens a te defendendus essem , nunc committere , ut tu jure optimo me absentem deserere posses ? Unum genus excipio sermonis , in quo porsæpe aliquid dicitur , quod te putem nolle dici : si aut legatorum tuorum cuipiam , aut præfectorum , aut tribunorum militum male dicitur : quod tamen ipsum non meherecule adhuc accidit me audiente , ut aut gravius diceretur , aut impurius , quam mecum Corcyræ Clodius est loquutus ; cum in eo genere maxime quereretur , te aliorum improbitate minus felicem fuisse . Hos ego sermones , quod & multi sunt , & tuam existimationem ( ut ego sentio ) non offendunt , laceravi nunquam , sed non valde repressi , si quis



enīs est , qui neminem bonā fide in gratiam  
 pudet redire posse , non nostram is perfidiam  
 cōarguit , sed indicat suam ; simulque non de me  
 is pejus , quam de te existimat : sin autem ali-  
 quem mea instituta in provincia non delectant,  
 & quadam dissimilitudine institutorum meorum  
 ac tuorum laedi se putat , cum uterque nostrum  
 recte fecerit sed non idem uterque sequutus sit :  
 hunc ego amicum habere non curo . Liberalitas  
 tua , ut hominis nobilissimi , latius in provin-  
 cia patuit : nostra si angustior est ( etsi de tua  
 prolixa , beneficaque natura limavit aliquid po-  
 sterior annus . propter quandam tristitiam tem-  
 porum ) non debent mirari homines , cum , &  
 natura semper ad largiendum ex alieno fuerim  
 restrictior , & temporibus , quibus alii mo-  
 ventur , iisdem ego movear , me esse acerbum  
 sibi , ut sim dulcis mihi . De rebus urbanis  
 quod me certiores fecisti , cum per se mihi  
 gratum fuit , tum quod significasti tibi omnia  
 mea mandata curā fore , in quibus unum illud  
 te praeipue rogo , ut cures , ne quid mihi ad  
 hoc negotiū aut oneris accedat , aut temporis :  
 Hortensiumque nostrum collegam , & familia-  
 rem roges : ut , si unquam mea causa quicquam  
 aut sentit , aut fecit , de hac quoque sententia  
 bima decebat , qua mihi nihil potest esse in-  
 iimicius . De nostris rebus quod scire vis , Tar-  
 so nonis Oct. Amanum versus profecti sumus .  
 Hæc scripsi postridie ejus diei , cum castra ha-  
 berem in agro Mopsuestiæ , si quid egero ,  
 scribam ad te : neque domum unquam ad meos  
 litteras mittam , quin adjungam eas , quas tibi  
 reddi velim . De Parthis quod quaeris , fuisse  
 nullos puto . Arabes qui fuerunt , admisso Par-  
 thico ornatu dicuntur omnes revertisse : hos-  
 tem esse in Syria negant ullum . Tu velim ad  
 me quam saepissime , & de tuis rebus scribas ,  
 & de meis , & de omni reipublicæ statu , de  
 quo sum sollicitus , eo magis , quod ex tuis li-  
 teris cognovi Pompejum nostrum in Hispaniam  
 iturum . Vale .

*Appis litteris, humanissime scriptis, humanissime respondit; gratulatur de triumphis spe, hortatur ad absolutionem librorum auguralium supplicationes petit.*

IX. M. T. C. IMP. APPIO PULCHRO S. D.

**V**ix tandem legi litteras dignas Appio Claudio plenas humanitatis, officii, diligentiae: aspectus videlicet urbis tibi tuam pristinam urbanitatem reddidit; nam quas exitinere, antequam ex Asia egressus es, ad me litteras misisti, unas de legatis a me prohibitis proficisci, alteras de Apameorum aedificatione impedita, legi perinvitus, itaque conscientia mea constantis erga te voluntatis rescripti tibi subiratus. Iis vero litteris lectis, quas Philotimo liberti meo dedisti, cognovi, intellexique in provincia multos fuisse, qui nos quo animo inter nos sumus, esse nollent, ad urbem vero ut accesseris, vel potius ut primum tuos videris, cognosces ex iis, qua in te absentem fide, qua in omnibus officiis tuendis erga te observantia, & constantia fuisset. Itaque quanti illud me aestimare putas quod est in tuis litteris scriptum? si quid acciderit quod ad meam dignitatem pertineat, etsi vix fieri possit, tamen te parem mihi gratiam relaturum, tu vero facile facies. **N**ISIL est enim, quod studio, & benevolentia, vel amore potius effici non possit. Ego, etsi & ipse ita judicabam, & fiebam crebro a meis per litteras certior, tamen maximam latitiam cepi ex tuis litteris de spe minime dubia, & plane explorata triumphis tui; neque vero ob eam causam, quo ipse facilius consequeretur, (nam id quidem. *Επιχέρων* est) sed me hercule, quod tua dignitas atque amplitudo mihi est ipsa cara per se. Quare, quoniam plures tu habes quam ceteri, quos scias in hanc provinciam proficisci, quod te adeunt fere omnes, si quid velis gratissimum mihi feceris, si ad me, simulatque adeptus eris: quod & tu confidis, & ego opto, litteras miseris. Longi subsellii  
( ut

( ut noster Pompejus appellat ) judicatio , & mora , si quem tibi item unum , alterumve diem abstulerit ( quid enim potest amplius ) tua tamen dignitas suum locum obtinebit ; sed si me diligit , si a me diligi vis , ad me litteras , ut quam primum latititia afficiar , mittito . Et velim reliquum quod est promissi , ac muneris tui , mihi persolvas , cum ipsam cognitionem juris auguralis consequi cupio , tum mehercule tuis incredibiliter studiis erga me , muneribusque delector . Quod autem a me tale quiddam desideras , sane mihi considerandum est , quoniam te remunerer potissimum genere : nam profecto non est meum quod in scribendo , ut soles adscribi , tantum in daustitia ponam , committere ut in scribendo negligens fuisse videar : praesertim cum id non modo negligentis , sed etiam ingrati animi crimen futurum sit : verum haec videbimus . Illud , quod polliceris , velim pro tua fide , diligentiaque , & pro nostra non instituta , sed jam inveterata amicitia , cures , & enitescere , ut supplicatio nobis quam honorificentissime quam primumque decernatur . Omnino scripsimus nisi litteras quam vellem , in quo cum difficultas navigandi fuit odiosa : tum in ipsum discesum senatus incidisse credo meas litteras , sed , sed id feci adductus auctoritate , & consilio tuo ; idque a me recte factum puto , quod non statim ut imperator appellatus sum , sed aliis rebus additis , activisque confectis , litteras miserim . Haec igitur tibi erunt curae , quemadmodum ostendis : meque totum , & mea , & meos commendatos habebis . Vale .

A R G U M E N T U M .

*Dolabella Appium accusaverat , eoque ipso tempore Ciceronis filiam duxerat uxorem : id factum a suis , sed insciente conatur Cicero probare : & in hanc sententiam multa colligit .*

X. M. T. C. PROCOS. APPIO PULCHRO S. D.

Cum est ad nos allatum de temeritate eorum , qui tibi negotium facerent , esse graviter primo nuntio commotus sum , quod

nihil tam præter opinionem meam accidere potuit: tamen ut me collegi, cetera mihi facilissima videbantur, quod & in te ipso maximam spem, & in tuis magnam habebam, multaque mihi veniebant in mentem, quamobrem istum laborem tibi etiam honori putarem fore: illud plane moleste tuli, quod certissimum, & iustissimum triumphum hoc invidorum consilio esse tibi ereptum videbam, quod tu si tanti facies, quanti ego semper judicavi faciendum esse, facies sapienter, & ages victor ex inimicorum gloriæ triumphum iustissimum: ego enim plane video fore nervis, opibus, sapientiaque tua, vehementer ut inimicos tuos pœniteat intemperantiæ suæ. De me tibi sic, contestans omnes deos, promitto, atque confirmo, me pro tua dignitate (malo enim dicere, quam pro salute) in hac provincia, cui tu præfueris, rogando, deprecatoris: laborando, propinquo; auctoritate, cari hominis, ut spero, & ut civitates, gravitate, Imperatoris susceptorum officia, atque partes: omnia volo a te & postules, & expectes: vincam meis officiis cogitationes tuas. Q. Servil. perbreves a te mihi litteras reddidit: quæ mihi tamen nimis longæ visæ sunt: injuriam enim mihi fieri putabam: cum rogabar nollem accidisset tempus, in quo perspicere posses quanti ego te, quanti Pompejum: (quem unum ex omnibus facio, ut & cæleo plurimi) quanti Brutum facerem quamquam in consuetudine quotidiana perspexisses, sicuti perspicies; sed quoniam accidit, si quid a me prætermisum fuerit commissum facinus, & admissum dedecus confitebor. Pontinius, quia a te tractatus est præstanti, ac singulari fide, (cujus tui beneficii ego sum testis) præstat tibi memoriam, benevolentiamque quam debet: qui cum maximis rebus suis coactus, a me invitissime decessisset, tamen ut vidit tua interesse, conscendens jam navem, Epheso Laodiceam revertit. Talia cum te studia videam habiturum esse innumerabilia, plane dubitare non possum, quin tibi omplitudinis ista sollicitudo futura sit. Si vero efficias, ut Censores creentur, & si ita gesseris Censuram, ut & debes, & potes: non tibi solum, sed

tuis

tuis omnibus video in perpetuum summo te praesidio futurum. Illud pugna, & enitere, ne quid nobis temporis prorogetur: ut, cum hic tibi satisfecerimus, isthic quoque nostram in te benevolentiam navare possimus. Quæ de hominum, atque ordinum omnium erga te studiis scribis ad me, minime mihi miranda, & maxime jucunda acciderunt: eademque ad me perscripta sunt a familiaribus meis. Itaque capio magnam voluptatem, cum tibi, cujus mihi amicitia non solum ampla, sed etiam jucunda est, ea tribui, quæ debeantur: tum vero etiamnum remanere in civitate nostra studia prope omnium consensu erga fortes, & industrios viros: quæ mihi ipsi una semper tributa merces est laborum, & vigiliarum mearum. Illud vero mihi permirum accidit, tantam temeritatem fuisse in eo adolescente: cujus ego salutem duobus capitis judiciis summa contentione defendi, ut, tuis inimiciis suscipiendis, oblivisceretur patroni omnium fortunarum ac rationum suarum, præsertim cum tu omnibus vel ornamentis, vel præsidiis redundares, illi (ut levissime dicam) multa deessent, cujus sermo stultus, & puerilis erat jam antea ad me a M. Cælio familiari nostro perscriptus, de quo item sermone multa scripta sunt abs te. Ego autem citius cum eo, qui tuas inimicitias suscepisset, veterem conjunctionem diremissem, quam novam conciliaissem: neque enim de meo erga te studio dubitare debes: neque id est obscuro cuiquam in provincia, nec Romæ fuit; sed tamen significatur in tuis litteris suspicio quædam, & dubitatio tua, de qua alienum tempus est mihi tecum expostulandi, purgandi autem mei necessarium. Ubi enim ego cuiquam legationi sui impedimento, quominus Romam ad laudem tuam mitteretur? aut in quo potui, si te palam odissem, minus quod tibi obesset, facere? si clam, magis aperte inimicus essem. Quod si essem ea perfidia, qua sunt ii, qui in nos hæc conferunt, tamen ea stultitia certe non fuisset, ut aut in obscuro odio apertas inimicitias, aut in quo tibi nihil nocerem, summam ostenderem voluntatem nocendi. Ad me adire quosdam memini qui dicerent,

nimis magnos sumptus legatis decerni, quibus ego non tam imperavi, quam centui, sumptus legatis quam maxime ad Legem Corneliam decernendos: atque in eo ipso me non perseverasse, testes sunt rationes Civitatum, in quibus quantum quæque voluit, Legatis tuis datum induxit. Te autem quibus mendaciis homines levissimi onerant? non modo sublato sumptus, sed etiam a procuratoribus eorum, qui jam profecti essent, repetitos, & ablato, eamque causam multis omnino non cundi fuisse. Quererer tecum, atque exoptularem, nisi, ut supra scripsi, purgare me tibi hoc tuo tempore, quam accusare te, malle; idque putarem esse rectius. Itaque nihil de te, quod credideris de me, quamobrem non debueris credere pauca dicam. Nam si me virum bonum, si dignum iis studiis, eaque doctrina, cui me a pueritia dedi, si satis magni animi, non minimi consilii maximis rebus perspectum habes, nihil in me non modo perfidiosum, & insidiosum, & fallax in amicitia, sed ne humile quidem, aut jejunum debes agnoscere; sin autem me astutum, & occultum lubet fingere, quid est, quod minus cadere in ejusmodi naturam possit, quam aut florentissimi hominis aspernari benevolentiam, aut ejus existimationem oppugnare in provincia, cujus laudem domi defenderis, aut in ea re animum ostendere inimicum, in qua nihil obsis, aut id eligere ad perfidiam, quod ad indicandum odium apertissimum sit, ad nocendum, levissimum? Quid erat autem cur ego in te tam implacabilis essem, cum te ex fratre meo ne tunc quidem, cum tibi prope necesse esset eas agere partes, inimicum mihi fuisse cognovissem? cum vero reditum nostrum in gratiam uterque expectasset: quid in consulatu tuo frustra mecum egisti, quod me aut facere, aut sentire voluisses? quod mihi mandasti, cum te Puteolis prosequer, in quo non expectationem tuam diligentia mea vicerim? Quod si id est maxime astuti, omnia ad suam utilitatem referre: quid mihi tandem erat utilius, quid commodis meis aptius, quam hominis nobilissimi, atque honoratissimi conjunctio, cujus opes, ingenium, li-

beri,

beri , affines , propinqui mihi magno , vel or-  
namento , vel praesidio esse possent ? quæ tamēn  
ego omnia , in expetenda amicitia tua , non  
astutia quadam , sed aliqua potius sapientia se-  
cutus sum . Quid illa vincula , quibus quidem  
libentissime adstringor , quanta sunt ? studio-  
rum similitudo , suavitas consuetudinis , dele-  
ctatio vitæ , atque victus , sermonis societas ,  
litteræ interiores ? atque hæc domestica . Quid  
illa tandem popularia ? reditus illustris in gra-  
tiam , in quo ne per imprudentiam quidem er-  
rari potest sine suspitione perfidiæ , amplissimi  
sacerdotii collegium , in quo non modo amici-  
tiam violari apud majores nostros fas non erat,  
sed ne cooptari quidem sacerdotem licebat , qui  
cuiquam ex collegio esset inimicus . Quæ ut  
omittam tam multa , atque tanta , quis unquam  
tanti quemquam fecit , aut facere potuit , aut  
debuit , quanti ego Cn. Pompejum focerum filia-  
e tuæ ? Etenim , si merita valent , patriam , li-  
beros , salutem , dignitatem , memetipsum mi-  
hi per illum restitutum puto : si consuetudinis  
jucunditas : quæ fuit unquam amicitia consula-  
rium in nostra civitate conjunctior ? si ulla  
amoris , atque officii signa ; quid mihi ille non  
commisit ? quid non mecum communicavit ?  
quid de se in senatu , cum ipse abesset , per  
quemquam agi maluit ? quibus ille me rebus  
non ornatissimum voluit amplissime ? quæ deni-  
que ille facilitate , qua humanitate tulit con-  
tentionem meam pro Milone , adversantem in-  
terdum actionibus suis ? quo studio providit ,  
nequa me illius temporis invidia attingeret ,  
cum me consilio , cum auctoritate , cum armis  
denique texit suis ? quibus quidem temporibus  
hæc in eo gravitas , hæc animi altitudo fuit ,  
non modo ut Phrygi alicui , aut Lycaoni ,  
quod tu in legatis fecisti , sed ne summorum  
quidem hominum malevolis de me sermonibus  
crederet . Hujus igitur filius cum sit gener tu-  
us , cumque præter hanc conjunctionem affini-  
tatis , quam sis Cn. Pompejo carus , quamque  
jucundus , intelligam : quo tandem acimo in  
te esse debeo ? cum præsertim eas ad me is  
litteras miserit , quibus , etiam si tibi , cui sum

amicissimus, hostis essem, placarer tamen, totumque me ad ejus viri, ita de me meriti, voluntatem, nutumque converterem. Sed hæc hæcenus, pluribus enim etiam fortasse verbis, quam necesse fuit, scripta sunt. Nunc ea, quæ a me perfecta, quæque instituta sunt, cognosce. Atque hæc agimus, & agemus magis pro dignitate, quam pro periculo tuo: te enim, ut spero, propediem censorem audiemus: cujus magistratus officia, quæ sunt maximianimi, summi-que consilii, tibi diligentius, & accuratius, quam hæc, quæ nos de te agimus, cogitanda esse censeo. Vale.

## A R G U M E N T U M.

*Acceptis ab Appio lateris de absolutione Majestatis, gratulatur majorem in modum, & de ambitus judicio bene illi sperandum significat.*

XI. M. T. C. IMP. APPIO PULCHRO, UT SPERO, CENSORI S. D.

**C**UM essem in castris ad fluvium Pyramum, redditæ mihi sunt uno tempore a te Epistolæ duæ, quas ad me Q. Servilius Tarso miserat, earum in altera dies erat adscripta nonarum Aprilium: in altera, quæ mihi recentior videbatur, dies non erat. Respondebo igitur superiori prius, in qua scribis ad me de absolutione majestatis, de qua etsi permulto ante certior factus eram litteris, nuntiis, fama denique ipsa (nihil enim fuit clarius; non quo quisquam aliter putasset: sed nihil de insignibus ad laudem viris obscure nunciari solet) tamen eadem illa lætiora fecerunt mihi tuæ litteræ, non solum quia planius loquebantur, & uberius, quam vulgi sermo: sed etiam quia magis tibi videbar gratulari, cum de te ex te ipso audiebam. Complexus igitur sum cogitatione te absentem. Epistolam vero osculatus, & ipse mihi gratulatus sum, quæ enim a cuncto populo, a senatu, a iudicibus ingenio, industriæ, virtuti tribuuntur, quia mihi ipse assentior fortasse, cum ea esse in me fingo; mihi quoque ipsi tribui puto; nec tam gloriosum exitum tui iudicii exstitisse, sed tam pravam



vam inimicorum tuorum mentem fuisse mirabar. De ambitu vero, quid interest, inquires, an de maiestate? Ad rem nihil: alterum enim non attigisti, alteram auxisti. Veruntamen est maiestas (ut Sylla voluit) ne in quemvis impune declamare liceret: ambitus vero ita apertam vim habet, ut aut accusetur improbe, aut defendatur, qui enim facta, aut non facta largitio ignorari potest? tuorum autem honorum cursus cui suspectus unquam fuit? me miserum, qui non affuerim: quos ego risus excitassem! Sed de maiestatis iudicio duo mihi illa ex tuis litteris iucundissima fuerunt: unum, quod te ab ipsa rep. defensum scribis, quæ quidem etiam in summa bonorum, & fortium civium copia tueri tales viros deberet; nunc vero eo magis, quod tanta penuria est in omni vel honoris, vel ætatis gradu, ut tam orba civitas tales tutores complecti debeat: alterum, quod Pompeii, & Bruti fidem, benevolentiamque mirifice laudas. Lætor virtute, & officio cum tuorum necessariorum, meorum amicissimorum, tum maxime alterius omnium sæculorum, & gentium principis, alterius jampridem juventutis, celeriter (ut spero) civitatis. De mercenariis testibus a suis civitatibus notandis, nisi jam factum aliquid est per Flaccum, flecta me, cum per Asiam decedam. Nunc ad alteram Epistolam venio. Quod ad me quasi formam communium temporum, & totius reipub. misisti expressam; prudentia litterarum tuarum valde est mihi grata, video enim, & pericula leviora, quam timebam, & maiora præsidia; siquidem, ut scribis, omnes vires civitatis se ad Pompeii ductum applicaverunt: tuumque simul promptum animum, & alacrem perspexi ad defendendam rempub. mirificamque cepi voluptatem ex hac tua diligentia; quod in summis tuis occupationibus, mihi tamen reip. statum per te notum esse voluisti. Nam augurales libros ad commune utriusque nostrum otium servi: ego enim a te cum tua promissa per litteras flagitabam, ad urbem te otiosissimum esse arbitrabar, nunc tamen, ut ipse pollice-  
ris, pro auguralibus libris orationes tuas

confectas omnes expectabo. Tullius, cui mandata ad me dederas, non convenerat me: nec erat jam quisquam mecum tuorum præter omnes meus, qui sunt omnes tui. Stomachosiores meas litteras, quas dicas esse, non intelligo, bis ad te scripsi, me purgans diligenter, te leviter accusans in eo, quod de me cito credidisset; quod genus querelæ mihi quidem videbatur esse amici: sin tibi displicet, non utar eo post hac. Sed si, ut scribis, ex litteræ non fuerunt disertæ, scito meas non fuisse, ut enim Aristarchus Homeri versum negat, quem non probat: sic tu (libet enim mihi jocari) quod disertum non erit, ne puteris meum. Vale, & in censura, si jam es censor (ut spero) de proavo multum cogitato tuo.

## A R G U M E N T U M.

*Gratulatur de absolutione Ambitus: & querente Appio, quod accusatori suo Dolabella filiam collocavit, ostendit, id, se insciente, per suos factum.*

XII. M. T. C. IMP. APPIO PUL-  
CHRO S. D.

**G**ratulabor tibi prius (ita enim rerum ordo postulat) deinde ad me convertertar. Ego vero vehementer gratulor de judicio ambitus: neque id, quod nemini dubium fuit, absolutum te esse, sed illud, quod, quo melior civis, quo vir clarior, quo fortior amicus es, quoque plura virtutis, & industriæ ornamenta in te sunt, eo mirandum est magis, nullam ne in tabellæ quidem latebra fuisse absconditam malevolentiam, [quæ te impugnare auderet, non horum temporum, non horum hominum, atque morum negotium, nihil jam sum pridem admiratus magis. De me autem suscipe paulisper meas partes, & cum te esse finge, qui ego sum, si facile inveneris, quod dicas, noli ignorare hæitationi meæ. Ego vero velim mihi, Tullique meæ (sicut tu amicissime, & suavissime optas) prospere evenire ea, quæ me insciente facta sunt a meis; sed ita cecidisse, ut agerentur eo tempore, spero omnino cum aliqua felicitate, & opto: verumtamen plus  
me

me in hac spe tua sapientia, & humanitas consolatur, quam opportunitas temporis. Itaque quemadmodum expediam exitum hujus institutionis orationis, non reperio, neque enim tristius dicere quidquam debem ea de re, quam tu ipse omnibus optimis prosequeris: neque non me tamen mordet aliquid, in quo unum non vereor, ne tu parum perspicias ea, quæ gesta sunt, ab aliis esse gesta, quibus ego ita mandaram, ut cum tam longe abfuturus essem, ad me ne referrent, agerent, quod probassent. In hoc autem mihi illud occurrit: quid tu igitur, si affuisses? rem probassem: de tempore, nihil te invito, nihil sine consilio egissem tuo. Vides sudare me jamdudum laborantem, quomodo ea tuear, quæ mihi tuenda sunt, & te non offendam; leva me igitur hoc onere, numquam enim mihi videor tractasse causam difficiliorum, sed tamen sic habeto: nisi jam tunc omnia negotia cum summa tua dignitate diligentissime confecissem: tamen si nihil videbatur ad meum erga te pristinum studium addi posse; tamen, hac mihi affinitate renuntiata, non maiore equidem studio, sed acrius, apertius, significantius dignitatem tuam defendissem. Decedenti mihi, & jam imperio annuo terminato, ante diem 11. Non. Sext. cum ad Sidam navi accederem, & mecum Q. Servilius esset, litteræ a meis sunt redditæ, dixi statim Servilio (etenim videbatur esse commotus) ut omnia a me majora exspectaret. Quid multa? benevolentior tibi, quam fui, nihilo sum factus, diligentior quidem ad declarandam benevolentiam multo. Nam ut vetus nostra similitas antea stimulabat me, ut caverem, ne cui suspicionem fide reconciliatæ gratiæ darem: sic affinitas novam curam mihi affert cavendi, ne quid de summo meo erga te amore detractum esse videatur. Vale.

*Agit gratias Appio, quod amicos suos in supplicationibus sibi decernendis studiose iuvisset, pariaque illi officia pollicetur: quamquam sceler Dolabella sit, qui de Majestate, & ambitu illum accusaverat.*

## XIII. M.T.C. IMP. APPIO PULCHRO S. D.

**Q**Uasi divinatam, tali in officio fore mihi aliquando expectandum studium tuum, sic cum de tuis rebus gestis agebatur, inserviebam honori tuo, dicam tamen vera: plus, quam acceperas, reddidisti. Quis enim ad me non perscripsit, te non solum auctoritate orationis, sententia tua, quibus ego a te tali viro contentus eram, sed etiam opera, consilio, domum veniendo, conveniendis meis, nullum onus officii cuiquam reliquum fecisse? hæc mihi ampliora multo sunt, quam illa ipsa, propter quæ hæc elaborantur. **INSIGNIA** enim virtutis multi etiam sine virtute assequuti sunt: talium virorum tanta studia assequi sola virtus potest. Itaque mihi propono fructum amicitie nostræ, ipsam amicitiam, qua nihil est uberius, præsertim in iis studiis, quibus uterque nostrum devinctus est, nam tibi me profiteor & in repub. socium; de qua idem sentimus; & in quotidiana vita conjunctum cum iis artibus, studiisque, quæ colimus. Velim ita fortuna tulisset, ut quanti ego cunctes tuos facio, tanti tu meos facere posses: quod tamen ipsum, nescio quæ permotus animi divinatione, non despero; sed hoc nihil ad te: nostrum est onus. Illud velim sic habeas, quod intelliges, hæc renovata, additum potius aliquid ad meum erga te studium, cui nihil videbatur addi posse, quam quicquam esse detractum. Cum hæc scribebam, censorem jam te esse sperabam: eo brevior est hæc Epistola, & ut adversus magistrum morum modestior. Vale.

# LIBER IV. <sup>77</sup>

## ARGUMENTUM.

*Satis patebit hujus Epistolæ argumentum, si lector sciat, scriptam esse, cum Cæsar, pulso ex Italia Pompejo, bellum contra Pompeji legatos in Hispaniam pararet. Resp. Suspensio congressum petenti.*

I. M. T. C. SER. SULPITIO S. D.

**C**Ajus Trebatijs familiaris meus ad me scripsit, te ex se quassisse, quibus in locis essem, molestique ferre, quod me propter valetudinem tuam, cum ad urbem accessissem, non vidisses; & hoc tempore velle te mecum, si propius accessissem, de officio utriusque nostrum communicare. Utinam, Servi, salvis rebus (sic enim est dicendum) colloqui potuissemus inter nos: profecto aliquid opis occidenti reip. tulissemus. Cognoramus enim jam absens, te hæc mala multo ante providentem, defensorum pacis & in consulatu tuo, & post consulatum fuisse. Ego autem cum consilium tuum probarem, & idem ipse sentirem, nihil proficiebam, iero enim veneram: solus eram: rudis esse videbar in causa: incideram in hominum pugnandi cupidorum infanias. Nunc quoniam nihil jam videmur posse optulari reip. si quid est, in quo nobismetipsis consulere possimus, non ut aliquid ex pristino statu nostro retineamus, sed ut quam honestissime lugeamus: nemo est omnium, qui cum potius mihi, quam tecum, communicandum putem. Nec enim clarissimorum virorum, quorum similes esse debemus, exempla, neque doctissimorum, quos semper coluisti, præcepta te fugiunt. Atque ipse antea ad te scripsissem, te frustra in senatum, sive potius in conventum senatorum esse venturum, ni veritus essem, ne ejus animum offenderem, qui a me, ut te imitarer, petebat, cui quidem ego, cum me rogaret, ut adessem in senatu, eadem omnia, quæ a te de pace, & de Hispaniis dicta sunt, ostendi me esse dicturum. Rem vides quo modo se habeat; orbem terrarum, imperiis distributis, ardere bello; urbem sine legibus, sine judi-

judicio, sine jure, sine fide, relictam direptioni, & incendiis; itaque mihi venire in mentem nihil potest, non modo quod sperem, sed vix jam, quod audeam optare, sin autem tibi homini prudentissimo videtur utile esse, nos colloqui: quamquam longius etiam cogitabam ab urbe discedere, cujus jam etiam nomen invitus audio; tamen propius accedam. Trebatio mandavi, ut, si quid cum velles ad me mittere, ne recusaret: idque ut facias, velim: aut si quem tuorum fideliū voles, ad me mitteras: ne aut tibi exire ex urbe necesse sit, aut mihi accedere. Ego tibi tantum tribuo, quantum mihi fortasse arrogo: ut exploratum habeam, quicquid nos communi sententia stauerimus, id omnes homines probaturos. Vale.

## A R G U M E N T U M.

*Disputat, utrum manendum sit in Italia, an ad Pompeium in Graciam navigandum; quorum alterum utilius, alterum honestius ait esse. Concludit, difficilem esse deliberationem; se tamen discessionem magis probare.*

## II. M. T. C. S U L P I T I O. S. D.

**A**D III. Kal. Majas, cum essem in Cumanis, accepi tuas litteras: quibus lectis, cognovi non satis prudenter fecisse Philotimum; qui cum abs te mandata haberet (ut scribis) de omnibus rebus, ipse ad me non venisset; litteras tuas misisset: quas intellexi breviores fuisse, quod cum perlaturum putasses. Sed tamen, postquam litteras tuas legi, Postumia tua me convenit, & servius noster: his placuit, ut tu in Cumanum venires: qui etiam mecum, ut ad te scriberem, egerunt. Quod meum consilium exquiris, id est tale, ut capere facilius ipse possim, quam alteri dare; quid enim est, quod audeam suadere tibi, homini summa auctoritate, summaque prudentia? Si, quid rectissimum sit, quaerimus, perspicuum est, si, quid maxime expediat, obscurum; an ii sumus, qui profecto esse debemus, ut nihil arbitremur expedire, nisi quod rectum, honestumque sit: non potest esse dubium, quid faciendum nobis sit. Quod existimas meam causam conjunctam esse

cum

cum tua: certe similis in utroque nostrum, cum optime sentiremus, error fuit, nam omnia utriusque consilia ad concordiam spectaverunt, qua cum ipsi Casari nihil esset utilius, gratiam quoque nos inire ab eo defendenda pace arbitrabamur, quantum nos fefellerit, & quem in locum res deducta sit, vides: neque solum ea perspicis, quæ geruntur, quæque jam gesta sunt, sed etiam qui cursus rerum, qui exitus futurus sit. Ergo aut probare oportet ea, quæ sunt: aut interesse, etiamsi non probes, quarum altera mihi turpis, altera etiam periculosa ratio videtur. Restat, ut discedendum putem: in quo reliqua videtur esse deliberatio, quod consilium in discessu, quæ loca sequamur, omnino cum minor res nunquam accidit, tum ne deliberatio quidem difficilior, nihil enim constitui potest, quod non incurrat in magnam aliquam difficultatem. Tu, si videbitur, ita censeo facias: ut, si habes jam statutum, quid tibi agendum putes, in quo non sit conjunctum consilium tuum cum meo, supersedeas hoc labore itineris; sin autem est, quod mecum communicare velis, ego te expectabo, tu, quod tuo commodo fiat, quamprimum velim ventas, sicut intellexi, & Servio, & Postumia placere. Vale.

## A R G U M E N T U M.

*Sulpitium Achaia a Casare profectum consolatur in dolore, quæ ex Reip. calamitate capiebat. Scripta est epistola post victum Pompejum.*

## III. M. T. C. S U L P I C I O S. D.

**V**ehementer te esse sollicitum, & in communibus miseriis præcipuo quodam dolore angere, multi ad nos quotidie deferunt, quod quamquam minime miror, & meum quodammodo agnosco: doleo tamen, te, sapientia præditum prope singulari, non tuis bonis delectari potius, quam alienis malis laborare. Me quidem etiam nemini concedo qui majorem ex perniciæ, & peste reipub. molestiam traxerit; tamen multa jam consolantur, maximeque conscientia consiliorum meorum. Multo enim

enim ante, tanquam ex aliqua specula, prospexi tempestatem futuram: neq; id solum mea sponte; sed multo etiam magis monente, & denuntiante te, etsi enim absui magnam partem consulatus tui: tamen & absens cognoscebam, quæ esset tua in hoc pestifero bello cavendo, & prædicendo, sententia, & ipse assui primis temporibus tui consulatus, cum accuratissime monuisti senatum, collectis omnibus bellis civilibus, ut & illa timerent, quæ meminissent; & scirent, cum superiores, nullo tali exemplo antea in repub. cognito, tam crudeles fuissent, quicumque postea rempubl. oppressisset armis, multo intolerabiliorem futurum. NAM quod exemplo fit, id etiam jure fieri putant, & aliquid, atque adeo multa addunt, & afferunt de suo. Quare meminisse debes eos, qui auctoritatem & consilium tuum non sunt secuti, sua stultitia occidisse, cum tua prudentia salvi esse potuissent. Dices: Quid me ista res consolatur in tantis tenebris, & quasi parietinis reipub. Est omnino vix consolabilis dolor: tanta est omnium rerum amissio, & desperatio recuperandi, sed tamen & Caesar ipse ita de te judicat, & omnes cives sic existimant, quasi lumen aliquod extinctis cæteris, elucere sanctitatem, & prudentiam, & dignitatem tuam. Hæc tibi ad levandas molestias magna esse debent. Quod autem a tuis abes, ideo levius ferendum est, quod eodem tempore a multis, ac magnis molestis abes, quas ad te omnes perscriberem, nisi verer, ne ea cognosceres absens, quæ quia non vides, mihi videris meliore esse conditione, quam nos qui videmus. Hactenus existimo nostram consolationem recte adhibitam esse, quoad certior ab homine amicissimo fieres iis de rebus, quibus levare possent molestias tuas. Reliqua sunt in te ipso, neque mihi ignota, nec minima solatia, & ut quidem ego sentio, multo maxima, quæ ego ipse experiens quotidie sic probō, ut ea mihi salutem afferre videantur. Te autem ab initio ætatis, memoria teneo, summe omnium doctrinarum studiosum fuisse, omniaque, quæ a sapientissimis ad bene vivendum tradita essent, summo studio, curaque didicisse, quæ quidem vel optimis rebus,



rebus, & ului & delectationi esse possent: his vero temporibus habemus aliud nihil, in quo acquiescamus, nihil faciam insolenter; nec te, tali vel scientia vel natura præditum, hortabor, ut ad eas te referas artes quibus a primis temporibus ætatis studium tuum dedisti; tantum dicam (quod te spero approbaturum) me, posteaquam illi arti, cui studueram, nihil esse loci neque in curia, neque in foro viderim, omnem meam curam, atq; operam ad philosophiam contulisse, tuæ scientiæ excellenti, ac singulari non multo plus, quam nostræ, relictum est loci. Quare non equidem te moneo; sed mihi ita persuasi, te quoq; in iisdem versari rebus, quæ etiamsi minus prodesse, animum tamen a sollicitudine abducerent. Servius quidem tuus in omnibus ingenuis artibus, in primisq; in hac, in qua ego me scripsi acquiescere, ita versatur ut excellat: a me vero sic diligitur, ut tibi uni concedam, præterea nemini: mihiq; ab eo gratia refertur, in quo ille existimat, quod facile appareat, cum me colat, & observet tibi quoq; in eo se facere gratissimum. Vale.

## A R G U M E N T U M.

*Laudat Sulpitii scripta. Probat, quod Achajæ administranda curam non recusarit: scribit de Marcelli restitutione, de suis studiis, de Sulpitii filio, de rebus urbanis, de Casare.*

## I V. M. T. C. S U L P I T I O S. D.

**A**ccipio excusationem tuam, qua usus es, cur sæpius ad me litteras uno exemplo dedisses; sed accipio ex ea parte, quatenus aut negligentia, aut improbitate eorum, qui Epistolas accipiant, fieri scribis, ne ad nos perferantur, illam partem excusationis, qua te scribis, orationis paupertate (sic enim appellas) iisdem verbis Epistolas sæpius mittere, nec agnosco, nec probo, & ego ipse, quem tu per jocum (sic enim accipio) divitias orationis habere dicis, me non esse verborum admodum inopem agnosco. *ἐπιπορεύσας*, enim non necesse est, sed tamen idem (nec hoc *ἐπιπορεύμενος*) facile cedo tuorum scriptorum subtilitati, & elegantiae. Consilium tuum, quo te usum scribis, hoc Achajicum negotium non recusavisse,

viſe, cum ſemper probaviſſem, cum multo magis probavi, lectis tuis proximis litteris, omnes enim cauſæ, quas commemoras, juſtiſſimæ ſunt, tuæque & auctoritate, & prudentia digniſſimæ. Quod aliter cecidiſſe rem exiſtimas, atque opinatus ſis, id tibi nullo modo aſſentior, ſed quia tanta perturbatio, & confuſio eſt rerum, ita perculſa, & proſtrata ſœdiſſimo bello ſacient omnia, ut ſæpiſſimè locus, ubi ipſe ſit, miſerrimus eſſe videatur: propterea & tui te conſilii pœnitet, & nos, qui domi ſumus, tibi beati videmur. At contra nobis non tu quidem vacuus moleſtiis, ſed præ nobis beatus: atque hoc ipſo melior eſt tua, quam noſtra conditio, quod tu, quid doleas, ſcribere audeſ, nos ne id quidem tuto poſſumus; nec id victoris vitio, quo nihil moderatius, ſed ipſius victoriæ, quæ civilibus bellis ſemper eſt inſolens. Uno te vicimus, quod de Marcelli, collegæ tui ſalute paulo ante, quam tu, cognovimus: etiam mehercule, quod, quemadmodum ea res ageretur, vidimus, nam ſic ſac exiſtimes, poſt has miſerias, id eſt, poſtquam armis diſceptari cœptum eſt de iure publico, nihil eſſe actum aliud cum dignitate; nam & ipſe Cæſar, accuſata acerbitate Marcelli ( ſic enim appellabat ) laudatæque honorificenſiſſimæ & æquitate tua, & prudentia, repente præter ſpem dixit, ſe ſenatui roganti de Marcello, ne hominis quidem cauſa, negaturum. Fecerat autem hoc ſenatus, ut cum a L. Piſone mentio eſſet facta de Marcello, & cum C. Marcellus ſe ad Cæſaris pedes abjeciſſet, cunctus conſurgeret, & ad Cæſarem ſupplex accederet, noli quærere: ita mihi pulcher hic dies viſus eſt, ut ſpeciem aliquam viderem, videre quaſi reviviſcentis reipubl. Itaque, cum omnes ante me rogari gratias Cæſari egiſſent, præter Volcatium ( iſe enim, ſi eo loco eſſet, negavit ſe ſacurum fuiſſe ) ego rogatus mutavi meum conſilium: nam ſtatuëram, non mehercule inertia, ſed deſiderio priſtinæ dignitatis, in perpetuum tacere. Fregit hoc meum conſilium, & Cæſaris magnitudo animi, & ſenatus officium. Itaque pluribus verbis egi Cæſari gratias; meque metuo ne etiam in cæteris rebus honeſto otio privarim: quod

quod erat unicum solatium in malis; sed tamen, quoniam effugi ejus offensionem, qui fortasse, arbitraretur, me hanc rempubl. non putare, si perpetuo tacerem; modice hoc faciam, aut etiam intra modum; ut & illius voluntati, & meistudiis serviam. Nam, etsi a prima ætate me omnis ars, & doctrina liberalis, & maxime philosophia delectavit, tamen hoc studium quotidie ingravescit, credo & ætatis maturatione ad prudentiam, & his temporum vitiis, ut nullas res alia levare animum molestiis possit, a quo studio te abduci negotiis, intelligo ex tuis litteris. Sed tamen aliquid jam noctes te adjuvabunt. Servius tuus, vel potius noster summa me observantia colit; cujus ego cum omni probitate, summaque virtute, tum studiis, doctrinaque delector, is mecum sæpe de tua mansione, aut decessione communicat, adhuc in hac sum sententia nihil ut faciamus nisi quod maxime Cæsar velle videatur. Res sunt ejusmodi, ut, si Romæ sis, nihil te præter tuos delectare possit, dereliquis, nihil melius ipso est: ceteri, & cætera ejusmodi, ut, si alterutrum necesse sit, audire ea malis, quam videre. Hoc nostrum consilium nobis minime jucundum est, qui te videre cupimus: sed consulimus tibi. Vale.

#### ARGUMENTUM.

*Cum Cæsar bellum gereret in Hispania contra Pompeii liberos, periit Tullia ex partu, Ciceronis filia, jam a Dolabella dimissa. Consolatur Ciceronem Sulpitius, argumentis ad tollendum dolorem undecumq; collectis. De Sulpitio sic Quint. l. ix. Ser. Sulpitius insignem non immerito famam tribus orationibus meruit.*

#### V. Sulpitius Ciceronis. D.

**P**osteaquam mihi renuntiatum est de obitu Tullia filia tua; sane quam pro eo, ac debui, graviter molesteq; tui communemq; eam calamitatem existimavi: qui si istuc assuissem, neque tibi defuissem, coramq; meum dolorem tibi declarassem. Etsi genus hoc consolationis miserum, atq; acerbum est propterea quia per quos id fieri debet, propinquos ac familiares, ipsi pari molestia afficiunt.

afficiuntur, neq; sine lacrymis multis id conari queunt, ut magis ipsi videantur aliorum consolatione indigere, quam aliis posse suum officium præstare, tamen, quæ in præsentia mihi in mentem venerunt, decrevi brevi ad te perscribere; non, quod ea te fugere existimem, sed quod forsitan dolore impeditus minus ea perspicias. Quid est, quod tantopere te commoveat tuus dolor intestinus? cogita, quemadmodum adhuc fortuna nobiscum egerit, ea nobis erepta esse, quæ hominibus non minus, quam liberi, cara esse debent, patriam, honestatem, dignitatem, honores omnes, hoc uno incommodo addito, quid ad dolorem adjungi potuit, aut quid illis rebus exercitatus animus callere jam debet, atque omnia minoris æstimare? An illius vicem credo, doles? quoties in eam cogitationem necesse est & tu veneris, & nos sæpe incidimus, hisce temporibus non pessime cum iis esse actum, quibus sine dolore licitum est mortem cum vita commutare. Quid autem fuit, quod illam hoc tempore ad vivendum magno opere invitare posset, quæ res? quæ spes? quod animi solatium? ut cum aliquo adolescente primario conjuncta ætatem ageret? Licitum est tibi, credo, pro tua dignitate ex hac juventute generum diligere, cujus fidei liberos tuos te tuto committere putares. An ut ea liberos ex sese pareret, quos cum florentes videret, lataretur, qui rem a parente traditam per se tenere possent, honores ordinatim petitori essent in republica, in amicorum negotiis liberalitate sua uterentur? quid horum fuit, quod non prius, quam datum, ademptum sit? At vero malum est liberos amittere, malum, nisi hoc pejus sit, hæc sufferre, & perpeti. Quæ res mihi non medioerem consolationem attulit, volo tibi commemorare; si forte eadem res tibi minuere dolorem possit. Ex Asia rediens cum ab Ægina Megaram versus, navigarem, cæpi regiones circumcirca prospicere, post me erat Ægina, ante Megara, dextra Piræus, sinistra Corinthus; quæ oppida quodam tempore florentissima fuerunt, nunc prostrata, & diruta ante oculos jacent, cæpi egomet mecum sic cogitare: Hem, nos homunculi indignamur, si quis nostrum interiit, aut occisus est, quorum vita bre-

brevior esse debet; cum uno loco tot oppidorum cadavera projecta jaceant, visne tu te, Servi, cohibere, & meminisse hominem te esse natum? Crede mihi, cogitatione ea non mediocriter sum confirmatus; hoc idem, si tibi videretur, fac ante oculos tibi proponas; modo uno tempore tot viri clarissimi interierunt, de imperio præterea tanta diminutio facta est, omnes provincie conquassatae sunt, in unius mulierculæ animula si iactura facta sit, tantopere commoveris? quæ si hoc tempore non suum diem obisset, paucis post annis tamen ei moriendum fuit, quoniam homo nata fuerat. Etiam tu ab hisce rebus animum, & cogitationem tuam avoca: atque ea potius reminiscere, quæ digna tua persona sunt: illam, quamdiu ei opus fuerat, vixisse: una cum republica fuisse: te patrem suum prætorem, consulem, augurem vidisse: adolescentibus primariis nuptam fuisse: omnibus bonis prope perfunctam esse: cum republica occideret, vita excessisse, quid est, quod tu, aut illa, cum fortuna hoc nomine queri possitis? Denique noli te oblivisci Ciceronem esse, & eum, qui aliis consueveris præcipere, & dare consilium; neque imitari malos medicos, qui in alienis morbis proficiuntur se tenere medicinæ scientiam, ipsi se curare non possunt, sed potius, quæ aliis tute præcipere soles, ea tute tibi subijce, atque apud animum propone. NULLUS dolor est, quem non longinquitas temporis minuat, atque molliat, hoc te expectare tempus, tibi turpe est, ac non ei rei sapientia tua te occurrere. Quod si quis etiam inferis sensus est, qui illius amor in te fuit, pietasque in omnes suos, hoc certe illa te facere non vult, da hoc illi mortuæ: da cæteris amicis, & familiaribus, qui tuo dolore morrentur: da patriæ; ut, si qua in re opus sit, opera, & consilio tuo uti possit. Denique quoniam in eam fortunam devenimus, ut etiam huic rei nobis servandum sit: noli committere, ut quisquam sepuret non tam filiam, quam reipublicæ tempora, & aliorum victoriam. Plura me ad te de hac re scribere pudet, ne videar prudentiæ tuæ diffidere. Quare, si hoc unum pro-

proposuero, finem faciam scribendi. Vidimus aliquoties secundam pulcherrime te ferre fortunam, magnamque ex ea re laudem adipisci; fac aliquando intelligamus, adversam quoque te æque ferre posse; neque id majus, quam debeat, tibi onus videri; ne ex omnibus virtutibus hæc una tibi videatur deesse. Quod ad me attinet, cum te tranquilliore else animo cognovero, de his rebus, quæ hic geruntur, quemadmodumque se provincia habeat, certio rem faciam. Vale.

### ARGUMENTUM.

*Ad Servii consolationem respondet, suum dolorem, lectis illius litteris, aliqua ex parte lenitum; sed dolendi causas apud se & plures, & graviores esse, quam apud quemvis alium in simili calamitate.*

### VI. M. T. C. S U L P I T I O S. D.

**E**Go vero, Servi, vellem, ut scribis, in meo gravissimo casu affuisset. Quantum enim præsens me adjuvare potueris, & consolando, & promerique dolendo, facile ex eo intellico, quod tuis litteris tuis lectis, aliquantulum acquievi, nam & ea scripsisti, quæ levare luctum possent, & in me consolando non mediocrem ipse animi dolorem adhibuisti. Servius tamen tuus omnibus officiis, quæ illi tempori tribui potuerunt, declaravit, & quanti ipse me faceret, & quam suum talem erga me animum tibi gratum putaret fore, cujus officia jucundiora scilicet sæpe mihi fuerunt, numquam tamen gratiora, me autem non ratio tua solum, & societas pene agnitudo, sed etiam auctoritas consolatur; turpe enim esse existimo, me non ita ferre casum meum, ut tu, tali sapientia præditus, ferendum putas: sed opprimor interdum, & vix remitto dolori, quod ea me solatia deficiunt, quæ cæteris, quorum mihi exempla propono, simili in fortuna non defuerunt. Nam & Q. Maximus qui filium consularem, clarum virum, & magnis rebus gestis, amisit: & L. Paulus, qui duos septem diebus: & vester Gallus, & M. Cato, qui summo ingenio, summa virtute filium perdidit.

perdidit, iis temporibus fuerunt, ut eorum luctum ipsorum dignitas consolaretur ea, quam ex republica consequerentur, mihi autem amissis ornamentis iis, quæ ipse commemoras, quæque eram maximis laboribus adeptus, unum manebat illud solatium, quod creptum est. Non amicorum negotiis, non reipublicæ procuratorum impediabantur cogitationes meæ, nihil in foro agere libebat: aspicere curiam non poteram, existimabam id, quod erat, omnes me & industriæ meæ fructus, & fortunæ perdidisse; sed cum cogitarem hæc mihi tecum, & cum quibusdam aliis esse communia, & cum frangerem jam ipse me, cogeremque illa ferre toleranter, habebam quo confugerem, ubi conquiescerem, cujus in sermone, & suavitate omnes curas, doloresque deponerem. Nunc autem hoc tam gravi vulnere etiam illa, quæ consensisse videbantur, recrudescunt; non enim, ut tum me a republ. mœstum domus excipiebat, quæ levaret: sic nunc, domo mœrens, ad republ. confugere possum, ut in ejus bonis acquiescam. Itaque & domo absum, & foro: quod nec cum dolorem, quem a republ. capio, domus iam consolari potest, nec domesticum res republ. Quo magis te exspecto, teque videre quam primum cupio. Major mihi levatio afferri nulla potest, quam conjunctio consuetudinis, sermonumque nostrorum, quamquam sperabam tuum adventum (sic enim audiebam) appropinquare. Ego autem cum multis de causis te exopto, quamprimum videre, tum etiam, ut ante comitemur inter nos, qua ratione nobis traducendum sit hoc tempus, quod est totum ad unius voluntatem accommodandum, & prudentis, & liberalis; & (ut perspexisse mihi videor) nec a me alieni, & tibi amicissimi. Quod cum ita sit, magnæ tamen est deliberationis, quæ ratio sit ineunda nobis; non agendi aliquid, sed illius consensu, & beneficio quiescendi. Vale.

omnibus, sapiens tuum consilium, a multis etiam magni, ac fortis animi iudicatum: sed habet ista ratio (ut mihi quidem videtur) quandam modum; præsertim cum tibi nihil deesse arbitrer ad tuas fortunas omnes obtinendas, præter voluntatem. Sic enim intellexi, nihil aliud esse, quod dubitationem afferret ei, penes quem est potestas, nisi quod vereretur, ne tu illud beneficium omnino non putares; de quo quid sentiam, nihil attinet dicere, cum appareat, ipse quid fecerim; sed tamen, si jam ita constituisses, ut abesse perpetuo mallet, quam ea, quæ nolles, videre: tamen id cogitare deberes, ubicumque es, te fore in eius ipsius, quem fugeres, potestate; qui si facile passurus esset, te carentem patria, & fortunis tuis quiete, & libere vivere: cogitandum tibi tamen esset, Romæ ne, & domi tuæ, cuiusmodi res esset, an Mytilenis, aut Rhodi mallet vivere. Sed, cum ita late pateat ejus potestas, quem veremur, ut terrarum orbem complexa sit, nonne magis sine periculo domi tuæ esse, quam cum periculo alienæ? equidem, etiam si oppetenda mors esset, domi, atque in patria mallet, quam in externis, atque alienis locis. Hoc idem omnes, qui te diligunt, sentiunt; quorum est magna pro tuis maximis, clarissimisque virtutibus multitudo. Habemus etiam rationem rei familiaris tuæ, quam dissipari nolumus; nam, cum nullam potest accipere injuriam, quæ futura perpetua sit; propterea quod neque is, qui tenet rempubl. pateretur, neque ipsa respubl. tamen impetum prædonum in tuas fortunas fieri nolo, si autem, qui, essent, auderem scribere) nisi te intelligere considerem. Hic pro te unus sollicitudines, unius etiam multæ, & assidue lacrymæ C. Marcelli, fratris optimi, deprecantur, nos cura, & dolore proximi sumus, precibus adiores, quod ius adeundi, cum ipsi deprecatore eguerimus, non habemus, gratia tantum possumus, quantum videri: sed tamen consilio, studio Marcello non desumus: a tuis reliquis non adhibemur: ad omnia parati sumus. Vale.

*consiglio Dagli altri  
vostri.*

E 2 A R.



## A R G U M E N T U M.

*Et hæc epistola eo spectat, ut Marcello reditus in patriam persuadeatur.*

## VIII. M. T. C. MARCELLO S. D.

**N**Eque monere te audeo, præstanti prudentia virum; nec confirmare, maximi animi hominem, virumque fortissimum: consolari vero nullo modo; nam si ea, quæ acciderunt, ita fers, ut audio: gratulari magis virtuti debeo, quam consolari dolorem tuum; sin te tanta mala reipublicæ frangunt, non ita abunde ingenio, ut te consoletur, quum ipse me non possim. Reliquum est igitur, ut tibi mecum omni re eum præbeam, præstemque, ut ad omnia, quæ tui velint, ita adsim præsto, ut me non solum omnia debere tua causa, quæ possum, sed ea quoque, quæ non possum, putent. Illud tamen vel tu me monuisse, vel censuisse puta, vel propter benevolentiam tacere non potuisse; ut quod ego facio, tu quoque animi inducas, si sit aliqua respublica, in ea te esse oportere iudicio omnium, teque principem, necessitate cedentem temporis: sin autem nulla sit, hunc tamen aptissimum esse etiam ad exulandum locum. Si enim libertatem sequimur; qui locus hoc dominatu vacat? sin qualemcumque locum; quis est domesticæ sede iucundior? Sed (mihi crede) etiam is, qui omnia tenet, favet ingeniis: nobilitatem vero, & dignitatem hominum, quantum ei res, & ipsius causa concedit, amplectitur. Sed plura, quam statueram, redeo ego ad unum illud, me tuum fore cum tuis, si modo erunt tui: sin minus, me certe in omnibus rebus satis nostræ conjunctioni, amorique facturum. Vale.

## A R G U M E N T U M.

*Reditum in patriam suadet, ut supra. Argumenta ex intima arte depromit ad persuadendum firmissima.*

## IX. M. T. C. M. MARCELLO S. D.

**E**Tu per paucis ante diebus dedisti a Q. Mun-  
tio litteras ad te pluribus verbis scriptas.

quibus declaraveram, quo te animo censerem  
 esse oportere, & quid tibi faciendum arbitrarer:  
 tamen, cum Theophilus, libertus tuus, profici-  
 sceretur, cujus ego fidem erga te, benevolen-  
 tiamque perspexeram, sine meis litteris eum ad  
 te venire nolui. Iisdem igitur te de rebus eti-  
 am atque etiam hortor, quibus superioribus lit-  
 teris hortatus sum, ut in ea republica, quæ-  
 cumque est, quam primum velis esse; multa vi-  
 debis fortasse, quæ nolis; non plura tamen,  
 quam audis quotidie. Non est porro tuum, uno  
 sensu solum oculorum moveri: cum illud idem  
 auribus percipias, quod etiam majus videri so-  
 let, minus laborare. At tibi ipsi dicendum erit  
 aliquid, quod non sentias, aut faciendum, quod  
 non probes. Primum, TEMPORI cedere, id-  
 est necessitati parere, semper sapientis est habi-  
 tum; deinde, non habet, ut nunc quidem est,  
 id vitii res; dicere fortasse quæ sentias, non li-  
 cet, tacere plane licet; omnia enim delata ad u-  
 num sunt; is utitur consilio ne suorum quidem,  
 sed suo, quod non multo secus fieret, si is rem-  
 publ. teneret, quem sequuti sumus. An qui in  
 bello, cum omnium nostrum conjunctum esset, re-  
 riculum suo cerneret, certorum hominum mini-  
 me prudentium consilio uteretur, eum magis com-  
 munem censemus in victoria futurum fuisse,  
 quam incertis in rebus fuisset? & qui nec, te  
 consule, tuum sapientissimum consilium sequu-  
 tus esset, nec fratre tuo consulatum ex auctori-  
 tate tua gerente, nobis auctoribus uti voluerit;  
 nunc omnia tenentem, nostras sententias desi-  
 deraturum censes fuisse? OMNIA sunt mise-  
 ra in bellis civilibus, quæ majores nostri ne  
 semel quidem, nostra ætas sæpe jam sensit: sed  
 MISERUS nihil, quam ipsa victoria, quæ  
 etiam si ad meliores venit, tamen eos ipsos se-  
 rociore, impotentioresque reddit: ut, etiam si  
 natura tales non sint, necessitate esse cogantur.  
 MULTA enim victori eorum arbitrio, per  
 quos vicit, etiam invito facienda sunt. An tu  
 non videbas mecum simul, quam illa crudelis  
 esset futura victoria? igitur tunc quoque patria  
 careres, ne, quæ nolles, videres? Non, inqui-  
 es: ego enim ipse tenerem opes, & dignitatem

meam, at erat tua virtutis, in minimis rebus ponere, de republica vehementius laborare. Deinde, qui finis istius consilii est? nam adhuc & factum tuum probatur, & ut in tali re, etiam fortuna laudatur: factum, quod & initium belli necessario sequutus sis, & extrema sapienter persequi nolueris: fortuna, quod honesto otio tenueris & statum, & famam dignitatis tuae, nunc vero nec locus tibi ullus dulcior esse debet patria: nec eam diligere minus debēs, quod deformior est, sed misereri potius: nec eam multis claris viris orbatam privare etiam adspectu tuo. Denique, si fuit magni animi, non esse supplicem victori: vide, ne superbi sit, & aspernari ejusdem liberalitatem: & si sapientis est carere patria, dura non desiderare; & si re publica non possis frui, statum est nolle privata. Caput illud est, ut, si ista vita tibi commodior esse videatur, exigitandum tamen sit, ne tutior non sit, magna gladiatorum est licentia: sed in externis locis minor etiam ad facinus verecundia, mihi salus tua tantae curae est, ut Marcello fratri tuo aut par, aut certe proximus sim. Tuum est consulere temporibus, & incolumitati, & vitae, & fortunis tuis. Vale.

## A R G U M E N T U M.

*Mortatur, ut reditum maturet, jam enim de reditu persuaserat.*

X. M. T. C. MARCELLO S. D.

**E**tsi nihil novi, quod ad te scriberem, & habebam; magisque litteras tuas jam expectare incipiebam, vel te potius ipsum: tamen, cum Theophilus proficisceretur, non potui nihil ei litterarum dare. Cura igitur, ut quam primum venias: venies enim (mihi crede) expectatus, neque solum nobis, idest tuis, sed prorsus omnibus. Venit enim mihi in mentem, subvereri interdum, ne te delectet tarda decessio, quod si nullum haberes curam, nisi oculorum, prorsus tibi ignoscerem, si quosdam nolles videre, sed, cum leviora non multo essent, quae audirentur, quam quae viderentur.

rea-

rentur, suspicarer autem multum interesse rei familiaris tuæ, te quamprimum venire, idque in omnes partes valere: putavi ea de re te esse admonendum. Sed quoniam, quod mihi placeret, ostendi: reliqua tu pro tua prudentia considerabis: me tamen velim, quod ad tempus te expectentur, certiore facias. Vale.

## A R G U M E N T U M.

*Significat, se in patriam rediturum, commotum consilio, & auctoritate Ciceronis,*

## XI. M. MARCELLUS CICERONI S. D.

**P**urimum valuisse apud me tuam semper auctoritatem, cum in omni re, tum in hâc maxime negotio, potes existimare, cum mihi C. Marcellus frater, amantissimus mei, non solum consilium daret, sed precibus quoque me obsecraret; non prius mihi persuadere potuit, quam tuis est effectum litteris, ut uterer vestro potissimum consilio. Res quemadmodum facti, vestrae litterae mihi declarant: gratulatio tua, etsi est mihi probatissima, quod ab optimo sit animo: tamen hoc mihi multo jucundius est, & gratius, quod in summa paucitate amicorum, propinquorum, ac necessariorum, qui verè meæ saluti faverent, te cupidissimum mei, singularemque mihi benevolentiam præstitisse cognovi. Reliqua sunt ejusmodi, quibus ego, quoniam hæc erant tempora, facile, & æquo animo carebam: hoc vero ejusmodi esse statuo, ut sine talium vitorum, & amicorum benevolentia neque in adversa, neque in secunda fortuna quisquam vivere possit. Itaque in hoc ego mihi gratulor, tu vero, ut intelligas, homini amicissimo te tribuisse officium, re tibi præstabo. Vale.

## A R G U M E N T U M.

*Marcellum a Magio interfectum, suaque erga mortuum officia significat.*

## XII. SERVIUS CICERONI S. D.

**E**tsi scio non jucundissimum me nuntium vobis allaturum: tamen quoniam C. A.

SUS, & natura in bonis dominatur, visum est faciendum, quoquo modo res se haberet, vos certiores facere. Ad xi. Kalend. Jun. cum ab Epidauro, Piræum navi advectus essem, ibi Marcellum collegam nostrum conveni, eumque diem ibi consumpsi, ut cum eo essem, Postero die, cum ab eo digressus essem, eo consilio, ut ab Athenis in Bœotiam irem, reliquamque jurisdictionem absolverem: ille, ut agebat, supra Maleas I aliam versus navigaturus erat, postridie ejus diei, cum ab Athenis proficisci in animo haberent, circiter horam decimam noctis Posthumius familiaris ejus ad me venit, & mihi nuntiavit, Marcellum collegam nostrum post cœnæ tempus a P. Magio Chilone, familiari ejus, pugione percussum esse, & duo vulnera accepisse, unum in stomacho, alterum in capite secundum autem; sperare tamen eum vivere posse: Magium seipsum interfecisse: postea se a Marcello ad me missum esse, qui hæc nuntiaret, & rogaret uti cogerem medicos, coegi; & e vestigio eo sum profectus prima luce. Cum non longe a Piræo abessem, pater Acidini mihi obviam venit cum codicillis, in quibus erat scriptum, paulo ante lucem Marcellum diem tuum obiisse. Ita vir clarissimus ab homine terribissimo acerbissima morte est affectus; & cui inimici propter dignitatem pepercerant, inventus est amicus, qui ei mortem afferret. Ego tamen ad tabernaculum ejus perrexi: inveni duos libertos, & pauculos servos, reliquos agebant profugisse metu perterritos, quod dominus eorum ante tabernaculum interfectus esset; coactus sum in eadem illa lectica, qua ipse delatus eram, meisque lecticariis in urbem eum referre; ibique pro ea copia, quæ Athenis erat, funus ei satis amplum faciendum curavi. Ab Atheniensibus locum sepulturæ intra urbem ut darent, impetrare non potui, quod religione se impediri dicerent: neque tamen id antea cuiquam concesserant, quod proximum fuit, uti in quo vellemus gymnasio eum sepeliremus, nobis permiserunt, nos in nobilissimo orbis terrarum gymnasio Academicæ locum delegimus; ibique eum combussimus; posteaque curavimus,

ut iidem Athenienses in eodem loco monumen-  
tum ei marmoreum faciendum locarent; ita quæ  
nostra officia fuerunt, pro collegio, & propin-  
quitate, & vivo, & mortuo omnia ei præstiti-  
mus. Vale. Datæ pridie Kal. Jun. Athenis.

A R G U M E N T U M.

*Exultantem Nigidium spe redditus consolans, suam illi operam, suumque officium pollicetur præterea rem familiarem, in extremo hortatur, ut bono animo, fortique sit in utramque partem.*

XIII. M. D. C. P. NIGIDIO FIGULO S. D.

**Q**Uærenti mihi jamdiu, quid ad te potissimum scriberem, non modo certa res ulla, sed ne genus quidem litterarum usitatum veniebat in mentem; unam enim partem, & consuetudinem earum epistolarum, quibus secundis rebus uti solebamus, tempus eripuerat; perfecteratque fortuna, ne quid tale scribere possem, aut omnino cogitare. Relinquebatur triste quoddam, & miserum, & his temporibus contentaneum genus litterarum, id quoque deficiebat me, in quo debebat esse aut promissio auxilii alicujus, aut consolatio doloris tui: quod pollicerer, non erat. Ipse enim pari fortuna abjectus, aliorum opibus, casus meos sustentabam; sæpiusque mihi veniebat in mentem queri, quod ita viverem, quam gaudere, quod viverem. Quamquam enim nulla me ipsum privatim perculit insignis injuria; nec mihi quicquam tali tempore in mentem venit optare, quod non ultro mihi Cæsar detulerit; tamen nihilo minus eis conficior curis, & hoc ipsum, quod maneam in vita, peccare me existimem, careo enim cum familiarissimis multis, quos aut mors eripuit nobis, aut distraxit fuga, cum omnibus amicis, quorum benevolentiam nobis conciliarat per me quondam, te socio, defensa republ. versorque in eorum naufragiis, & bonorum direptionibus: nec audio solum, quod ipsum esset miserum,

# EPIST. FAMIL.

sed etiam ~~dispersum~~ video, quo nihil est acer-  
 bius, eorum fortunas dissipari, quibus nos  
 olim adiutoribus illud incendium extinximus  
 & in qua urbe modo gratia, auctoritate, &  
 gloria floruimus, in ea nunc iis quidem omni-  
 bus caremus. Obtinemus ipsius Caesaris sum-  
 mam erga nos humanitatem: sed ea plus non  
 potest, quam vis, & mutatio omnium rerum,  
 atque temporum. Itaque orbus iis rebus omni-  
 bus, quibus & natura me, & voluntas, & con-  
 suetudo assuefecerat, cum ceteris, ut quidem  
 videor, tum mihi ipse displiceo; natus enim  
 ad agendum semper aliquid dignum viro, nunc  
 non modo agendi rationem nullam habeo, sed  
 ne cogitandi quidem, & qui antea aut obscu-  
 ris hominibus, aut etiam fontibus opitulari  
 poteram, nunc P. Nigidio, uni omnium do-  
 tissimo, & sanctissimo, & maxima quondam  
 gratia, & mihi certe amicissimo, ne benigne  
 quidem polliceri possum. Ergo hoc ereptum est  
 litterarum genus. Reliquum est, ut te conso-  
 ler, & afferam rationes, quibus te a molestis  
 coner abducere. At ea quidem facultas vel  
 alterius consolandi in te summa est, si um-  
 quam in ullo fuit. Itaque eam partem, quae  
 ab exquisita quadam ratione, & doctrina pro-  
 ficiscitur, non attingam, tibi totam relin-  
 quam. Quid sit forti, & sapienti homine di-  
 gnum, quid gravitas, quid altitudo animi,  
 quid actus tua vita, quid studia, quid artes,  
 quibus a pueritia floruisti, a te flagitent, tu  
 videbis; ego, quod intelligere, & sentire,  
 quia sum Romae, & quia curo, attendoque,  
 possum id tibi affirmo, te in istis molestiis,  
 in quibus es hoc tempore, non diutius futu-  
 rum: in iis autem, in quibus etiam nos su-  
 mus, fortasse semper fore. Videor mihi per-  
 spicere, primum ipsius animum, qui plurimum  
 potest, propensum ad salutem tuam, non scri-  
 bo hac temere, quo minus familiaris sum,  
 hoc sum ad investigandum curiosior. Quo fa-  
 cilius, quibus est iratior, respondere tristius  
 possit, hoc est adhuc tardior ad te molestia  
 liberandum, familiares vero ejus, & ii qui-  
 dem, qui illi jucundissimi sunt, mirabiliter  
 de

*non non sua faramenū, che un giorno  
non fosse*

L I B E R. I V. 97

De te & loquuntur, & sentiunt. Accedit eadem vulgi voluntas, vel potius consensus omnium; etiam illa, quæ minimum nunc quidem potest, sed possit necesse est, resp. quascunque vires habebit, ab iis ipsis, quibus tenetur, de te propediem ( mihi credere ) impetrabit. Redeo igitur ad id, ut jam tibi etiam pollicear aliquid, quod primo omiseram; nam & complectar ejus familiarissimos, qui me admodum diligunt, multumque mecum sunt; & in ipsius me consuetudinem; quam adhuc meus pudor mihi claudit, insinuabo: & certe omnes vias persequar, quibus putabo ad id, quod volumus, pervenire posse, in hoc toto genere plura faciam, quam scribere audeo. Cetera, quæ tibi a multis prompta esse certo scio, a me sunt paratissima, nihil in re familiari mea est, quod ego meum malim esse; quam tuum, hæc de re, & de hoc genere toto hoc scribo parcus, quod ~~id~~ ( id quod ipse confido ) sperare malo, te esse usurum tuis. Extremum illud est, ut te hortet, & obiecrem, animo ut in maximo sis, nec ea solum memineris, quæ ab illis magnis viris accepisti: sed illa, etiam, quæ ipse ingenio, studioque peperisti, quæ si colliges, & sperabis omnia optime, & quæ accident, quascunque erunt, sapienter feres, sed hæc tu melius, vel optime omnium. Ego, quæ pertinere ad te intelligam, studiosissime omnia diligentissimeque curabo, tuorumque tristissimo meo tempore meritorum erga me memoriam conservabo. Vale.

A R G U M E N T U M.

*Respondet ad duplicem Plancii gratulationem de recuperata Ciceronis dignitate, & de novis ejusdem nuptiis cum Publia, divortio jam facto cum Terentia.*

XIV. M. T. C. C N. P L A N C I O S. D.

**B**inas a te accepi literas, Corcyra datas: quarum alteris mihi gratulabare, quod audires meam me pristinam dignitatem obtinere: alteris dicebas, te velle, quæ egissem, bene,



ac feliciter evenire. Ego autem, si dignitas est bene de repub. sentire, & bonis viris probare, quod sentias; obtineo dignitatem meam: sin autem in eo dignitas est, quod sentias, aut re efficere, si possis, aut denique libera oratione defendere: ne vestigium quidem ullum est reliquum nobis dignitatis: agiturque præclare, si nosmetipsos regere possimus: ut ea, quæ partim jam adunt, partim impendent, moderate feramus, quod est difficile in eiusmodi bello; cujus exitus ex altera parte eadem ostendat, ex altera servitutem. Quo in periculo non nihil me consolatur, cum recordor, hac me tum vidisse, cum secundas etiam res nostras, non modo adversas pertimescebam: videbamque, quanto periculo de iure publico disceptaretur armis. Quibus si ii vicissent, ad quos ego, pacis ipse, non belli cupiditate adductus, accesseram, intelligebam tamen, & iratorum hominum, & cupidorum, & insolentium quam crudelis esset futura victoria: sin autem victi essent, quantus interitus esset futurus civium partim amplissimorum, partim etiam optimorum, qui me hæc prædicentem, atque optime consulentem salutis suæ, malebant nimium timidum, quam satis prudentem existimari. Quod autem mihi de eo, quod egerim, gratularis; te ita velle certo scio, sed ego tam misero tempore nihil novi consilii cepissem, nisi in reditu meo nihilo meliores res domesticas, quam rempubl. offendissem. Quibus enim pro meis immortalibus beneficiis carissima mea salus, & mea fortunæ esse debebant; cum propter eorum scelus nihil mihi intra meos parietes tutum, nihil insidiis vacuum viderem, novarum me necessitudinum fidelitate contra veterum perfidiam muniendum putavi. Sed de nostris rebus satis, vel etiam nimium multa. De tuis, velim, ut eo sis animo, quo debes esse: id est, ut ne quid tibi præcipue timendum putes; si enim status erit, an quis civitatis, quicumque erit, te omnium periculorum video expertem fore, nam alteros tibi jam placatos esse intelligo, alteros nunquam iratos fuisse. De mea autem in te voluntate sic velim iudices, me, quibuscunque rebus opus esse intelligam, quamquam videam, quis sum hoc tempore, & quid possim, opera tamen, &

consilio, studio quidem certe, rei, famæ, salutis tuæ præsto futurum. Tu, velim, & quid agas, & quid acturum te putes, facias me quam diligentissime certiores. Vale.

A R G U M E N T U M.

*Hortatur, ut communem fortunam fortiter ferat.*

XV. M. T. C. CN. P L A N C I O S. D.

**A** Ccepi perbreves tuas litteras, quibus id, quod scire cupiebam, cognoscere non potui, cognovi autem id, quod mihi dubium non fuit; nam, quam fortiter ferres communes miseras, non intellexi: quam me amares, facile perspexi, sed hoc scieram; illud si scissem, ad id meas litteras accommodassem. Sed tamen, etsi ante scripsi, quæ existimavi scribere oportere; tamen hoc tempore breviter commonendum putavi, ne quo periculo te proprio existimares esse, in magno omnes, sed tamen in communi sumus. Quare non debes, aut propriam fortunam, & præcipuam postulare, aut communem recusare; quapropter eo animo simus inter nos, quo semper fuimus, quod de te sperare, de me præstare possum. Vale.



L I B E R V.

A R G U M E N T U M.

*Queritur Metellus Celer, qui Galliam Proconsul regebat, Metellum Nepotem, fratrem suum, a Cicerone oppugnatum. Videtur esse paulo arrogantior epistola.*

I. Q. METELLUS. Q. F. CELER PROCONS. M. T. CICERONI S. D.

**S**I vales, bene est. Existimaram, pro mutuo inter nos animo, & pro reconciliata gratia, neque me absentem ludibrio læsum iri, nec Metellum fratrem, ob dictum, capite; ac fortunis per te oppugnatum iri, quem si parum pudor  
ipsum

ipsius defendebat. vel familiæ debebat nostræ dignitas, vel meum studium erga vos, remque publicam sublevare. Nunc video illum circumventum, me desertum a quibus minime conveniebat. Itaque in luctu, & squalore sum, qui bellum gero. Quæ quoniam nec ratione, nec majorum nostrorum clementia administrastis, non erit mirandum, si vos pœnitebit. Te tam mobili in me meosque esse animo, non sperabam. Me interea nec domesticus dolor, nec cujusquam injuria a republ. abducat. Vale.

## A R G U M E N T U M.

*Excusat se de Metello Nepote: suaque in ipsum Celerem merita commemorat.*



M. T. C. Q. METELLO, Q. F. CELERI.  
PROCOS. S. D.

**S**I tu, exercitusque valetis, bene est. scribis ad me, te existimasse, pro mutuo inter nos animo, & pro reconciliata gratia nunquam te a me ludibrio læsum iri. Quod cujusmodi sit, satis intelligere non possum: sed tamen suspicor ad te esse allatum, me, in senatu cum disputarem, permultos esse, qui temp. a me conservatam dolerent, dixisse; a te propinquos tuos, quibus negare non potuisses, impetrasse, ut ea, quæ statuisses tibi in senatu de mea laude esse dicenda, reticeres. Quod cum dicerem, illud adjunxi; mihi tecum ita dispartitum officium fuisse in reip. salute retinenda, ut ego urbem a domesticis insidiis, & ab intestino scelere, tu Italiam & ab armatis hostibus, & ab occulta conjuratione defenderes: atque hanc nostram tanti, & tam præclari muneris societatem a tuis propinquis labefactatam: qui, cum tu a me rebus amplissimis, atque honorificentissimis ornatus esses, timuissent, ne qua mihi pars abs te voluntatis mutue tribueretur. Hoc in sermone, cum a me exponeretur, quæ mea expectatio fuisset orationis tuæ, quantoque in errore versatus essem: visa est oratio non injucunda, & mediocrius quidam est risus consequutus, non in te, sed magis in errorem meum,

um, & quod me abs te cupisse laudari, aperte, atque ingenue confitebar. Jam hoc non potest in te non honorifice esse dictum, me in clarissimis meis, atque amplissimis rebus, tamen aliquod testimonium tuæ vocis habere voluisse. Quod autem ita scribis, pro mutuo inter nos animo: quid tu existimes esse in amicitia mutuum, nescio: equidem hoc arbitror, cum par voluntas accipitur, & redditur. Ego si hoc dicam, me tua causa prætermisisse provinciam, tibi ipse levior videar esse: meæ enim rationes ita tulerunt, atque ejus mei consilii majorem in dies singulos fructum, voluptatemque capio, illud dico, me, ut primum in concione provinciam deposuerim, statim, quemadmodum eam tibi traderem, cogitare cœpisse. Nihil dico de sortitione vestra; tantum te suspicari vole, nihil in ea re per collegam meum, me insciente, esse factum. Recordare cetera, quam cito senatum illo die, facta sortitione, coegerim, quam multa de te verba fecerim; cum tu ipse mihi dixisti, orationem meam non solum in te honorificam; sed etiam in collegas tuos contumeliosam fuisse. Jam illud S. C. quod eo die factum est, ea præscriptione est, ut dum id extabit, officium meum in te obscurum esse non possit. Postea vero quam profectus es, velim recordere, quæ ego de te in senatu egerim, quæ in concionibus dixerim, quas ad te litteras miserim. Quæ cum omnia collegeris, tu ipse velim judices, satisne videatur his omnibus rebus tuus adventus, cum proxime Romanam venisti, mutuo respondisse. Quod scribis dereconciliata nostra gratia, non intelligo, cur reconciliatam esse dicas, quæ nunquam immutata est. Quod scribis, non oportuisse Metellum, fratrem tuum, ob dictum a me oppugnari, primum hoc velim existimes, animum mihi istum tuum vehementer probari, & fraternam plenam humanitatis, ac pietatis voluntatem; deinde, si qua ego in te fratri tuo reip. causa restiterim, peto, ut mihi ignoscas, tam enim sum amicus reip. quam qui maxime. Si yero meam salutem contra illius impetum in me crudelissimum defenderim, satis

habeas, nihil me etiam tecum de tui fratris injuria conqueri, quem egocum comperissem, omnem sui tribunatus conatum in meam perniciem parare, atque meditari; egi cum Claudia uxore tua, & cum vestra sorore Mutia (cujus erga me studium pro Cn. Pompeji necessitudine multis in rebus perspexeram) ut eum ab illa injuria deterrent. Atque ille (quod te audisse credo) pridie Kal. qua injuria nemo unquam in aliquo magistratu improbissimus civis affectus est, ea me consulem affecit, cum reipub. confectussem; atque abeuntem magistratu concionis habenda potestate privavit, cujus injuria mihi tamen honori summo fuit; nam cum ille nihil mihi, nisi ut jurarem permitteret: magna voce juravi verissimum, pulcherrimumque jussurandum, quod populus item magna voce me vere jurasse, juravit. Hac accepta tam insigni injuria, tamen illo ipso die misi ad Metellum communes amicos, qui agerent cum eo, ut ab illa mente desisteret, quibus ille respondit, sibi non esse integrum, etenim paulo ante in concione dixerat, eis qui in alios animadvertisset indicia causa, dicendi ipsi potestatem fieri non oportere. Hominem gravem, & civem egregium, qui, qua poena senatus, consensu bonorum omnium eos affecerat, qui urbem incendere, magistratus ac senatum trucidare, bellum maximum conflare voluissent, eadem dignum judicaret eum, qui curiam eade, urbem incendiis, Italiam bello liberasset. Itaque ego Metello fratri tuo praesenti restiti, nam in senatu Kal. Jan. sic cum eo de republ. disputavi, ut sentiret sibi cum viro forti, & constanti esse pugnandum. Ad III. non. Jan. cum agere cepisset, tertio quoque verbo orationis suae me appellabat, mihi minabatur: neque illi quidquam deliberatius fuit, quam me, quacumque ratione posset, non judicio, neque disceptatione, sed vi, atque impressione evertere. Hujus ego temeritati si virtute, atque animo non restitissem, quis esset, qui me in consalatu non, casu potius existimaret, quam consilio fortem fuisse: Hac si Metellum cogitare de me nescisti, debes existimare, te maximis de rebus a fratre esse celatum; sin aliquid impertivit tibi sui consilii, lenis a te, & facilis existima-

stimari debeo; quin nihil tecum de his ipsis rebus  
exoptulem, etsi intelligis, non me dicto Metelli  
(ut scribis) sed consilio eius, animoque in me  
inimicissimo esse commotum. Cognosce nunc hu-  
manitatem meam: si humanitas appellanda est in  
acerbissima iniuria remissio animi, ac dissolu-  
tio. Nulla est a me unquam sententia dicta in  
fratrem tuum, quotiescumque aliquid est actum,  
sedens iis assenti, qui mihi lenissime sentire  
visi sunt. Addam illud etiam, quod jam ego  
curare non debui, sed tamen fieri non moleste  
tuli, atque etiam, ut ita fieret, pro mea parte  
adjuvi; ut S. C. meus inimicus, quia tuus fra-  
ter erat, sublevaretur. Quare non ego oppugna-  
vi fratrem tuum, sed fratri tuo repugnaui: nec  
in te (ut scribis) animo fui mobili, sed ita  
stabili, ut in mea erga te voluntate, etiam de-  
fessus ab officiis tuis, permanerem. Atque hoc  
ipso tempore tibi, pene minitanti nobis per  
litteras, hoc rescribo, atque respondeo; ego do-  
lori tuo non solum ignosco, sed summam etiam  
laudem tribuo, meus enim me sensus, quanta  
vis fraterni sit amoris, admonet; a te peto, ut  
tu quoque æquum te iudicem dolori meo præ-  
beas, si acerbè, si crudeliter, si sine causa sum  
a tuis oppugnatus; ut statuas mihi non modo  
non cedendum, sed etiam tuo, atque exercitus  
tui auxilio in ejusmodi causa utendum fuisse.  
Ego te mihi semper amicum esse volui; me ut  
tibi amicissimum esse intelligeres, laboravi,  
maneo in voluntate, &, quoad voles tu, perma-  
nebo: citiusque amore tui fratrem tuum odisse  
definam, quam illius odio quidquam de nostra  
benevolentia detrahatur. Vale.

## A R G U M E N T U M.

*Quæ sequitur epistola, non dubito, quin Metelli  
Celeris potius sit, quam Nepotis, & in epistola  
Nepotem puto significari.*

III. Q. METELLUS NEPOS  
CICERONI S. D.

**H**ominis importunissimi contumeliæ, qui-  
bus me crebris concionibus onerat,  
tuis erga me officiis leniuntur; &, ut sunt le-  
ves

ves huiusmodi homines, a me despiciuntur, libenterque commutata persona, te mihi fratri loco esse duco, de illo ne meminisse quidem volo, tamen bis cum invitum servavi. De me, meisque rebus, ne vobis multitudinem litterarum molestior essem, ad Lottium perscripsi; de rationibus etiam provinciarum quid vellem fieri, ut is vos doceret, & commonefaceret. Si poteris, velim pristinam tuam erga me voluntatem conserves. Vale.

## ARGUMENTUM.

*Studium, & auxilium Metelli Nepotis Consulatum gerentis exul implorat.*

IV. M. T. C. Q. METELLO NEP. COS. S. D.

**L**itteræ Quinti fratris, & T. Pomponii necessarii mei tantum mihi spei dederant, ut in te non minus auxilii, quam in tuo collega mihi constitutum fuerit, itaque ad te litteras statim misi, per quas, ut fortuna postulabat, & gratias tibi egi, & de reliquo tempore auxilium petii. Postea mihi non tam meorum litterarum, quam sermones eorum, qui hac iter faciebant, animum tuum immutatum significabant, quæ res fecit, ut tibi litteris obstrepere non auderem. Nunc mihi Quintus frater meumnitissimam tuam orationem, quam in senatu habuisses, perscripsit, qua inductus ad te scribere sum coactus; & abs te, quantum tua fert voluntas, peto, quæsoque ut tuos mecum servares potius, quam propter arrogantem crudelitatem tuorum me oppugnes. Tu, tuas inimicitias ut reipub. donares, te vicisti; alienas ut contra reipub. confirmes, adducis? Quod si mihi tua clementia opem tuleris, omnibus in rebus me fore in tua potestate tibi confirmo, si mihi, neque magistratum, neque senatum, neque populum auxiliari propter eam vim, quæ me cum rep. vicit, licuerit; vide ne, cum velis revocare tempus omnium conservandorum, cum, qui servetur, non erit, non possis. Vale.

ARGU.

## ARGUMENTUM.

*Exprobrat Antonio, qui Macedoniam Proconsul  
regebat, ingrati animi vitium, deinde Atticum  
illi commendat.*

V. M. T. C. C. ANTONIO M. F. IMP. S. D.

**E** T si statueram nullas ad te litteras mittere, nisi commendatitias ( non quod eas intellexerem satis apud te valere, sed ne iis, qui me rogarent, aliquid de nostra conjunctione immineat esse ostenderem ) tamen, cum T. Pomponius, homo omnium meorum in te studiorum, & officiorum maxime conscius, tui cupidus, nostri amantissimus, ad te proficisceretur, aliquid mihi scribendum puravi, praesertim cum aliter ipsi Pomponio satisfacere non possem. Ego si abs te summa officia desiderem, mirum nemini videri debeat, omnia enim a me in te profecta sunt, quae ad tuum commodum, quae ad honorem, quae ad dignitatem pertinerent, pro his rebus nullam mihi abs te relatum esse gratiam, tu es optimus testis. **C**ontra etiam esse aliquid abs te profectum, ex multis audiui ( nam, comperisse me non audeo dicere, ne forte id ipsum verbum ponam, quod abs te, ajunt, falso in me solere conferri ) sed ea, quae ad me delata sunt, malo te ex Pomponio, cui non minus molesta fuerunt, quam ex meis litteris cognoscere. Meus in te animus quam singulari officio fuerit, & senatus, & populus R. testis est ( tu, quam gratus erga me fueris, ipse existimare potes : quantum mihi debeas, ceteri existiment. Ego, quae tua causa antea feci, voluntate sum adductus, ut facerem, posteaque constantia; sed reliqua ( mihi crede ) multo maius necum studium, maioremque gravitatem, & laborem desiderant, quae ego, si non profundere, ac perdere videbor, omnibus meis viribus sustinebo, sin ingrata esse sentiam, non committam, ut tibi ipse insanire videar; ea, quae sint, & cujuscumque, poteris ex Pomponio cognoscere. Atque ipsum tibi Pomponium ita commendo, ut quamquam ipsius causa confido te omnia esse facturum; tamen abs te hoc petam;



tam; ut, si quid residet in te amoris erga me, id omne in Pomponii negotio ostendas; hoc mihi gratius facere nihil potes. Vale.

### ARGUMENTUM.

*Narrat, se diligentiam adhibuisse, ne Sextio succederetur. Adscribit de domo a se emptæ.*

### VI. M. T. C. P. SEXTIO L. F. PRO- QUÆS. S. D.

Cum ad me Decius librarius tuus venisset, egissetque mecum, ut operam darem, ne tibi hoc tempore succederetur; quamquam illum hominem frugi, & tibi amicum existimabam; tamen, quod memoria tenebam; cujuscumque ad me litteras antea misisses, non satis credidi homini prudenti, tam valde esse mutatam voluntatem tuam. Sed posteaquam & Cornelia tua Terentiam convenit, & ego cum Q. Cornelio loquutus sum; adhibui diligentiam, quotiescumque senatus fuit, ut adessem: plurimumque in eo negotii habui, ut Q. Fusium tribunum pleb. & ceteros, ad quos tu scripseras, cogerem mihi potius credere, quam tuis litteris: omnino res tota in mensem Januarium rejecta erat, sed facile obtinebatur. Ego, tua gratulatione commotus, quod ad me pridem scripseras, velle te bene evenire, quod de Crasso domum emissem, cini eam ipsam, domum xxxv. aliquanto post tuam gratulationem. Itaque nunc me scito tantum habere æris alieni, ut cupiam conjurare, si quis me recipiat: sed partim odio inducti me excludunt, & aperte vindicem conjurationis oderunt: partim non credunt, & a me insidias metuunt; nec putant ei nummos deesse posse, qui ex obsidione frægeneratores exemerit, omnino semissibus magna copia est: ego autem meis rebus gestis hoc sum assequutus, ut bonum nomen existimer. Domum tuam, atque ædificationem omnem perspexi, & vehementer probavi. Antonium, etsi ejus in me officia omnes desiderant, tamen in senatu gravissime, ac diligentissime.

tissime defendi; senatumque vehementer oratione mea, atque auctoritate commovi. Tu ad me velim litteras crebrius mittas. Vale.

## A R G U M E N T U M.

*Leviter expostulat, quod Pompejus sibi de oppressa Catilina conjuratione non esset pro rei magnitudine literis gratulatus.*

VII. M. T. C. CN. POMPEJO, CN. F. MAGNO IMP. S. D.

**S**I tu, exercitusque valetis, bene est. Ex literis tuis, quas publice misisti, cepi unam cum omnibus incredibilem voluptatem, tantam enim spem otii ostendisti, quantam ego semper omnibus, te uno fretus, pollicebar; sed hoc scito, tuos veteres hostes, novos amicos, vehementer literis perculosos, atque ex magna spe deturbatos jacere. Ad me autem literas, quas misisti, quamquam exiguum significationem tuæ erga me voluntatis habebant, tamen mihi scito jucundas fuisse, nulla enim re tam lætari soleo, quam meorum officiorum conscientia, quibus si quando non mutuo respondetur, apud me plus officii residere facillime patior. Illud non dubito, quin, si te mea summa erga te studia parum mihi adjunxerunt: respub. nos inter nos conciliatura, conjuncturaque sit; ac, ne ignores, quid ego in tuis literis desiderarim, scribam aperte, sicut & mea natura, & nostræ amicitia postulat. Res eas gessi, quarum aliquam in tuis literis & nostræ necessitudinis, & reip. causa gratulationem expectavi, quam ego abs te prætermittam esse arbitror, quod verebatur, ne cujus animum offenderes, sed scito, ea, quæ nos pro salute patriæ gessimus, orbis terrarum judicio, ac testimonio comprobari, quæ, cum veneris, tanto consilio, tantaque animi magnitudine a me gesta esse cognosces, ut tibi, multo majori, quam Africanus fuit, me, non multo minorem quam Lælium facile & in republ. & in amicitia adjunctum esse patiari.

A R-

## ARGUMENTUM.

*Officium suum in Crassum praebeat: omniaque pollicetur, quae ad illius commodum, aut amplitudinem pertinebunt.*

VII. M. T. C. LICINIO P. F. CRASSO S. D.

**Q**Uantum meum studium extiterit dignitatis tuae vel tuendae, vel etiam augendae, non dubito, quin ad te omnes tui perscripserint, non enim fuit aut mediocre, aut obscurum, aut ejusmodi, quod silentio posset praeteriri. Nam & cum consulibus, & cum multis consularibus tanta contentione decertavi, quanta nunquam antea ulla in causa, suscepique mihi perpetuam propugnationem pro omnibus ornamentis tuis, veteri quae nostrae necessitudini jamdiu debitum, sed multa varietate temporum interruptum officium cumulate reddidi. Neque mehercule unquam mihi tui aut colendi, aut ornandi voluntas defuit; sed quaedam pestes hominum, laude aliena dolentium, & te nonnunquam a me alienarunt, & me aliquando immutarunt tibi. Sed exitit tempus optatum mihi magis, quam speratum, ut, florentissimis tuis rebus, mea perspicere posset & memoria nostrae voluntatis, & amicitiae fides. Sum enim consequutus, non modo ut domus tua tota, sed ut cuncta civitas me tibi amiciissimum esse cognosceret; itaque & praestantissima omnium seminarum uxor tua, & eximia pietate, virtute, gratia tui Crassum meis consiliis, monitis, studiis, actionibusque nituntur, & senatus, populusque Rom. intelligit, tibi absenti nihil esse tam promptum, aut tam paratum, quam in omnibus rebus, quae ad te pertineant, operam, curam, diligentiam, auctoritatem meam. Quae sint acta, quaeque aguntur, domesticorum tibi litteris declarari puto. De me sic existimes, ac tibi per uideas vehementer velim, non me repentina aliqua voluntate, aut fortuito, ad tuam amplitudinem meis officiis amplectendam incidisse; sed, ut primum forum attigerim, spectasse semper, ut tibi possem quam maxime esse conjunctus. Quo quidem ex tempore, memoria teneo, neque meam tibi observantiam, neque mihi tuam summam benevolentiam,

riam, ac liberaliterem defuisse, si qua interci-  
derent non tam re quam suspicione violata, ea  
cum fuerint & falsa, & inania, sunt evulsa ex  
omni memoria, vitaque nostra; is enim tu vir  
es, & cum me esse cupio, ut, quoniam in ea-  
dem reip. tempora incidimus, conjunctionem,  
amicitiamque nostram utrique nostrum laudi  
sperem fore. Quamobrem tu, quantum tuo ju-  
dicio tribuendum nobis esse putes, statues ipse,  
& ut spero, statues ex nostra dignitate: ego ve-  
ro tibi profiteor, atque polliceor eximium, &  
singulare meum studium in omni genere officii,  
quod ad honestatem, & gloriam tuam spectet.  
In quo, etiamsi multi mecum contendunt, ta-  
men cum reliquis omnibus, tum Crassistuis ju-  
dicibus, omnes facile superabo, quos quidem  
ego ambos unice diligo, sed in Marci benevo-  
lencia impari: hoc magis sum Publico deditus,  
quod me, quamquam a pueritia sua semper, ta-  
men hoc tempore maxime, sicut alterum paren-  
tem, & observat, & diligit. Has litteras ve-  
lim existimes, fœderis habituras esse vim, non  
epistolæ, meque ea, quæ tibi promitto, ac re-  
cipro, sanctissime esse observaturum, diligen-  
tissimeque facturum. Quæ a me suscepta defen-  
sio est, te absente, dignitatis tuæ, in ea ego  
non solum amicitia nostræ, sed etiam constan-  
tiæ meæ causa permanebo. Quamobrem satis esse  
hoc tempore arbitratum sum, hoc ad te scribe-  
re, me; si quid ipse intelligerem aut ad volun-  
tatem, aut ad commodum, aut ad amplitudi-  
nem tuam pertinere, mea sponte id esse factu-  
rum, sin quippiam aut a te essem admonitus,  
aut a tuis, effecturum, ut intelligeres, nihil  
neque te scripsisse, neq; quenquam tuorum fru-  
stra ad me detulisse. Quamobrem velim ita &  
ipse ad me scribas de omnibus minimis, maxi-  
mis, mediocribusq; rebus, ut ad hominem ami-  
cissimum, & tuis præcipias, ut opera, consi-  
lio, auctoritate, gratia mea sic utantur in om-  
nibus publicis, privatis, forensibus, domesti-  
cis tuis, amicorum, hospitum, clientum tuo-  
rum negotiis, ut, quoad ejus fieri possit, præ-  
sentia tuæ desiderium meo labore minuerur. Vale.

ARGU-

## A R G U M E N T U M.

*Vatinius ex Consulatu a Cesare Dictatore in Illyria missus, commendat suam dignitatem Ciceroni contra malevolorum obtestationes.*

IX. P. VATINIUS IMP. CICER. SUO S. D.

**S**I vales, bene est: ego valeo. Si tuam consuetudinem in patrociniis tuendis servas, P. Vatinius cliens ad te venit, qui pro se causam dicitur vult. Non, puto, repudiabis in honore, quem in periculo recepisti, ego autem quem potius adoptem, aut invocem, quam illum, quo defendente, vincere didici? an verear, ne, qui potentissimorum hominum conspirationem neglexerit pro mea salute, is pro honore meo pusillorum, ac malevolorum obtestationes, & invidias non prosternat, atque obterat? Quare, si me, sicut soles, amas, suscipe me totum; atque hoc, quidquid est oneris, ac muneris, pro mea dignitate tibi tuendum, ac sustinendum puta. Scis meam fortunam nescio quo modo facile obtestatores invenire, non meo quidem mehercule merito; sed quanti id refert, si tamen fato nescio quo accidit? Si quis forte fuerit, qui nostrae dignitati obesse velit, peto a te, ut tuam consuetudinem, & liberalitatem in me absente defendendo mihi praestes. Litteras ad senatum nostris de rebus gestis, quo exemplo miseram, intra tibi perscripsi. Dicitur mihi tuus servus anagnostes fugitivus cum Vardæis esse: de quo tu mihi nihil mandasti: ego tamen, terra, marique, ut conquireretur, praemandavi: & profecto tibi illum reperiam, nisi in Dalmatiam aufugerit: & inde tamen aliquando eruam. Tu nos fac ames. Vale. ad v. Id. Quin. ex castris. Narona.

## A R G U M E N T U M.

*Scribit haec, de Dionysio Ciceronis servo, de Catilio pirata, de rebus a se in Dalmatia gestis, pro quibus supplicationes sibi decerni postulat.*

X. VATINIUS IMP. CICER. SUO S. D.

**S**I vales, bene est: ego quidem valeo. De Dionysio tuo adhuc nihil extrico: & comi-

minus, quod me frigus Dalmaticum, quod il-  
 linc eiecit, etiam hic refrigeravit, sed tamen  
 non desistam, quin illum aliquando eruam.  
 Sed tamen omnia mihi dura imperas. De Ca-  
 tilio, nescio quid, ad me scripsisti deprecationis  
 diligentissima, apage te cum nostro Sex. Ser-  
 vilio: nam mehercule ego illum quoque amo,  
 sed hujuscemodi vos clientes, hujusmodi cau-  
 sas recipitis? hominem unum omnium crudelissi-  
 mum, qui tot ingenus, matresfamilias stupra-  
 vit, tot cives Rom. occidit, arripuit, disperdi-  
 dit, regiones vastavit? Simius, non semilis ho-  
 mo, contra me arma tulit, & euni bello cepi.  
 Sed tamen, mi Cicero, quid facere possum? om-  
 nia mehercule cupio, quæ tu imperas, meam  
 animadversionem, & supplicium, quo usus  
 eram in eum, quem cepissem, remitto tibi, &  
 condono; quid illis respondere possum, qui suæ  
 bona direpta, naves expugnatas, fratres, libe-  
 ros, parentes occisos, actione expostulant? si me-  
 hercule Appii os haberem, in ejus locum suf-  
 fectus sum, tamen hoc sustinere non possem.  
 Quid ergo est? faciam omnia sedulo, quæ te  
 sciam velle, defenditur a Q. Volusio, tuo di-  
 scipulo; si forte ea res poterit adversarios fu-  
 gare, in eo maxima spes est. Nos, si quid erit  
 istic opus, defendes. Caesar adhuc mihi inju-  
 riam facit; de meis supplicationibus & rebus  
 gestis Dalmaticis adhuc non refert: quasi vero  
 non iustissimi triumphi in Dalmatia res gesse-  
 rim, nam, si hoc expectandum sit, dum totum  
 bellum conficiam, viginti oppida sunt Dalma-  
 tiæ antiqua; quæ sibi ipsi adsciverunt, ampli-  
 us sexaginta: hæc nisi omnia expugno, si mihi  
 supplicationes non decernuntur, longe alia con-  
 ditione ego sum, ac ceteri Imperatores.

E G O, post supplicationes mihi decretas, in  
 Dalmatiam profectus sum; sex oppida vi op-  
 pugnando cepi: unum hoc, quod erat maxi-  
 mum, quater a me jam captum: quatuor enim  
 turres, & quatuor muros cepi, & arcem eorum  
 totam: ex qua me nivos, frigora, imbres detru-  
 serunt: indigneque, mi Cicero, oppidum cap-  
 tum, & bellum jam confectum relinquere sum  
 coactus. Quare te rogo, si opus erit, ad Casarem

meam causam agas, meque tibi in omnes partes defendendum putes, hoc existimans, neminem te tui amantiorē habere. Vale. Nonis Dec. Narona.

## A R G U M E N T U M.

*Suum studium erga uxorem Vatinii, ipsumque Vatinium significat. Rogat deinde, ut omnino sibi remittat servum suum fugitivum Dionysium.*

## XI. M. T. C. P. VATINIO IMP. Ss D.

**G**Rata tibi esse officia mea, non miror; cognovi enim te gratissimum omnium; idque nunquam destiti predicare, nec enim tu mihi gratiam modo habuisti, verum etiam cumulatiflime retulisti, quamobrem reliquis tuis rebus omnibus pari me studio erga te, & eadem voluntate cognosces. Quod mihi feminam primariam Pompejam, uxorem tuam, commendas; cum Sura nostro statim, tuis litteris lectis, loquutus sum, ut ei meis verbis diceret, ut, quicquid opus esset, mihi denuntiaret: me omnia, quæ ea vellet, summo studio, curaque facturum; itaque faciam, eamque, si opus esse videbitur, ipse conveniam. Tu tamen ei velim scribas, ut nullam rem neq; tam magnam, neque tam parvam putet, quæ mihi aut difficilis, aut parum me digna videatur, omnia, quæ in tuis rebus agam, & non laboriosa mihi, & honesta videbuntur. De Dionysio, si me amas, confice: quamcunque ei fidem dederis, præstabo; si vero improbus fuerit, ut est, duces eum captivum in triumpho. Dalmatis dii male faciant, qui tibi molesti sunt, sed, ut scribis, brevi capiuntur, & illustrabunt res tuas gestas: semper enim habiti sunt bellicosi. Vale.

## A R G U M E N T U M.

*Lucejum historiarum scriptorem rogat, ut de rebus a se in Consulatu gestis separatim volumen conficiat: quod illustrius videbatur.*

## XII. M. T. C. L. LUCCEJO Q. F. S. D.

**C**oram me tecum eadem hæc agere sæpe conantem deterruit pudor quidam gene-  
ru-

sufficiens; quæ nunc expromam absens audacius, Epistola enim non erubescit. Ardeo cupiditate incredibile, neque ( ut ego arbitror ) reprehendenda, nomen ut nostrum scriptis illustretur, & celebretur tuis, quod etsi mihi sæpe ostendis te esse facturum, tamen ignoscas velim huic festinationi meæ, genus enim scriptorum tuorum etsi erat semper a me vehementer expectatum, tamen vicit opinionem meam; meque ita vel cepit, vel incendit, ut cuperem quam celerissime res nostras monumentis commendari tuis. Non enim me solum commemoratio posteritatis ad spem quandam immortalitatis rapit, sed etiam illa cupiditas, ut vel auctoritate testimonii tui, vel indicio benevolentie, vel suavitate ingenii vivi perfruarur. Neque tamen, hæc cum scribebam, eram nescius, quantis oneribus premerere susceptarum rerum, & jam institutarum, sed, quia videbam Italici belli, & civilis historiam jam pene a te esse perfectam; dixeras autem mihi, te reliquas res ordiri: deesse mihi nolui, quin te admonerem, ut cogitares, conjuncte ne malles cum ceteris rebus nostra contexere, an, ut multi Græci fecerunt Callisthenes Troicum bellum, Timæus Pyrrhi, Polybius Numantinum, qui omnes a perpetuis suis historiis ea, quæ dixi, bella separaverunt, tu quoque item civilem conjurationem ab hostilibus, externisque bellis sejungeres. Equidem ad nostram laudem non multum video interesse: sed ad prooperationem meam quiddam interest, non te exspectare, dum ad locum venias, ac statim causam illam totam & tempus arripere. Et simul, si uno in argumento, unaque in persona mens tua tota versabitur, cerno jam animo, quanto omnia uberiora, atque ornatiores futura sint. Neque tamen ignoro, quam impudenter faciam, qui primum tibi tantum oneris imponam ( potest enim mihi denegare occupatio tua ) deinde etiam, ut ornēs me postulem. Quid, si illa tibi non tantopere videntur ornanda? sed tamen, qui semel verecundia fines transferit, cum bene, & naviter oportet esse impudentem. Itaque te plane etiam, atque etiam rogo, ut, & ornēs ea vehementius etiam,



quam fortasse sentis, & in eo leges historiarum negligas; gratiamque illam, de qua suavissime quodam in proximo scripsisti, a qua te affici non magis potuisse demonstras, quam Herculem Xenophontium illum a voluptate, ea si me tibi vehementius commendabit, ne aspernere; amorique nostro plussculum etiam, quam concedit veritas, largiari. Quod si te adducemus, ut hoc suscipias; erit (ut mihi persuadeo) materies digna facultate, & copia tua; a principio enim conjurationis usque ad reditum nostrum videtur mihi modicum quoddam corpus confici posse. In quo & illa poteris uti civilium commutati nam scientia, vel in explicandis causis rerum novarum, vel in remediis incommodorum; cum & reprehendes ea, quæ vituperanda duces; & quæ placebunt, exponendis rationibus comprobabis: & si liberius, ut consuesti, agendum putabis, multorum in nos perfidiam, insidias, proditorem notabis. Multam etiam casus nostri tibi varietatem in scribendo suppeditabunt, plenam cujusdam voluptatis, quæ vehementer animos hominum in legendo scripto retinere possit. **NIHIL** est enim aptius ad delectationem lectoris, quam temporum varietates, fortunæque vicissitudines: quæ etsi nobis optabiles in experiendo non fuerunt, in legendo tamen erunt jucundæ. **HABET** enim præteriti doloris secunda recordatio delectationem: ceteris vero, nulla perfundis propria molestia, casus alienos sine ullo dolore intuentibus, etiam ipsa misericordia est jucunda. Quem enim nostrum ille moriens apud Mantineam Epaminondas non cum quadam miseratione delectat? quæ tum denique sibi avelli jubet spiculum, posteaquam ei percontanti dictum est, clypeum esse salvum; ut etiam in vulneris dolore, æquo animo cum laude moreretur. Cujus studium in legendo non erectum Themistoclis fuga, redituque retinetur? etenim ordo ipse annalium mediocriter nos retinet quasi enumeratione factorum: at viri sæpe excellentis principites, virique casus habent admirationem, expectationem, lætitiā, molestiam, spem, timorem: si vero exitu notabili concluduntur,

tur, expletur animus jucundissimæ lectionis voluptate. Quo mihi acciderit optatius, si in hac sententiâ fueris, ut a continentibus tuis scriptis, in quibus perpetuam rerum gestarum historiam complecteris, secernas hanc quasi fabulam rerum, eventorumque nostrorum, habet enim varios actus, multasque actiones, & consiliorum, & temporum. Ac non vereor, ne assentatiuncula quadam aucupari tuam gratiam videar, cum hoc demonstrum, me a te potissimum ornari, celebrarique velle; neque enim tu is es, qui, quid sis, nescias, & qui non eos magis, qui te non admirentur, invidos, quam eos, qui laudent, assentatores arbitrere. Neque autem ego sum ita demens, ut me semper æternæ gloriæ per eum commendari velim, qui non ipse quoque in me commendando propriam ingenii gloriam consequatur. Neque enim Alexander ille gratiæ causa ab Apelle potissimum pingi, & a Lysippo fingi volebat, sed quod illorum artem cum ipsi, tum etiam sibi gloriæ fore putabat, atque illi artifices corporis simulacra ignotis nota faciebant, quæ vel si nulla sint, nihilo sunt tamen obscuriores clari viri. Nec minus enim est Spartiatus Agæfilaus ille perhibendus, qui neque præteritam, neque futuram imaginem suam passus est esse, quam qui in eo genere laborarunt. Unus enim Xenophontis libellus in eo rege laudando facile omnes imagines omnium, statuasque superavit. Atque hoc præstantius mihi fuerit & ad lætitiæ animi, & ad memoriæ dignitatem, si in tua scripta pervenero, quam si in ceterorum; quod non ingens mihi solum suppeditatum fuerit tuum, sicut Timoleonti a Timæo, aut ab Herodoto Themistocli, sed etiam auctoritas clarissimi, & spectatissimi viri, & in reip. maximis, gravissimisque causis cogniti, atque in primis probati: ut mihi non solum præconium, quod cum in Siciliam venisset, Alexander ab Homero Achilli tributum esse dixit, sed etiam grave testimonium impertitum clari hominis, magnique videatur; placet enim Hector ille mihi Naviæus, qui non tantum laudari se lætatur, sed ad id etiam, a laudato viro. Quod si a te non impetito, hoc est, si qua te res impederit (ne-

que enim fas esse arbitror, quidquam me rogantem abs te non impetrare (cogar fortasse facere, quod nonnulli sæpe reprehendunt: scribam ipse de me, multorum tamen exemplo, & clarorum virorum, sed, quod te non fugit, hæc sunt in hoc genere vitia: & verecundius ipsi de sese scribant necesse est, si quid est laudandum: & prætereant, si quid forte reprehendendum est. Accedit etiam, ut minor sit fides, minor auctoritas, multi denique reprehendant & dicant verecundiores esse præcones ludorum gymnycorum, qui, cum ceteris coronas imposuerint victoribus, eorumque nomina magna voce pronuntiarint, cum ipsi ante ludorum missionem corona donentur, alium præconem adhibeant, ne sua voce ipsi se victores esse prædicent. Hæc nos vitare cupimus, & si recipis causam nostram, vitabimus: idque ut facias, rogamus. Ac ne forte mirere, cur, cum mihi sæpe ostenderis, te accuratissime nostrorum temporum consilia, atque eventus litteris mandaturum; a te id nunc tantopere, & tam multis verbis petamus: illa nos cupiditas incendit, de qua initio scripsi, festinationis, quod alacres animo sumus: ut & ceteri, viventibus nobis, ex libris tuis non cognoscant, & nosmetipsi vivi gloriola nostra perfruamur. His de rebus, quid acturus sis, si tibi non est molestum, rescribas mihi velim; si enim suscipis causam, coniciam commentarios rerum omnium: sin autem differs me in tempus aliud, coram tecum loquar, tu interea non cessabis; & ea, quæ habes instituta, perpolles, nosque diliges. Vale.

## A R G U M E N T U M.

*Significat Lucæ litteræ consolatorię quantum profecerint ad eam sollicitudinem minuendam, quam ex afflictâ Republica capiebat.*

XIII. M. T. C. L. LUCCEJO Q. F. S. D.

**Q**uamquam ipsa consolatio litterarum tuarum mihi gratissima est; (declarat enim summam benevolentiam conjunctam pari prudentia) tamen illum fructum ex iis litteris vel maximum cepi, quod te præclare res humanas contemnentem, & optime contra fortunam paratum, ar-

ma-

matumque cognovi. Quam quidem laudem sapientiae statuo esse maximam, NON aliunde pendere, nec extrinsecus aut bene, aut male vivendi suspensas habere rationes, quæ cogitatio cum mihi non omnino excidisset, (etenim penitus insecderat) vi tamen tempestatum, & concursu calamitatum erat aliquantum labefactata, atque convulsa: cui te opitulari, & video, & id fecisse etiam proximis litteris, multumque profecisse sentio; itaque hoc sæpius dicendum, tibi non significandum solum, sed etiam declarandum arbitror, nihil mihi esse potuisse tuis litteris gratius. Ad consolandum autem cum illa valent, quæ eleganter copioseque collegisti; tum nihil plus, quam quod firmitudinem, gravitatemque animi tui perspexi, quam non imitari, turpissimum existimo. Itaque hoc etiam fortio rem me puto, quam te ipsum præceptorem fortitudinis, quod tu mihi videris spem nonnullam habere, hæc aliquando futura meliora; casus enim gladiatorii, similitudinesque eæ, tum rationes in ea disputatione a te collectæ vetabant me reip. penitus diffidere, itaque alterum minus mirum fortio rem te esse, cum aliquid speres; alterum mirum, spe ulla teneri; quid est enim non ita effectum, ut id non deletum, extinctumque omne esse fateare? circumspice omnia membra reip. quæ notissima sunt tibi: nullum reperies profecto, quod non fractum, debilitatumve sit, quæ persequer, si aut melius ea viderem, quam tu vides, aut commemorare possem sine dolore, quamquam tuis monitis, præceptisque omnis est abjiciendus dolor. Ergo & domestica feremus, ut censes, & publica paulo etiam fortius fortasse, quam tu ipse, quæ præcipis, te enim spes aliqua consolatur, ut scribis; nos autem erimus etiam in omni desperatione fortes, ut tu tamen idem & hortaris, & præcipis. Das enim mihi jucundas recordationes conscientiae nostræ, rerumque earum, te in primis auctore, quæ, gessimus, præstitimus enim patriæ non minus certe, quam debuimus: plus profecto, quam est ab animo cujusquam, aut consilio hominis postulatum. Ignosces mihi de meipso aliquid prædicanti,

Munem, vel tuam solius, ac propriam. Cupio non obtundere te, si non delectare nostro studio: cupio detertere, ne permanear in incerto; cum duæ res istæ contrariæ me conturbent: ex quibus aut in altera mihi velim, si potes, obtuleres; aut in altera non offendas. Vale.

## A R G U M E N T U M.

*Quærenti Lucejo, cur ab Urbe abesset, ejusque maiorem minuere conanti, respondet, & cur doleat, & cur in Urbe non vivat.*

XV. M. T. C. L U C C E J O S. D.

**O**Mnis amor tuus ex omnibus partibus se ostendit in iis litteris, quas a te proxime accepi, non ille quidem mihi ignotus, sed tamen gratus, & optatus: dicerem, jucundus, nisi id verbum in omne tempus perdidissem, neq; ob eam unam causam, quam tu suspicaris, & in qua me, lenissimis, & amantissimis verbis utens, re graviter accusas, sed quod illius tanti vulneris quæ remedia esse debebant, ea nulla sunt. Quid enim? ad amicosne confugiam? quam multi sunt? habemus enim fere communēs, quorum alii occiderunt, alii nescio quo pacto obduruerunt, tecum vivere possem equidem, & maxime vellem, vetustas, est, amor, consuetudo, studia paria, quod vinculum, quæ res deest nostræ conjunctioni? possumusne igitur esse una? n. e. nehercule intelligo, quid impediat, sed certe adhuc non fuimus, cum essemus vicini in Tusculano, in Puteolano, nam quid dicam in urbe? in qua, cum forum commune sit, vicinitas non requiritur, sed, casu nescio quo, in ea tempora nostra ætas incidit. ut, cum maxime florere nos oporteret, tum vivere etiam pueret. Quod enim mihi poterat esse perfugium spoliato & domesticis & ferendis ornamentis, atque solatiis, litteræ, credo, quibus utor assidue; quid enim aliud facere possum? sed nescio quo modo ipsæ illæ excludere me a portu, & perfugio videntur, & quasi exprobrare, quod in ea vita maneam, in qua nihil insit, nisi propagatio miserrimi temporis. Hic tu ea me abesse urbe miraris, in qua domus nihil delectare possit, summum sit o-

dium temporum, hominum, fori, curiæ; itaque sic litteris utor, in quibus consumo omne tempus, non ut ab his medicinam perperam, sed ut exiguum doloris oblivionem petam, quod si id egissemus ego, atque tu (quod ne in mentem quidem nobis veniebat propter quotidianos metus) omne tempus una fuissimus: neque me valetudo tua offenderet, neque te mœror meus, quod, quantum fieri poterit, consequamur; quid enim utriq; nostrum aptius? propediem te igitur videbo. Vale.

## A R G U M E N T U M.

*Consolatur diligenter in primis amicum, filii obitum immoderatus ferentem.*

## XVI. M. T. C. TITIO S. D.

**E**T si unus ex omnibus minime sum ad te consolandum accommodatus: quod tantum ex tuis molestiis cepi doloris, ut consolatione ipse egerem; tamen, cum longius a summi luctus acerbitate meus abesset dolor, quam tuus, statui nostræ necessitudinis esse, meæque in te benevolentia; non tacere tanto in tuo mœrore tamdiu, sed adhibere aliquam modicam consolationem, quæ levare dolorem tuum posset, si minus sanare potuisset. Est autem consolatio pervulgata quidem illa maxime, quam semper in ore, atque in animo habere debemus: HOMINES nos ut esse meminerimus, ea lege natos, ut omnibus fortunæ telis proposita sit vita nostra: neque esse recusandum, quominus ea, qua nati sumus, conditione vivamus; neve tam graviter eos casus feramus, quos nullo consilio vitare possumus: eventisque aliorum memoria repetendis, nihil accidisse nobis novi cogitemus. Neque hæc, neque ceteræ consolationes, quæ sunt a sapientissimis viris usurpatæ, memoriæque, & litteris prodita, tantum videntur proficere debere, quantum status ipse nostræ civitatis, & hæc perturbatio temporum perditorum: cum beatissimi sint; qui liberos non susceperunt; minus autem miseri, qui his temporibus amiserunt, quam si eosdem bona, aut denique aliqua repub. perdidissent. Quod si  
tuum

tuum te desiderium movet, aut si tuarum rerum cogitatione mœres: non facile exhauriri tibi istum dolorem posse universum puto. Sin illa te res cruciat quæ magis amoris est, ut eorum, qui occiderunt, miseras lugeas: ut ea non dicam, quæ sæpissime & legi, & audiui, nihil mali esse in morte, in qua si resideat sensus, immortalitas illa potius, quam mors ducenda sit: sin sit amissus, nulla videri miseria debeat quæ non sentiat: hoc tamen non dubitans confirmare possum, ea misceri, parari, impendere reip. quæ qui reliquerit, nullo modo mihi quidem deceptus esse videatur. Quid est enim jam non modo pudori, probitati, virtuti, rectis studiis, bonis artibus, sed omnino libertati, ac salutis loci? non mehercule quenquam audiui hoc gravissimo, & pestilentissimo anno adolescentulum, aut puerum mortuum, qui mihi non a Diis immortalibus ereptus ex his miseriis, atque ex iniquissima conditione vitæ videretur. Quare si tibi unum hoc detrahi potest, ne quid iis, quos amasti, mali putes contigisse, permultum erit ex mœrore tuo diminutum; relinquetur enim simplex illa jam cura doloris tui, quæ non cum illis communicabitur, sed ad te ipsum proprie referetur, in qua non est jam gravitatis, ac sapientiæ tuæ, quam tu a puero præstitisti, ferre immoderatus casum incommodorum tuorum, qui sit ab eorum, quos dilexeris, miseria, maloque sejunctus. Etenim eum semper te & privatis in rebus, & publicis præstitisti, tuenda tibi ut sit gravitas, & constantiæ serviendum, nam, quod allatura est ipsa diuturnitas, quæ maximos luctus vetustate tollit, id nos præripere consilio, prudentiaque debemus. Etenim si nulla unquam fuit, liberis amissis, tam imbecillo mulier animo, quæ non aliquando lugendi modum fecerit, certe nos, quod est dies allatura, id consilio anteferre debemus, neq; expectare temporis medicinam, quam repræsentare ratione possumus. His ego litteris si quid profecissem, existimabam optandum quiddam me esse assequutum: sin minus forte valuissent, officio tamen esse functum benevolentissimi, atque amicissimi: quem me tibi

& fuisse semper, existimes velim, & futurum esse confidas. Vale.

## A R G U M E N T U M.

*Excusat tarditatem litterarum; hortatur Sextium, ut exilii casum sapienter, fortiterque ferat.*

XVII. M. T. C. P. SEXTIO P. F. S. D.

**N**ON oblivione amicitiae nostrae, neque intermissione consuetudinis meae, superioribus temporibus ad te nullas litteras misi, sed quod priora tempora in ruinis reip. nostrisque jacuerunt, posteriora autem me a scribendo tuis injustissimis, atque acerbissimis incommodis retardaverunt; cum vero & intervallum jam satis longum fuisset, & tuam virtutem, animique magnitudinem diligentius essem mecum recordatus; non putavi esse alienum institutis meis, & haec ad te scribere. Ego te, P. Sexti, & primis temporibus illis, quibus in invidiam absens, & in crimen vocabare, defendi: & cum in tui familiarissimi iudicio, ac periculo tuum nomen conjungeretur, quam potui accuratissime te, tuamque causam tutatus sum, & proxime recenti adventu meo, cum rem aliter institutam offendissem, ac mihi placuisset, si adfuissem, tamen nulla re saluti tuae defui, quumque eo tempore invidia annonae inimici non solum tui, verum etiam amicorum tuorum, iniquitas totius iudicii, multaque alia reipubl. vitia plus, quam causa ipsa, veritasque valuissent; Publio tuo neque opera, neque consilio, neque labore, neque gratia, neque testimonio defui. Quomobrem, omnibus officiis amicitiae diligenter a me, sancteque servatis, ne hoc quidem praetermittendum esse duxi, te ut hortarer, rogaremque, ut & hominem te, & virum esse meminisses; id est, ut & communem, incertumque casum, quem neque vitare quisquam nostrum, neque praestare ullo facto potest, sapienter ferres; & dolori fortiter, ac fortunae resisteres; cogitaresque & in nostra civitate, & in ceteris, quae rerum potitae sunt, multis fortissimis, atque optimis viris, injustis iudiciis, tales casus incidisse. Illud utinam ne verescriberem, ea te republica carere, in qua neminem prudentem hominem res ulla delectet. De tuo  
autem



autem filio, vereor, ne si nihil ad te scripserim, debitum ejus virtuti videar testimonium non cepisse; sin autem omnia, quæ sentio, perscripserim, ne refricem meis litteris desiderium, ac dolorem tuum, sed tamen prudentissime facies, si illius pietatem, virtutem, industriam, ubicumque erit, tuam esse, tecum esse duces, nec enim minus nostra sunt, quæ animo complectimur, quam quæ oculis intuemur. Quamobrem & illius eximia virtus, summusq; in te amor magnæ tibi consolationi debet esse; & nos, ceterique, qui te non ex fortuna, sed ex virtute tua pendimus, semperque pendemus; & maxime animi tui conscientia, cum tibi nihil merito accidisse reputabis; & illud adjunges, HOMINES sapientes turpitudine, non casu, & delicto suo, non aliorum injuria commoveri. Ego & memoria nostræ veteris amicitiae, & virtute, atque observantia filii tui monitus, nullo loco deero neque ad consolandum, neque ad levandum fortunam tuam; tu si quid ad me forte scripseris, perficiam, ne te frustra scripsisse arbitrere. Vale.

## A R G U M E N T U M.

*Argumentis utitur septem, ut Fabium exulem consoletur.*

XVIII. M. T. C. F A B I O S. D.

E T si egomet, qui te consolari cupio, consolandus ipse sum: propterea quod nullam rem gravius jamdiu tuli, quam incommodum tuum: tamen te magnopere non horror solum, sed etiam pro amore nostro rogo, atque oro, te colligas, virumque præbeas, & qua condicione omnes homines, & quibus temporibus nati sumus, cogites. Plus tibi virtus tua denit, quam fortuna abstulit: propterea quod adeptus es, quod non multi homines novi; amisti, quod plurimi homines nobilissimi. Ea denique videtur conditio impendere legum, judiciorum, temporum, ut optime actum cum eo videatur esse, qui quam levissima poena ab hac repub. discesserit. Tu vero, qui & fortunas, & liberos habeas, & nos, ceterosque ne-

cellitu-

consuetudine, & benevolentia tecum conjunctissimos; quique magnam facultatem sis habiturus nobiscum, & cum omnibus tuis vivendi, & cum unum sit judicium ex tam multis, quod reprehendatur, ut quod una sententia, eaque dubia, potentiae alicujus condonatum existimetur; omnibus his de causis debes istam molestiam quam levissime ferre. Meus animus erit in te, liberosque tuos semper, quem tu esse vis, & qui esse debet. Vale.

## A R G U M E N T U M.

*Rufo, paulo ante Quaestori suo in Provincia, suadet, ut in bello civili Pompejum sequatur.*

## XIX. M. T. C. R U F O S. D.

**E**T si mihi nunquam dubium fuit, quin tibi essem carissimus: tamen quotidie magis id perspicio: extatque id, quod mihi ostenderas quibusdam litteris, hoc te studiosiorem in me colendo fore, quam in provincia fuisses (etsi meo judicio, nihil ad tuum provinciale officium addi potest) quo liberius judicium esse posset tuum. Itaque me & superiores litterae tuae admodum delectaverunt, quibus & expectatum meum adventum abs te amanter videbam; &, cum aliter res cecidisset ac putasses, te meo consilio magnopere esse laetatum, & his proximis litteris magnum cepi fructum & judicii, & officii tui: judicii, quod intelligo, te (id quod omnes fortes ac boni viri facere debent) nihil putare utile esse, nisi quod rectum, honestumque sit: officii, quod te mecum, quodcumque cepissem consilii, polliceris fore; quo neque mihi gratius, neque, ut ego arbitror tibi honestius esse quidquam potest. Mihi consilium captum jamdiu est: de quo ad te, non quo celandus esses, nihil scripsi antea, sed quia communicatio consilii tali tempore, quasi quaedam admonitio videtur esse officii, vel potius efflagitatio ad coeundam societatem vel periculi, vel laboris. Cum vero ea tua sit voluntas, humanitas, benevolentia erga me; libenter amplector talem animum, sed ita (non enim dimittam pudorem in rogando meum) si feceris id, quod ostendis,

ma-

magnam habebō gratiam: si non feceris, ignoscā; & alterum timori, alterum mihi te negare non potuisse arbitror, est enim res profecto maxima, quid rectum sit, apparet, quid expediat, obscurum est; ita tamen, ut, si nos ii sumus, qui esse debemus (id est studio digni, & literis nostris) dubitare non possimus, quin ea maxime conducant, quæ sunt rectissima. Quare tu, si simul placebit, statim ad me venies: sin idem placebit, atque eodem, nec continuo poteris; omnia tibi ut nota sint, faciam, quicquid statueris, te mihi amicum; sin id, quod opto, etiam amicissimum iudicabo. Vale.

## A R G U M E N T U M.

*Purgatio Ciceronis ad Rufum, Quastorem antea suum in Cilicia, de rationibus provincialibus.*

XX. M. T. C. R U F O S. D.

**Q**uomodo potuissē, te convenissē si eo, quo constituēras, venire voluissēs, quare et si mei commodi causa commovere me noluissēs: tamen ita existimes velim, me antelaturum fuisse, si ad me misissēs, voluntatem tuam commodō meo. Ad ea, quæ scripsissēs, commodius equidem possem de singulis ad te rebus scribere, si M. Tullius scriba meus adesset: a quo mihi exploratum est in rationibus duntaxat referendis (de ceteris rebus affirmare non possum) nihil eum fecisse scientem, quod esset contra aut rem, aut estimationem tuam: deinde, si rationum referendarum jus vetus, & mos antiquus maneret, me relaturum rationes, nisi tecum conjunctione nostræ necessitudinis contulissē confecissēque, non fuisse. Quod igitur fecissē ad urbem, si consuetudo pristina maneret; id (quando lege Julia relinquere rationes in provincia necesse erat, easdemque totidem verbis referre ad ærarium) feci in provincia, neque ita feci, ut te ad meum arbitrium adducerem; sed tribui tibi tantum, quantum me tribuisse nunquam penitebit. Totum enim scribam meum, quem tibi video nunc esse suspectum, tibi tradidi, tu ei M. Mindium fratrem tuum adjunxissēs, rationes contestæ me absente sunt tecum: ad quas

ego

ego nihil adhibui præter lectionem, ita accepi  
 librum a meo servo scriba, ut eundem acceperim  
 a fratre tuo, si honoris fuit, maiorem tibi ha-  
 bere non potui: si fides, maiorem tibi habui,  
 quam pene ipsi mihi. Si providendum fuit, ne  
 quid aliter, ac tibi, & honestum, & utile esset,  
 referretur; non habui, cui potius id negotii da-  
 rem. Illud quidem certe factum est, quod lex ju-  
 bebat, ut apud duas civitates, Laodicensem, &  
 Apamensem, quæ nobis maxime videbantur, quo-  
 niam ita necesse erat, rationes confectas, & con-  
 solutas deponeremus. Itaque huic loco primum  
 respondeo, me, quanquam iustis de causis ratio-  
 nes deferre præperatim, tamen te expectaturum  
 fuisse, nisi in provincia relictas rationes pro re-  
 latis haberem. Quamobrem, de Volusio quod scri-  
 bis, non est id rationum; docuerunt enim me pe-  
 riti homines, in his cum omnium peritissimus,  
 tum mihi amicissimus C. Camillus, ad Volusium  
 transferri nomen a Valerio non potuisse, sed præ-  
 des Valerianos teneri, neque id erat HS<sup>xxx</sup>. ut  
 scribis, sed x<sup>x</sup>. Erat enim curata nobis pecu-  
 nia Valerii mancipii nomine: ex qua reliquum,  
 quod erat in rationibus, retuli, sed sic me, &  
 liberalitatis fructu privas, & diligentia, &  
 (quod minime tamen laboro) mediocris etiam  
 prudentia: liberalitatis, quod mavis scribæ mei  
 beneficio, quam meo, legatum meum, præse-  
 ctumque maxima calamitate levatos, cum præ-  
 sertim non deberent esse obligati: diligentia,  
 quod existimas, de tanto officio meo, tanto et-  
 iam periculo, nec scisse me quicquam, nec co-  
 gitasse, scribam, quicquid voluisset, cum id  
 mihi ne recitasset quidem, retulisse: prudent-  
 tia, cum rem a me ne insipienter quidem cogita-  
 tam putas. Nam & Volusii liberandi meum fuit  
 consilium, &, ut multa tam gravis Valerianis  
 prædibus, ipsiq; T. Mario depelleretur, a me ini-  
 ta ratio est: quam quidem omnes non solum pro-  
 bant, sed etiam laudant, &, si verum scire vis,  
 hoc uni scribæ meo intellexi non nimium placere;  
 sed ego putavi esse viri boni, cum populus suum  
 servaret, consulere fortunis tot vel amicorum,  
 vel civium. Nam de Lucejo est ita actum, ut  
 auctore Cn. Pompejo ista pecunia in fano po-  
 nere-

neretur; id ego agnovi meo jussu esse factum, quæ pecunia Pompejus est usus, ut tua, quam tu deposueras, Sextius; sed hoc ad te nihil intelligo pertinere, illud me non animadvertisse moleste ferrem, ut adscriberem, te in sano pecuniam jussu meo deposuisse, nisi ista pecunia gravissimis esset, certissimisq; monumentis testata: cui data, quæ S. C. quibus tuis, quibus meis litteris? Sextio tradita esset. Quæ cum viderem tot vestigiis impressa, ut in his errari non posset; non adscripsi id, quod tua nihil referebat: ego tamen adscripsisse mallet, quando id te video desiderare. Sicut scribis tibi id esse referendum, idem ipse sentio; neq; in eo quicquam a meis rationibus discrepabunt tuæ, addes enim tu, meo jussu: quod ego nunquam addidi; nec causa est, cur negem: nec, si esset, & tu nolles, negarem. Nam de HS. non-gentis millibus certe ita relatum est, ut tu, si frater tuus referri voluit; sed, si quid est, quando de Lucejo parum provisum est, quod ego in rationibus referendis etiamnum corrigere possim; de eo mihi, cum S. C. non sum usus, quid per leges liceat, considerandum est, te certe in pecunia exacta ita efferre ex meis rationibus relatis non oportuit, nisi quid me fallit: sunt enim alii peritiores, illud cave dubites, quin ego omnia faciam, quæ interesse tua, aut etiam velle te existimem, si ullo modo facere possim. Quod scribis de beneficiis, scito a me & tribunos mil. & præfectos, & contubernalis duntaxat meos delatos esse: in quo quidem ratio me fefellit; liberum enim mihi tempus ad eos deferendos existimabam dari, postea certior sum factus, triginta diebus deferri necesse esse, quibus rationes retulissem; sane moleste tuli, non illa beneficia tuæ potius ambitioni reservata esse, quam meæ, qui ambitione nihil uterer. De centurionibus tamen, & de tribunorum mil. contubernalibus, res est in integro: genus enim horum beneficiorum definitum lege non erat. Reliquum est de HS. centum millibus: de quibus memini mihi a te Myrina litteras esse allatas, non mei errati, sed tui: in quo peccatum videbatur esse, si modo erat, fratris tui, & Tullii, sed cum id corrigi non posset, quod jam depositis rationibus ex provincia

de

decessimus : credo , me quidem tibi pro animi mei voluntate , proque ea spe facultatum , quam tum habebamus , quam humanissime potuerim , scripsisse , sed neque tum me humanitate mearum litterarum obligatum puto , neque tuam hodie epistolam de HS. centum millibus sic accepisse , ut ii accipiunt , quibus epistolæ per hæc tempora molestæ sunt . Simul illud cogitare debes , me omnem pecuniam , quæ ad me salvis legibus pervenisset , Ephesi apud publicanos deposuisse : id fuisse HSxxxii. mil. eam omnem pecuniam Pompejum abstulisse : quod ego sive æquo animo fero , sive iniquo , tu de HS. centum millibus æquo animo ferre debes & existimare , eo minus ad te vel de tuis cibariis , vel de mea liberalitate pervenisse . Quod si mihi expensa ista HS. centum tulisses , tamen , quæ tua est suavitas , quique in me amor , nolles a me hoc tempore ællimationem accipere , nam numeratum si cuperem , non erat . Sed hæc jocatum me putato , ut ego te existimo , ego tamen , cum Tullius rure redierit , mittam eum ad te , si quid ad rem putabis pertinere . Hanc epistolam cur non fecundâ velim , causa nulla est . Vale .

## A R G U M E N T U M .

*Cupidum se esse significat Mescinii videndireumque hortatur, ut acerbisatem temperum litterarum studio, optimæque conscientia recordatione mitiget .*

XXI. M. T. C. LUCIO MESCINIO S. D.

**G**Ratæ mihi tuæ litteræ fuerunt : ex quibus intellexi quod etiam sine litteris arbitrabar , videndi mei te summa cupiditate affectum esse , quod ego ita libenter accipio , ut tamen tibi non concedam . Nam tecum esse , ita mihi omnia , quæ opto contingant , ut vehementer velim ; etenim , quum esset major & virorum & civium bonorum , & jucundorum hominum , & amantium mei copia , tamen erat nemo , quicum essem libentius quam tecum , & pauci quibus cum æque libenter : hoc vero tempore , cum alii interierint , alii absint , alii mutati voluntate sint , unum medius fidius tecum diem libentius , posuerim , quam hoc omne tempus cum plerisque eorum , qui-

quibuscum vivo necessario. Noli enim existimare mihi non solitudinem jucundiorē esse (qua tamen ipsa uti non licet) quam sermones eorum qui frequentant domum meam, excepto uno, aut ad summum altero. Itaque utor eodem perfugio, quo tibi utendum censeo, litterulis nostris; præterea etiam conscientia consiliorum meorum. Ego enim is sum (quemadmodum tu facillime videres existimare) qui nihil unquam mea potius, quam meorum civium causa fecerim: cui nisi invidisset is, quem tu nunquam amasti (me enim amabas) & ipse beatus esset, & omnes boni; ego sum is, qui nullius vim plus valere volui, quam honestum otium. Idemque cum illa ipsa arma, quæ semper timueram, plus posse sensi, quam illum consensum bonorum, quem ego idem effeceram, quavis tuta conditione pacem accipere malui, quam viribus cum valentiore pugnare. Sed & hæc, & multa alia coram brevi tempore licebit; neque me tamen ulla res alia Romæ tenet, nisi expectatio rerum Africanarum: videtur mihi res in propinquum adducta discrimen. Puto autem mea nonnihil interesse; quamquam id ipsum quid intersit, non sane intelligo; verum tamen, quicquid illinc nunciatum sit, non longe abesse a consiliis amicorum; est enim res ipsa jam in eum locum adducta, ut, quamquam multum intersit inter eorum causas, qui dimicant, tamen inter victorias non multum interfuturum putem. Sed plane animus, qui dubiis rebus forsitan fuerit infirmior, desperatis confirmatus est multum; quem etiam superiores tuæ litteræ confirmarunt: quibus intellexi, quam fortiter injuriam ferres, juvitque me, tibi cum summam humanitatem, cum etiam tuas litteras profuisse. Verum enim scribam: teneriore mihi animo videbare, sicut omnes fere, qui, vita ingenua, in beata, & libera civitate viximus; sed, ut illa secunda moderate tulimus; sic hanc non solum adversam; sed etiam funditus eversam fortunam fortiter ferre debemus: ut hoc saltem in maximis malis boni consequamur, ut mortem, quam etiam beati contemnere debebamus, propterea quod nullum sensum esset habitura, nunc sic affecti non modo contemnere audeamus, sed etiam optare.

Tu,

Tu, si me diligis, fruiere isto otio: tibi que persuade; PRÆTER culpam, ac peccatum, quo semper caruisti, & carebis, homini accidere nihil posse, quod sit horribile, aut pertimescendum. Ego, si videbitur recte fieri posse, ad te veniam brevi: si quid acciderit, ut mutandum consilium sit, te certiores faciam statim. Tu ita fac: cupidus mei videndi sis, ut istinc te ne moveas tam infirma valetudine, nisi ex me prius quæstioris per litteras, quid te velim facere. Me velim, ut facis, diligas, valetudinique tuæ, & tranquillitati animi servias. Vale.

## LIBER VI.

### ARGUMENTUM.

*A. Manlius Torquatus, qui Pompejanas partes secutus erat, consolatur in eo, quod Romæ non sit; & aliquam simul spem redditus ostendit.*

I. M. T. C. A. TORQUATO S. D.

**E**tsi ea perturbatio est omnium rerum, ut suæ quemque fortunæ maxime pœniteat; nemoque sit, quin ubivis, quam ibi, ubi est, esse malit: tamen mihi dubium non est, quin hoc tempore bono viro Romæ esse, miserrimum sit. Nam, e. si quocumque in loco quisque est, idem est ei sensus, & eadem acerbitas ex interitu rerum & publicarum, & suarum: tamen oculi augent dolorem, qui ea, quæ ceteri audiunt, intueri coguntur, nec avertere a miseris cogitationem sinunt. Quare etsi multarum rerum desiderio te angere necesse est, tamen illo dolore, quo maxime te confici audio, quod Romæ non sis, animum tuum libera. Etsi enim cum magna molestia tuos, tuæque desideras: tamen illa quidem, quæ requiris, suum statum tenent, nec melius, si tu adesses, tenerent: nec sunt ullo in proprio periculo, nec debes tu, quum de tuis cogitas, aut præcipuam aliquam fortunam postulare, aut communem reculare. De te autem ipso, Torquate,

est



est tuum sic agitare animo, ut non adhibeas in consilium cogitationum tuarum desperationem, aut timorem. Nec enim is, qui in te adhuc injustior, quam tua dignitas postulabat, fuit, non magna signa dedit animi erga te mitigati, nec tamen is ipse, a quo salus petitur, habet explicatam, aut exploratam rationem salutis suæ. Cumque omnium bellorum exitus incerti sint, ab altera victoria tibi periculum nullum esse perspicio, quod quidem sejunctum sit ab omnium interitu: ab altera te ipsum numquam timuisse certo scio. Reliquum est, ut te idipsum, quod ego quasi consolationis loco pono, maxime excruciet, commune periculum reipubl. cujus tanti mali, quamvis docti viri multa dicant, tamen vereor, ne consolatio ulla possit vera reperiri, præter illam, quæ tanta est, quantum in cujusque animo roboris est, atque nervorum. Si enim BENE sentire; recteque facere, satis est ad bene, beateque vivendum; vereor, ne eum, qui se optimorum consiliorum conscientia sustentare possit, miserum esse nefas sit dicere. Nec enim nos arbitror victoriæ præmiis ductos, patriam olim, & liberos, & fortunas reliquisse; sed quoddam nobis officium justum, & pium, & debitum reip. nostræque dignitati videbatur: qui neque, cum id faciebamus, tam eramus amentes, ut explorata nobis esset victoria. Quare, si id evenit, quod ingredientibus nobis in causam propositum fuit accidere posse, non debemus ita cadere animis, quasi aliquid evenerit, quod fieri posse nunquam putarimus. Simus igitur ea mente, quam ratio, & veritas præscribit; ut nihil in vita nobis præstandum præter culpam putemus, eaque cum careamus, omnia humana placate, & moderate feramus. Atque hæc eo pertinet oratio, ut, perditis rebus omnibus, tamen ipsa virtus se sustentare posse videatur; sed, si est spes aliqua rebus communibus, ea tu, quicumque status est futurus, carere non debes. Atque hoc mihi scribenti veniebat in mentem, me eum esse, cujus tu desperationem accusare solitus esses, quemque auctoritate tua cunctantem, & diffidentem excitare; quo quidem tempore non ego causam

fam nostram ; sed consilium improbabam : fere enim nos iis armis adversari videbam , quæ multo ante conformata per nosmetipsos erant ; de-  
 lebanque pilis , & gladiis , non consiliis , neque auctoritatibus nostris , de jure publico disceptari . Neque ego ea , quæ facta sunt , fore cum dicebam , divinabam futura ; sed quod & fieri posse , & exitiosum fore , si evenisset , videbam , idne accideret , timebam : præsertim cum si mihi alterutrum de eventu , atque exitu rerum promittendum esset , id futurum , quod evenit , exploratius possem promittere : iis enim rebus præstamus , quæ non prodeunt in aciem : usu autem armorum , & militum robore inferiores eramus . Sed tu illum animum nunc adhibe , quæso , quo me tum esse oportere censebas . Hæc eo scripsi , quod mihi nunc Philargyrus tuus , omnia de te requirenti , fidelissimo animo ( ut mihi quidem visus est ) narravit , te interdum sollicitum solere esse vehementius ; quod facere non debes , nec dubitare , quin aut aliqua re-  
 publ. sis futurus , qui esse debes ; aut perditus , non afflictiore conditione , quam ceteri . Hæc vero tempus , quo exanimati omnes , & suspensifumus , hoc moderatiore animo ferre debes , quod & in ea urbe es , ubi nata , & alta est ratio , ac moderatio vitæ : & habes Ser. Sulpicium , quem semper unice dilexisti , qui te profecto & benevolentia , & sapientia consolatur : cuius si essemus auctoritatem , & consilium sequuti , rogati potius potentiam , quam armati victoriam subiissemus . Sed hæc longiora fortasse fuerunt , quam necesse fuit : illa quæ majora sunt , brevius exponam . Ego habeo , cui plus , quam tibi debeam , neminem : quibus tantum debebam , quantum tu intelligis , eos mihi hujus belli casus eripuit , qui sim autem hoc tempore , intelligo : sed quia NEMO est tam afflictus , qui , si nihil aliud studeat , nisi id , quod agit , non possit navare aliquid , & efficere : omne meum consilium , operam , studium certo velim existimes tibi , tuisque liberis esse debitum . Vale .

## ARGUMENTUM.

*Primum se excusat, quod minus saepe scribat : deinde de reditu Torquati esse impetratum significat : & consolationis loco subjungit, nihil ei praeipue timendum.*

## II. M. T. C. A. TORQUATO S.D.

**P**Eto a te, ne me putes oblivione tui rarius ad te scribere, quam solebam, sed aut gravitate valetudinis (qua tamen jam paullulum videor levare) aut quod absum ab urbe, ut, qui ad te proficiscantur, scire non possim. Quare velim ita statutum habeas, me tui memoriam summa cum benevolentia tenere, tuasque omnes res non minori mihi curæ, quam meas esse, quod ~~ma~~ <sup>ma</sup>jore in varietate versata est adhuc tua causa, quam homines aut volebant, aut opinabantur : mihi crede, non est pro malis temporum quod moleste feras, necesse est enim aut armis urgeri reipub. sempiternis, aut, his positis, recreari aliquando, aut funditus interire, si arma valebunt, nec eos, a quibus reciperis ; vereri debes, nec eos, quos adjuvisti : sin, armis aut conditione positis, aut defatigatione abiectis, aut victoria detractis, civitas respiraverit, & dignitate tua frui tibi, & fortunis licebit, sin omnino interierint omnia, fueritque is exitus, quem vir prudentissimus M. Antonius jam tum timebat, cum tantum instare malorum suspicabatur ; misera est illa quidem consolatio, tali praesertim civi, & viro ; sed tamen necessaria : **NIHIL** esse praeipue cuiquam dolendum in eo, quod accadat universis. Quæ vis insit in his paucis verbis (plura enim committenda epistolæ non erant.) si attendes, quod facis, profecto etiam siue meis litteris intelliges, te aliquid habere, quod speres ; nihil, quod aut hoc, aut aliquo reipub. statu timeas : omnia si interierint, cum superstitem te esse reipub. ne si liceat quidem, velis ferendam esse fortunam, praesertim quæ absit culpa ; sed hæc hætenus. Tu velim scribas ad me, quid agas, & ubi futurus sis, ut aut quo scribam, aut quo veniam, scire possim. Vale.

A R-

*Consolari vult: sed quia nihil aliud ad consolandum suppetit, consolationem ait debere esse optimorum consiliorum conscientiam.*

### III. M. T. C. A. T O R Q U A T O S. D.

**S**uperioribus litteris, benevolentia magis adductus, quam quod res ita postulareret, fui & inglor. Neq; enim confirmatione nostra egebat virtus tua: neque erat ea mea causa, atque fortuna, ut, cui omnia deessent, alterum confirmarem, hoc item tempore brevior esse debeo, sive enim tum nihil opus fuit tam multis verbis; nihilo magis nunc opus esse sive enim tum opus fuit illud satis est, praesertim cum accesserit nihil novi. Nam etsi quotidie aliquid audimus earum rerum, quas ad te perferri existimo, summa tamen eadem est, & idem exitus, quem ego tam video animo, quam ea, quae oculis cernimus. Nec vero quidquam video, quod non idem te videre certo sciam; nam etsi, quem exitum acies habitura sit, divinare nemo potest, tamen & belli exitum video, & si id minus, hoc quidem certe, cum sit necesse alterutrum vincere, qualis futura sit, vel haec, vel illa victoria. Idque cum optime perspexi, tale video, nihil ut mali videatur esse futurum, si id vel ante acciderit, quod vel maximum ad timorem proponitur. **ITA** enim vivere, ut non sit vivendum, miserissimum est: mori autem nemo sapiens miserum duxit, ne beato quidem. Sed in ea es urbe, in qua haec, vel plura, & ornatiora parietes ipsi loqui posse videantur. Ego tibi hoc confirmo, **ET SI** levis est consolatio ex miseriis aliorum, nihilo te nunc majore in discrimine esse quam quemvis aut eorum, qui discesserint, aut eorum, qui remanserint, alteri dimicant, alteri victorem timent. Sed haec consolatio levis, illa gravior, qua te uti spero, ego certe utor, nec enim, dum ero, angar ulla re, cum omni vacem culpa: &, si non ero, sensu omnino carebo. Sed rursus γὰρ οὐκ ἄσπασαι, qui ad te haec. Mihi tu, cui, tua omnia maxime cura sunt, &, dum vivam, erunt. Vale.

A R-

## ARGUMENTUM.

*Consolatoria epistola rationibus undecumq; collectis:  
sed, si consideras, desperationem potius continet.*

IV. M. T. C. A. TORQUATO S. D.

**N**OVI, quod ad te scriberem, nihil erat;  
& tamen, si quid esset, sciebam, te a  
tuis certiores fieri solere, de futuris autem  
rebus etsi semper difficile est dicere; tamen in-  
terdum conjectura possis propius accedere, cum  
res est ejusmodi, cujus exitus provideri possit.  
Nunc tantum videmur intelligere non diutur-  
num bellum fore: etsi id ipsum nonnullis videat-  
ur secus; equidem, cum hæc scribebam, ali-  
quid jam actum putabam, non quod ego certo  
scirem, sed quod non difficilis erat conjectura,  
nam cum omnis belli Mars communis, & cum  
semper incerti exitus praeliorum sunt: tum hoc  
tempore ita magarum utrinque copia, ita parata  
ad depugnandum esse dicuntur, ut, uterun-  
que vicerit, non sit mirum futurum. Illa in  
dies singulos magis, magisque opinio hominum  
confirmatur, etiamsi inter causas armorum ali-  
quantum intersit, tamen inter victorias non  
multum interfuturum. Alteros propemodum jam  
sumus experti: de altero, nemo est, quin cogi-  
tet, quam sit metuendus iratus victor armatus.  
Hoc loco si videor angere dolorem tuum, quem  
consolando levare debebam, fateor, me commu-  
nium malorum consolationem nullam invenire  
præter illam; quæ tamen, si possis eam susci-  
pere, maxima est quæque ego quotidie magis  
uro: **CONCIENTIAM** rectæ voluntatis  
maximam consolationem esse rerum incommoda-  
rum: necesse ullum magnum malum præter cul-  
pam, a qua quando tantum absumus, ut etiam  
optime senserimus, eventusque magis nostri  
consilii, quam consilium reprehendatur, &  
quando præstitimus, quod debuimus, moderate,  
quod evenit, feramus. Sed hoc mihi tamen  
non sumo, ut te consolet de communibus mi-  
seriis, quæ & ad consolandum majoris ingenii,  
& ad ferendum singularis virtutis indigent. Il-  
lud cuiusvis facile est docere, cur præcipue tu des-

lere nihil debeas; ejus enim, qui tardior in te-  
 levando fuit, quam fore putavimus, non est mi-  
 hi dubia de tua salute sententia: de aliis au-  
 tem non arbitror te expectare, quid sentiam.  
 Reliquum est, ut te angat, quod absis a tuis  
 tamdiu, res molesta, praesertim ab iis pueris,  
 quibus nihil potest esse festivius, sed, ut an-  
 tea ad te scripsi, tempus est hujusmodi, ut su-  
 am quisque conditionem miserimam putet, &  
 ubi quisque sit, ibi esse minime velit. Equi-  
 dem, nos quod Romae sumus, miserimum es-  
 se duco; non solum quod in omnibus malis  
 acerbius est videre, quam audire; sed etiam  
 quod ad omnes casus subitorum periculorum ma-  
 gis obiecti sumus, quam si abessemus, etsi me-  
 ipsum consolatorem tuum non tantum litterarum,  
 quibus semper studui, quantum longinquitas  
 temporis mitigavit. Quanto fuerim in dolore,  
 meministi, in quo prima illa consolatio est,  
 vidisse me plus, quam ceteros, cum cupiebant  
 quavis iniqua conditione pacem, quod etsi ca-  
 su, non divinatione mea factum est, tamen hac  
 inani prudentiae laude delector. Deinde, quod  
 mihi ad consolationem commune tecum est, si  
 jam vocer ad exitum vitae, non ab ea republ-  
 avellar, qua carendum esse doleam, praesertim  
 cum id sine ullo sensu futurum sit. Adjuvat e-  
 tiam aetas, & aeta jam vita, quae cum cursu suo  
 bene confecto delectatur; tum verat in eo viti-  
 timere, quo nos jam natura ipsa pene perduce-  
 rit. Postremo is vir, vel etiam ii viri, hoc  
 bello occiderunt, ut imprudentia videator, ean-  
 dem fortunam, si res cogat, recusare. Equidem  
 mihi omnia propono, nec ullum est tantum ma-  
 lum, quod non putem impendere: sed cum plus  
 in metuendo mali sit, quam in illo ipso, quod  
 timetur, desino; praesertim cum id impendeat,  
 in quo non modo dolor nullus; verum finis e-  
 tiam doloris futurus sit. Sed hac satis multa,  
 vel plura potius, quam necesse fuit, facis au-  
 tem non loquacitas mea, sed benevolentia hon-  
 giores epistolas. Servium discessisse Athenis mo-  
 teste tui, non enim dubito, quin magna tibi  
 levationi sit solitus esse quotidianus congres-  
 sus, & sermo cum familiarissimi hominis, tam  
 opti-

optimi, & prudentissimi viri. Tu velim te, ut debes, & soles, tua virtute sustentas, ego, quæ te velle, quæque ad te, & ad tuos pertinere arbitror, omnia studiose, diligenterque curabo, quæ cum faciam, benevolentiam tuam erga me imitabor, merita non assequar. Vallo.

## A R G U M E N T U M.

*Cecinam, qui pro Pompejo contra Cæsarem pugnauerat, patria carentem bene sperare iubet, seque ei nullam in re defuturum pollicetur. Et autem Cæsarem ignovisse, Hirtius tradit de bello Africano.*

## V. M. T. C. A. CÆCINÆ S. D.

Quotiescumque filium tuum videbo ( video autem fere quotidie ) polliceor ei studium quidem meum, & operam sine ulla exceptione, aut laboris, aut occupationis, aut temporis: gratiam autem, atque auctoritatem cum hac exceptione, quantum valeam quantumque possim. Liber tuus & lectus est, & legitur a me diligenter, & custoditur diligentissime. Res, & fortunæ tuæ mihi maximæ curæ sunt: quæ quidem quotidie faciliores mihi, & meliores videntur, multisque video magnæ esse curæ: quorum de studio, & de sua spe filium ad te perscripsisse certo scio. Iis autem de rebus, quæ conjectura consequi possumus, non mihi sumo, ut plus ipse prospiciam, quam te videre, atque intelligere mihi persuaserim, sed tamen, quia fieri potest, ut tu ea perturbatiore animo cogites; puto esse meum, quid sentiam exponere. Ea natura rerum est, & is temporum cursus, ut non possit ista aut tibi, aut ceteris fortuna esse diuturna, neque hæere in tam bona causa, & in tam bonis civibus tam acerba injuria. Quare ad eam spem, quam extra ordinem de te ipso habemus, non solum propter dignitatem, & virtutem tuam ( hæc enim ornamenta sunt tibi etiam cum aliis communia ) accedunt tuæ præcipua, propter eximium ingenium, summamque virtutem; cui mehercule hic, casus in potestate sumus, multum tribuit. Itaque

ne punctum quidem temporis in ista fortuna fuisses, nisi eo ipso bono tuo, quo delectatur, se violatum putaret, quod ipsum lenitur quotidie: significaturque nobis ab iis, qui simul cum eo vivunt, tibi hanc ipsam opinionem ingenii apud ipsum plurimum profuturam. Quapropter primum fac animo forti, atque magno sis, ita enim natus, ita educatus, ita doctus es, ita etiam cognitus, ut tibi id faciendum sit: deinde spem quoque habeas firmissimam propter eas causas, quas scripsi. A me vero tibi omnia, liberisque tuis paratissima esse confidas velim: id enim & vetustas nostri amoris, & mea consuetudo in meos, & tua multa erga me officia postulant. Vale.

## A R G U M E N T U M.

*Ad confirmandum Cæcinæ exulis animum divinationem quandam inducit, sumptam ex Casariæ natura, & ex civilium temporum ratione.*

VI. M. T. C. CÆCINÆ S. D.

**V**ereor, ne desideres officium meum, quod tibi pro nostra & meritorum multorum, & studiorum parium conjunctione deesse non debet: sed tamen vereor, ne litterarum a me officium requiras: quas tibi & jampridem, & sæpe misissem, nisi quotidie melius expectans, gratulationem quam confirmationem animi tui complecti litteris maluissem; nunc autem, ut spero, brevi gratulabimur: itaque in aliud tempus id argumentum epistolæ differo. His autem litteris animum tuum, quem minime imbecillum esse & audio, & spero, etsi non sapientissimi, at amicissimi hominis auctoritate confirmandum etiam atque etiam puto: nec iis quidem verbis, quibus te consolet ut afflictum, & jam omni spe salutis orbatum, sed ut eum, de cujus incolumitate non plus dubitem, quam te meminisse dubitare de mea. Nam cum me ex republica expulissent ii, qui illam cadere posse, stante me, non putarunt: memini, me ex multis hospitiis, qui ad me ex Asia, in qua tu eras, venerant, audire, te de glorioso, & celesti redivituro confirmare. Si te ratio quadam Etru-

scæ



scæ disciplinæ, quam a patre, nobilissimo, atque optimo viro acceperas, non fefellit; nec nos quidem nostra divinatio faller, quam tum sapientissimorum virorum monumentis, atque præceptis, plurimoque, ut tu scis, doctrinæ studio, tum magnæ etiam usu tractandæ reipublicæ, magnaue nostrorum temporum varietate consequuti sumus; cui quidem divinationi hoc plus confidimus, quod ea nos nihil in his tam obscuris rebus, tamque perturbatis unquam omnino fefellit. Dicerem, quæ antea futura dixissem, ni vererem, ne ex eventis fingere viderem; sed tamen plurimi sunt testes, me & initio, ne conjungeret se cum Cæsare, monuisse Pompeium, & postea, ne se jungeret, conjunctione frangi Senatus opes, disjunctione civile bellum excitari videbam. Atqui utebar familiarissime Cæsare, Pompeium faciebam plurimi: sed erat meum consilium cum fidele Pompejo, tum salutare utrique. Quæ præterea providerim, prætereo: nolo enim hunc de me optime meritum existimare, ea me suasisse Pompejo, quibus ille si parvisset, esset hic quidem clarus in toga, & princeps; sed tantas opes, quantas nunc habet, non haberet. Eundem in Hispaniam censui, quod si fecisset, civile bellum nullum omnino fuisset. Rationem haberi absentis, non tam pugnavi, ut liceret, quam ut, quando, ipso consule pugnante, populus jufferat, haberetur. Causa belli orta est: quid ego prætermisi aut monitorum, aut querelarum, cum vel iniquissimam pacem justissimo bello anteferrem? victa est auctoritas mea non tam a Pompejo (nam is movebatur) quam ab iis, qui duce Pompejo freti, peropportunam & rebus domesticis, & cupiditatibus suis illius belli victoriam fore putabant. Susceptum bellum est, quiescente me; depulsum ex Italia, manente me, quoad potui, sed valuit apud me plus pudor meus, quam timor. Veritus sum deesse Pompeji saluti, cum ille aliquando non defuisset meæ. Itaque vel officio, vel fama bonorum, vel pudore victus, ut in fabulis Amphiaræus, sic ego prudens, & sciens ad pellem ante oculos positam sum profectus; quo in bel-

lo nihil adversi accidit non prædicente me. Quare, quando, ut augures, & astrologi solent, ego quoque augur publicus ex meis superioribus prædictis constitui apud te auctoritatem augurii, & divinationis meæ, debet habere fidem nostra prædictio. Non igitur ex astitis involatu, nec e cantu sinistro oscinis ( ut in nostra disciplina est ) nec e tripudiis solistimis, aut somniis tibi auguro: sed habeo alia signa, quæ observem: quæ etiam non sunt certiora illis, minus tamen habent vel obscuritatis, vel erroris. Notantur autem mihi ad divinandum signa duplici quadam via quarum alteram duco a Cæsare ipso, alteram a temporum civilium natura, atque ratione. In Cæsare hæc sunt, mitis, clemensque natura, qualis exprimitur præclare illo libro querelarum tuarum, & accedit, quod mirifice ingeniis excellentibus, quale est tuum, delectatur, præterea cedit multorum justis, & officio incensis; non inanibus, aut ambitiosis voluntatibus, in quo vehementer eum consentiens Etruria movebit. Cur hæc igitur adhuc parum profecerunt? quia non putat se sustinere causas posse multorum, se tibi, cui justius videtur irasci posse, concesserit. Quæ est igitur ( inquires ) spes ab irato? Ee eodem fonte se haustum intelligit laudes suas, & quo sit leviter asperius, postremo homo est valde acutus, & multum providens: intelligit, te hominem in parte Italiæ minime contemnenda facile omnium nobilissimum, & in communi republ. cuivis summorum tuæ ætatis vel ingenio, vel gratia, vel fama populi Rom. parem, non posse prohiberi a republ. diutius; nollet hoc temporis potius esse aliquando beneficium, quam iam suum. Dixi de Cæsare: nunc dicam de temporum, rerumque natura. Nemo est tam inimicus ei causæ, quam Pompejus animatus melius, quam paratus susceperat, qui nos malos cives dicere, aut homines improbos audeat, in quo admirari soleo gravitatem, & justitiam, & sapientiam Cæsaris; nunquam nisi honorificentissime Pompejum appellat, at in ejus personam multa fecit asperius, armorum ista, & victorie sunt facta non Cæsaris, at nos quemadmodum est complexus? Cassium sibi legavit: Brutum Cæ-

liz præfecit, Sulpicium Graciz: Marcellum,  
 cui maxime succensebat cum summa illius di-  
 gnitate restituit. Quo igitur hæc spectant, re-  
 rum hoc natura: & civilium temporum non pa-  
 rietur: nec manens, nec mutata ratio feret,  
 primum ut non in causa par eadem sit & con-  
 ditio, & fortuna omnium; deinde ut in eam  
 civitatem boni viri, & boni cives nulla igno-  
 minia notati non revertantur, in quam tor ne-  
 fariorum scelerum condemnati reverterunt. Hæ-  
 bes augurium meum, quo, si quid addubitarem,  
 non potius uterer, quam illa consolatione, qua  
 facile fortem virum sustentarem, te, si explora-  
 ra victoria arma sumpsisses pro republica (ita  
 enim tum putabas) non nimis esse laudandum;  
 sin propter incertos exitus, eventusque bello-  
 rum posse accidere, ut vinceremur, putasses,  
 non debere te ad secundam fortunam bene pa-  
 ratum fuisse, adversam ferre nullo modo posse.  
 Disputarem etiam, quanto solatio tibi conscien-  
 tia tui facti, quantæ delectationi in rebus ad-  
 versis litteræ esse deberent. Commemorarem non  
 solum veterum, sed horum etiam recentium vel  
 ducum, vel comitum tuorum gravissimos casus  
 etiam externos multos viros nominarem. L. EN-  
 V A T enim dolorem communis quasi legis, &  
 humanæ conditionis recordario. Exponerem etia-  
 am, quemadmodum hic, & quanta in turba,  
 quantaque in confusione rerum omnium vivere-  
 mus, necesse est enim minore desiderio perdita  
 repub. carere, quam bona; sed hoc genere ni-  
 hil opus est; incolumem te cito, ut spero, vel  
 potius, ut perspicio, videbimus. Interea tibi  
 absenti, & huic, qui adest, imagini animi, &  
 corporis tui, constantissimo, atque optimo fuit  
 tuum studium, officium, opera, laborem meum  
 jampridem & pollicitus sum, & detuli; nunc  
 hoc amplius, quod me amicissime quotidie ma-  
 gis Cæsar amplectitur, familiares quidem ejus,  
 sicuti neminem, apud quem quicquid valebo vel  
 auctoritate, vel gratia, valebo tibi. Tu cura,  
 ut cum firmitudine te animi, tum etiam spe  
 optima sustentas. Vale.

## A R G U M E N T U M.

*Primum agit de libro, quem in Cæsarem scripserat: deinde studiose rogat, ut veniam sibi a Cæsare, potestatemque impetret redeundi.*

## VII. A. CÆCINA CICERONI S. D.

**Q**UOD tibi non tam celeriter liber est redditus, ignosce timori nostro, & miserere temporis: filius, ut audio, pertimuit (neque insuria) si liber exisset, quando non tam interest, quo animo scribatur, quam quo accipiat, ne ea res inepte mihi noceret: cum, praesertim adhuc styli pœnas dem. Qua quidem in te, singulari sum fato; nam cum mendum scripturae litura tollatur, stulticia fama mulctetur; mens error exilio corrigitur: cujus summa criminis est, quod armatus adversario maledixi. Nemo nostrum est, ut opinor, quin vota victoriae suae fecerit: nemo, quin, etiam cum de alia re immolaret, tamen eo quidem ipso tempore, ut quam primum Cæsar superaretur, optarit. Hoc si non cogitat, omnibus rebus felix est: si scit, & persuasus est, quid irascitur ei, qui aliquid scripsit contra suam voluntatem, cum ignoret omnibus, qui multa deos venerati sint contra ejus salutem? Sed, ut eodem revertar, causa hæc fuit timoris: scripsi de te parce medius fidius, & timide, non revocans me ipse, sed pene fugiens; genus autem hoc scripturae non modo liberum, sed incitatum, atque elatum esse debere, quis ignorat? solum existimatur esse, alteri maledicere: tamen cavendum est, ne in petulantiam incidas, impeditum, seipsum laudare, ne vitium arrogantiae subsequatur: solum vero liberum, alterum laudare, de quo quicquid detrahas, necesse est aut infirmitati, aut invidiae assignetur. Ac nescio, an tibi gratius, opportuniusque acciderit; nam, quod prestare non poteram, primum erat non attingere: secundum beneficium quam parcissime facere, sed tamen ego me quidem sustinui: multa minui, multa sustuli: complura ne posui quidem. **QUEM AD MODUM** igitur scalarum gradus, si alios tollas, alios incidas, nonnullos male hæ-

ren-

rentes relinquant, ruinæ periculum struas, non ascensum pares: sic tot malis tum victum tum tractum studium scribendi, quid dignum auribus, aut probabile potest afferre? Cum vero ad ipsius Cæsaris nomen veni, toto corpore contremisco non pœnæ metu, sed ipsius iudicii: totum enim Cæsarem non novi. Quem putas animum esse, ubi secum loquitur? hoc probabit: hoc verbum suspiciosum est, quid, si muto? ac vereor, ne pejus sit. Age vero, laudo aliquem; num offendo? cum porro non offendam (quid, si non vult? armati stylum persequitur: victi, & nondum restituti quid faciet? Auges etiam tu mihi timorem, qui in Oratore tuo caves tibi per Brutum, & ad excusationem socium queris; ubi hoc omnium patronus facit, quid me, veterem tuum, nunc omnium clientem, sentire oportet? In hac igitur calumnia timoris, & cæcæ suspicionis tormento, cum plurima ad alieni sensus conjecturam, non ad suum iudicium scribantur, quam difficile sit evadere, si minus expertus es, (quod te ad omnia summum, atque excellens armavit ingenium nos sentimus. Sed tamen ego filio dixeram, librum tibi legeret, & auferret; aut ea conditione daret, si reciperes te correcturum, hoc est, si totum alium faceres. De Asiatico itinere, quanquam summa necessitas premebat, ut imperasti, feci. Te pro me quid horret? vides tempus venisse, quo necesse sit de nobis constitui: nihil est, mi Cicero, quod filium meum exspectes, adolescens est: omnia excogitare vel studio, vel atate, vel metu non potest; totum negotium tu sustineas oportet: in te mihi omnis spes est, tu pro tua prudentia, quibus rebus gaudeat, quibus capiatur Cæsar, tenes, a te omnia proficiantur, & per te ad exitum perducantur necesse est, apud ipsum multum, apud ejus omnes plurimum potes: unum si tibi persuaseris, non hoc esse tui muneris, si quid rogatus fueris, ut facias, (quanquam id magnum, & amplum est) sed totum tuum esse onus, perficies: nisi forte aut in miseria nimis stulte, aut in amicitia nimis impudenter tibi onus impono. Sed utrique rei excusationem tua vitæ consuetudo dat; nam quod ita consuesti pro amicis

laborare, non jam sic sperant abs te, sed etiam sic imperant tibi familiares. Quod ad librum attinet, quem tibi filius dabit: peto a te, ne exeat: aut ita corrigas, ne mihi noceat. Vale.

## A R G U M E N T U M.

*Datum sibi a Ballo, & Oppio scribit, ut Cæcina liceret esse in Sicilia, ibique ut commoratur suadet.*

## VIII. M. T. C. CÆCINÆ S. D.

**C**Um esset mecum Largus, homo tui studiosus, loquutus Kal. Jan. tibi præfinitas esse: quod omnibus in rebus perspexeram, quæ Balbus, & Oppius, absente Cæsare, egissent, ea solere illi rata esse; egi vehementer cum his, ut hoc mihi darent, tibi in Sicilia, quoad vellemus, uti esse liceret. Qui mihi cum suescerent aut libenter polliceri, si quid esset ejusmodi, quod eorum animos non offenderet, aut etiam negare, & afferre rationem, cur negarent, huic meæ rogationi potius non continuo responderunt; eodem die tamen ad me reverterunt; mihi hoc dederunt, ut esses in Sicilia, quoad velles: se præstituros, nihil ex eo te offensionis habiturum. Quando, quid tibi permittatur, cognovisti: quid mihi placeat, puto te scire oportere. Atque his rebus, litteræ a te mihi sunt redditæ, quibus a me consilium petis, quid sim tibi auctor, in Sicilia ne subsidias, an ut ad reliquias Asiaticæ negotiationis proficiscare, hæc tua deliberatio non mihi convenire visa est cum oratione Largi; ille enim mecum, quasi tibi non liceret in Sicilia diutius commorari, ita loquutus erat: tu autem, quasi concessum sit, ita deliberas. Sed ego, sive hoc, sive illud est, in Sicilia censeo commorandum; propinquitas locorum vel ad impetrandum adjuvat crebris litteris, & nuntiis, vel ad reditus celeritatem, re aut impetrata, quod spero, aut aliqua ratione confecta, quamobrem censeo magnopere commorandum. T. Furfano Postumio familiari meo, legatisque ejus, item meis familiaribus, diligentissime te commendabo, cum venerint: erant enim omnes Mutinæ, viri sunt optimi,

&

& tui similitum studiosi, & mei necessarii: Quæ mihi venient in mentem, quæ ad te pertinere arbitrabor, ea mea sponte faciam: si quid ignorabo, de eo admonitus omnium studia vincam. Ego, etsi coram de tecum Furfatio ita loquar, ut tibi litteris ad eam nihil opus sit: tamen, quoniam tuis placuit, te habere meas litteras; quas ei redderes, morem eis gessi; earum litterarum exemplum infra scriptum est. Vale.

## A R G U M E N T U M.

*Brevis est epistola, sed perfecta commendationis exemplum.*

## IX. M. T. C. FURFANO PROCOS. S. D.

Cum A. Cæcina tanta mihi familiaritas, consuetudoque semper fuit, ut nulla major esse possit; nam & patre ejus, claro homine, & forti viro plurimum usi sumus, & hunc a puero, quod & spem mihi magnam afferebat summæ probitatis, summæque eloquentiæ, & vivebat mecum conjunctissime, non solum officiis amicitiae, sed etiam studiis communibus, sic semper dilexi, ut non ullo cum homine conjunctius viverem. Nihil attinet me plura scribere, quam mihi necesse sit, ejus salutem, & fortunas, quibuscumque rebus possim, tueri vides. Reliquum est, ut, cum cognorim pluribus rebus, quid tu & de bonorum fortuna, & de reip. calamitatibus sentires, nihil a te petam, nisi ut ad eam voluntatem, quam tua sponte erga Cæcinam habiturus esses, tantus cumulus accedat commendatione mea; quanti me a te fieri intelligo, hoc mihi gratius facere nihil potes. Vale.

## A R G U M E N T U M.

*Pollicetur quidquid potest ad eius incolumitatem, neque nullam spem fortunæ melioris ostendit.*

## X. M. T. C. TREBIANO S. D.

Ego, quanti te faciam, semperque fecerim, quanti me a te fieri intellexerim, sum mihi ipse testis; nam & consilium tuum

vel casus potius diutius in armis civilibus commorandi, semper mihi magno dolori fuit; & hic eventus, quod tardius, quam est æquum, & quam ego vellem, recuperes fortunam, & dignitatem tuam, mihi non minori curæ est, quam tibi semper fuerint casus mei. Itaque & Postumuleno, & Sextio, & sæpissime Attico nostro, proximeque Theudæ, liberto tuo, totum me patefeci: & his singulis sæpe dixi, quacunque re possem, me tibi, & liberis tuis satisfacere cupere: idque tu ad tuos velim scribas, hæc quidem certe, quæ in potestate mea sunt, ut operam, studium, consilium, rem, fidem meam sibi ad omnes res paratam putent. Si auctoritate, & gratia tantum possem, quantum in ea republica, de qua ita meritus sum, posse deberem: tu quoque is esses, qui fuisti cum omni gradu amplissimo dignissimus, tum certe ordinis tui facile princeps. Sed quando eodem tempore, eademque de causa nostrum uterque cecidit: tibi & illa polliceor, quæ supra scripsi, quæ sunt adhuc mea, & ea, quæ præterea videor mihi ex aliqua parte retinere, tanquam ex reliquiis pristinae dignitatis. Neque enim ipse Cæsar, ut multis rebus intelligere potui, est alienus à nobis: & omnes fere familiarissimi ejus, casu devincti magnis meis veteribus officiis, me diligenter observant, & colunt. Itaque, si quis mihi erit aditus de tuis fortunis (idest) de tua incolumitate, in qua sunt omnia) agendi, (quod quidem quotidie magis ex eorum sermonibus adducor, ut sperem) agam per me ipse, & moliar. Singula persequi non est necesse: universum studium meum, & benevolentiam ad te deferò, sed magni mea interest, hoc tuos omnes scire, quod tuis litteris fieri potest, ut intelligant, omnia Ciceronis patere Trebiano, hoc eo pertinet ut nihil existiment esse tam difficile, quod non, pro te mihi susceptum, juvandum sit futurum. Vale.



## ARGUMENTUM.

*Excusatio, cur non scripserit, consolatio, promissio meliorum rerum, & officii sui.*

XI. M. T. C. TREBIANO S. D.

**A**Ntea misissem ad te litteras, si genus scribendi invenirem, tali enim tempore aut consolari amicorum est, aut polliceri; consolatione non utebar, quod ex multis audiebam, quam fortiter, sapienterque ferres injuriam temporum, quamque te vehementer consolaretur conscientia factorum, & consiliorum tuorum. Quod quidem si facis, magnum fructum studio- rum optimorum capis, in quibus tescio semper esse versatum: idque ut facias, etiam atque etiam te hortor. Simul & illud tibi homini peritissimo rerum, & exemplorum, & omnis verustatis, ne ipse quidem rudis, sed in studio minus fortasse, quam vellem, at in rebus, atque usu plus etiam, quam vellem, versatus, spondeo tibi, acerbitem istam & injuriam non diuturnam fore. Nam & ipse, qui plurimum potest, quotidie mihi delabi ad æquitatem, & ad rerum naturam videtur: & ipsa causa ea est, ut jam simul cum republica, quæ in perpetuum jacere non potest, necessario reviviscat, atque recreetur: quotidieque sit aliquid lenius, & liberalius, quam timebamus. Quæ quoniam in temporum inclinationibus sæpe parvis posita sunt: omnia momenta observabimus, neque ullum prætermitemus tui juvandi, & levandi locum. Itaque illud alterum, quod dixi litterarum genus quotidie mihi, ut spero fiet proli- vius, ut etiam polliceri possim, id re quam verbis, faciam libentius. Tu velim existimes, & plures te amicos habere, quam qui in isto casu sint, ac fuerint, quantum quidem ego intelligere potuerim; & me concedere eorum ne- mini. Fortem fac animum habeas, & magnum, quod est in uno te: quæ sunt in fortuna, tem- poribus regentur, & consiliis nostris provide- buntur. Vale.

AR-

## A R G U M E N T U M.

*Gratulatur de reditu in patriam impetrato: hortatur, ut praterita ex animo deleat. dignitatisque recuperationem rei familiaris salutem anteponat.*

XII. M. T. C. T R E B I A N O S. D.

**D**olabellam antea tantummodo diligebam: obligatus ei nihil eram; nec enim acciderat mihi opus esse: & illi mihi debebat; quod non defueram ejus periculis, nunc tanto sum devinctus ejus beneficio; quod & antea in te, & hoc tempore in salute tua cumulatissime mihi satisfecit, ut nemini plus debeam. Qua in re tibi gratulor ita vehementer, ut te quoque mihi gratulari, quam gratias agere malim: alterum omnino non desidero: alterum vere facere poteris. Quod reliquum est, quando tibi virtus, & dignitas tua reditum ad tuos aperuit, est tuae sapientiae, magnitudinisque animi, quid amiseris, oblivisci; quid recuperaveris, cogitare; vives cum tuis, vives nobiscum; plus acquisivisti dignitatis, quam amisisti rei familiaris: quae ipsa tum esset jucundior, si ulla res esset publica. Vesterius, noster familiaris, ad me scripsit, te mihi maximas gratias agere; haec praedicatio tua mihi valde grata est: eaque te uti facile patior cum apud alios, tum mehercule apud Sironem nostrum amicum, quae enim facimus, ea prudentissimo cuique maxime probata esse volumus. Te cupio videre quam primum. Vale.

## A R G U M E N T U M.

*Gratulatur de reditu impetrato; & ad consolationem adscribit quaedam perditis rebus aptiora.*

XIII. M. T. C. A M P I O B A L B O S. D.

**G**ratulor tibi, mi Balbe, vereque gratulor: nec sum tam stultus, ut te usura falsi gaudii frui velim, deinde frangi repente, atque ita cadere, ut nulla res te ad aequitatem animi postea possit extollere. Egi tuam causam apertius, quam tempora nostra ferebant, vincebatur enim fortuna ipsa debilitate gratiae nostrae, tui caritate, & meo perpetuo erga te amo-

re, culto a te diligentissime. Omnia promissa, confirmata, certa, & rata sunt, quæ ad reditum, & salutem tuam pertinent, vidi, cognovi, interfui, etenim omnes Cæsaris familiares satis opportune habeo implicatos consuetudine, & benevolentia: sic, ut cum ab illo discesserint, me proximum habeant, hoc Pansa, Hircius, Balbus, Oppius, Matius, Postumius, plane ita faciunt, ut me unice diligant. Quod si mihi pro me efficiendum fuisset, non me pœniteret pro ratione temporum ita esse molitum, sed nihil est a me inservitum temporis causa, veteres mihi necessitudines cum his omnibus intercedunt: quibuscum ego agere de te non destiti: principem tamen habuimus Pansam, tui studiosissimum, mei cupidum, qui valet apud illum non minus auctoritate, quam gratia. Cimber autem Tullius mihi plane satisfecit. Valent tamen apud Cæsarem non tam ambitiosæ rogationes, quam necessariæ: quas quia Cimber habebat, plus valuit, quam pro ullo alio valere potuisset. Diploma statim non est datum: quod mirifica est improbitas in quibusdam, qui tulissent acerbius, veniam tibi dari, quem illi appellabant tubam belli civilis: multaque ita dicunt, quasi non gaudeant id bellum incidisse. Quare visum est occultius agendum, neque ullo modo divulgandum, de te jam esse perfectum, sed id erit perbreve: nec dubito, quin, legente te has litteras, confecta jam res futura sit. Pansa quidem mihi gravis homo, & certus, non solum confirmavit, verum etiam recepit, perceleriter se ablaturum diploma. Mihi tamen placuit hæc ad te perscribi, minus enim te firmum sermo Appulejæ tuæ, lacrymæque Ampia declarabant, quam significant litteræ tuæ, atque illæ arbitrabantur, cum a te abessent ipsæ, multo in graviore te cura futurum; quare magnopere putavi, angoris, & doloris tui levandi causa, pro certis ad te ea, quæ essent certa, perscribi oportere. Scis me antea sic solitum esse scribere ad te, magis ut consolarer fortem virum, atque sapientem, quam ut exploratam spem salutis ostenderem, nisi eam, quam ab ipsa rep. cum hic ardor extinctus esset, sperari

opor-

oportere censerem. Recordare tuas litteras, quibus, & magnum animum mihi semper ostendisti, & ad omnes casus ferendos constantem, atque paratum. Quod ego non mirabar, cum recorderer, te & a primis temporibus ætatis in rep. esse versatum, & tuos magistratus in ipsa discrimina incidisse salutis, fortunarumque communium: & in hoc ipsum bellum esse ingressum, non solum ut victor beatus, sed etiam (si ita accidisset) victus ut sapiens esses. Deinde, cum studium tuum consumas in virorum fortium factis memoriæ prodendis, considerare debēs, nihil tibi esse committendum, quamobrem eorum, quos laudas, non te similem præbeas. Sed hæc oratio magis esset apta ad illa tempora, quæ jam effugisti; nunc vero tantum te para ad hæc nobiscum ferenda, quibus ego si quam medicinam invenirem, tibi quoq; eandem traderem. Sed est unum perfugium, doctrina, ac litteræ, quibus semper usi sumus: quæ secundis rebus delectationem modo habere videbantur, nunc vero etiam salutem. Sed, ut ad initium revertar, cave dubites, quin omnia de salute, ac reditu tuo perfecta sint. Vale.

## A R G U M E N T U M.

*Scribit, se bene sperare de Ligarii salute: ad eamq; impetrandam omnia sua pollicetur. Interim hortatur, ut adversam fortunam moderate ferat.*

XIV. M. T. C. Q. LIGARIO S. D.

**E**Tsi tali tuo tempore me aut consolandi, aut juvandi tui causa scribere ad te aliquid pro nostra amicitia oportebat: tamen adhuc id non feci, quia neque lenire videbar oratione, neque levare posse dolorem tuum; postea vero quam magnam spem habere cœpi, fore, ut te brevi tempore incolumem haberemus; facere non potui, quin tibi & sententiam, & voluntatem declararem meam. Primum igitur scribam, quod intelligo, & perspicio, non fore in te Cæsarem duriores, nam & res cum quotidie, & dies, & opinio hominum, & ut mihi videtur, etiam sua natura mitiorem facit, idque cum  
de

de reliquis sentio, tum de te etiam audio ex familiarissimis ejus; quibus ego ex eo tempore, quo primum ex Africa nuntius venit, supplicare una cum fratribus tuis non destiti, quorum quidem & virtus, & pietas, & amor in te singularis, & assidua, & perpetua salutis tuæ cura tantum proficit, ut nihil sit, quod non ipsum Cæsarem tributurum existinem; & si tardius sit, quam volumus; magnis occupationibus ejus, a quo omnia petuntur, aditus ad eum difficiliore fuerunt; & simul Africanæ causæ iratior, diutius velle videtur eos habere sollicitos, a quibus se putat diuturnioribus esse molestiis constitutum, sed hoc ipsum intelligimus eum quietie remissius, & placatius ferre. Quare mihi crede, & memoriæ manda, me tibi id affirmasse, te in istis molestiis diutius non futurum. Quando, quid sentirem, exposui; quid velim tua causa, re potius declarabo, quam oratione; & si tantum possem, quantum in ea republica, de qua ita meritus sum, ut tu existimas, posse debebam; ne tu quidem in istis incommodis esses. Eadem enim causa opes meas fregit, quæ tuam salutem in discrimen adduxit, sed tamen quicquid imago veteris meæ dignitatis, quicquid reliquæ gratiæ valebunt, studium, consilium, opera, gratia, fides mea nullo loco deerit tuis optimis fratribus. Tu fac habeas fortem animum, quem semper habuisti; primum ob eas causas, quas scripsi: deinde, quod ea de republ. semper voluisti, atque sensitisti, ut non modo nunc secunda sperare debeas, sed etiam, si omnia adversa essent, tamen conscientia & factorum, & consiliorum tuorum, quæcunque acciderent, fortissimo, & maximo animo terre deberes. Vale.

## A R G U M E N T U M.

*Exorditur ab officii sui commemoratione. Deinde, quid de reditu Ligarii opinetur, subjungit.*

XV. M. T. C. Q. L I G A R I O S. D.

**M**E scito omnem meum laborem, omnem operam, curam, studium in tuam la-

salute consumere, nam cum te semper maxime dilexi, tum fratrum tuorum, quos æque, atque te summa benevolentia sum complexus, singularis pietas, amorque fraternus nullum me patitur officii erga te, studique munus, aut tempus prætermittere, sed quæ faciam, fecerimque pro te, ex illorum te litteris, quam ex meis, malo cognoscere, quid autem sperem, aut confidam, & exploratum habeam de salute tua, id tibi a me declarari volo. Nam, si quisquam est timidus in magnis, periculosisque rebus, semperque magis adversos rerum exitus metuens, quam sperans secundos, is ego sum: &, si hoc vitium est, eo me non carere confiteor. Ego idem tamen, cum ad 11. Kal. intercalares priores rogatu fratrum tuorum venissem mane ad Cæsarem, atque omnem adeundi, & conveniendi illius indignitatem, & molestiam pertulissem, cum fratres, & propinqui tui jacerent ad pedes, & ego essem loquutus, quæ causa, quæ tuum tempus postulabat, non solum ex oratione Cæsaris. quæ sane mollis, & liberalis fuit; sed etiam ex oculis, & vultu, & multis præterea signis, quæ facilius perspicere potui, quam scribere, hanc in opinionem discessi, ut mihi tua salus dubia non esset. Quamobrem fac animo magno, fortique sis: &, si turbidissima sapienter ferebas, tranquilliora late feras. Ego tamen tuis rebus sic adero, ut difficillimis; neque Cæsari solum, sed etiam amicis eius omnibus, quos mihi amicissimos esse cognovi, pro te, sicut adhuc feci, libentissime supplicabo. Vale.

## ARGUMENTUM.

*Continet hæc Epistula omnium brevissima gratulationem, benevolentiam, officium.*

XVI. M. T. C. BASILIO S. D.

**T**ibi gratulor: mihi gaudeo: te amo: tueor, a te amari, & quid agas, quidque tibi agatur, certior fieri volo. Vale.

ARGU-

LIBER VI. 153  
ARGUMENTUM.

*Insinuat se ad petitionem, mutui amoris commemoratione: petit autem, ut se absentem tueatur; si quidem gratum fore non dubitet.*

XVII. BITHYNICUS CICERONI S. D.

**S**I mihi tecum non & multæ, & justæ causæ amicitia privatim essent, repetarem initia amicitia ex parentibus nostris: quod faciendum iis existimo, qui paternam amicitiam nullis ipsi officiis prosequuti sunt. Itaque contentus ero nostra ipsorum amicitia: cujus fiducia peto a te, ut absentem me, quibuscunque in rebus opus fuerit, tueare; si nullum officium tuum apud me intermoriturum existimas. Vale.

ARGUMENTUM.

*Mirum declarat desiderium cum Bithynico vivendi, & adjicit, se esse illi amore conjunctissimum.*

XVIII. M. T. C. BITHYNICO S. D.

**C**UM ceterarum rerum causa cupio esse aliquid quando temp. constitutam, tum velim mihi credas, accidere id etiam, quo magis expectam promissum tuum, quo in litteris uteris; scribis enim, si ita sit, te mecum esse victurum, gratissima mihi tua voluntas est: facisque nihil alienum necessitudine nostra, iudiciisque patris tui de me, summi viri. Nam sic habeto, beneficiorum magnitudine eos, qui temporibus valuerunt, aut valeant, conjunctiores tecum esse, quam me, necessitudine neminem; quamobrem grata mihi est & memoria tua nostræ conjunctionis, & ejus etiam augendæ voluntas. Vale.

ARGUMENTUM.

*Respondet Lepta, qui praconium fecissent, licere iis esse in Decurionibus; scribit de bello Hispanensi, de Lepta negotio, de Oratore suo, de mansione urbana.*

XIX. M. T. C. LEPTÆ S. D.

**S**imul ut accepi a Seleuco tuo litteras, statim quæsi de Balbo per codicillos, quid esset in lege,

lege Rescripsit, eos, qui facerent præconium, vetari esse in decurionibus: qui fecissent, non vetari. Quare bono animo sint & tui, & mei, familiares, neque enim erat ferendum, cum, qui hodie aruspicinam facerent, in Senatu Romæ legerentur, eos, qui aliquando præconium fecissent, in municipiis decuriones esse non licere. De Hispaniis novi nihil: magnum tamen exercitum Pompejum habere constat; nam Cæsar ipse ad nos misit exemplum Paciaci litterarum, in quo erat, illi XI. esse legiones, scripserat etiam Messalla Q. Salasso, Q. Curtium fratrem eius, jussu Pompeji, inspectante exercitu interfectum; quod consensisset cum Hispanis quibusdam, si in oppidum nescio quod Pompejus rei frumentariæ causa venisset, cum comprehendere, ad Cæsaremque deducere. De negotio tuo, quod sponsor es pro Pompejo, si Balbus consponsor tuus redierit, homo in re familiari non parum diligens, non desinam cum illo communicare, si quid expediri possit, quod videbatur mihi ille confidere. Oratorem meum tantopere a te probari, vehementer gaudeo, mihi quidem sic persuadeo, me, quicquid habuerim judicii de dicendo, in illum librum contulisse, qui si est talis, qualem tibi videri scribis: ego quoque aliquid sum: sin aliter, non recuso, quin quantum de illo libro, tantundem de mei judicii fama detrahatur. Leptam nostrum cupio delectari jam talibus scriptis; etsi abest maturitas ætatis, jam tamen personare aures ejus hujusmodi vocibus, non est inutile. Me Romæ tenuit omnino Tullia mea partus; sed cum ea, quemadmodum spero, satis firma sit; teneor tamen, dum a Dolabellæ procuratoribus exigam primam pensionem, & mehercule non tam sum peregrinator jam, quam solebam. Edificia mea me delectabant, & otium; domus est, quæ nulli villarum mearum cedat: otium omni desertissima regione majus. Itaque ne litteræ quidem meæ impediuntur: in quibus sine ulla interpellatione versor. Quare, ut arbitror, prius hiote nos, quam istic tu nos videbis. Lepta suavissimus ediscat Hesiodum, & habeat in ore: *ἄνθρωπος δὲ ἀπὸ τῆς ἰσχυρίας, &c.*



## ARGUMENTUM.

*Cum Caesar ludos regionatim daturus esset, curationem eorum Lepta cupiebat. Cicero dissuadet, meminit Svetonius de his ludis in Julii vita.*

XX. M. T. C. LEPTÆ S. D.

**M**Aculam officio functum esse gaudeo, ejus Falernum mihi semper idoneum visum est diversorio: si modo testi satis est ad comitatum nostrum recipiendum; ceteroqui is mihi locus non displicet: nec ea re Petrinum tuum deseram, nam & villa, & a mœnibus illa commorationis est, non diversorii. De curatione aliqua nuperum regionum cum Oppio loquutus sum, nam Balbum, posteaquam tu es profectus, non vidi, tantis pedum doloribus afficitur, ut se conveniri nolit. Omnino de tota re, ut mihi videris, sapientius faceres, si non curares, quod enim eo labore assequi vis, nullo modo assequere: tanta est enim intimorum multitudo, ut ex his potius aliquis effluat, quam novo sit aditus, præsertim qui nihil afferat præter operam, in qua ille se dedisse beneficium putabit, si modo ipsum sciet, non accepisse; sed tamen aliquid videbitur, in quo sit spes, aliter quidem non modo non appetendum, sed etiam fugiendum puto. Ego me Asturæ diutius arbitror commoraturum, quoad ille quandoque veniat. Vale.

## ARGUMENTUM.

*Monet Toranium, ut in Sicilia commoretur, quoad scire possit, quid sibi agendum sit; clausula consolationis nescio quid continet.*

XXI. M. T. C. TORANIO S. D.

**D**Ederam triduo ante pueris Cn. Plancii litteras ad te: eo nunc ero brevior, teque ut antea consolabar, hoc tempore monebo. Nichil puto tibi esse utilius, quam ibidem opperiri, quoad scire possis, quid tibi agendum sit, nam præter navigationis longæ, & hyemalis, & minime portuosæ periculum, quod vitaveris; ne illud quidem non, quamvis subito, cum  
certi

certi aliquid audieris, te istinc posse proficisci, nihil est præterea, cur advenientibus te offerre gestias. Multa præterea metuo, quæcum Chitone nostro communicavi, quid multa? loco opportuniore in his malis nullo esse potuisti, ex quo te, quocunque opus erit, facillime, & expeditissime conferas. Quod si recipiet ille se, ad tempus aderis: sin. (quoniam multa accidere possunt) aliqua res eum vel impediet, vel morabitur: tu ibi eris, ubi omnia scire possis, hoc mihi prorsus valde placet. De reliquo, ut te sæpe per litteras hortatus sum, ira velim tibi persuadeas, te in hac causa nihil habere, quod timendum sit præter communem casum civitatis, qui, etsi est gravissimus; tamen ita viximus, & id ætatis jam sumus, ut omnia, quæ non nostra culpa nobis accident, fortiter ferre debeamus. Hic tui omnes valent, summaque pietate te desiderant, & diligunt, & colunt. Tu & cura, ut valeas, & te istinc ne temere commoveas.

#### ARGUMENTUM.

*Ad consolandum Toranium præterita colligit, & quid ipse fecerit, quasi exemplum ad imitandum proponit.*

XXII. M. T. C. TORANIO S. D.

**E**T si cum hæc ad te scriberem, aut appropinquare exitus hujus calamitosissimi belli, aut jam aliquid actum, & confectum videbatur: tamen quotidie commemorabam, te unum in tanto exercitu mihi fuisse assensorem, & me tibi, solosque nos vidisse, quantum esset in eo bello mali, in quo, spe pacis exclusa, ipsa victoria futura esset acerbissima, quæ aut interitum allatura esset, si victus esses, aut, si vicisses, servitutem. Itaque ego, quem tum fortes illi viri, & sapientes, Domitii, & Lentuli timidum esse dicebant (& eram plane: timebam enim ne evenirent ea, quæ acciderunt) idem nunc nihil timeo, & ad omnem eventum paratus sum, cum aliquid videbatur caveri posse, tum id negligi dolebam: nunc vero, everfis omnibus rebus, cum consilio proficisci nihil possit, una ratio videtur, quicquid even-

merit, ferre moderate; præsertim cum omnibus rerum mors sit extremum; & mihi sim conscius, me, quoad licuërit, dignitati reip. consuluisse, & hæc amissa, salutem retinere voluisse. Hæc scripsi, non ut de me ipse dicerem; sed ut tu, qui conjunctissimæ fuisti mecum & sententia, & voluntate, eadem cogitares. MAGNA enim consolatio est, cum recordare, etiam si secus acciderit, te tamen recte, vereque sensitse. Atque utinam liceat aliquando aliquo reip. statu nos frui, interque nos conferre sollicitudines nostras, quas pertulimus tum, cum timidi putabamur, quia dicebamus ea futura, quæ facta sunt. De tuis rebus nihil esse, quod timeas, præter universæ reipub. interitum, tibi confirmo. De me autem sic velim judices, quantum ego possum, me tibi, salutem tuam, liberisque tuis summo cum studio præsto semper futurum. Vale.

## A R G U M E N T U M.

*Domitium, interitu amicorum dolentem, rogat, ut cum Reip. jam satisfecerit, incolumitatis suæ consulat.*

## XXIII. M. T. C. D O M I T I O S. D.

**N**on ea res me deterruit, quominus, posteaquam in Italiam venisti, litteras ad te mitterem, quod tu ad me nullas miseris; sed quia nec quid tibi pollicerer ipse egens rebus omnibus, nec quid suaderem, cum mihi metipsum consilium deesset, nec quid consolationis afferrem, in tantis malis reperiebam. Hæc, quamquam nihilo meliora sunt, nunc etiam, atque etiam multo desperatiora: tamen inanes esse meas litteras, quam nullas, malui. Ego, si te intelligerem plus conatum esse suscipere reipub. causâ muneris, quam quantum præstare potuisses; tamen, quibuscunque rebus possem, ad eam conditionem te vivendi, quæ daretur, quæque esset, hortarer; sed cum consilii tui bene, fortiterque suscepti cum tibi finem statueris, quem ipsa fortuna terminum nostrarum contentionum esse voluisset: oro, obtestorque te pro nostra

nostra vetere conjunctione, ac necessitudine, proque summa mea in te benevolentia, & tua in me pari, te ut nobis, parenti, conjugi, utrisque omnibus, quibus es, fuistisque semper carissimus, saluum conserves; incolumitati tuæ, tuorumque, qui ex te pendunt, consulas, quæ didicisti, quæque ab adolescentia, pulcherrime a sapientissimis viris tradita, memoria, & scientia comprehendisti, iis hoc tempore utare; quos conjunctos summa benevolentia, plurimisque officiis amisisti, eorum desiderium, si non æquo animo, at forti feras. Ego, quid possim, nescio, vel potius me parum posse sentio: illud tamen tibi polliceor, me, quæcunque salutis, dignitatisque tuæ conducere arbitror, tanto studio esse facturum, quanto semper tu & studio, & officio in meis rebus fuisti. Hanc meam voluntatem ad matrem tuam, optimam feminam, tuique amantissimam detuli. Si quid ad me scripseris, ita faciam, ut te velle intellexero: sin autem tu minus scripseris, ego tamen omnia, quæ tibi utilia esse arbitror, summo studio, diligenterque curabo. Vale.

## LIBER VII.

### ARGUMENTUM.

*Ludos, quos Pompejus Magnus iterum consul dedit, describit, & extenuat: utrumque ob eam causam, ne Marium eos prætermisisse pœntioeret.*

I. M. T. C. M. MARIO S. P.

**S**I te dolor aliquis corporis, aut infirmitas valetudinis tuæ tenuit, quominus ad ludos venires, fortunæ magis tribuo, quam sapientiæ tuæ, sin hæc, quæ ceteri mirantur, contemnenda duxisti, & cum pervaletudinem posses, venire tamen noluisse: utrumque lator, & sine dolore corporis te fuisse, & animo valuisse, cum ea, quæ sine causa mirantur alii, neglexeris: modo ut tibi constiterit fructus otii tui: quo quidem tibi

tibi perfrui mirifice licuit, cum esses in ista amoenitate pene solus relictus. Neque tamen dubito, quin tu ex illo cubiculo tuo, ex quo tibi Scabianum perforasti, & patefecisti Sejanum, per eos dies matutina tempora lectuiculis consumpseris: cum illi interea, qui te istuc reliquerunt, spectarent communes mimos semisomni; reliquas vero partes dici tu consumebas iis delectationibus, quas tibi ipsi ad arbitrium tuum compararas, nobis autem erant ea perpetienda, quæ scilicet P. Mæcius probavisset. Omnino, si quæris, ludi apparatusissimi, sed non tui stomachi: conjecturam enim facio de meo, nam primum honoris causa in scenam redierant, quos ego honoris causa de scena decessisse arbitrabar, delicia vero tuæ nostræ Æsopus eiusmodi fuit, ut ei desinere per omnes homines liceret, is juvare cum cœpisset, vox cum defecit in illo loco; Si sciens fallo. Quid tibi ego alia narrem? nosti enim reliquos ludos. Quid? ne id quidem leporis habuerunt, quod solent mediocres ludi, apparatus enim spectatio tollebat omnem hilaritatem, quo quidem apparatu non dubito, quin animo æquissimo carueris; quid enim delectationis habent sexcenti muli in Clytemnestra? aut in Equo Trojano craterarum tria millia? aut armatura varia peditatus, & equitatus, ut in aliqua pugna? quæ popularem admirationem habuerunt, delectationem tibi nullam attulissent. Quod si tu per eos dies operam dedisti Protogeni tuo: dummodo is tibi quidvis potius, quam orationes meas legerit, næ tu haud paulo plus, quam quisquam nostrum, delectationis habuisti. Non enim te puto Græcos, aut Oscos ludos desiderasse; præsertim cum Oscos ludos vel in senatu nostro spectare possis, Græcos vero ita non armes, ut ne ad villam quidem tuam via Græca ire soleas. Nam quid ego te auletas putem desiderare, qui gladiatores contempseris? in quibus ipse Pompeius constitur, se & operam, & oleum perdidisse. Reliquæ sunt venationes, binæ per dies quinque, magnificæ, nemo negat: sed quæ potest esse homini politico delectatio, cum aut homo imbecillus a

valentissima bestia laniatur, aut præclara bestia venabulo transverberatur? quæ tamen si videnda sunt, sæpe vidisti: neq; nos, qui hæc spectavimus, quicquam novi vidimus. Elephantorum extremus dies fuit: in quo admiratio magna vulgi, atque turbæ, delectatio nulla extitit, quin etiam misericordia quædam consequuta est, atque opinio ejusmodi, esse quandam illi belluæ cum genere humano societatem. His ego tamen diebus, ludis scenicis, ne forte videar tibi non modo beatus, sed liber omnino fuisse, dirupi pene me in iudicio Galli Canii, familiaris tui. Quod si tam facilem populum haberem, quam Æsopus habuit; libenter mehercule artem desinerem, tecumque, & similibus nostri viverem, nam me cum antea exdebat, cum & ætas, & ambitio hortabantur, & licebat denique, quem nolebam, non defendere: tum vero hoc tempore vita nulla est, neque enim fructum ullum laboris exspecto, & cogor nonnunquam homines non optime de me meritos, rogatu eorum, qui bene meriti sunt, defendere. Itaque quæro causas omnes aliquando vivendi arbitrata meo, teq; & istam rationem otii tui & laudo vehementer, & probo, quodque nos minus intervisis, hoc fero animo æquiore, quod si Romæ esses, tamen neque nos lepore tuo, neque te, si quis est in me, meo frui liceret, propter molestissimas occupationes meas, quibus si me relaxaro (nam, ut plane exsolvam, non postulo) te ipsum quidem, qui multos annos nihil aliud commentaris, docebo profecto, quid sit humaniter vivere. Tu modo istam imbecillitatem valetudinis tuæ sustenta, & tuere, ut facis, ut postras villas obire, & mecum nostra simul lecticula concurrere possis. Hæc ad te pluribus verbis scripsi, quam soleo, non otii abundantia, sed amoris erga te, quod me quadam Epistola subinvitaras, si memoria tenes, ut ad te aliquid ejusmodi scriberem, quominus te prætermisisse ludos pœniteret. Quod si assequutus sum, gaudeo: sin minus, hoc me tamen consolor, quod posthac ad ludos venies, nosque vides, neque in Epistolis relinques meis spem aliquam delectationis tuæ. Vale.

## ARGUMENTUM.

*Marii negotium sibi curæ fore promittit; deinde scribit quanti & faciat; & facere debeat condemnationem T. Munatii Plancii Bursa; de quo vide Padianum in commentario Milontana. Scripta est primis diebus eius anni, quo Ser. Sulpicius, & M. Marcellus Consules fuere: nam paulo post Cicero in Provinciam ivit; & De Plancum damnatum est, cum primum exiit a magistratu.*

## II. M. T. C. MARIO S. D.

**M**andatum tuum curabo diligenter: sed homo acutus ei mandasti potissimum, cui expediret, illud venire quamplurimum: sed eo vidisti multum, quod præfisti, quo ne plaris emerem. Quod si mihi permisisses: qui meus amor in te est, consecissem cum coheredibus, nunc, quando tuum pretium novi, licitatore potius apponam, quam illud minoris veneat, de de joco satis est, tuum negotium agam, sicuti debeo, diligenter. De Bursa te gaudere certo scio; sed nimis verecunde mihi gratularis, putas enim, ut scribis, propter hominis sordes minus me magnam illam lætitiā putare; credas mihi velim, magis me iudicio hoc, quam morte inimici lætatum. Primum enim iudicio malo, quam gladio: deinde gloria potius amici, quam calamitate, in primisque me delectavit, tantum studium bonorum in me extitisse contra incredibilem contentionem clarissimi, ac potentissimi viri, postremo (quod vix verisimile fortasse videatur) oderam multo pejus hunc, quam illum ipsum Clodium, illum enim oppugnaram, hunc defenderam. Et ille, cum omnis res in meo capite discrimen esset habitura, magnum quiddam spectavit, nec sua quidem sponte; sed eorum auxilio, qui, me stante, stare non poterant: hic simiolus animi causa me, in quem invaderetur, delegerat: persuaseratque nonnullis invidis meis, se in me civilissem semper fore. Quamobrem valde jubeo gaudere te, magna res gesta est, nunquam ulli fortiores cives fuerunt, quam qui ausi sunt cum contra tantas opes ejus,

H. 2. a quo

a quo iusti & iulices erant, condemnare, quod fecissent nunquam, nisi iis dolori meus fuisset dolor. Nos hic multitudine, & celebritate iudiciorum, & novis legibus ita distinemur, ut quotidie vota faciamus, ne intercaletur, ut quamprimum te videre possimus. Vale.

### A R G U M E N T U M.

*Causam expsnit, cur acie Pharsalica victus a bello discesserit: quod illi ab iniquis vitio dabatur.*

III. M. T. C. M. M A R I O S. D.

**P**ER saepe mihi cogitanti de communibus miseriis, in quibus tot annos versamur, & (ut video) versabimur, solet in mentem venire illius temporis, quo proxime fuimus una: quin etiam ipsum diem memoriateneo, nam id III. Idus Martias, Lentulo, & Marcello cons. cum in Pompejanum vesperi venissem, tu mihi sollicito animo praesto fuisti, sollicitum autem te habebat cogitatio tum officii, tum etiam periculi mei; si manerem in Italia, verebatur, ne officio decessem: si proficiscerer ad bellum, periculum te meum commovebat. Quo tempore vidisti profecto me quoque ita conturbatum, ut non explicarem, quid esset optimum factu: pudori tamen malui, famaeque cedere, quam salutis meae rationem ducere. Cuius me mei facti poenituit, non tam propter periculum meum, quam propter vitia multa, quae tibi offendi, quo veneram: primum neque magnas copias, neque bellicosas: deinde extra ducem, paucosque praeterea (de principibus loquor) reliqui primum in ipso bello rapaces, deinde in oratione ita crudeles, ut ipsam victoriam horrerem: maximum autem & alienum amplissimorum virorum, quid quaeris? nihil boni praeter causam. Quae cum vidissem, desperans victoriam, primum coepi suadere pacem, cuius fueram semper auctor: deinde, cum ab ea sententia Pompejus valde abhorreret, suadere institui, ut bellum duceret: hoc interdum probabat, & in ea sententia videbatur fore, & fuisset fortasse, nisi quadam ex pugna coeisset suis militibus confidere. Ex eo tempore vir ille summus, nullus imperator fuit: signa tirone, & colle-

ti-



Cæcio exercitu cum legionibus robustis simis con-  
 tulit, victus turpissime, amissis etiam castris,  
 solus fugit. Hunc ego belli mihi finem feci, nec  
 putavi, cum integri pares non fuissenus, fractos  
 superiores fore. Discessi ab eo bello, in quo  
 aut in acie cadendum fuit, aut in aliquas insi-  
 dias incidendum, aut deveniendum in victoris  
 manus, aut ad Jubam confugiendum, aut ca-  
 piendus tanquam exilio locus, aut consciscen-  
 da mors voluntaria; certe nihil fuit præterea,  
 si te victori nolles, aut non auderes committe-  
 re. Ex omnibus autem iis, quæ dixi, incom-  
 modis, nihil tolerabilius exilio, præsertim in-  
 nocenti, ubi nulla adjuncta est turritudo: ad-  
 do etiam, cum ea urbe careas, in qua nihil  
 sit, quod videre possis sine dolore. Ego cum  
 meis (si quicquam nunc cujuscumque est) etiam  
 in meis esse malui: quæ acciderunt, omnia  
 dixi futura. Veni domum, non quod optima  
 vivendi conditio esset; sed tamen, si esset ali-  
 qua forma reipubl. tanquam in patria et ci-  
 sem: si nullam, tanquam in exilio. Mortem mi-  
 hi cur consciscerem, causa nulla visa est: cui  
 optarem, multæ; verus est enim, UBI non sis,  
 qui fueris, non esse cur velis vivere, sed tamen  
 VACARE culpa, magnum est solatium; præser-  
 tim cum habeam-dans res, quibus me sustentem,  
 optimarum artium scientiam, & maximarum reu-  
 rum gloriam: quarum altera mihi vivo nun-  
 quam eripitur, altera ne mortuo quidem. Hæc  
 ad te scripsi verbosius, & tibi molestus fui,  
 quod te cum mei, tum reipub. cognovi aman-  
 tissimum. Notum tibi omne consilium meum esse  
 se volui, ut primum scires, me nunquam  
 voluisse plus quemquam posse, quam unive-  
 rsam rempubl. postea autem quam alicujus cul-  
 pa tantum valeret unus, ut ei obisti non pos-  
 set, me voluisse pacem: amisso exercitu, &  
 eo duce, in quo spes fuerat uno, me volui-  
 se etiam reliquis omnibus; postquam non po-  
 tuerim, mihi ipsi finem fecisse belli: nunc au-  
 tem, si hæc civitas est, civem esse me: si non,  
 exulem esse non incommodiorem locum, quam  
 si me Rhodum, aut Mitylenas contulissem.  
 Hæc tecum coram malueram: sed, quia lon-

gius fiebat, volui per litteras eadem, ut haberes, quid diceres, si quando in vituperatores meos incidisses; sunt enim, qui, cum meus interitus nihil fuerit reipub. profuturus, criminis loco putent esse, quod vivam, quibus ego certo scio non videri satis multos periisse: qui si me audissent, quamvis iniqua pace, honeste tamen viverent: armis enim inferiores, non causa fuissent. Habe epistolam verbosio rem fortasse, quam velles, quod tibi ita videri putabo, nisi mihi longiorem remiseris. Ego si, quæ volo, expediero, brevi tempore te, ut spero, videbo. Vale.

#### ARGUMENTUM.

*Præmonet Marium de adventu suo in Pompejanum.*

IV. M. T. C. MARIO S. D.

**A**D VIII. Kal. in Cumanum veni cum Libone tuo, vel nostro potius: in Pompejanum statim cogito; sed faciam te ante certiore. Te cum semper valere cupio, tum certe, dum hic sumus, vides enim quanto post una futuri sumus, quare, si quid constitutum cum podagra habes, fac in alium diem differas, cura igitur, ut valeas, & me hoc biduo, aut triduo expecta. Vale.

#### ARGUMENTUM.

*Commendat studiosissime Trebatium jurisconsultum Casari Galliarum præfecto.*

V. M. T. C. CÆSARI IMP. S. D.

**V**ide, quam mihi persuaserim, te me esse alterum, non modo in iis rebus, quæ ad me ipsum, sed etiam in iis rebus, quæ ad meos pertinent. C. Trebatium cogitaram quocumq; exirem, mecum ducere; ut eum meis omnibus studiis, & beneficiis quam ornatissimum domum reducerem, sed posteaquam & Pompeji commoratio diuturnior erat, quam putaram, & mea quidem tibi non ignota dubitatio aut impedire profectionem meam videbatur, aut certe tardare: vide quid mihi sumpturim: cæpi velle ea Trebatium expectare a te, quæ sperasset a me: neque mehercule minus ei prolixè de tua voluntate promisi, quam eram solitus de mea polliceri. Casus vero mirificus quidam in-

Intervenit, quasi vel testis opinionis meæ, vel sponsor humanitatis tuæ; nam cum de hoc ipso Trebatio cum Balbo nostro loquerer accuratius domi meæ, litteræ mihi dantur a te, quibus in extremis scriptum erat: M. Furium, quem mihi commendas, vel regem Galliæ faciam, vel hunc Lepz delegam: si vis tu, ad me alium mitte, quem bñem. Sustulimus manus & ego, & Balbus, & tanta fuit opportunitas, ut illud nescio quid non fortuitum, sed divinum videretur. Mitto igitur ad te Trebatium, atque ita mitto, ut initio meæ sponte, post autem invitatu tuo mittendum duxerim: hunc, mi Cæsar, sic velim omni tua comitate complectare, ut omnia, quæ per me possis adduci, ut in meos conferre velis, in unum hunc conferas, de quo tibi homine hoc spondeo, non illo vetere verbo meo, quod, cum ad te de Milone scripsissem, jure lusisti; sed more Romano, quo modo homines non inepti loquuntur, probiorem hominem, meliorem virum, prudentiorem esse neminem. Accedit etiam, quod familiam ducit, in jure civili singularis memoria, summa scientia; huic ego neque tribunatum, neque præfecturam, neque ullius beneficii certum nomen peto: benevolentiam tuam, & liberalitatem peto: neque impedio quominus, si tibi ita placuerit, etiam hisce eum ornēs gloriolæ insignibus, totum denique hominem tibi trado de manu (ut ajunt) in manum tuam istam & victoriam, & fide præstentem, sumus enim putidiusculi, quam per te vix licet: verum, ut video, licebit. Cura, ut valeas; & me, ut amas, ama.

## ARGUMENTUM.

*Trebatium desiderium Urbis vix ferentem hortatur, ut Urbis, urbanitatisque memoriam, quasi quasdam ineptias, abjiciat, & de Provincia quo se contulerat, tum spe beneficiorum, tum constantia causa cogitet.*

## VI. M. T. C. CAJO TREBATIO S.D.

**I**N omnibus meis epistolis; quas ad Cæsarem, aut Balbum mitto, legitima quadam

est accessio commendationis tuæ, nec ea vulgaris, sed cum aliquo insigni indicio meæ erga te benevolentia. Tu modo ineptias istas, & desideria urbis, & urbanitatis depone, &, quo consilio profectus es, id assiduitate, & virtute consequere. Hoc tibi tam ignoscemus nos amici, quam ignoverunt Medæ, quæ Corinthum, arcem altam, habebant, matronæ opulenta optimates: quibus manibus gypsatisimis persuasit, ne sibi illæ vitio verterent, quod abesset a patria;

*Nam multi suam rem bene gessere, & publicam patriam procul:*

*Multi, qui domi ætatem agerent, propterea sunt improbat.*

quo in numero tu certe fuisses, nisi te extruisssemus. Sed plura scribemus alias. Tu, qui ceteris cavere didicisti, in Britannia ne ab essedariis decipiaris, caveto, & quando Medeam agere cepi, illud semper memento; QUI ipse sibi sapiens prodesse nequit, nequidquam sapit. Cura, ut valeas.

#### ARGUMENTUM.

*Studium suum in commendando Trebatio significat, jocatur de Britannia, monet, ut in familiaritatem Cæsaris se penitus insinuet, & occasione utatur.*

VII. M. T. C. TREBATIO S. D.

**E**Go te commendare non desisto: sed quid proficiam ex te scire cupio; spem maximam habeo in Balbo: ad quem de te diligentissime, & sapientissime scribo. Illud soleo mirari non me toties accipere tuas litteras, quoties a Q. Fratre mihi afferuntur. In Britannia nihil esse audio neque auri, neque argenti: id si ita est, esse dum aliquod suadeo rapias, & ad nos quamprimum recurras; sin autem sine Britannia tamen assequi id, quod volumus, possumus: perforce, ut sis in familiaribus Cæsaris, multum te in eo frater adjuvabit meus, multum Balbus; sed (mihi crede) tuus pudor, & labor plurimum. Imperatorem liberalissimum habes, ætatem opportunissimam, commendationem certe singularem:

ut

ut tibi unum timendum sit, ne ipse tibi defuisse  
videare. Vale.

## A R G U M E N T U M.

*Modeste reprehendit Trebatium, qui Tribunatum  
militum, a Casare delatum, recusaverat.*

## VIII. M. T. C. TREBATIO S. D.

**S**cripsit ad me Caesar perhumaniter, nondum  
te sibi satis esse familiarem propter occupa-  
tiones suas, sed certe fore, cui quidem ego re-  
scripsi, quam mihi gratum esset futurum, si  
quamplurimum in te studii, officii, liberalitatis  
suae contulisset. Sed ex tuis litteris cognovi præ-  
properam quamdam festinationem tuam, & simul  
sum admiratus, cur tribunatus commodus, dempto  
præsertim labore militiæ, contempseris. Quæ-  
cum Vacerra, & Manillo, nam Cornelio nihil  
audeo dicere: cujus tu periculo stultus es, qua-  
do te ab eo sapere didicisse profiteris; quin tu  
urges istam occasionem, & facultatem, qua me-  
lior nunquam reperietur? Quod scribis de illo  
Prætorio Juriconsulto, ego te ei non desino com-  
mendare, scribit etiam ipse mihi, te sibi gratias  
agere debere. De eo quid sit, cura ut sciam. Ego  
vestras Britannicas litteras expecto. Vale.

## A R G U M E N T U M.

*Litterarum officium a Trebatio requirit: monet,  
ne reditum in Urbem præpropere cupiat.*

## IX. M. T. C. TREBATIO S. D.

**J**amdudum ignoro, quid agas; nihil enim scribis;  
neque ego ad te his duobus mentibus scripse-  
ram, quia cum Quinto, fratre meo, non eras;  
quo mitterem, aut cui darent, nesciebam. Cu-  
pio scire, quid agas, & ubi sis hiematurus: e-  
quidem velim cum Casare: sed ad eum propter  
ejus occupationes nihil sum ausus scribere, ad  
Balbum tamen scripsi. Tu tibi deesse noli, se-  
rius potius ad nos, dum plenior. Quod huc pro-  
peres, nihil est, præsertim Vacerræ mortuo; sed  
tibi consilium non deest, quid constitueris, cu-  
pio scire. Cn. Octavius, an Cn. Cornelius:

H 5 tuus

tuus quidem familiaris, summo genere natus, terræ filius: is me, quia scit tuum familiarem esse, crebro ad cœnam invitat, adhuc non potuit perducere: sed mihi tamen gratum est. Vale.

### ARGUMENTUM.

*Levitatis Trebatium per iocum arguit, quia scripserat, se Casari valde Jureconsultum videri: item timiditatis, quod transire in Britanniam cum Casare recusavit, & alia nonnulla.*

### X. M. T. C. TREBATIO S. D.

**L**Egi tuas litteras, ex quibus intellexi, te Casari nostro valde jureconsultum videri. Est quod gaudeas, te in ista loca venisse, ubi aliquid sapere videre, quod si in Britanniam quoque profectus esses; profecto nemo in illa tanta insula peritior te fuisset. Verumtamen (rideamus licet: sum enim à te invitatus) subinvideo tibi, ultro te etiam accersitum ab eo, ad quem ceteri, non propter ejus superbiam, sed propter occupationes, adspirare non possunt. Sed tu in ista epistola nihil mihi scripsisti de tuis rebus, quæ mehercule mihi non minori curæ sunt, quam meæ. Valde metuo, ne frigeas in hibernis, quamobrem camino luculento utendum censeo: idem & Mucio, & Manilio placebat, præsertim qui sagis non abundares, quamquam vos nunc istic satis calere audio, quo quidem nuntio valde mehercule de te timueram: sed tu in re militari multo es cautior, quam in advocacionibus, qui neque in Oceano natare volueris studiosissimus homo natandi: neque spectare effedarios, quem antea ne andabatam quidem defraudare poteramus. Sed jam satis jocati sumus. Ego de te ad Casarem quam diligenter scripserim, tute scis; quam sæpe, ego, sed mehercule jam intermiseram, ne viderer liberalissimi hominis, meique amantissimi voluntati erga me diffidere, sed tamen his litteris, quas proxime dedi, putavi esse hominem commonendum, id feci, quid profecerim, facias me velim ceertior, & simul de toto statu tuo consiliisque omnibus, scire enim cupio, quid agas quid expectes,

des, quam longum istum tuum discessum a nobis futurum putes, sic enim tibi persuadeas velim, unum mihi esse solatium; quare facilius possim pati, te esse sine nobis, si tibi esse id emolumento sciam, sin autem id non est, nihil duobus nobis est stultius; me qui te non Romam attraham: te qui non huc advoles. Una mehercule nostra vel severa, vel jocosa congressio pluris erit, quam non modo hostes, sed etiam fratres nostri Ædui, quare omnibus de rebus fac, ut quamprimum sciam. Aut consolando, aut consilio, aut re juvero.

A R G U M E N T U M.

*Conatur Trebatio desiderium Urbis adimere: precipit tamen, ut, nisi absit ab Urbe cum emolumento, redeat.*

XI. M. T. C. TREBATIO. S. D.

**N**isi ante Roma profectus esses, nunc eam certe relinqueres, quis enim tot interregnis jure consultum desiderat? ego omnibus unde petatur, hoc consilii dederim, ut a singulis interregibus binas advocaciones postulent. Satisne tibi videor abs te jus civile didicisse? Sed heus tu, quid agis? ecquid sit? video enim te jam joculari per litteras: hæc signa meliora sunt, quam in meo Tusculano, sed quid sit, scire cupio, consuli quidem te a Cæsare scribis; sed ego tibi ab illo consuli mallet. Quod si aut sit, aut futurum putas; perfer istam militiam, & permane, ego enim desiderium tui spe tuorum commodorum consolabor: sin autem ista sunt inaniora, recipere te ad nos, nam aut erit hic aliquid aliquando: aut, si minus, una mehercule collocatio nostra plus erit, quam omnes Samarobrinæ, denique, si te cito retuleris, sermo nullus erit: sin frustra diutius abfueris, non modo Laberium, sed etiam sodalem nostrum Valerium pertimesco, mira enim persona induci potest Britannici jureconsulti. Hæc ego non rideo, quamvis tu rideas: sed de re severissima tecum, ut soleo, jocos. Remoto joco, tibi hoc amicissimo animo precipio: ut si istic mea commendatione tuam dignitatem obtinebis, perferas nostri desiderium; honestatem,

statem, & facultates tuas augeas: sin autem ista frigeant, recipias te ad nos: omnia tamen, quæ vis, & tua virtute profecto, & nostro summo erga te studio consequere. Vale.

### ARGUMENTUM.

*Ex intermissione litterarum arguit Trebatium Epicureum esse factum: & in eo jocatur.*

### XII. M. T. C. TREBATIO S. D.

**M**irabar, quid esset, quod tu mihi litteras mittere intermisisses; indicavit mihi Pansa meus, Epicureum te esse factum: o castra preclara: quid tu fecisses, si te Tarentum, & non Samarobrinam misisses? Jam tum mihi non placebas, cum idem intuebare quod & Titius, familiaris meus. Sed quonam modo jus civile defendes, cum omnia tua causa facias, non civium? Ubi porro illa erit formula fiduciae. Ut inter bonos bene agere oportet? quis enim est bonus, qui facit nihil, nisi sua causa? Quod jus statues communi dividendo, cum commune nihil possit esse apud eos qui omnia voluptate suametuntur? Quomodo autem tibi placebit Jovem lapidem iurare, cum scias Jovem iratum esse nemini posse? quid fiet porro populo Ulubrano, si tu statueris *πελαγεύεσθαι* non oportere? Quare, si plane a nobis deficiis; moleste fero: sin Pansæ assentari commodum est, ignosco: modo scribe aliquando ad nos, quid agas, & a nobis, quid agi, quid fieri, aut curari velis. Vale.

### ARGUMENTUM.

*Intermissionis litterarum causam dicit, quam non accipiente Trebatio; inde occasionem arripit liberius jocandi.*

### XIII. M. T. C. TREBATIO S. D.

**A** Deone me injustum esse existimasti, ut tibi irascerer, quod parum mihi constans, & nimium cupidus decedendi viderere, ob eamque causam me arbitrarere litteras ad te jamdiu non misisse? mihi perturbatio animi tui, quam primis litteris perspiciebam, molestiam attulit, neque alia fuit ulla causa intermissionis litterarum



rum ; nisi quod ubi esses , plane nesciebam . Hic tu me etiam insimulas , nec satisfactionem meam accipis ; audi , mi Testa ; utrum superbior te pecunia facit , an quod te imperator consulit ? moriar , mi , quæ tua gloria est , puto , te malle a Cæsare consuli , quam inaurari ; si verò utrumque est , quis feret , præter me , qui omnia ferre possum ? Sed ut ad rem redeam , te istic invitum non esse , vehementer gaudeo : & ut illud erat molestum , sic hoc est jucundum ; tantum metuo , ne artificium tuum tibi parum profit , nam , ut audio , istic

*Non ex jure manu confectum , sed mage ferro Rem repetunt .*

Et tu soles ad vim faciendam adhiberi ? Neque est , quod illam exceptionem in interdicto pertimescas , quod tu prior vi hominibus armatis non veneris , scio enim te non esse procacem in laceffendo . Sed ut ego quoque te aliquid de nostris cautionibus admoneam , Treviros vites censeo : audio capitales esse , malle , aurq , argento , ære essent , sed alias jocabimur . Tu ad me de istis rebus omnibus scribas velim quam diligentissime . Ad 111. Non. Mart. Vale .

## A R G U M E N T U M .

*Familiariter , & jocosè Trebatium reprehendit , qui litteras nullas miserat .*

### XIV. M. T. C. TREBATIO S. D.

**C**hrysippus Vettius , Cyri architecti libertus , fecit , ut te non immemorem putarem mei : salutem enim mihi verbis tuis nuntiavit ; valde jam lautus es , qui gravere litteras ad me dare , homini præsertim prope domesticò . Quod si scribere oblitus es , minus multi jam te advocato causa cadent . Sin nostris oblitus es , dabo operam , ut istuc veniam antequam plane ex animo tuo effluam , sin æstivorum timor te debilitat ; aliquid excogita , ut fecisti de Britannia . Illud quidem perlibenter audiavi ex eodem Chrysippo te esse Cæsari familiarem ; sed michercule malle

id

id quod erat æquius, de tuis rebus ex tuis literis quam sapientissime cognoscere; quod certe ita fieret, si tu maluisses benevolentiz, quam litium jura perdiscere. Sed hæc joculari sumus & tuo more, & nonnihil etiam nostro. Te valde amamus, nosque a te amari tum volumus, tum etiam confidimus. Vale.

### ARGUMENTUM.

*Declarat suum absentis Trebatii desiderium: & gratulatur de C. Marii familiaritate.*

#### XV. M. T. C. TREBATIO S. D.

**Q**UAM sint morosi, qui amant, vel ex hoc intelligi potest; moleste ferebam antea, te invitum istic esse: pungit me rursus, quod scribis, te esse istic libenter, neque enim mea commendatione te non delectari facile patiebar: & nunc angor, quidquam tibi sine me esse jucundum; sed tamen hoc malo nos ferre desiderium, quam te non ea, quæ spero, consequi. Quod vero in C. Marii suavissimi, doctissimi que hominis familiaritatem venisti; non dici potest quam valde gaudeam: qui fac, ut te quam maxime diligat, mihi crede, nihil ex ista provincia potes, quod jucundius sit, deportare. Cura, ut valeas.

### ARGUMENTUM.

*Laudare videtur Trebatium, ut sapientem, qui belli pericula vitaret: sed revera notat ut timidum. Adscribit de Octavio, de Trebatii divitiis, de superbia per jocum.*

#### XVI. M. T. C. TREBATIO S. D.

**I**N equo Trojano scis esse in extremo. SERO SAPIUNT; tu tamen, mi vetule, non sero, primum illas rabiosulas, sat fatuas, dedisti, deinde, quod in Britannia non minus φλοδίαρον te præbuiisti, plane non reprehendo, nunc vero in hibernis injectus mihi videris: itaque te commovere non curas. USQUEQUAQUE sapere oportet: id erit telum acerrimum. Ego si foris cœnitarem, Cn. Octavio familiari tuo non defuissem: cui tamen dixi, cum me aliquoties in vita-

vitaret: Oro te, quis tu es? sed mehercule, extra jocum, homo bellus est: vellem cum tecum abduxisses. Quid agatis, ecquid in Italiam venturi sitis hac hyeme fac plane sciam. Balbus mihi confirmavit, te divitem futurum, id utrum Romano more loquutus sit, bene nummatum te futurum, an, quomodo Stoici dicunt, omnes esse divites, qui celo, & terra frui possunt, postea videro. Qui istinc veniunt, superbiam tuam accusant, quod negent te percunctantibus respondere: sed tamen est, quod gaudeas; constat enim inter omnes, neminem te uno Samarobrinx juris peritiorem esse. Vale.

## A R G U M E N T U M.

*Gratalatur Trebatio, quod de reditu in Urbem jam non amplius cogitet, & hortatur, ut Caesaris amicitiam plurimi facias, quam fore fructuosam promittit, in seque ipse recipit.*

## XVII. M. T. C. TREBATIO S. D.

**E**X tuis litteris & Q. Fratri gratias egi, & te aliquando collaudare possum, quod jam videris certa aliqua in sententia constitisse; nam primorum mensium litteris tuis vehementer commovebar, quod mihi interdum (pace tua dixerim) levis in urbis, urbanitatisque desiderio, interdum piger, interdum timidus in labore militari, saepe autem etiam (quod a te alienissimum est) subimpudens videbare, tanquam enim syngrapham ad imperatorem, non epistolam attulisses, sic, pecunia ablata, domum redire properabas: nec tibi in mentem veniebat, eos ipsos, qui cum syngraphis venissent Alexandriam, nullum adhuc nummum auferre potuisse. Ego, si mei commodi rationem ducerem, te mecum esse maxime vellem, non enim mediocri afficiebar vel voluptate ex consuetudine nostra, vel utilitate ex consilio, atque opera tua; sed cum te ex adolescentia tua in amicitiam, & fidem meam contulisses, semper te non modo regendum mihi, sed etiam augendum, atque ornandum putavi, Itaque, quoad opinatus sum

me in provinciam exiturum; quæ ad te ultro attulerim, meminisse te credo: posteaquam mea mutata ratio est: cum viderem me a Cæsare honorificentissime tractari, & unice diligere, hominisque liberalitatem incredibilem, & singularem fidem nossem, sic ei te commendavi, & tradi, ut gravissime, diligentissimeque potui; quod ille ita & accepit, & mihi sæpe litteris significavit, & tibi verbis, & re ostendit; mea commendatione sese valde esse commotum. Hunc tu virum nactus, si me aut sapere aliquid, aut velle tua causa putas, ne dimiseris: & si qua te forte res aliquando offenderit, cum ille aut occupatione aut difficultate tardior tibi erit visus, perferto, & ultima expectato; quæ ego tibi & iucunda, & honesta præstabo. Pluribus te hortari non debeo: tantum monco, neque amicitiae confirmandæ clarissimi, ac liberalissimi viri, neque uberioris provinciae, neque ætatis magis idoneum tempus, hoc si amiseris, te esse ullum unquam reperturum; hoc, quemadmodum vos scribere soletis in vestris libris, idem Q. Cornelio videbatur. In Britanniam te non esse profectum, vehementer gaudeo; quod & tu labore caruisti, & ego te de rebus illis non audiam. Ubi sis hibernaturus, & qua spe, aut conditione, perscribas ad me velim. Vale.

### ARGUMENTUM.

*Laudat Trebatium, qui de militia cum Cæsare perferenda cogitaret: jocatur præterea in illius parsimoniam, quia scripserat in palimpsesto.*

### XVIII. M. T. C. TREBATIO. S. D.

**A**ccepi a te aliquot epistolas uno tempore, quas tu diversis temporibus dederas: in quibus me cetera delectarunt: significabant enim, te istam militiam jam firmo animo ferre, & esse fortem virum, & constantem. Quæ ego paulisper in te ita desideravi, non imbecillitate animi tui, sed magis, ut desiderio nostri te æstare putarem. Quare perge, ut cepisti: fortiani  
mo

mo istam tolera militiam, multa (mihi crede) assequere, ego enim renovabo commendationem, sed tempore. Sic habeto, non tibi majori esse curæ, ut iste tuus a me discessus fructuosissimus tibi sit, quam mihi. Itaque quando veltræ cautiones infirmæ sunt, Græculam tibi misi cautionem chirographi mei. Tu me velim de ratione Gallici belli certiore facias, ego enim ignavissimo cuique maximam fidem habeo. Sed, ut ad epistolas tuas redeam, cetera belle: illud miror, quis solet eodem exemplo plures dare qui sua manu scribit? Nam, quod in palimpsesto, laudo equidem parsimoniam: sed miror, quid in illa chartula tuerit, quod delere malueris, quam hæc scribere: nisi forte tuas formulas: non enim puto te meas epistolas delere, ut reponas tuas: an hoc significas, nihil fieri? frigeret te? ne chartam quidem tibi suppeditare? jam ista tua culpa est, qui verecundiam tecum extuleris, & non hic nobiscum reliqueris; ego te Balbo, cum ad vos proficiscetur, more Romano commendabo. Tu, si intervallum longius erit mearum litterarum, ne sis admiratus, eam enim abfuturus mense April. Has litteras scripsi in Pomptino, cum ad villam M. Æmilii Philemonis divertissem: ex qua jam audieram fremitum clientium meorum; quos quidem tu mihi conciliasti; nam Ulubris, honoris mei causa, vim maximam ranuncolorum se commosse constabat. Cura ut valeas. VI. Idus April. de Pontino.

*Eodem Argumento.*

XIX. M. T. C. TREBATIO S. D.

Epistolam tuam, quam accepi ab L. Arruncio, conscidi innocentem: nihil enim habebat, quod non vel in concione recte legi posset, sed & Arruntius ita te mandasse agebat, & tu adscriperas. Verum illud esto, nihil te ad me postea scripsisse, demiror, præsertim tam novis rebus. Vale.

## A R G U M E N T U M .

*Scribit de Topicis a se conscriptis , ut roganti Trebatio satisfaceret : eaque esse obscuriora significat , nec legenda sine interprete . Addit , si expeditam in quaestionibus habere doctrinam velis , exercitationem esse necessariam .*

## XX. M. T. C. TREBATIO. S. D.

**V**ide , quanti apud me sis , etsi jure id quidem : non enim amore te vinco , verumtamen quod praesenti tibi prope subnegaram , non tribueram certe , id absenti debere non potui . Itaque , ut primum Velia navigare coepi , institui Topica Aristotelica conscribere , ab ipsa u be commonitus amantissima tui , eum librum tibi misi Rhegio , scriptum quam planissime res illa scribi potuit ; sin tibi quaedam videbuntur obscuriora , cogitare debebis NULLAM artem litteris sine interprete , & sine aliqua exercitatione percipi posse . Non longe abieris ; num jus civile vestrum ex libris cognoscipotes ? qui quamquam plurimi sunt , doctorem tamen lumenque desiderant , quamquam tu , si attente leges , si saepius , per te omnia consequere , ut certe intelligas . Ut vero etiam ipsi tibi loci , proposita quaestione , occurrant , exercitatione consequere : in qua quidem nos te continebimus , si & ea lvi redierimus , & salva ista offenderimus . Vale . v. Kal. Sext. Rhegio .

## A R G U M E N T U M .

*De Amore Velignium in Trebatium scribit ; & hortatur , ne possessione ear vendat , qua tam misera temporibus perfugium esse possint .*

## XXI. M. T. C. TREBATIO S. D.

**A**mabilius mihi Velia fuit , quod te ab ea sensi amari , sed quid ego dicam te , quem quis non amat ? Rusto medius fidius tuus ita desiderabatur , ut si esset unus e nobis , sed ego te non reprehendo , qui illum ad adificationem tuam traduxeris , quamquam enim Velia non est vilior ,  
quam

quàm Lupercal : tamen istuc malo , quàm hæc omnia ; tu si me audies , quem soles , has paternas possessiones tenebis ; ( nescio quid enim Velientes verebantur ) neque Heletem , nobilem amnem , relinques ; nec Papirianam domum deferres : quanquam illa quidem habet lucum , a quo etiam advenæ teneri solent : quem tamen si excideris , multum prospexeris . Sed in primis opportunum videtur , his præsertim temporibus , habere perfugium , primum eorum urbem , quibus carus sis , deinde etiam tuam domum , tuosque agros , eaque remoto , salubri , amœnoque loco : idque etiam mea interesse , mi Trebatî , arbitror . Sed valebis , meaque negotia videbis , meque , Diis juvantibus , ante brumam expectabis . Ego a Sex. rabio , Nicomîs discipulo , librum abstuli Νικωτο περί πολυφαγίας . , o medicum suavem , meque docilem ad hanc disciplinam : sed Bassus noster me de hoc libro celavit : te quidem non videtur . Ventus increbrescit . Cura , ut valeas . XIII. Kal. Sex. Velia .

## A R G U M E N T U M .

*Silii causam , viri optimi , amici sui , Trebatius commendat . Videtur autem ; cum extra Urbem , ad Trebatium in urbem hac scripsisse .*

## XXII. M. T. C. TREBATIO S. D.

**S**ilii causam te docui , is postea fuit apud me , cum ei dicerem tibi videri sponsionem illam nos sine periculo facere posse ; Si bonorum Turpilii possessionem Q. Cæpio prætor ex edicto suo mihi dedit ; negare aiebat . Servium tabulas testamenti esse eas , quas institulisset is , qui factionem testamenti non habuerit : hoc idem Of. filium dicere : tecum se loquutum negabat : me autem que rogavit , ut se , causamque suam tibi commendarem . Nec vir melior mi Testa , nec mihi amicior P. Silio quisquam est , te tamen excepto . Gratissimum igitur mihi feceris , si ad eum ultro veneris , eique pollicitus eris , sed , si me amas , quamprimum , hoc te vehementer etiam , atque etiam rogo . Vale .

A R .

## A R G U M E N T U M.

*Auctoritate Jurisconsultorum probat, quod de controversia quadam dixerat.*

## XXIII. M. T. C. TREBATIO S. D.

**I**lluseras heri inter scyphos, quod dixeram, controversiam esse, posset ne hæres, quod furtum antea factum esset, recte furti agere. Itaque, etsi domum bene potus, seroque redieram: tamen id caput, ubi hæc controversia est, notavi, & descriptum tibi misi: ut scires, id, quod tu neminem sensisse dicebas, Sex. Æmilium, M. Manilium, M. Brutum sensisse. Ego tamen Scævolæ, & Testæ assentior. Vale.

## A R G U M E N T U M.

*Signa quadam Ciceroni Gallus emerat, cum is tabellas potius pistras cuperet. Rescribit igitur, ex iis emptionibus nullam se curasse. De proxima domo illi conducenda se desiderare addit.*

## XXIV. M. T. C. M. FABIO GALLO S. D.

**T**antum ex Arpinati veneram, cum mihi a te litteræ redditæ sunt: ab eodemque accepi Aviani litteras: in quibus hoc erat liberalissimum, nomina se facturum, cum venisset, qua ego vellem die. Fac, quæso, qui ego sum, esse te; est ne aut tui pudoris, aut nostri, primum rogare de die, deinde plus annua postulare? Sed essent, mi Galle, omnia facilia, si & ea mercatus esses, quæ ego desiderabam, & ad eam summam, quam volueram, ac tamen istæ hæc ipsa, quæ te emisse scribis, non solum parata mihi erunt, sed etiam grata; plane enim intelligo, te non modo studio, sed etiam amore usum, quæ te delectarint hominem (ut ego semper judicavi) in omni judicio elegantissimum, quæque me digna putaris, coemisse. Sed velim maneat Damasippus in sententia; prorsus enim ex istis emptionibus nullam deïdero, tu autem, ignarus instituti mei, quanti ego genus omne signorum omnium non æstimo, tanti ista quatuor, aut quinque sumpstisti. Sed Bacchas istas cum Musis Metelli comparas: quid simile?

pri-



primum ipsas ego Musas nunquam tanti putassem : atque id fecissem , Musis omnibus approbantibus , sed tamen erat aptum bibliotheca , studiisque nostris congruens : Bacchis vero ubi est apud me locus ? At pulchellæ sunt ; novi optime , & sæpe vidi : nominatim tibi signa , mihi nota , mandassem , si probassem : ea enim signa ego emere soleo , quæ ad similitudinem gymnasiolorum exornent mihi in palæstra locum . Martis vero signum quo mihi pacis auctori ? gaudeo nulum Saturni signum fuisse , hæc enim duo signa putarem mihi æs alienum attulisse . Mercurii , mallem , aliquod fuisset : felicius , puto , cum Aviano transigere possemus . Quod tibi destinaras Trapezophoron : si te delectat , habebis ; sin autem sententiam mutasti , ego habebo scilicet . Ista quidem summa nã ego multo libentius emerim diversorium Tarracinæ ; ne semper hospiti molestus sim . Omnino liberti mei video esse culpam , cui plane res certas mandaram ; itemque Junii , quem puto tibi notum esse , Aviani familiarem . Exhedria quædam mihi nova sunt instituta in porticula Tusculani : ea volebam tabellis ornare , etenim , si quid generis istiusmodi me delectat , pictura delectat ; sed tamen , si ista mihi sunt habenda , certiorera velim me facias , ubi sint , quando accersantur , quo genere vesturæ ; si enim Damasippus in sententia non manebit , aliquem pseudo-Damasippum vel cum iactura reperiemus . Quod ad me de domo scribis iterum , jam id ego proficiscens mandaram meæ Tullia ; ea enim ipsa hora acceperam tuas litteras , egeram etiam cum tuo Nicia ; quod is utitur , ut scis , familiariter Cassio . Ut redii autem , prius , quam tuas legi has proximas litteras , quasi de mea Tullia , quod egisset . Per Liciniam se egisse dicebat , sed opinor , Cassium uti non ita multum forore , eam porro negare se audere , cum vir abesset ( est enim profectus in Hispaniam Decius ) illo & absente , & insciente migrare . Est mihi gratissimum , tanti a te æstimatam consuetudinem vitæ , victusque nostri , primum ut eam domum sumeres , ut non modo prope me , sed plane mecum habitare posses , deinde , ut

migrare tantopere festines. Sed, ne vivam, si tibi concedo, ut ejus rei tu cupidior sis, quam ego sum, itaque omnia experiar, video enim, quid mea intersit, quid utriusque nostrum. Si quid egebo, faciam ut scias, tu ad omnia rescribes, & quando te expectem, facies me, si tibi videbitur, certiolem. Vale.

## A R G U M E N T U M.

*Narrat, quam inique Tigellius sibi irascatur. Idem scribit l. 13. ad Att. ep. 17. Nec dubito, quin hujus nepos sit is, de quo Horatius Sat. 2. & 3. l. 1.*

## XXV. M. T. C. FABIO GALLO S. D.

**A** Moris quidem tui, quoque me verti, vestigia, vel proxime de Tigellio, sensi enim ex litteris tuis, valde te laborasse, amo igitur voluntatem, sed pauca de re. Capius, opinor, olim, NON omnibus dormio; sic ego non omnibus, mi Galle, servio, etsi quæ est hæc servitus? olim, cum regnare existimabamur, non tam ab ullis, quam hoc tempore observor a familiarissimis Cæsaris omnibus, præter istum, id ego in lucris pono, non ferre hominem pestilentiorẽ patriæ suæ: cumque addictum jam tum puto esse Calvi Licinii Hipponastæ præconio. At vide, quid succenseat. Phæmez causam susceperam, ipsius quidem causa: erat enim mihi sane familiaris, is ad me venit, dixitque judicem sibi operam dare constituisse eo ipso die, quo de P. Sextio in consilium iri necesse erat, respondi, nullo modo me facere posse, cum vellem; alium diem si sumpsisset, me ei non defuturum, ille autem, qui sciret se nepotem bellum tibicinem habere, & sat bonum unctorem, discessit a me, ut mihi videbatur, iratior. Habeo Sardos venales, alium alio nequiorẽ, cognosti meam causam, & istius Salacis iniquitatem. Catonem tuum mihi mittere: cupio enim legere, me adhuc non legisse turpe utrique nostrum est. Vale.

## ARGUMENTUM.

*Rescribit de epistola non conscissa. Monenti, ut de Casare caute loqueretur, & scriberet, gratias agit.*

XXVI. M. T. C. M. FABIO GALLO S. D.

**Q**UOD epistolam conscissam doles, noli laborare: salva est domi: petes, cum libebit. Quod autem me mones, valde gratum est: idque ut semper facias rogo, videris enim mihi vereri, ne, si istum habuerimus, rideamus *ῥιζωτα σαρδύνας*. Sed heus tu, manum de tabula: magister adest citius, quam putaramus, vereor ne in Catonem, Cato in nos. Mi Galle, cave putes quidquam melius, quam epistolæ tuæ partem ab eo loco. Cetera labuntur, secreto hoc audi: tecum habeto: ne Apellæ quidem liberti tuo dixeris, præter duos nos loquitur isto modo nemo: bene maleve, videro: sed, quidquid est, nostrum est; urge igitur, nec transversum unguem (quod ajunt) a stylo, is enim est dicendi opifex, atque ego quidem aliquantum jam etiam noctis assumo. Vale.

## ARGUMENTUM.

*Scribit de morbo ex herbarum esu contracto.*

XXVII. M. T. C. GALLO S. D.

**C**UM decimum jam diem graviter ex intestino laborarem; neque iis, qui mea operanti volebant, probarem, me non valere, quia febrim non haberem, fugi in Tusculanum; cum quidem biduum ita jejunos fuisset, ut ne aquam quidem gustarem. Itaque confectus languore, & fame, magis tuum officium desideravi, quam abs te requiri putavi meum, ego autem cum omnes morbos reformido, tum quod Epicurum tuum Stoici male accipiunt, quia dicat *δυσχερεια καὶ δυσπρεπεια παθῶν* sibi molestia esse: quorum alterum morbum edacitatis esse putant, alterum etiam turpioris intemperantiae. Sane *δυσπρεπεια* pertimueram: sed visa est mihi vel loci mutatio, vel animi etiam relaxatio, vel ipsa fortasse jam senescentis morbi.

tibi remissio profuisse. Attamen ne mirere, unde hoc acciderit, quomodo ve commiserim: lex sumptuaria, quæ videtur *ἀποτρεῖται* attulisse, ea mihi fraudi fuit; nam; dum volunt isti lautæ terra nata, quæ lege excepta sunt, in honorem adducere, fungos, heluellas, herbas omnes ita condiunt, ut nihil possit esse suavius, in eas cum incidissem in cœna augurali apud Lentulum, me tanta *διὰ ὀρῶσα* arripuit, ut hodie primum videatur cœpisse consistere. Ita ego, qui me ostreis, & muranis facile abstinebam, a beta etiam, & malva deceptus sum, posthac igitur erimus cautiore. Tu tamen cum audisses ab Anicio (vidit enim me nauseantem) non modo mittendi causam justam habuisti, sed etiam vivendi. Ego hic cogito commorari, quoad ne reficiam: nam & vires, & corpus amisi; sed, si morbum depulcro, facile, ut spero, illa revocabo. Vale.

### ARGUMENTUM.

*Gallum, non eum, ad quem proxime scripsit, Fabiæ gentis, sed, ut opinor, Sextiæ, accusat, ut iniquum, & impudentem.*

### XXVIII. M. T. C. GALLO S. D.

**M**iror, cur me accuses, cum tibi id facere non liceat, quod si liceret, tamen non debebas. EGO enim te (inquis) in consulatu observaram, & ais, fore, ut te Cæsar restituat. Multa tu quidem dicis, sed tibi nemo credit. Tribunatum plebis dicis te mea causa petisse; utinam semper esses tribunus: intercessorem non quæreres. Negas me audere, quod sentiam, dicere: quasi tibi, cum parum prudenter me rogares, parum fortiter responderim. Hæc tibi scripsi, ut isto ipso in genere, in quo aliquid posse vis, te nihil esse cognosceres. Quod si humaniter mecum questus esses, libenter tibi me, & facile pergissem: non enim mihi ingrata sunt, quæ fecisti, sed, quæ scripsisti, molesta. Me autem, propter quem ceteri liberi sunt, tibi liberum non visum, demiror; nam, si falsa fuerunt, quæ tu ad me,

ut

ut ais, detulisti, quid ego tibi debeo? sin ver-  
 ra; tu es optimus testis, quid mihi populus  
 Rom. debeat. Vale.

# ARGUMENTUM.

*Probat consilium Curii, qui, Repub. desperata  
 in Græciam se contulerit; & adjungit, se to-  
 tum in litteris esse, libertate prorsus amissa*

## XXIX. M. T. C. MAN. CURIO S. D.

**M**Emini, cum mihi desipere videbare, quod  
 istic potius viveres, quam nobiscum,  
 erat enim multo depicillium hujus urbis ( cum  
 quidem hæc urbs ) aptius humanitati, & sua-  
 vitati tuæ, quam tota Peloponnesus, nedum  
 Patræ. Nunc contra & vidisse mihi multum  
 videris, cum; prope desperatis his rebus, te  
 in Græciam contulisti; & hoc tempore non so-  
 lum sapiens, qui hinc absis, sed etiam beatus,  
 quanquam quis, qui aliquid sapiat, nunc bea-  
 tus esse potest? Sed, quod tu, cui licebat, pe-  
 dibus es consecutus, ut ibi esses, ubi nec Pe-  
 lopidarum; nosti cetera; nos idem propemodum  
 consequimur alia ratione. Cum enim salutatio-  
 ni nos dedimus amicorum, quæ sit hoc etiam  
 frequentius, quam solebat, quod, quasi avem  
 albam, videntur bene sentientem civem vide-  
 re; abdo me in bibliothecam. Itaque opera ef-  
 ficio tanta, quanta sortassetu senties, intelle-  
 xi enim ex tuo sermone quodam, cum mæsti-  
 tiam meam, & desperationem accusares, de-  
 mi tuæ dicere te, ex meis libris animum me-  
 um desiderare. Sed mehercule & tum temp.  
 hagebam, quæ non solum suis erga me, sed  
 etiam meis erga se beneficiis erat mihi carior;  
 & hoc tempore, quanquam me non ratio so-  
 lum consolatur ( quæ plurimum debet Valere )  
 sed etiam dies ( quæ stultis quoque mederi  
 solet ) tamen deleo ita communem rem esse  
 dilapsam, ut ne spes quidem melius aliquan-  
 do fore, relinquatur. Nec vero nunc quidem  
 culpa in eo est, in cuius potestate omnia sunt  
 ( nisi forte id ipsum esse non debuit ) sed alia  
 casu, alia etiam nostra culpa sic acciderunt,  
 ut de præteritis non sit querendum. Reli-

quam formam nullam video, quare ad prima redeo. Sapienter hæc reliquisti, si consilio: feliciter, si casu. Vale.

## A R G U M E N T U M.

*Memoriam declarat accepti a Cicerone beneficii, & commendatitias ab eo litteras petit ad Sulpicii successorem.*

XXX. M. AN. CURTIUS M. CICERONI  
S U O S. D.

**S**I valet, bene est, sum enim *κοινός* μέν tuus, *κρυπτός* δὲ Attici nostri; ergo fructus est tuus, mancipium illius, quod quidem si inter senes coemptionales venale proscripserit, egerit non multum. At illa nostra prædicatio quanti est, nos quod simus, quod habeamus, quod homines existimemur, id omne abs te habere? Quare, Cicero mi, persevera constanter nos conservare: & Sulpicii successoribus nos de meliore nota commendare, quo facilius tuis præceptis obtemperare possimus, teque ad verba lubentes videre, & nostra desigere, deportareque tuto possimus. Sed, amice magne, noli hanc epistolam Attico ostendere: sine eum errare, & putare me virum bonum esse, nec solere duos parietes de eadem fideliter dealbare. Ergo, patroni mi, bene vale, Tironemque meum saluta nostris verbis. D. A. D. iv. kal. Nov.

## A R G U M E N T U M.

*Ostendit, quam misere agatur cum Repub. cum Cæsar Cæsinium ad aliquot horas Consullem caverit: & de litteris commendatitiis ad Aciliam scriptis significat.*

XXXI. M. T. C. CURTIO S. D.

**E**GO vero jam te nec hortor, nec rogo, ut domum redeas; quin hinc iose evolare cupio, & aliquo pervenire, ubi nec Pelopidarum nomen, nec facta audiam. Incredibile est, quam turpiter mihi facere videar, qui his rebus intersim. Næ tu videris multo ante providisse, quid impenderet, tum, cum hinc profugisti; quamquam enim hæc etiam auditu  
accr-

acerba sunt; tamen audire tolerabilius est, quam videre. In campo certe non fuisti, cum hora secunda, comitiis quæstoriiis institutis, sella Q. Maximi, quem illi consulem esse dicebant, posita esset, quo mortuo nuntiato, sella sublata est. Ille autem, qui comitiis tributis esset auspicatus, centuriata habuit; consulem hora septima renuntiavit, qui usque ad kal. Jan. esset, quæ erant futuræ mane postridie. Ita Caninio consule scito neminem prandisse, nihil tamen eo consulo mali factum est; fuit enim mirifica vigilantia, qui suo toto consulatu somnum non viderit. Hæc tibi ridicula videntur: non enim ades: quæ si videres, lacrymas non teneres. Quid, si cetera scribam? sunt enim innumerabilia generis ejusdem: quæ quidem non ferrem, nisi me in philosophiæ portum contulissem, & nisi haberem socium studiorum meorum Atticum nostrum, cujus quando proprium te esse scribis mancipio, & nexu, meum autem usu, & fructu, contentus isto sum. I D. ENIM cujusque est proprium, quo quisque fruitur, atque utitur. Sed hæc alias pluribus. Acilius, qui in Græciam cum legionibus missus est, maximo meo beneficio est, bis enim est a me iudicio capitis, rebus salvis, defensus: & est homo non ingratus, meque vehementer observat, ad eum de te diligentissime scripli; eamque epistolam cum hac conjunxi, quam ille cum acceperit, ecquid tibi pollicitus sit, velim ad me scribas. Vale.

## A R G U M E N T U M.

*Invitat eum ad officia mutua, & ad Urbem ut redeat, rogat, ut veteris urbanitatis retinenda causa.*

XXXII. M. T. C. C U R I O. S. D.

**F**Acile perspexi ex tuis litteris. (quod semper studui) & me a te plurimi fieri, & te intelligere, quam mihi carus esses. Quod quando uterque nostrum consequutus est: reliquum est, ut officiis certemus inter nos; quibus æquo animo vel vincam te, vel vincar abs te. Acilio non fuisse necesse meas dari litteras, facile patior. Sulpicii tibi operam intelligo ex tuis litteris non multum opus fuisse, propter re-

ita contractas, ut, quemadmodum scribis, nec caput, nec pedes. Equidem vellem, pedes haberent, ut aliquando redires, vides enim exaruisse jam veterem urbanitatem, ut Pomponius noster suo jure possit dicere, Nisi nos pauci retineamus gloriam antiquam Atticam. Ergo is tibi, nos ei succedimus. Veni igitur, quaeso, ne tantum semen urbanitatis una cum repub. intereat. Vale.

## ARGUMENTUM.

*Scribit hanc epistolam in Provincia: prima pars de distis est, secunda de judiciis, tertia de Rep. ultima de Dolabella, nondum genero.*

## XXIII. M.T.C. VOLUMNIO S.D.

**Q**Uod sine prænominе familiariter, ut debebas, ad me epistolam misisti; primum addubitavi, num a Volumnio senatore esset, quocum mihi est magnus usus: deinde *εὐχαρις* litterarum fecit; ut intelligerem, tuas esse, quibus in litteris omnia mihi perjucunda fuerunt, præter illud quod parum diligenter possessio salinarum mearum a te procuratore defenditur, ais enim, ut ego discesserim, omnia omnium dicta, in his etiam Sextiana, in me conferri, quid? tu id pateris? nonne defendis? non resistis? equidem sperabam ita notata me reliquisse genera dictorum meorum, ut cognosci sua sponte possent. Sed, quando tanta fœx est in urbe, ut nihil sit tam *ἀκυρον*, quod non alicui vcnustum esse videatur: pugna, si me amas, nisi acuta *ὑπερβολή*, nisi elegans *ἀμφιβολία*, nisi *παρά κρᾶμμα* beilum, nisi ridiculum *παρά πρὸςδοκίαν*, nisi cetera, quæ sunt a me in secundo libro de oratore per Antonii personam disputata de ridiculis, *ἵπικνα*, & arguta apparebunt, ut sacramento contendas, mea non esse. Nam, de judiciis quod quereris, multo laboro minus, trahantur per me pedibus omnes rei: sit vel Selius tam eloquens, ut possit probare se liberum: non laboro. Urbanitatis possessio- nem, amabo, quibusvis interdiciis defendamus,



mus, in qua te unum metuo, contemno ceteros. Derideri te putas? nunc demum intelligo, te sapere. Sed mehercule, extra jocos, valde mihi tuæ litteræ facetæ, elegantesque visæ sunt. Illa, quamvis ridicula essent, sicut erant, mihi tamen risum non moverunt, cupio enim nostrum illum amicum in tribunatu quamplurimum habere gravitatis, idque cum ipsius causa (est enim mihi, ut scis, in amoribus) tum mehercule etiam reipub. quam quidem, quamvis in me ingrata sit, tamen amare non desinam. Tu, mi Volumni, quando & instituisti, & mihi vides esse gratum, scribe ad me quam sapissime de rebus urbanis, de repub. jucundus est mihi sermo litterarum tuarum. Præterea Dolabellam, quem ego perspicio, & judico cupidissimum esse, atque amantissimum mei, cohortare, & confirma, & redde plane meum, non mehercule quod quidquam desit, sed quia valde cupio, non videor nimium laborare. Vale.

### A R G U M E N T U M.

*Hæc epistola missa est post Civile bellum, scribit, se exercitationis causa declamare, auditoribus Hirtio, Cassio, Dolabella: Volumnium vocat ad eadem studia. Addit deliberatum sibi esse, Casare permittente, a causis, judiciisque discedere.*

#### XXXIV. M. T. C. VOLUMNIO S. D.

**Q**uod declamationibus nostris cares, damni nihil facis. Quod Hirtio invideres, nisi cum amares, non erat causa invidendi; nisi forte ipsius eloquentiæ magis, quam quod me audiret, invideres. Nos enim plane, mi suavissime Volumni, aut nihil sumus, aut nobis quidem ipsis displicemus; gregalibus illis, quibus, te plaudente, vigeamus, amissis: ut, etiamsi aliquando aliquid dignum nostro nomine emisimus, ingemiscamus, quod hæc pennigero, non armigero in corpore tela exercentur, ut ait Philoctetes apud Attium, abjecta gloria; sed tamen omnia mihi erunt, si tu veneris, hilariora, quamquam venies, ut ipse intelligis, in maximarum

quasi concursum occupationum; quas si, ut voluimus, exceperimus; ego vero multam salutem & foro dicam, & curi; vivamque tecum multum, & cum communibus nostris amatoribus. Nam & Cassius tuus, & Dolabella noster, vel potius uterque noster, studiis iisdem tenentur, & meis æquissimis utuntur auribus. Opus est huc limatulo, & politulo tuo iudicio, & illis interioribus litteris meis, quibus sæpe verècundior me in loquendo facis; mihi enim iudicatum est (si modo hoc Cæsar aut patietur, aut volens deponere illam jam personam, in qua me sæpe illi ipsi probavi, ac me totum in litteras ablere, tecumque, & cum ceteris earum studiosis honestissimo otio perfrui. Tu, vellem, ne veritus esses, ne perinvitus legerem tuas litteras, si mihi, quemadmodum scribis, longiores forte misisses, ac velim posthac sic stas tuas, quas mihi litteras longissimas quasque gratissimas fore. Vale.



## LIBER VIII.

### ARGUMENTUM.

*Commentarium mittit rerum urbanarum, & excusat se, quod alteri negotium dederit ad illa colligenda. Addit hac de Comitibus Transpadanorum, Romæ rumorem nullum esse; de successione Galliarum nihil relatum: de Pompejo cupere se aliquid cognoscere; de Cæsare varia dissipari; aliaque nonnulla. Resp. dat Cicero huic Epistola ea, quæ est 8. lib. 2.*

L. M. COELIUS RUFUS M. T. CIC. S. D.

**Q**UOD tibi decedenti pollicitus sum, me omnes res urbanas diligentissime tibi perscripturum, data opera paravi, qui sic omnia persequeretur, ut verèar, ne tibi arguta nimium hæc sedulitas videatur. Tametsi tu, scio, quam sis curiosus, & quam omnibus peregrinantibus gratum sit, minimarum quoque rerum, quæ domi gerantur, fieri certiores: tamen in hoc t

de-

deprecor, ne meum hoc officium arrogantia  
condemnes, quod hunc laborem alteri delega-  
vi: non quia mihi suavissimum sit & occupato,  
& ad litteras scribenda, ut tu nosti, pigerri-  
mo, tuae memoriae dare operam, sed ipsum vo-  
lumen, quod tibi misi, facile, ut ego arbi-  
tror, me excuset. Nescio cuius otii erit; non  
modo perscribere haec, sed omnino animadver-  
tere; omnia enim sunt ibi S. C. edicta, fabu-  
lae, rumores. Quod exemplum si forte nimis te  
delectarit, ne molestiam tibi cum impensa mea  
exhibeam, fac me certiorum. Si quid in rep.  
majus actum erit; quod isti operarii minus  
commode persequi possint; & quenaadmodum  
actum sit, & quae existimatio consequuta, quae  
que de eo spes, diligenter tibi perscribemus.  
Ut nunc est, nulla magnopere expectatio est;  
nam & illi rumores de comitiis Transpadana-  
rum Cumarum tenuis caluerunt. Romam cum  
venissem: ne tenuissimam quidem auditionem  
de ea re accepi. Præterea Marcellus quidem  
adhuc nihil retulit de successione provinciarum  
Gallarum; in Kal. Jun. ut mihi ipse dixit,  
eam distulit relationem; tamen quam ebs le-  
mones repressit, qui de eo cum fuerant; cum  
Romae nos essemus. Tu, si Pompejum, ut vo-  
lebas; offendisti; qui tibi visus sit, & quam  
orationem habuerit tecum, quamque ostende-  
rit voluntatem (solet enim aliud sentire, &  
loqui: neque tamen tantum valere ingenio; ut  
non appareat, quid cupiat) fac mihi perscri-  
bas. Quod ad Caesarem attinet, crebri, & non  
belli de eo rumores, sed susurrationses cunctae  
veniunt, alius; equitem perdidisse; quod  
opinor certe factum: alius septimam legionem  
vapulasse: ipsum apud Bellovacos circumfide-  
ri, interclusum ab reliquo exercitu: neque ad-  
huc certi quidquam est: neque haec incerta ta-  
men, vulgo jaectantur, sed inter paucos, quos tu  
nostis plane, secreto narrantur; at Domitius,  
cum manus ad os apposuit. Te ad ix. Kalend.  
Jun. subrostrani (quod illorum capiti sit) dissi-  
parant perisse: ita ut in urbem; ac si toto ne-  
xius rumor fuerit; te a Q. Pompejo in itinere  
occisum: Ego; qui scirem, Q. Pompejum

Baulis embæneticam facere, & usq; eo, ut ego miserer ejus esuriei, non sum commotus, & hoc mendacio, si qua pericula tibi impenderent, ut defungeremur, optavi. Plancus quidem tuus Ravennæ est; & magno congiario donatus a Cæsare, nec beatus, nec bene instructus est. Tui politici libri omnibus vigent. Vale.

## ARGUMENTUM.

*Nuntiat de absoluto Messala; ejusque defensore Hortensio a populo male accepto. Adjicit quædam de Republica, & de competitoribus suis.*

II. M. COELIUS M. T. CICERO. S. D.

Certe, inquam, absolutus est, me repræsentante pronuntiatum est, & quidem omnibus ordinibus, sed & singulis in unoquoque genere sententiis, vide modo, inquis, non me hercules: nihil enim unquam tam præter opinionem, tam quod videretur omnibus indignum, accidit; quin ego, cum pro amicitia validissime faverem ei, & me jam ad dolendum præparassem; postquam factum est, obstupui, & mihi visus sum captus esse, quid alios putas? clamoribus scilicet maximis judices corripuerunt; & ostenderunt, plane esse, quod ferri non posset. Itaque relictus lege Licinia, majore esse periculo videtur. Accessit huc, quod postridie ejus absolutionis in theatrum Curionis Hortensius introiit; puto, ut suum gaudium gauderemus, hic tibi strepitus, fremitus, clamor, tonitruum, & rudentum sibilus, hoc magis animadversum est, quod intactus a sibilo pervenerat Hortensius ad senectutem, sed tum ita bene, ut in totam vitam cuivis satis esset, & pœniteret cum jam vicisse. De rep. quod tibi scribam, nihil habeo. Marcelli impetus resederunt, non inertia, sed ut mihi videbatur, consilio. De comitiis consularibus incertissima est existimatio. Ego incidi in competitorem nobilem, & nobilem agentem: nam M. Octavius Cn. F. & C. Hirrus mecum petit, hoc ideo scripsi, quod scio te acriter propter Hirsrum nuntium nostrorum comitiorum expecta-

aturum. Tu tamen simul ac me designatum audieris, ut tibi curæ sit, quod ad pantheras attinet, rogo. Syngrapham Sittianam tibi commendo. Commentarium rerum urbanarum primum dedi L. Castrinio Pato, secundum ei, qui has litteras tibi reddet. Vale.

### ARGUMENTUM.

*Suum in scribendo officium predicat; scribit de Comitibus suis. quæ opinio sit; de Milonis re quid egerit: præterea cupere, se aliquo Ciceronis libro illustrari.*

### III. M. COELIUS M. T. CICER. S. D.

**E**st ne? vici? & tibi sæpe, quod me negaras discedens curaturum, litteras mitto? est, si quidem perferuntur, quas do, atque hoc eo diligentius factito, quod, cum otiosus sum, plane, ubi delectem otium meum, non habeo. Tu cum Romæ eras, hoc mihi certum, ac iucundissimum vacanti negotium erat, tecum id otii tempus consumere: idque non mediocriter desidero: ut non modo mihi solus esse, sed Romæ, te profecto, solitudo videatur facta; & qui, quæ mea negligentia est, multos sæpe dies ad te, cum hic eras, non accedebam, nunc quotidie non esse te, ad quem cursitem, discracior, maxime vero, ut te dies, noctesque quæram, competitor Hirrus curat. Quomodo illum putas, auguratus tuum competitorum dolere, & dissimulare, me certiores, quam se, candidatum? de quo ut, quem optas, quamprimum nuntium accipias, tua mediis fidiis magis, quam mea causa cupio, nam mea, si nō, forsitan cum locupletiore referam: sed hoc usque eo suave est, quod, si acciderit, tota vita risus nobis deesse non poterit, sed tanti? sed mehercule, non multum M. Octavius eorum odia, qui Hirrum premunt, quæ permulta sunt, subleuat. Quod ad Philotimi liberti officium, & bona Milonis attinet: dedimus operam, ut & Philotimus quam honestissime Miloni absentis, ejusque necessariis satisfaceret, & secundum ejus fidem, & sedulitatem æstimatio tua conservaretur. Illud nunc a te peto, si eris

( ut spero ) otiosus, aliquid ad nos, ut intelligamus nos tibi curæ esse, σύνταγμα conscribas. Qui tibi istuc, inquis, in mentem venit hominī non inepto? aliquid ex tam multis tuis monumentis existare, quod nostræ amicitiae memoriam posteris quoque prodat, velim; cuiusmodi, puto, quæris; tu aptius, qui omnem hosti disciplinam, quod maxime conveniat, excogitabis: genere tamen, quod & ad nos pertineat, & διασχολίαν quandam, ut versetur inter manus, habeat. Vale.

### ARGUMENTUM.

*Scribit de iudiciis, de magistratibus, de Rep de se ipso, de syngrapha Sittiana, de Rege Alexandrino.*

IV. M. COELIUS M. T. CICERO. S. D.

**I**nvideo tibi: tam multa quotidie, quæ mirere, istuc perferuntur: primum illud, absolutum Messallam, deinde eundem condemnatum: C. Marcellum COS. factum: M. Claudium a repulsa postulatū a Gallis duobus: P. Dolabellam quindecimvirum factum; hoc tibi non invideo, caruisse te pulcherrimō spectaculo, & Lentuli Suræ repulsi vultum non vidisse, at qua spe, quam certa opinione descenderat? quanti ipso dissidente Dolabella? & hercules, nisi nostri equites acutius vidissent, pene concedente adversario superasset. Illud te non arbitror miratum, Servium tribunum pl. designatum, condemnatum: cuius locum C. Curio petiit, sane quam multis intuit, qui eum, facilitatemque ejus non norunt, magnum merum. Sed, ut spero, & volo, & ut se fessē ipse, bonos, & senatum malet, totus, ut nunc est, hic scaturit. Hujus autem voluntatis initium, & causa est, quod cum non mediocriter Cæsar, qui solet infimorum hominum amicitias sibi qualibet impensa adjungere, valde contempsit; qua in re mihi videtur illud perquam venuste cecidisse, quod a reliquis quoque usque eo est animadversum, ut Curio, qui nihil consilio facit, ratione, & insidiis usus videretur in evitandis eorum consiliis, qui se intenderant adversarios in ejus tribunatum: Lælios, & An-

Ionios, & id genus valentes dico. Has ego tibi litteras eo majore mihi intervallo, quod comitorum dilationes occupationesque me habebant, & expectare in dies exitum coegebant, ut, confectis omnibus, te facerem certiores; ad Kalend. Sext. uique expectavi. Prætoris moræ quædam inciderunt, mea porro quem eventum sint habitura, nescio: opinionem quidem, quod ad Hirrum attinet, incredibilem ædiliū plebis comitiis nata sunt. Nam M. Cælium Vicinianum mentio illa fatua, quam deriseramus olim, & promulgatio de Dictatore subito dejecit, & dejectum magno clamore insecuta est; inde Hirrum cunctis jam, non faciendum, agitare. Specto te celeriter & de nobis, quod sperasti, & de illis, quod vix sperare ausus es, auditurum. De republ. jam novi quidquam expectare desicimus; sed, cum senatus habitus esset ad Apollinis ad xi. Kal. Sext. & reterretur de stipendio Cn. Pompeii; mentio facta est de legione eaque expensam tulit C. Cæsari Pompejus, quo numero esset, quo appeteretur: cum ex Gallia re-actus est dicere Pompejus, se legionem abducturum: sed non statim sub mentionem, & conviciū obrectatorum. Inde interrogatus de successione C. Cæsaris; de qua, hoc est de provinciis, placitum est ut quamprimum ad urbem reverteretur Cn. Pompejus, ut coram eo de successione provinciarum ageretur, nam Ariminum ad exercitum Pompejus erat iturus; & statim it, puto idibus Sext. de ea re factum iri; profecto aut transigetur aliquid, aut turpiter intercedetur; nam in disputando coniecit illam vocem Cn. Pompejus, omnes oportere senatus dicto audientes esse. Ego tamen sic nihil expecto, quo modo Paulum COS. des. primum sententiam dicentem. Sæpius te admoneo de Syngrapha Siritiana, cupio enim, te intelligere, eam rem ad me valde pertinere, item de pantheris, ut Cybiratas accessas, curesque mihi ut vehantur. Præterea nuntiatum nobis, & pro certo jam habetur; regem Alexandrinum mortuum: Quid mihi suadcas, quomodo regnum illud sese habeat, quis procuraret; diligenter mihi perscribas. Kal. Sext. Vale.

## A R G U M E N T U M.

*Monet Ciceronem, ut, antequam Parthi bellum inferrent, statueret, quid sibi agendum esset: imparem enim fore dimicationem, de Rep. nihil ait esse novi.*

V. M. COELIUS M. T. CICERO. S. D.

**Q**ua tu cura sis, quod ad pacem provinciarum tuarum, finitimarumque regionum attinet, nescio; ego quidem vehementer animi pendeo, nam si hoc moderari possemus, ut pro viribus copiarum tuarum belli quoque existeret magnitudo; & quantum gloriæ, triumphoque opus esset, assequeremur; periculosamque, & gravem illam dimicationem evitarem; nihil tam esset optandum. Nunc, si Parthus movet aliquid, scio, non mediocrem fore contentionem, tuus porro exercitus vix unum saltum tueri potest. Haec autem nemo ducit rationem: sed omnia desiderantur ab eo (tanquam nihil denegatum sit ei, quominus quam paratissimus esset) qui publico negotio præpositus est. Accedit huc, quod successionem futuram propter Galliarum controversiam non video. Tamen si hac de re puto, te constitutum, quid facturus esses, habere: tamen, quo maturius constitueres, cum hunc eventum providebam, visum est, ut te facerem certior, noli enim hæc translatina, de Galliis constitueretur; erit qui intercedat; deinde alius existet, qui, nisi libere liceat de omnibus provinciis decernere senatus, reliquas impediatur, sic multum, ac diu ludetur, atque ita diu, ut plus biennium in his tricis moretur. Si quid novi de republ. quod tibi scriberem, haberem, usus essem mea consuetudine, ut diligenter, & quid actum esset, & quid ex eo futurum sperarem, perscriberem, tunc tanquam in quodam filice jam omnia adhæserunt. Marcellus idem illud de provinciis urget: sed neque adhuc frequentem senatum efficere potuit. Quod si hoc præterito anno Curius tribunus, & eadem actio de provinciis introibit: quam facile tunc sit omnia im-



impedire , & quam hoc Cæsari , & iis , qui suam causam , non reip. curent , superet , non te fallit . Vale .

## A R G U M E N T U M .

*Narrat de Hirro competitore ab Ædilitate dejecto , de Provinciis nihil actum significat ; pantheras petit : M. Feridium commenaat ; addit nonnulla de Favonio , Pompejo , Calidio .*

## V I . M . C O E L I U S M . T . C I C E R . S . D .

**S**ic tu , inquis , Hirrum tractasti ? imo , si scias , quam facile , quam ne contentionis quidem minimæ fuerit , pudeat te , ausum illum unquam esse incedere tamquam tuum competitorem : post repulsam vero risus facit : civem bonum ludit , & contra Cæsarem sententias dicit : expectationem corripit Curionem prorsus non mediocriter objurgavit : hac repulsa se mutavit , præterea qui nunquam in foro apparuit , non multum in judiciis versatus sit , agit causam liberalis , sed raro post meridiem . De provinciis , quod tibi scripseram idibus Sext actum iri , interpellat iudicium Marcelli consulis designati , in Kal. rejecta causa est , ne frequentiam quidem efficere potuerant . Has litteras ad iv. non Sept. dedi , cum ad eam diem ne profligatum quidem quidquam esset . Ut video , causa hæc integra in proximum annum transferetur ; & , quantum divino , relinquendus tibi erit , qui provinciam obelneat . Nam non expeditur successio : quando Gallie , quæ habent intercessorem , in eandem conditionem , quam ceteræ provinciæ , vocantur , hoc mihi non est dubium , quo tibi magis scripsi , ut ad hunc eventum te parares . Fere litteris omnibus tibi de pantheris scripsi , turpe tibi erit , Patiscum Curioni decem misisse , te non multis partibus plures : quas ipsas Curio mihi , & alias Africanas decem donavit : ne putes illum tantum prædia rustica dare scire . Tu , si modo memoria tenueris , & Cybiratas arcessieris , itemque in Pamphyliam litteras miseris ( nam ibi plures capi ajunt ) quod voles , efficies . Hoc vehementius laboro nunc , quod

Quod seorsum a collega puto mihi omnia paranda. Amabo te; impera tibi: hoc cura. Soles libenter; ut ego; majorem partem nihil curare; in hoc negotio nulla tua, nisi loquendi; cura est; hoc est, imperandi; & mandandi; hanc, simul atque erunt captae, qui alant eas, & deportent, habes eos, quos ad Sittianam syngrapham misi. Puto; etiam si nullam spem mihi litteris ostenderis; me isto missurum alios: M. Feridium, equitem Romanum, amici mei filium, bonum, & strenuum adolescentem, qui ad suum negotium istuc venit, tibi commendō; & te rogo, ut eum in tuorum numero habeas. Agros; quos fructuarios habent civitates, vult tuo beneficio; (quod tibi facile; & honestum factu est) immunes esse; gratos, & bonos viros tibi obligaris: Nolo te putare; Favonium a columnariis prateritum; optimus quisque eum non fecit. Pompejus tuus aperrē non vult, Cæsarem provinciam tenere cum exercitu, & consulem esse: tamen hanc sententiam dixit, nullum hoc tempore S. C. faciendum: Scipio hanc, ut Kal. Mar. de provinciis Galliis, neu quid conjunctim referretur. Contristavit hæc sententia Balbum Cornelium; & scio, eum conquestum esse cum Scipione: Callidius in defensione suæ fuit disertissimus, in accusationes satis frigidus. Vale.

## A R G U M E N T U M.

*Patia scribit, primum de iudiciis quibusdam, tum de Rep. satis copiose, postremo de seipso,*

VII. M. COELIUS M. T. CICERO. S. D.

**E**tsi de repub. quæ tibi scribam, habeo; tamen nihil quo magis gavisurum te putem; habeo, quam hoc: Scito, C. Sempronium Rufum, mel, ac delicias tuas, calumniam maximo plausu tulisse; quaris quæ in causâ? M. Tuccium, accusatorem sum, post ludos Romanos reum lege Plotia de vi fecit, hoc consilio, quod videbat, si extraordinarius nemo reus accessisset, sibi hoc anno causam esse dicendam; dubium porro illi non erat, quid futurum

Tum esset : nemini hoc deferre munusculum maluit , quam sub accusatori : itaque sine ullo subscriptore descendit , & Tuccium reum fecit ; at ego , simul atque audiui ; invocatus ad subsellia rei accurro ; surgo , neque verbum de re facio : obtulim Scampronium usque eo perago , ut Vestorium quoque interponam , & illam fabulam narrem , quemadmodum tibi pro beneficio dederit , si quid injuriis suis esset , quod Vestorius teneret. Hæc quoque magna nunc contentio forum tenet : M. Servilius ; postquam , ut cœperat , omnibus in rebus turbabat , nec , quod non venderet , quidquam reliquerat , maxima nobis traditus erat invidia ; neque Laterensis prætor , postulante Pausania , nobis patronis , quo ea pecunia pervenisset , recipere voluit ; quod Pilius ; necessarius Attici nostri ; de repetundis eum postulavit ; magna illico fama surrexit , & de damnatione ferventer loqui est cœptum ; quo ventus projicitur Appius minor , ut indicet , pecuniam ex bonis paternis pervenisse ad Servilium , prævaricationisque causa diceret depositum H. S. LXXXI. Admiraris amentiam ? quid si actiones stultissimas , quid si nefarias patris confessiones audisces ? mittit in consilium eosdem illos , qui lites æstimant , judices . Cum æquo numero sententia fuissent , Laterensis , leges ignorans , pronuntiavit quid singuli ordines judicassent ; & ad extremum , ut solent , Non redigam . Postquam discessit , & pro absoluto Servilius haberi cœptus , legisque unum , & centesimum caput legit , in quo ita erat ; QUOD eorum judicium major pars judicavit , id jus , ratumque esto ; in tabulas absolutum non retulit , ordinum judicia perscripsit . Postulante rursus Appio , cum L. Lollio transiegit , & se relaturum dixit ; sic nunc neque absolutus , neque damnatus Servilius , de repetundis saucius Pilius tradetur . Nam de divinatione Appius , cum calumniam jurasset contendere ausus non est , Pilioque cœsit ; & ipse de pecuniis repetundis a Serviliis est postulat , & præterea de vi reus a quodam suo emissario est factus ; recte hoc par habet . Quod ad rempub. per-

tinet ,

placere, auctoritatem perscribi, & de ea re ad senatum, populumque referri. Huic S. C. intercessit C. Cælius, L. Vicinius, P. Cornelius, C. Vibius Pansa. Item senatui placere, de militibus, qui in exercitu C. Cæsaris sunt, quæ eorum stipendia emerita, causas, quibus de causis missi fieri debeant, habeant, ad hunc ordinem referri, ut eorum ratio habeatur, causæque cognoscantur. Si quis huic S. C. intercesserit, senatui placere, auctoritatem perscribi, & de ea re ad senatum, populumque referri. Huic S. C. intercessit C. Cælius, C. Pansa, tribuni plebis, itemque Senatui placere, in Ciliciam provinciam, inque VIII. reliquas provincias, quas prætorii pro prætore obtinerent, eos, qui prætores fuerunt, neque in provincia cum imperio fuerunt, quos eorum ex S. C. cum imperio in provincias pro prætore mitti oporteret, eos sortito in provincias mitti placere: si ex eo numero, quos S. C. in provincias ire oporteret, ad numerum non essent, qui in eas provincias proficiscerentur; tum, uti quodque collegium primum prætorum fuisset, neque in provincias profecti essent, ita sorte in provincias proficiscerentur: si ad numerum ii non essent, tunc deinceps proximi cuiusque collegii, qui prætores fuissent, neque in provincias profecti essent, in sortem conjicerentur: quoad is numerus effectus esset, quem ad numerum in provincias mitti oporteret: si quis huic S. C. intercessisset, auctoritas perscriberetur. Huic S. C. intercessit C. Cælius, C. Pansa tribuni plebis. Illa præterea Cn. Pompeji sunt animadversa, quæ maxime confidentiam attulerunt hominibus; ut diceret, se ante Kal. Mart. non posse sine injuria de provinciis Cæsaris statuere; post Kal. Mart. se non dubitaturum. Cum interrogaretur, si qui tum intercederent; dixit, hoc nihil interesse, utrum Cæsar senatui dicto audiens futurus non esset, an pararet, qui senatum decernere non pateretur. Quid si, inquit alius, & consul esse, & exercitum habere velit? At ille, quam clementer: quid, si filius meus fuissem mihi impingere velit? His vocibus, ut existimarent

hu-

homines Pompejo cum Cæsare esse negotium ; effecit , itaq; jam , ut video , alterutram ad conditionem descendere vult Cæsar , ut aut maneat , neque hoc anno sui ratio habeatur : aut , si designari poterit , decedat : Curio se contra eum tutum parat , quid assequi possit , nescio . Illud video , bene sentientem , etsi nihil effecerit , cadere non posse . Me tractat liberaliter , & mihi suo munere negotium imposuit ; nam , si mihi non dedisset eas , quæ ad ludos ei adveherant Africanæ , potuit supersederi ; hunc , quando dare necesse est , velim tibi curæ sit , quod a te semper petii , ut aliquid istinc bestiarum habeamus : Sittianamque syngrapham tibi commendo . Libertum Philonem istuc misi , & Diogenem Græcum , quibus mandata , & litteras ad te dedi : eas tibi , & rem , de quâ misi , velim curæ habeas , nam , quam vehementer ad me pertineat , in iis , quas tibi illi reddent , litteris descripsi . Vale :

### ARGUMENTUM.

*Scribit de Parthici belli rumore , & de Provinciis quid putet assumiri : addit actiones Curionis de agro Campano , de Ciceronis decessu . Affirmat , se officio suo satis esse facturum .*

VIII. M. COELIUS M. T. CICER. S. D.

**S**ANE , quam litteris C. Cassi , & Desotari sumus commoti ; nam Cassius cis Euphratem copias Parthorum esse scripsit : Desotarus , profectas per Commagensem in provinciam nostram . Ego quidem præcipuum merum , quod ad te attingebat , habui ; qui scirem quam paratus ab exercitu esses , ne quod hic tumultus dignitati tuæ periculum afferret . Nam de vita , si paratioꝝ ab exercitu esses , rinuisssem ; nunc hæc exiguitas corporum , recessum , non dimicationem mihi tuam præfagebat : hoc quo modo acciperent homines ; quam probabilis necessitas futura esset , vereor etiam nunc , neque prius desinam formidare , quam tetigisse te Italiam audierō . Sed de Parthorum transitu huntii varios sermones excitant ; alius enim , Pompejum mittendum ; alius ab urbe non removendum ; alius , Cæsarem cum suo exercitu ; alius ,

Alius Consules; nemo tamen, ex S. C. privatos. Consules autem, quia verentur, ne illud S. C. fiat, ut paludati exeant, & contumeliose præter eos ad alium res transferatur, omnino senatum hæc æri nolunt: usque eo, ut parum diligentes in republica videantur; sed honeste, siue negligentia, siue inertia est, siue ille, quem proposui, metus, latet sub hac temperantiæ existimatione, nolle provinciam. A te litteræ non venerunt, &, nisi Desotari subsequeretur essent, in eam opinionem Cassius venerat; quæ diripisset ipse, ut viderentur ab hoste vastata, finxisse bellum; & Arabas in provinciam immisisse, eosque Parthos esse, senatui renuntiasset. Quare tibi suadeo, quicumque est istic status rerum, diligenter, & caute perscribas; ne aut velificatus alicui dicaris, aut aliquid, quod referret scire, reticuisse. Nunc exitus est anni; nam ego has litteras ad xiv. Kalend. Decemb. scripsi, planè nihil video ante Kalend. Januar. agi posse. Nosti Marcellum, quam tardus, & parum efficax sit, itemque Servium, quam cunctator. Cujusmodi putas hos esse, aut qui id, quod nolint, conficere posse, qui, quæ cupiunt, tamen ita frigide agunt, ut nolle existimentur? Novis magistratibus autem, si Parthicum bellum erit, hæc causa primos menses occupabit; sin autem, aut non erit istic bellum, aut tantum erit, ut vos, aut successores, parvis additis copiis, sustinere possint. Curionem video, se dupliciter jactaturum, primum; ut aliquid Cæsari adimat: inde, ut aliquid Pompejo tribuat, quodvis quamlibet tenue munusculum. Paulus porro non humane de provincia loquitur hujus cupiditati occursurus est Furnius noster, plures suspicari non possunt. Hæc novi: alia quæ possunt accidere, non cerno: multa tempus afferre, & præparata multa scio: sed intra fines hos, quæcunque acciderint, verentur. Illud addo, actiones C. Curionis de agro Campano, de quo negant Cæsarem laborare; sed Pompejum valde, nolle; ne vâcûus adveniënti Cæsari pateat. Quod ad tuum decessum attinet, illud tibi non possum polliceri, me curaturum, ut tibi succedatur: illud

illud certe præstabo, ne quid amplius prorogetur. Tui consilii est, si tempus, si senatus coget, si honeste a nobis recusari non poterit, velisne perseverare: mei officii est meminisse, qua obtestatione decedens, mihi, ne paterer fieri, mandaris. Vale.

# ARGUMENTUM.

*Capita sunt hujus Epistolæ, de Appio a Dolabella accusato, de Ciceronis officio, de affinitate cum Dolabella jungenda, de Republica. Huic respondet epistola decimatertia libri secundi.*

## IX. M. COELIUS M. S. CICERONI S. D.

**N**on dubito, quin perlatum ad te sit, Appium a Dolabella reum factum; sanequam non ea, qua existimaveram, invidia, neque enim stulte Appius, qui simul atque Dolabella accessit ad tribunal, introierat in urbem, triumphique postulationem abjecerat. Quo facto, retudit sermones, paratiorque visus est, quam speraverat accusator. Is nunc in te maximam spem habet, scio, tibi eum non esse odio, quam velis eum obligare, in tua manu est: cum quo simultates si tibi non fuissent, liberius tibi de tota re esset. Nunc si ad illam summam veritatem legitimus jus exegeris, cavendum tibi erit, ne parum simpliciter, & candide posuisse inimicitias videaris, in hanc partem porro tutum tibi erit, si quid volueris, gratificari; nemo enim necessitudine, & amicitia te deterritum ab officio dicet. Illud mihi occurrit, quod inter postulationem, & nominis delationem uxor a Dolabella discessit. Quid mihi discedens mandaris, memini: quid ego tibi scripserim, te non arbitror oblitum, non est jam tempus plura narrandi. Unum illud monere te possum: si res tibi non displicebit; tamen hoc tempore nihil de tua voluntate ostendas; & expectes, quemadmodum exeat ex hac causa: ne qua invidiosum tibi sit, si emanarit, porro significatio ulla si intercesserit, clarius quam deceat, aut expediat, fiat, neque ille tacere eam rem poterit, quæ suæ spei tam opportuna acciderit, quæque in negotio conficiendo tanto illustrior erit: cum præsertim is sit, qui, si per-

perniciosa sciret esse, loqui de hac re, vi-  
tamen se contineret. Pompejus dicitur valde pro  
Appio laborare; ut etiam putent alterutrum de  
filiis ad te missurum, hic nos omnes absolvi-  
mus, & hercule confecta, omnia fœda, & in-  
honestasunt. Consules autem habemus summa  
diligentia, adhuc S. C. nisi de feriis Latinis,  
nullum facere potuerunt. Curioni nostro tribu-  
natus congelat, sed dici non potest, quo modo  
hic omnia jaceant, nisi ego cum tabernariis, &  
aquariis pugnarem, veteris civitatem occupas-  
set. Si Parthi vos nihil calfaciunt, nos hic fri-  
gore frigesimus, tamen, quoquo modo hic om-  
nia jaceant, potuit sine Parthis. Bibulus in A-  
mano nescio quid cohorticularum amisit, hoc sic  
nuntiatum est. Quod tibi supra scripsi, Curio-  
nem frigere: jam calet, nam ferventissime con-  
cerpitur: levissime enim, quia de intercalando  
non obtinuerat, transfugit ad populum, & pro  
Cæsare loqui cepit, legemque viariam non dis-  
similem agrariæ Rulli, & alimentariam, quas  
jubeat adiles metiri, jactavit, hoc nondum fe-  
cerat, cum priorem epistolæ partem scripsi. A-  
mabo te, si quid, quod opus fuerit, Appio fa-  
cias, ponito me in gratiam. De Dolabella inte-  
grum tibi reserves, suadeo, & huic rei, de qua  
loquor, & dignitati tuæ, æquitatisque opinio-  
ni hoc ita facere expedit. Turpe tibi erit, pan-  
theras Græcas me non habere. Vale.

## A R G U M E N T U M.

*Scribit de belli Parthici periculo, de Cornificii nu-  
ptiis, de Valeriæ divortio, de Ocellæ adulterio.*

X. M. COELIUS M. T. CICERONI S. D.

**Q**Uam cito tu istinc decedere cupias, ne-  
scio: ego quidem eo magis, quo adhuc fe-  
licius rem gessisti, dum istic eris, de belli  
Parthici periculo cruciabor, ne hunc risum me-  
um metus aliquis perturbet. Breviares has lit-  
teras properanti publicanorum tabellario subito  
dedi: tuo liberto pluribus verbis scriptas pridie de-  
deram. Res autem novæ nullæ sane acciderunt:  
nisi hæc vis tibi scribi, quæ certe vis. Cornificiu-  
ado-



adoleſcens Oreſtillæ filiam ſibi deſpondit. Paula Valeria, ſoror Triarii, divortium ſine cauſa, quo die vir e provincia venturus erat, fecit, nuptura eſt D. Bruto, nondum retulerat. Multa in hoc genere incredibilia, te abſente, acciderunt. Ser. Ocella nemini perſuaſiſſet, ſe mœchum eſſe, niſi triduo his deprehenſuſ eſſet. Quæris, ubi? ubi hercules ego minime vellem; relinquo tibi, quod ab aliis quæras, neque enim diſplicet mihi, imperatorem ſingulos percunctari, cum qua ſit aliquis deprehenſus. Vale.

### ARGUMENTUM.

*ſupplicationes Ciceroni a Senatu decretas ſignificat pro re in Provincia bene geſta; & quæ fuerit cuiuſque vel ſententia, vel voluntas, docet; aſcribit etiam de Rep.*

XI. M. COELIUS M. T. CICERONI S. D.

**N**on diu, ſed acriter nos tuæ ſupplicationeſtorſerunt, incideramus enim in difficilem nodum. Nam Curio, tui cupidiffimus, cui omnibus rationibus comitiales eripiebantur, negabat, ſe ullo modo pati poſſe, decerni ſupplicationes; ne, ſi quid furore Pauli adeptus eſſet boni, ſua culpa videretur amiſſiſſe, & pravaricator cauſæ publicæ exiſtimaretur. Itaq; ad pacationem descendimus: & confirmarunt conſules, ſe his ſupplicationibus in hunc annum non uſuros. Plane, quod utriſque conſulibus gratias agas, eſt: Paulo magis certe; nam Marcellus ſic reſpondit ei, ſpem in iſtis ſupplicationibus non habere: Paulus, ſe omnino in hunc annum non edicturum. Renuntiarum nobis erat Hirrum diutius dicturum, prendimus eum: non modo non fecit, ſed, cum de hoſtibus ageretur, & poſſet rem impedire, ſi, ut numeraretur, poſtularet, tacuit: tantum Catoni aſſenſus eſt, qui de te & loquutus honorifice, non decrevit ſupplicationes. Tertius ad hos Favonius acceſſit; quare pro cuiuſque natura, & iſtituto gratiæ ſunt agenda: his, quod tantum voluntatem oſtenderunt, pro ſententia, cum impedire poſſent, non pugnarunt: Curioni verò, quod de ſua

suarum actionum cursu tua causa deflexit. Nam Furnius, & Lentulus, ut debuerunt, quasi eorum res esset, una nobiscum circumierunt, & laborarunt. Balbi quoque Cornelii operam, & sedulitatem laudare possum, nam cum Curione vehementer loquutus est: & eum, si aliter fecisset, injuriam Cæsari facturum dixit: tum ejus fidem in suspicionem adduxit. Decrerant, qui inique transigi volebant, Domitii, Scipiones, quibus hac re ad intercessionem evocandam interpellantibus, venustissime Curio respondit, se eo libentius non intercedere, quod quosdam, qui decernerent, videret confici nolle. Quod ad rempublicam attinet, in unam causam omnis contentio coniecta est: de provinciis inquam adhuc est, incubuisse cum senatu Pompejus videtur, ut Cæsar ante id. Nov. decedat. Curio omnia potius subire constituit, quam id pati: ceteras suas abiecit actiones. Nostri porro, quos tu bene nosti, ad extremum certamen rem deducere non audent, scena rei totius hæc. Pompejus, tamquam Cæsarem non impugnet, sed, quod illi æquum putet, constituat, ait, Curionem quærare discordias; valde autem non vult, & plane timet, Cæsarem consulem designari prius, quam exercitum, & provinciam tradiderit. Accipitur satis male a Curione: & totus ejus secundus consulatus exagitur. Hoc tibi dico; si omnibus rebus prement Curionem, Cæsar defenderetur: intercessorem si (quod videntur) reformidabunt, Cæsar, quoad volet, manebit. Quam quisque sententiam dixerit, in commentatio est rerum urbanarum, e quo tu, quæ digna sunt, selige: multa transi, in primis ludorum explosiones, & funerum, & ceterarum ineptiarum plura habet inutilia. Denique malo in hanc partem errare, ut, quæ non desideras, audias, quam quidquam, quod opus est, prætermittatur. Tibi curæ fuisse de Sirtiano negotio, gaudeo: sed, quando suspicaris minus certa fide eos tibi visos, tanquam procurator sic agas, rogo. Vale.

## A R G U M E N T U M.

*Gratulatur de affinitate Dolabellæ : de Curionis intercessione, & de Provinciis, quid actum sit significat, & de Hortensii præsentis jam mortis nuntiat.*

## XII. M. COELIUS M. T. CICERONI S. D.

**G**ratulor tibi affinitate viri medius fidius optimi, nam hoc ego de illo exillimo, cetera porro, quibus adhuc ille sibi parum utilis fuit, & ætate jam sunt decursa, & consuetudine, atque auctoritate tua, & pudore Tullæ, si qua restabunt, confido celeriter sublatum iri, non est enim pugnax in vitiis, neque hebes ad id, quod melius sit, intelligendum, deinde, quod maximum est, ego illum valde amo. Vides, Cicero, Curionem nostrum lautum intercessionis de provinciis exitum habuisse? nam cum de intercessione referretur: quæ relatio fiebat ex S. C. primaque M. Marcelli sententia prænuntiata esset, qui agendum cum tribunis placerebat: frequens senatus in alia omnia iit. Stomacho est scilicet Pompejus Magnus nunc ita languenti, ut vix id, quod sibi placeat, reperiat, transferant illuc, ut ratio esset ejus habenda, qui neque exercitum, neque provincias traderet. Quemadmodum hoc Pompejus laturus sit, cum cognoscat, quidnam reip. futurum sit, si aut non possit, aut non curet, vos fenes divites videritis. Q. Hortensius, cum has litteras scripsi, animam agebat. Vale.

## A R G U M E N T U M.

*Queritur de Appii Claudii injuriis.*

## XIII. M. COELIUS M. T. C. S. D. 3.

**P**udet me tibi confiteri; & queri de Appii, hominis ingratiissimi, injuriis; qui me odisse, quia magna mihi debebat beneficia, cœpit; &, cum homo avarus, ut ea solveret, sibi

im-

imperare non posset, occultum bellum mihi indixit, ita occultum tamen, ut multi mihi renuntiarent, & ipse facile animadverterem, male eum de me cogitare. Posteaquam vero compe-  
di, eum collegium tentasse, deinde aperte cum quibusdam loquutum cum L. Domitio, ut nunc est, mihi inimicissimo homine deliberare, velle hoc munusculum deferre Cn. Pompejo: ipsum reprehenderem, & ab eo deprecarer injuriam, quem vitam mihi debere putarem, impetrare a me non potui, quid ergo est? tum, quasi aliquid, amicis, qui testes erant meorum in illum meritorum, loquutus sum, posteaquam illum, ne cui satisfaceret quidem, me dignum habere sensi: malui collegæ eius, homini alienissimo mihi, & propter amicitiam tuam non æquissimo, me obligare, quam illius simiæ vultum subire. Id postquam rescivit, excanduit, & me causam inimicitiarum quærere elamitavit; ut, si mihi in pecunia minus satisfecisset, per hanc speciem simultatis eum confectarer. Postea non destitit accersere palam Servium accusatorem, inire cum Domitio consilia: quibus cum parum procederet, ut ulla lege mihi ponerent accusatorem; compellari ea lege me voluerunt, qua dicere non poterant. Insolentissimi homines summis Circensibus ludis meis postulandum me lege Scantinia curant. Vix hoc erat Pola eloquutus, cum ego Appium censorem eadem lege postulavi, quod melius caderet, nihil vidi, nam sic est a populo, & non infimo quoque approbatum, ut majorem Appio dolorem fama, quam postulatio attulerit. Præterea cœpi sacellum, in domo quod est, ab eo petere. Con-  
turbat me mora servi hujus, qui tibi litteras attulit, nam acceptis prioribus litteris, amplius quadraginta mansit. Quid tibi scribam, nescio. Scis Domitio diem timori esse. Exspecto te valde, & quamprimum videre cupio. A te peto, ut meas injurias proinde doleas, ut me existimas & dolere, & ulcisci tuas fo-  
lere. Vale.

*Hæc epistola multa complectitur, de L. Domitii  
Ahenobarbi repulsa in Augurato, de Satur-  
nino ab Cn. Domitio Calvino accusato, de Pom-  
peji, Cesarisque discordia, de Appii ad cor-  
rigendam civitatem ridicula diligentia.*

## XIV. M. COELIUS M. T. CICERONI S. D.

**T**Anti non fuit Arsacem capere, Seleuciam  
expugnare, ut earum rerum, quæ hic gestæ  
sunt, spectaculo careres; nunquam tibi oculi  
doluisent, si in repulsa Domitii vultum vidis-  
ses, magna illa comitia fuerunt: & plane stu-  
dia ex partium sensu apparuerunt, perpauci,  
necessitudinem sequuti officium præstiterunt. Ita-  
que mihi est Domitius inimicissimus: ut ne fami-  
liarem quidem suum quenuquam tam oderit, quam  
me: atque eo magis, quod per injuriam sibi pu-  
tat ereptum, cujus ego auctor fuerim; nunc furit  
tam gavisos homines suum dolorem, unumque me  
studiosorem Antonii: nam Cn. Saturninum ad o-  
lescentem ipse Cn. Domitius reum fecit sanequam  
superiore a vita invidiosum; quod iudicium nunc  
in expectatione est, etiam in bona spe, post Sext.  
Peducæi absolutionem. De summa repub. sæpe tibi  
scripsi, me etiamnum pacem non videre: & quo  
propius ea contentio, quam fieri necesse est, acce-  
dit, eo clarius id periculum apparet. Propositum  
hoc est, de quo, qui rerum potiuntur, sunt dimi-  
caturi, quod Cn. Pompejus constituit non pati C.  
Cæsarem consulem aliter fieri, nisi exercitum, &  
provincias tradiderit: Cæsari autem persuasum  
est, se salvum esse non posse, si ab exercitu reces-  
serit; fert illam tamen conditionem, ut ambo  
exercitus tradant. Sic illi amores, & invidiosa  
conjunctio non ad occultam recedit obtrectatio-  
nem, sed ad bellum se erumpit, neque mearum  
rerum quid consilii capiam, reperio, neque dubi-  
to, quin te quoque hæc deliberatio sit perturba-  
tura, nam mihi cum hominibus his & gratia, &  
necessitudo est, tum causam illam, non homi-  
nes odi. Illud te non arbitror fugere, quin homi-  
nes in dissensione domestica debeant, quamdiu  
civiliter sine armis certetur, honestiorem sequi  
par.

partem; ubi ad bellum, & castra ventum sit, firmiorem; & id melius statuere quod tutius sit. In hac discordia video, Cn. Pompeium, senatum, quique res judicant, secum habiturum; ad Casarem omnes, qui cum timore, aut mala spe vivant, accessuros; exercitum conferendum non esse, omnino sat spatii sit ad considerandas utriusque copias, & ad eligendam partem. Prope oblitus sum, quod maxime fuit scribendum. Scis Appium censorem hic ostenta facere? de signis, & tabulis, de agri modo, de ære alieno acerrime agere? Persuasum est ei, censuram lomentum aut nitrum esse. Errare mihi videtur, nam dum sordes eluere vult, venas sibi omnes, & viscera aperit. Curre per Deos, atque homines, & quamprimum hæc risum veni: legis Scantiniæ iudicium apud Drusum fieri: Appium de tabulis, & signis agere, crede mihi, est properandum. Curio noster sapienter id, quod remisit de stipendio Pompei, fecisse existimatur; ad summam quæris, quid putem futurum? si alteruter eorum ad Parthicum bellum non eat, video magnas impendere discordias: quas ferrum, & vis iudicabit, uterque & anima, & copiis est paratus. Si sine summo periculo fieri possit, magnum, & jucundum tibi fortuna spectaculum parabat. Vale.

## A R G U M E N T U M.

*Pompeium vituperat, Casarem laudat, addit de cupiditate sua conveniendi, & alloquendi Ciceronis, & de itinere ad Alpes.*

XV. M. COELIUS M. T. CICERONI S. D.

**E**quando tu hominem ineptiorem quam tuum Cn. Pompeium, vidisti, qui tantas turbas, qui tam nugax esset, commoritur? ecquem autem Casare nostro acriorem rebus gerendis, eodem in victoria temperantiorem aut legisti, aut audisti? Quid est? nunc tibi nostri milites, qui durissimis, & frigidissimis locis; terribilissima hyeme, bellum ambulando confecerunt, malis orbicularis esse pasti videntur. Quid

iam, inquis, gloriose omnia, si scias, quam sollicitus sum; tum hanc meam gloriam, quæ ad me nihil pertinet, derideas: quæ tibi exponere, nisi coram, non possum: idque celeriter fore spero: nam me, cum expulisset ex Italia Pompeium, constituit ad urbem vocare: id quod iam existimo confectum: nisi maluit Pompeium Brundisii circumfedere. Peream, si minima causa est properandi isto mihi, quod te videre, & omnia intima conferre discipulo, habeo autem quam multa, hui vereor (quod solet fieri) ne cum te videro, omnia obliviscar. Sed tamen quodnam ob scelus iter mihi necessarium retro ad Alpes versus incidit? adeo quod Intemelii in armis sunt: neque de magna causa. Bellienus, verna Demetrii, qui ibi cum præsidio erat, Domitium quendam, nobilem illic Cæsaris hospitem, a contraria factione nummis acceptis comprehendit, & strangulavit: civitas ad arma it, eo nunc cohortibus mihi per nives eundum est. Usquequaq; inquis, se Domitii mali dant. Vellem quidem Venere prognatus tantum animi habuisset in vestro Domitio, quantum ipse catenatus in hoc habuit. Ciceroni F. S. D. Vale.

#### ARGUMENTUM.

*Pulso ex Italia Pompejo, suadet Ciceroni Cælius, ne afflictam fortunam sequatur, consulitque, ut in aliquem locum a bello vacuum se recipiat. Suasio est ab utili contra honestum; nam esse cum Pompejo Resp. videbatur. Rescribit huic Cicero lib. 2. ep. 16.*

XVI. M. COELIUS M. T. CICERONI S. D.

**E**Xanimatus sum tuis litteris, quibus te nihil nisi triste cogitare ostendisti: neque id, quid esset, perscripsisti: neque tamen, quale esset, quod cogitares, aperuisti, has ad te illico litteras scripsi. Per fortunas tuas, Cicero, per liberos te oro, & obsecro, ne quid gravius de salute, & incolumitate tua consulas, nam deos hominesque, amicitiamque nostram testificor, me neque temere tibi prædixisse, neque temere monuisse, sed postquam Cæsarem convenerim, sententiamque ejus, qualis futura esset, parva victoria, cogno-

verim, te certiores fecisse. Si existimas eandem rationem fore Cæsari in dimitten-<sup>dis</sup> advertariis, & conditionibus ferendis, erras; nihil, nisi atrox, & saxum, cogitat, atque etiam loquitur, iratus lenatus exist: his intercessionibus plane incitatus est, non inehercule erit deprecationi locus. Quare, si tibi tu, si filius unicus, si domus, si spes tuæ reliquæ tibi curæ sunt; si aliquid apud te nos, si vir optimus gener tuus valet (quorum fortunas non debes velle conturbare) sequere eam causam, in causas victoria salus nostra est; ne aut odisse, aut relinquere cogamur; aut impiam cupiditatem contra salutem tuam habeamus. Denique illud cogita; quod offensæ fuerit, in ista cunctatione te prius subiisse, nunc te contra victorem facere, quem dubiis rebus lacerare noluiti, & ad eos fugatos accedere, quos resistentes sequi nolueris, summæ stultitiæ est. Vide ne, dum pudet te parum optimatem esse, parum diligenter, quid optimum sit, eligas. Quod si totum tibi persuadere non possum, saltem, dum, quid de Hispanis agamus, scitur, expecta: quas tibi nuncio adventu Cæsaris fore nostras, quam isti spem habeant amissis Hispaniis, nescio. Quod porro tuum consilium sit ad desperatos accedere, non medius fidius reperio hoc, quod tu non dicendo mihi significasti. Cæsar audierat: ac, simulatque, ave, mihi dixit, statim, quid de te audisset, expoluit; negavi me scire: sed tamen ab eo petii, ut ad te litteras mitteret, quibus maxime ad remanendum commoveri posses, me secum in Hispaniam ducit, nam nisi ita faceret, ego prius quam ad urbem accederem, ubicunque esses, ad te percurrissem, & hoc a te præsens contendissem, atque omni vi te retinuissem. Etiam, atque etiam, mi Cicero; cogita, ne te, tuosque omnes funditus evertas, ne te sciens, prudensque eo demittas, unde exitum vides nullum esse. Quod si te aut voces optimatum commoveant, aut nonnullorum hominum insolentiam, & fastidationem ferre non potes; eligas censeo, aliquod oppidum vacuum a bello, dum hæc decernuntur, quæ jam erunt cuncta. Id si feceris, & ego te sapienter fecisse judicabo, & Cæsarem non offendes. Vale.



## ARGUMENTUM.

*Queritur, se Curionis amore, & Appii odio ab optima mente descivisse, & Caesaris partes potius, quam Pompeji secutum esse: cujus rei culpam partim in fortunam, quod in Hispania fuerit, quo tempore Cicero ad Pompejum in Graciam profectus est. partim etiam in Ciceronem ipsum confert; postremo, quid moliat, exponit.*

XVII. M. COELIUS M. T. CICERONI S. D.

**E**Rgo me potius in Hispania fuisse, quam Formiis; tum, cum tu profectus es ad Pompejum? quod utinam aut Ap. Claudius in ista parte, aut C. Curio: cujus amicitia me paulatim in hanc perditam causam imposuit: nam mihi sentio bonam mentem iracundia, & amore ablatam. Tu porro, cum ad te proficiscens, noctu Ariminum venissem, dum mihi pacis mandata das ad Caesarem, & mirificum civem agis, amici officium neglexisti, neque mihi consulisti. Neque hæc dico, quod diffidam huic causæ: sed, crede mihi, perire satius est, quam hos videre. Quod si timor vestræ crudelitatis non esset, ejecti jam pridem hinc essemus; nam hic nunc, præter sœneratores paucos, nec homo, nec ordo quisquam est, nisi Pompejanus; equidem jam effeci, ut maxime plebs, & qui antea noster fuit, populus, vester esset. Cur hoc, inquis? imo, reliqua exspecta: vos invito vincere coegero: irritavi in me Catonem, vos dormitis, nec hæc adhuc mihi videmini intelligere, qua nos pareamus, & qua simus imbecilli, atque hoc nullius præmii spe faciam: sed quod apud me plurimum solet valere, doloris, atque indignitatis causa. Quid istic facitis? prælium exspectatis, quod firmissimum est? vestras copias non novi: nostri valde depugnare, & facile algere, & esurire consuerunt. Vale.

# LIBER IX.

## ARGUMENTUM.

*Adventum cupit Varronis, quod in ejus, librorumque consuetudine omnem spem reposuerit leniendi doloris, quem ex afflicta Republica capiebat.*

I. M. T. C. TERENTIO VARRONI S. D.

**E**X iis litteris, quas Atticus a te missas mihi legi, quid ageres, & ubi esses, cognovi: quando autem te visuri essemus, nihil sane ex eisdem litteris potui suspicari; in spem tamen venio, appropinquare tuum adventum: qui mihi utinam solatio sit: etsi tot, tantisque rebus urgemur, ut nullam allevationem quisquam non stultissimus sperare debeat. Sed tamen aut tu potes me, aut ego te fortasse aliqua re juvare; scito enim, me, posteaquam in urbem venerim, rediisse cum veteribus amicis ( id est cum libris nostris ) in gratiam, etsi non idcirco eorum usum dimiseram; quod iis succenscerem, sed quod eorum me supponebat: videbar enim mihi, cum me in res turbulentissimas, infidelissimis sociis, demissem; præceptis illorum non satis paruisse. Ignoscunt mihi, & revocant in consuetudinem pristinam; teque; quod in ea permanseris, sapientiorē, quam me, dicunt fuisse. Quamobrem, quando placeatis his utor, videor sperare debere, si te viderim, & ea, quæ premant, & ea, quæ impendant, me facile transiturum. Quamobrem, si ve in Tusculano, si ve in Cumano adesse placebit, si ve ( quod minime velim ) Romæ; dummodo simul simus, perficiam profecto, ut id utrique nostrum commodissimum esse videatur. Vale.

*Distius retenta epistola causam exponit. Deinde suadet, sibi que ita statutum affirmat, ut hominum frequentiam vitet, dum gratulatio ob Africanæ victoriæ nuntium deferrescat: suumque iuvanda quoquo modo Reipub. æsidium declarat.*

II. M. T. C. VARRONI S. D.

**C**Aninius, idem tuus, & idem noster, cum ad me nuperverseri venisset, & se postridie mane ad te iturum esse dixisset: dixi, ei me daturum aliquid mane, & ut peteret, rogavi, conscripsi epistolam noctu: nec ille ad me rediit, oblitum credidi; attamen eam ipsam epistolam misissem per meos, nisi audissem ex eodem, postridie te mane e Tusculano exiturum. At tibi repente paucis post diebus, cum minime expectarem, venit ad me Caninius mane; proficisci ad te statim dixit, etsi erat talis illa epistola, præsertim tantis postea novis rebus allatis: tamen perire meam lucubrationem nolui & eam ipsam Caninio dedi, sed cum eo, & homine docto, & amantissimo tui, loquutus ea sum, quæ pertulisse illum ad te existimo, tibi autem idem consilii do, quod mihi metipsi; ut vitemus oculos hominum, si linguas minus facile possumus, qui enim victoria se efferrunt, quasi victos nos intuentur: qui autem victos esse nostros moleste ferunt, nos dolent vivere. Quæres fortasse cur, cum hæc in urbe sint, non absim, quemadmodum tu. Tu enim ipse, qui & me, & alios prudentia vincis, omnia, credo, vidisti: nihil omnino te fefellit. Quis est tam lynceus, qui in tantis tenebris nihil offendat? nusquam incurrat? Ac mihi quidem jam pridem venit in mentem, bellum esse, aliquo exire, ut ea, quæ agebantur hic, quæque dicebantur, nec viderem, nec audirem, sed calumniabar ipse: putabam, qui obviam mihi venisset, ut cuique commodum esset, suspicaturum aut dicturum, etiam, si non suspicaretur. Hic aut metuït, & ea re fugit; aut aliquid cogitat, & habet navem paratam. Denique, levissime qui suspicaretur, & qui fortasse me novisset optime, putaret, me idcirco discedere, quod quosdam homines oculi mei

mei ferre non possent. Hæc ego suspicâns, adhuc Romæ maneo : & tamen λελαθός τοι consuetudo diuturna callum jam obduxit stomacho meo. Habes rationem mei consilii, tibi igitur hæc. Censeo latendum tantisper ibidem, dum detervescas hæc gratulatio, & simul dum audiamus, quemmodum negotium confectum sit : confectum enim esse existimo, magni autem intererit, qui fuerit victoris animus, qui exitus rerum, quamquam, quo me conjectura ducat, habeo; sed expecto tamen, te vero nolo, nisi ipse rumor jam riuus erit factus, ad Bajas venire; erit enim nobis honestius etiam, cum hinc discefferimus, videri venisse in illa loca ploratum potius, quam ratatum. Sed hæc tu melius: modo stet nobis illud, una vivere in studiis nostris, a quibus antea delectationem modo petebamus, nunc vero etiam salutem: non deesse, si quis adhibere volet, non modo ut architectos, verum etiam ut fabros ad ædificandam temp. potius libenter accurrere: sin nemo utetur opera, tamen & scribere, & legere πολιτείας; & si minus in curia, atque in foro, ac in litteris, & libris, ut doctissimi veteres fecerunt, navare reipublicæ, & de moribus, ac legibus quærere. Mihi hæc videntur, tu quid sis acturus, & quid tibi placeat, pręgratum erit, si ad me scripseris.

## A R G U M E N T U M.

*Scribit, se iturum ad Varronem: sed homines reprehensuros dicit, si, cum Respub. sit miserrima, ipsi ab Urbe absint, & in villis otio fruantur; se tamen eorum inscitiam negligere, & in studiis omnino cum Varrone victurum.*

## III. M. T. C. VARRONI S. D.

**E**tsi; quid scriberem, non habebam; tamen Caninio ad se eunti non potui nihil dare, quid ergo potissimum scribam? quod vel le te puto, cito me ad te esse venturum. At si vide, quæso, satisne rectum sit, nos, hoc tanto incendio civitatis, in istis locis esse, dabimus sermonem iis, qui nesciunt, nobis, quocumque in loco simus, eundem cultum, eundem vitam esse Quid refert? tamen in sermonem incide-

mus, valde id, credo, laborandum est, ne cum omnes in omni genere & scelerum, & flagitiorum volutentur, nostra nobiscum, aut inter nos cessatio vituperetur; ego vero, neglecta barbarorum inscitia, te persequar, quamvis enim hæc sint misera, quæ sunt miserrima; tamen artes nostræ nescio quo modo nunc uberiores fructus ferre videntur, quam olim ferebant: sive quia nulla nunc in re alia acquiescimus: sive quod gravitas morbi facit, ut medicinæ egeamus, eaque nunc appareat, cujus vim non sentiebamus, cum valebamus. Sed quid ego hæc ad te, cujus domi nascuntur; γλαύχ' εἰς Ἀθῶνας? nihil scilicet, nisi ut, rescribens aliquid, me expectares, sic igitur facies. Vale.

## A R G U M E N T U M.

*De Varronis adventu ex Diodori philosophi sententia jocatur; nam in libro de Fato Diodori opinionem improbens, Chrysippo assentitur.*

## IV. M. T. C. VARRONI S. D.

Περὶ δωαπτῶν me scito κατὰ Διόδωρον πρῖνεν, quaptopter, si venturus es, scito, necesse esse te venire: sin autem non es, τῶν ἀδωαπτῶν est te venire; nunc vide, utra te κρίτις magis delectet, Χρυσιππείᾳ ne, an hæc, quam noster Diodorus non concquebat. Sed de his etiam rebus, otiosi cum erimus, loquemur, hoc etiam est κατὰ Χρυσιππίου δωαπτόν. De Costio mihi gratum est: nam id etiam Attico mandaram. Tu si minus ad nos, nos accurremus ad te, si hortum in bibliotheca habes, nihil deerit. Vale.

## A R G U M E N T U M.

*Probat & diem, quo conventuri sunt, & Varronis, suumque consilium, quod semel a Casare viſti, ab armis desceſſerint.*

## V. M. T. C. VARRONI S. D.

**M**ihi vero ad nonas bene maturum videtur fore, neque solum propter temp. sed etiam propter anni tempus; quare diem istum probō: itaque eundem ipse sequar. Consilii nostri, ne si  
eos

hos quidem, qui id sequuti non sunt, non pœniteret, nobis pœnitendum putarem, sequuti enim sumus non spem; sed officium: reliquimus autem non officium, sed desperationem. Ita verecundiores fuimus, quam qui se domo non commovebant: saniores, quam qui, amissis opibus domum non reverterunt; sed nihil minus fero, quam severitatem otiosorum: & quoquo modo res se habet, magis illos vereor, qui in bello occiderunt, quam hos curo, quibus non satisfacimus, quia vivimus. Mihi si spatium fuerit in Tusculanum ante nonas veniendi, istuc te videbo: sin minus, persequar in Cumanum; & ante te certiore faciam; ut levatio parata sit. Vale.

## A R G U M E N T U M.

*Nūtiat Casaris adventum; & belli civilis causam in Pcmpejum potius, quam in Casarem confert; Varronem autem laudat, quod se ab armis ad studia, quasi a tempestate in portum contulerit.*

## VI. M. T. C. VARRONI S. D.

**C**Aninius noster me tuis verbis admonuit; ut scriberem ad te, si quid esset quod putarem te scire oportere. Est igitur adventus in expectatione (neque tu id ignoras, sed tamen, cum ille scripsisset, ut opinor, se in Alsienſe venturum, scripserunt ad eum sui, ne id faceret: multos ei molestos fore, ipsamque multis; Ostiæ, videri commodius, eum exire posse, id ego non intelligebam, quid interesset: sed tamen Hirrius mihi dixit, & se ad eum, & Balbum, & Oppium scripsisse, ut ita faceret, homines, ut cognovi, amantes tui. Hoc ego idcirco nosse te volui, ut seires, hospitium tibi ubi parares, vel potius utrobique: quid enim ille factururus, incertum est, & simul ostentavi tibi, me istis esse familiarem, & consiliis eorum interesse; quod ego cur melius, nihil video. NON enim est idem, ferre, si quid ferendum est; & probare, si quid probandum non est, etsi, quid non probeam quidem, nescio, præter initia rerum, nam hæc in voluntate fuerunt, vidi enim (nam tu aberas) nostros amicos cupere bellum; hunc autem non tam cupere, quam

mus, valde id, credo, laborandum est, ne, cum omnes in omni genere & scelerum, & flagitiorum volutentur, nostra nobiscum, aut inter nos cessatio vituperetur; ego vero, neglecta barbarorum inscitia, te persequar, quamvis enim hæc sint misera, quæ sunt miserrima; tamen artes nostræ nescio quo modo nunc uberiores fructus ferre videntur, quam olim ferebant: sive quia nulla nunc in re alia acquiescimus: sive quod gravitas morbi facit, ut medicinæ egeamus, eaque nunc appareat, cujus vim non sentiebamus, cum valebamus. Sed quid ego hæc ad te, cujus domi nascuntur; γλαύκεις Ἀθλώας? nihil scilicet, nisi ut, rescribens aliquid, me expectares, sic igitur facies. Vale.

### ARGUMENTUM.

*De Varronis adventu ex Diodori philosophi sententia jocatur; nam in libro de Fato Diodori opinionem improbens, Chrysippo assentitur.*

#### IV. M. T. C. VARRONI S. D.

Περὶ δωαπτῶν me scito κατὰ Διοδωρον κρινεν, quapropter, si venturus es, scito, necesse esse te venire: sin autem non es, τῶν ἀδωαπτῶ est te venire; nunc vide, utra te κρίνεις magis delectet, Χρυσιπείᾳ ne, an hæc, quam noster Diodorus non concuebat. Sed de his etiam rebus, otiosi cum erimus, loquemur, hoc etiam est κατὰ Χρυσιπτεον δωαλὸν. De Costio mihi gratum est: nam id etiam Attico mandaram. Tu si minus ad nos, nos accurremus ad te, si hortum in bibliotheca habes, nihil deerit. Vale.

### ARGUMENTUM.

*Probat & diem, quo conventuri sunt, & Varronis, suumque consilium, quod semel a Cesare visiti, ab armis descesserint.*

#### V. M. T. C. VARRONI S. D.

**M**ihi vero ad nonas bene maturum videtur fore, neque solum propter temp. sed etiam propter anni tempus; quare diem istum probo: itaque eundem ipse sequar. Consilii nostri, ac si  
eos

hos quidem, qui id sequuti non sunt, non pœniteret, nobis pœnitendum putarem, sequuti enim sumus non spem, sed officium: reliquimus autem non officium, sed desperationem. Ita verecundiores fuimus, quam qui se domo non commovebant: saniores, quam qui, amissis opibus domum non revertèrunt; sed nihil minus fero, quam severitatem otiosorum: & quoquo modo res se habet, magis illos vereor, qui in bello occiderunt, quam hos curo, quibus non satisfacimus, quia vivimus. Mihi si spatium fuerit in Tusculanum ante nonas veniendi, istic te videbo: sin minus, persequar in Cumanum; & ante te certiore faciam, ut levatio parata sit. Vale.

A R G U M E N T U M.

*Nūtiat Casaris adventum; & belli civilis causam in Pompejum pctius, quam in Casarem confert; Varronem autem laudat, quod se ab armis ad studia, quasi a tempestate in portum consulerit.*

VI. M. T. C. VARRONI S. D.

**C**Aninius noster me tuis verbis admonuit, ut scriberem ad te, si quid esset quod putarem te scire oportere. Est igitur adventus in expectatione (neque tu id ignoras, sed tamen, cum ille scripsisset, ut opinor, se in Alsienſe venturum, scripserunt ad eum sui, ne id faceret: multos ei molestos fore, ipsamque multis; Ostiæ, videri commodius, eum exire posse, id ego non intelligebam, quid interesset: sed tamen Hirrius mihi dixit, & se ad eum, & Balbum, & Oppium scripsisse, ut ita faceret, homines, ut cognovi, amantes tui. Hoc ego idcirco nosse te volui, ut seires, hospitium tibi ubi parares, vel potius utrobique: quid enim ille facturus, incertum est, & simul ostentavi tibi, me istis esse familiarem, & consiliis eorum interesse; quod ego cur melius, nihil video. NON enim est idem, ferre, si quid ferendum est; & probare, si quid probandum non est, etsi, quid non probeam quidem, nescio, præter initia rerum, nam hæc in voluntate fuerunt, vidi enim (nam tu aberas) nostros amicos cupere bellum; hunc autem non tam cupere, quam



non timere, ergo hæc consilii fuerunt, reliqua necessaria, vincere autem aut hos, aut illos necesse est. Scio te semper mecum in luctu fuisse, cum videremus, quam illud ingens malum alterutrus, exercitus ex ducum interitu: tum vero, extremum malorum omnium esse civilis belli victoriam; quam quidem ego etiam illorum timebam, ad quos veneramus, crudeliter enim otiosis minabantur: eratque iis & tua invisa voluntas, & mea oratio, nunc vero si essent nostri potiti, valde intemperantes fuissent: erant enim nobis perirati, quasi quicquam de nostra salute decrevissemus, quod non idem illis censuissemus: aut quasi utilius reip. fuerit eos etiam ad bestiarum auxilium confugere, quam vel mori, vel cum spe si non optima, at aliqua tamen, vivere. Ac in perturbata repub. vivimus, quis negat? sed hæc viderint ii, qui nulla sibi subsidia ad omnes vitæ status paraverunt. Huc enim ut venirem, superior longius, quam volui, fluxit oratio. Cum enim te semper magnum hominem duxi, tum quod his tempestatibus es prope solus in portu, fructusque doctrinæ percipis eos, qui maximi sunt, ut ea consideres, eaque tractes, quorum & usus, & delectatio est omnibus istorum & actis, & voluptatibus anteponenda. Equidem hos tuos Tusculanenses dies instar esse vitæ puto: libenterque omnibus omnes opes concesserim, ut mihi liceat, vi nulla interpellante, isto modo vivere, quod nos quoque imitamur, ut possumus, & in nostris studiis libentissime conquiescimus. Quis enim hoc non dederit nobis; ut, cum opera nostra patria sive non possit uti, sive nolit, ad eam vitam revertamur, quam multi docti homines, fortasse non recte, sed tamen multi, etiam reip. præponendam putaverunt? Quæ igitur studia, magnorum hominum sententia, vacationem habent etiam publici muneris; iis, concedente republica, cur non abutamur? Sed plus facio quam Caninius mandavit, is enim, si quid ego scirem, rogarat, quod tu nescires; ego tibi ea narro, quæ tu melius scis, quam ipse, qui narro. Faciam ergo illud, quod rogatus sum, ut eorum, quæ temporis huius sint, quæ tua interesse audiero, ne quid ignores. Vale.

A R.

## A R G U M E N T U M .

*Maturum jam esse ait, ut ab Urbe discedat, & de Caesaris ex Africano bello redeuntis itinere, rumores quosdam nunciat.*

## VII. M. T. C. V A R R O N I S. D.

**C**Oenabam apud Sejam, cum utrique nostrum redditæ sunt a te litteræ. Mihi vero jam maturum videtur; nam, quod ante a te calumniatus sum, indicabo malitiam meam. Volebam prope alicubi esse te, si quid bonæ salutis *σύν το δὲ ἐρχομένῳ*, nunc, quando confecta sunt omnia, dubitandum non est, quin æquis viris; nam, ut audiui de Lúcio Cæsare filio, mecum ipse, *Quid hic mihi faciet patri?* Itaque non desino apud istos, qui nunc dominantur, cœnitare; quid faciam? temporis serviendum est. Sed ridicula missa, præsertim cum sit nihil, quod rideamus.

*Africa terribilis tremet, horrida terra, tumultu.*

Itaque nullum est *ἀποπρωγμὲς*, quod non verear. Sed quod quæris, quando qua, quo, nihil adhuc scimus: istuc ipsum de Baiis; nonnulli dubitant, an per Sardiniam veniat, illud enim adhuc prædium suum non inspexit: nec ullum habet deterius, sed tamen non contemnit, ego omnino magis arbitror per Siciliam: vel jam sciemus: adventat enim Dolabella, cum puto magistrum fore.

*πολλὰ μάθεται πρῆστοις διδασάλλον.*

Sed tamen, si sciam, quid tu constitueris, meum consilium accommodabo potissimum ad tuum, quare exspecto tuas litteras, Vale.

## A R G U M E N T U M .

*Promiserat Varro, quosdam libros se esse in Cicero-  
nis nomine editurum. Cicero nunc admonet  
eum promissi, missis quasi admonitoribus quatuor  
libris Academicis, quos Varroni dicavit.*

## VIII. M. T. C. V A R R O N I S. D.

**E**T si munus flagitare, quamvis quis ostenderit, ne populus quidem solet, nisi concitatus: tamen ego expectatione promissi tui moveor,

ut

ut admoneam te, non ut flagitem. Misi autem ad te quatuor admonitores, non nimis verecundos, nosti enim profecto os ejus adolescentioris Academiæ, ex ea igitur media excitatos misi; qui, metuo, ne te forte flagitent: ego autem mandavi, ut rogarent. Expectabam omnino jamdiu, neque sustinebam, ne ad te prius ipse quid scriberem, quam aliquid accepissem; ut possem te remunerari quam simillimo munere: sed, cum tu tardius faceres, id est (ut ego interpretor) diligentius: teneri non potui, quin conjunctionem studiorum, amorisque nostri, quo possem, litterarum genere declararem. Feci igitur sermonem inter nos habitum in Cūmano, cum esset una Pomponius; tibi dedi parvas Antiochinas, quas a te probari, intellexisse mihi videbar; mihi sumpsi Philonis, puto fore, ut, cum legeris, mireris, id nos loquutos esse inter nos, quod nunquam loquuti sumus: sed nosti morem dialogorum. Posthac autem, mi Varro, quamplurima, si videbitur, & de nobis, & inter nos; sero fortasse, sed superiorum temporum fortuna reip. causam sustineat: hæc ipsi præstare debemus. Atque utinam quietis temporibus, atque aliquo, si non bono, at saltem certo statu civitatis, hæc inter nos studia exercere possemus, quamquam tum quidem vel aliz quæpiam rationes honestas nobis & curas, & actiones darent, nunc autem quid est, sine his cur vivere velimus? mihi vero cum his ipsis vix: his autem detraxis, ne vix quidem. Sed hæc coram, & sæpius. Migrationem, & emptionem feliciter evenire volo, tuumque in ea re consilium probo. Cura, ut valeas.

### ARGUMENTUM.

*Suadet Dolabella gener Ciceronis, ut aut Caesaris partes sequatur, aut in aliquam civitatem a bello vacuum se recipiat, quod idem Cælius fecerat. Vide Epist. 16. l. 8.*

### IX. DOLABELLA M. T. C. S. D.

**S**I vales, gaudeo; & ipse valeo; & Tullia nostra recte valet. Terentia minus belle habuit:  
sed

sed certum scio, iam convaluisse eam; præterea rectissime sunt apud te omnia. Etsi nullo tempore in suspicionem tibi debui venire, partium causa potius, quam tua, tibi suadere, ut te aut cum Cæsare, nobiscumque conjungeres, aut certe in otium referres: præcipue nunc, jam inclinata victoria, ne possum quidem in ullam aliam incidere opinionem, nisi in eam, in qua scilicet tua de re tibi suadere videar, quod pie tacere non possum. Tu autem, mi Cicero sic hæc accipies, ut, sive probabuntur tibi, sive non probabuntur, ab optimo certe animo, ac deditionissimo tibi & cogitata, & scripta esse judices. Animadvertis Cn. Pompejum nec nominis sui, nec rerum gestarum gloria, nec etiam regum aut nationum clientelis, quas ostentare crebro solebat, esse tutum; & hoc etiam, quod infimo cuique contigit, illi non posse contingere, ut honeste effugere possit, pulso Italia, amissis Hispaniis, capto exercitu veterano, circumvallato nunc denique: quod nescio, an ulli unquam nostro acciderit imperatori. Quamobrem quid aut ille sperare possit, aut tu, animum adverte pro tua prudentia, sic enim facillime, quod tibi utilissimum erit, consilii capies. Illud autem a te peto, ut, si iam ille evitaverit hoc periculum, & se abdiderit in classem, tu tuis rebus contulas, & aliquando tibi potius, quam cuivis, sis amicus. Satisfactum est jam a te vel officio, vel familiaritati; satisfactum etiam partibus, & ei reipublicæ, quam tu probabas, reliquum est, ubi nunc est resp. ibi simus potius, quam, dum illam veterem sequimur, simus in nulla. Quare velim, mi jucundissime Cicero, si forte Pompejus, pulsus his quoque locis, rursus alias regiones petere cogatur, ut tu te vel Athenas, vel in quamvis quietam recipias civitatem, quod si eris factururus, velim mihi scribas: ut ego, si ullo modo potero, ad te advolem. Quæcumque de tua dignitate ab imperatore erunt impetranda, qua est humanitate Cæsar, facillimum erit ab eo tibi ipsi impetrare: & meas tamen preces apud eum non minimum auctoritatis habituras puto; erit tuz quoque fidei, & humanitatis curare, ut is tabelarius,

lariue, quem ad te misi, reverti possit ad me,  
& a te mihi litteras referat. Vale.

### ARGUMENTUM.

*Quasi per jocum scribit, inter Niciam, & Vidium se judicem esse constitutum: & item per jocum de P. Syllæ morte quiddam scribit.*

X. M. T. C. DOLABELLÆ S. D.

**N**on sum ausus Salvio nostro nihil ad te litterarum dare nec mehercule habebam, quid scriberem, nisi te a me mirabiliter amari: de quo etiam nihil scribente me, te non dubitare certo scio. Omnino mihi magis literæ sunt expectandæ a te, quam a me tibi, nihil enim Romæ geritur, quod te putem scire curare: nisi forte scire vis, me inter Niciam nostrum, & Vidium, judicem esse, profert alter, ut opinor duobus versiculis expensum Niciæ: alter Aristarchus hos ἑβριζῆς ego, tanquam criticus antiquus, judicaturus sum, utrum sint τῶ ποιντῶ, an περιμβελημδύος, Putote nunc dicere: Oblitusne es igitur fungorum illorum, quos apud Niciam? & ingenium culinarum cum Sophia Septimæ? Quid ergo? tu adeo mihi excussam severitatem veterem putas, ut ne in foro quidem reliquæ pristinæ frontis appareant? sed tamen suavissimum σὺμβόλιον nostrum præstabo integellum; nec committam, ut, si ego cum condemnato, tu restituas: ne habeat Plancus Bursa, apud quem litteras discat. Sed quid ago? cum mihi sit incertum, tranquillo ne sis animo, an, ut in bello, in aliqua majuscula cura, negotiove versere, labor longius. Cum igitur mihi erit exploratum, te libenter esse risurum, scribam ad te pluribus, te tamen hoc scire volo vehementer populum sollicitum fuisse de P. Syllæ morte, antequam certum scierit, nunc quærere cessierunt, quomodo perierit, satis putant se scire, quod sciunt, ego ceteroqui animo æquo fero: unum vereor, ne hasta Cæsaris refrigerit. Vale.

## A R G U M E N T U M.

*Deplorat Tullioli mortem : & in Dolabella sermonibus plurimum sibi ait solatii futurum : quamquam jam eam Dolabella dimiserat ; sed fingendum erat Ciceroni , temporis causa ; cum Dolabella apud Casarem dominantem gratia plurimum valeret .*

## XI. M. T. C. DOLABELLÆ SUO S. D.

**V**El meo ipsius interitu mallem litteras meas desiderares , quam eo casu , quo sum gravissime afflictus : quem ferrem certe moderatius , si te haberem , nam & oratio tua prudens , & amor erga me singularis multum levaret . Sed quoniam brevi tempore , ut opinio nostra est , te sum visurus , ita me affectum offendes , ut multum a te possim juvari , non quo ita sim fractus , ut aut hominem me esse , oblitus sim ; aut fortunæ succumbendum putem : sed tamen hilaritas illa nostra , & suavitas , quæ te præter ceteros delectabat , erepta mihi omnis est : si imitarem tamen , & constantiam , si modo fuit aliquando in nobis , eandem cognosces , quam reliquisti . Quod scribis , prælia te mea causa sustinere : non tam id laboro , ut , si qui mihi obtrecent , a te refurentur ; quam intelligi cupio ( quod certe intelligitur ) me a te amari , quod ut facias , te etiam , atque etiam rogo : ignoscasque brevitati mearum litterarum ; nam & celeriter una futuros nos arbitror , & nondum satis confirmatus sum ad scribendum . Vale .

## A R G U M E N T U M.

*Gratulatur Dolbellæ de Bazarum salubritate , & orationem pro Dejotaro Rege ad Casarem habitam mittit .*

## XII. M. T. C. DOLABELLÆ S. D.

**G**Ratulor Bais nostris , si quidem , ut scribis , salubres repente factæ sunt , nisi forte te amant , & tibi assentantur , & tandem , dum tu ades , sunt oblitæ sui , quod quidem si ita est , minime miror , cælum etiam , & terras viam suam ,

suam, si tibi ita conveniat, dimittere. Oratiunculam pro Dejotaro, quam requirebas, habebam mecum: quod non puraram. Itaque eam tibi misi, velim sic legas, ut causam tenuem, & inopem, nec inscriptione magnopere dignam; sed ego hospiti veteri, & amico munusculum mittere volui levidense crasso filo, cujusmodi ipsius solent esse munera. Tu velim animo sapienti, fortique sis, ut tua moderatio, & gravitas aliorum infamet injuriam. Vale.

## ARGUMENTUM.

*Rogat Dolabellam, ut Suberino, & Planio reditum in patriam conficiat; eosque ita excuset, ut ostendat, casu quodam, & necessitate coactos Pompeji partes in Hispania fuisse.*

### XIII. M. T. C. DOLABELLÆ S. D.

**C** Suberinus Calenus & meus est familiaris, & Leptæ nostri familiarissimi pernecessarius; is cum vitandi belli causa profectus esset in Hispaniam cum M. Varrone ante bellum, ut in ea provincia esset, in qua nemo nostrum, post Afranionis superatum, bellum ullum fore putarat, incidit in ea ipsa mala, quæ summo studio vitaverat: oppressus est enim bello repentino: quod bellum commotum a Scapula, ita postea confirmatum est a Pompejo, ut nulla ratione se ab illa miseria eripere posset. Bademicausa fere est M. Planii Hæredis, qui est item Calenus, Leptæ nostri familiarissimus. Hosce igitur ambos sic tibi commendo, ut majorè cura, studio, sollicitudine animi commendare non possim. Volo ipsorum causa: meque in eo vehementer & amicitia movere, & humanitas. Lepta vero cum ita laboraret, ut ejus fortunæ videantur in discrimen venire; non possum ego non aut proxime, atque ille, aut etiam æque laborare. Quapropter, etsi sæpe expertus sum quantum me amares: tamen sic velim tibi persuadeas, id me in hac re maxime judicaturum. Peto igitur a te, vel, si pateris, oro, ut homines miseros, & fortuna, quam vitare nemo potest, magis, quam culpa, calamitosos,

fos, conserves incolumes; velisque, per te me hoc muneri cum ipsis amicis hominibus, tum municipio Caleno, qui cū mihi magna necessitudo est, tum Leptæ, quem omnibus antepono, dare. Quod dicturus sum, puto equidem non valde ad rem pertinere, sed tamen nihil obest dicere; res familiaris alteri eorum valde exigua est, alteri vix equestris. Quapropter quando his Cæsar vitam sua liberalitate concessit; nec est, quod iis præterea magnopere possit adinvi: reditum, si me tantum amas, quantum certe amas, hominibus confice; in quo nihil est præter viam longam: quam idcirco non fugiunt, ut & vivant cum suis, & moriantur domi. Quod tu enitare, contendasque, vel potius, ut perficias (posse enim te mihi persuasi) vehementer te etiam, atque etiam rogo. Vale.

## A R G U M E N T U M.

*Dolabellam laudibus extollit: quia columnam in foro Cæsari, quasi Deo, erectam evertērat. Vide l. 14. ad Atticum, & Lactantium l. 1. c. 15.*

XIV. M. T. C. DOLABELLÆ COS. S. D.

**E**tsi contentus eram, mi Dolabella, tua gloria, satisque ex ea magnam lætitiā, voluptatemque capiebam: tamen non possum non confiteri, cumulari me maximo gaudio, quod vulgo hominum opinio socium me adscribat tuis laudibus. Neminem conveni (convenio autem quotidie plurimos: sunt enim permulti optimi viri, qui valetudinis causa in hæc loca conveniant; præterea ex municipiis frequentes necessarii mei) quin omnes, cum te summis laudibus ad cælum extulerunt, mihi continuo maximas gratias agant; negant enim, se dubitare, quin tu meis præceptis, & consiliis obtemperans, præstantissimum te civem, & singularem consulem præbeas. Quibus ego quamquam verissime possum respondere, te, quæ facias tuo iudicio, & tua sponte facere, nec cujusquam egere consilios; tamen neque plane assentior, ne imminuam tuam laudem, si omnis a meis consiliis profecta videatur, neque valde nego: sum enim avidior etiam, quam satis est, gloriæ. Est tamen non  
alie-



alienum a dignitate tua, quod ipsi Agamemnoni, regum regi, fuit honestum, habere aliquem in consiliis cupiendis Nestorem, mihi vero gloriosum, te juvenem consulem florere laudibus, quasi alumnum disciplinæ meæ. L. quidem Cæsar, cum ad eum ægrotum Neapolim venissem, quamquam erat oppressus totius corporis doloribus tamen ante quam me plane salutavit. O mi Cicero, inquit, gratulor tibi, cum tantum vales apud Dolabellam, quantum si ego apud sororis filium valerem, jam salvi esse possemus. Dolabellæ vero tuo & gratulor, & gratias ago: quem quidem, post te consulem, solum possumus vere consulem dicere, deinde multa de facto, ac de re gesta: tum nihil magnificentius, nihil præclarius actum unquam, nisi ille reipub. salutaris, atque hæc una vox omnium est. A te autem peto, ut me hanc quasi falsam hereditatem alienæ gloriæ finas cernere, meque aliqua ex parte in societatem tuarum laudum venire patiari, quamquam, mi Dolabella (hæc enim jocatus sum) libentius omnes meas si modo sunt aliquæ meæ laudes, ad te transfuderim, quam aliquam partem exhausserim ex tuis, nam cum te semper tantum dilexerim, quantum tu intelligere potuisti: tum his tuis factis sic incensus sum, ut nihil unquam in amore fuerit ardentius. Nihil est enim (mihi crede) virtute formosius, nihil pulchrius, nihil amabilius. Semper amavi ut scis, M. Brutum, propter ejus summum ingenium, suavissimos mores, singularem probitatem, atque constantiam: tamen idibus Mart. tantum accessit ad amorem, ut mirarer locum fuisse augendi in eo, quod mihi jam pridem cumulatam esse videbatur. Quis erat, qui putaret ad eum amorem, quæ erga te habebam posse aliquid accedere? tantum accessit, ut mihi nunc denique amare videar, antea dilexisse. Quare quid est, quod ego te horter, ut dignitati, & gloriæ servias? proponam tibi claros viros; quod facere solent, qui hortantur? neminem habeo clariorem, quam te ipsum; te imitare oportet, tecum ipse certes, nec licet quidem tibi jam, tantis rebus gestis, non tui similem esse, quod cum ita sit, hortatio non est necessaria, gratulatione magis utendum est,

est, contigit enim tibi, quod haud scio an nemini, ut summa severitas animadversionis non modo non invidiosa, sed etiam popularis esset, & cum bonis omnibus, tum infimo cuique gratissima. Hoc si tibi fortuna quadam contigisset, gratularer felicitati tuæ; sed contigit magnitudine tum animi, tum etiam ingenii, atque consilii, legi enim concionem tuam: nihil illa sapientius, ita pedetentim, & gradatim tum accessus a te ad causam facti, tum recessus, ut res ipsa maturitatem tibi animadvertendi omnium concessu daret. Liberasti igitur & urbem periculo, & civitatem metu: neque solum ad tempus maximam utilitatem attulisti, sed etiam ad exemplum: quo facto intelligere debes, in te repositam esse rempub. tibi que non modo tuendos, sed etiam ornandos esse illos viros, a quibus initium libertatis profectum est. Sed his de rebus coram plura propediem, ut spero. Tu, quoniam rempub. nosque conservas, fac ut diligentissime teipsum, mi Dolabella, custodias. Vale.

## A R G U M E N T U M.

*Duabus Pæti Epistolis respondet: priori, jure se ejus valetudine perturbatum, cujus & amorem in se, & ingenii festivitatem plurimi faciat; posteriori, nihil referre, utrum Romæ sit, an Neapoli, cum Romæ unus natus regantur omnia; itaq; se manere in sententia de domo Neapoli emenda, dicit.*

## XV. M. T. C. PAPIRIO PÆTO S D.

**D**uabus tuis Epistolis respondebo: uni, quam triduo ante acceperam a Zetho; alteri, quam attulerat Phileros tabellarius. Ex prioribus tuis litteris intellexi, pergratam tibi esse curam meam valetudinis tuæ; quam tibi perspectam esse gaudeo: sed, mihi crede, non perinde, ut est reapse, ex litteris perspicere potuisti. Nam cum a satis multis (non enim possum aliter dicere) & coli me videam, & diligere; nemo est illorum omnium mihi te jucundior, nam quod me amas, quod id & jam pridem, & constanter facias, est id quidem magnum, atque haud scio, an maximum, sed tibi

com-

commune cum multis: quod tu ipse tam amandus es, tamque dulcis, tamque in omni genere iucundus, id est proprie tuum. Accedunt non Attici, sed falsiores, quam illi Atticorum, Romani veteres, atque urbani sales, ego autem (existimes licet quod lubet), mirifice capior facetiis, maxime nostratibus, præsertim cum eas videam primum oblitas Latio, tum cum in urbem nostram est infusa peregrinitas: nunc vero etiam braccatis, & transalpinis nationibus, ut nullum veteris leporis vestigium appareat. Itaque te cum video, omnes mihi Granios, omnes Lucilios, vere ut dicam, Crassos quoque, & Lælios videre videor; moriar, si præter te quemquam reliquum habeo, in quo possim imaginem antiquæ & vernaculæ festivitatis agnoscere. Ad hos lepores cum amor erga me tantus accedat, miraris, me tanta perturbatione valetudinis tuæ tam graviter exanimatum fuisse? Quod autem altera Epistola purgas te non dissuasorem mihi emptionis Neapolitanæ fuisse, sed auctorem commemorationis urbanæ: neque ego aliter accepi: intellexi tamen idem, quod his intelligo litteris, non existimasse te, mihi licere, id quod ego arbitrabar, res has non omnino quidem, sed magnam partem relinquere. Catulum mihi narras, & illa tempora: quid simile? ne mihi quidem ipsi tunc placebat, diutius abesse ab Reip. custodia, sedebamus enim in puppi, clavumque tenebamus: nunc autem vix est in sentina locus. An minus multa S. C. futura putas, si ego sum Neapoli? Romæ cum sum, & urgeo forum, S. C. scribuntur apud amatorem tuum, familiarem meum. Et quidem, cum in mentem venit, ponor ad scribendum; & ante audio S. C. in Armeniam, & Syriam esse perlatum, quod in meam sententiam factum esse dicatur, quam omnino mentionem ullam de ea re esse factam. Atque hoc nolim me joculari putes, nam mihi scito jam a regibus ultimis allatas esse litteras, quibus mihi gratias agant, quod se mea sententia reges appellaverim: quos ego non modo reges appellatos, sed omnino natos nesciebam. Quid ergo est? tamen quamdiu hic erit noster hic præfectus moribus, parebo auctoritati tuæ: cum vero aberit,

ad

ad fungos me tuos conferam. Domum si habebō, in denos dies, singulos sumptuariæ legis conferam, sin minus invenero, quod placeat, decrevi habitare apud te, scio enim, me nihil gratius tibi facere posse. Domum Sullanam desperabam jam, ut tibi proxime scripsi, sed tamen non abjeci. Tu, velim, ut scribis, cum fabris eam perspicias, si enim nihil est in parietibus, aut in tecto vitii, cetera mihi probabuntur. Vale.

## A R G U M E N T U M.

*Ostendit primum, nihil a se prætermissum, ut Casarianorum sibi benevolentiam conciliaret: deinde, neque boni civis, neque sapientis hominis officium in se desiderari posse; postremo ad Papirii locutiones respondet.*

## XVI. M. T. C. PAPIRIO PÆTO S. D.

**D**Electaverunt me litteræ tuæ: in quibus primum amavi amorem tuum, qui te ad scribendum incitavit, verentem, ne Silius suum nuntio aliquid mihi sollicitudinis attulisset, de quo & tu mihi antea scripseras, bis quidem eodem exemplo, facile ut intelligerem, te esse commotum: & ego tibi accurate rescripseram, ut quoquomodo, in tali re, atque tempore, aut liberarem te ista cura, aut certe levarem. Sed quando proximis quoque litteris ostendis, quantæ curæ tibi sit ea res, sic, mi Pæte, habeto, quicquid arte fieri potuerit (non enim jam satis est consilio pugnare; artificium quoddam excogitandum est) sed tamen quicquid elaborari, aut effici potuerit ad istorum benevolentiam conciliandam, & colligendam, summo studio me consequutum esse: nec frustra ut arbitror: sic enim color, sic observor ab omnibus iis, qui a Cesare diliguntur, ut ab eis me amari putem; nam, etsi NON facile dijudicatur amor verus, & fictus, nisi aliquid incidat ejusmodi tempus, ut, quasi aurum igne, sic benevolentia fidelis periculo aliquo perspicui possit: cetera sunt signa communia. Sed ego uno utor argumento, quamobrem me ex animo, vereque arbitres diligere quod

quod & nostra fortuna ea est, & illorum, ut si mulandi causa non sit. De illo autem, quem pœnes est omnis potestas, nihil video, quod timeam, nisi quod omnia sunt incerta, cum a jure discessum est: nec præstari quicquam potest, quale futurum sit, quod positum est in alterius voluntate, ne dicam libidine. Sed tamen ejus ipsius nulla re a me offensus est animus, est enim adhibita in ea re ipsa summa a nobis moderatio, ut enim olim arbitrabar esse mentem, libere loqui, cujus opera esset in civitate libertas; sic, ea nunc amissa, nihil loqui, quod offendant aut illius, aut eorum, qui ab illo diliguntur, voluntatem. Effugere autem si velim nonnullorum acute, aut facere dictorum offensionem, fama ingenii mihi est abjicienda; quod si id possem, non recusarem. Sed tamen ipse Cæsar habet peracriter judicium: & ut Servius, frater tuus (quem literatissimum fuisse judico) facile diceret, hic versus Plauti non est, hic est, quod tritas haberet aures notandis generibus poetarum, & consuetudine legendi: sic audio Cæsarem, cum volumina jam confecerit ἀποδιδύμετον, si quid afferatur ad eum pro meo, quod meum non sit, rejicere solere; quod eo nunc magis facit, quia vivunt mecum fere quotidie illius familiares. Incidunt autem in sermone vario multa, quæ fortasse illis, cum dixi, nec illiterata, nec insulsa esse videantur. Hæc ad illum cum reliquis actis perferuntur: ita enim ipse mandavit, sic fit, ut si quid præterea de me audiat, non audiendum putet. Quamobrem Oenomaio tuo nihil utor, etsi posuisti joco versus Attianos, sed quæ est invidia; aut quid nunc mihi invideri potest? Verum fac esse omnia; sic video philosophis placuisse, iis, qui mihi soli videntur vim virtutis tenere; NIHIL esse sapientis præstare, nisi culpam, qua videor mihi dupliciter carere: & quod ea senserim, quæ rectissima fuerunt: & quod, cum viderem, præsidii non satis esse ad ea obtinenda, viribus certandum cum valentioribus non putarim, ergo in officio boni civis certe non sum reprehendendus. Reliquum est, ne quid stulte, ne quid temere dicam, faciamve contra potentes, id

id quoque puto esse sapientis. Cetera vero, quid quisque me dixisse dicat, aut quomodo ille accipiat, aut qua fide mecum vivant ii, qui me assidue colunt, & observant, præstare non possum. Ita fit, ut & superiorum consiliorum conscientia, & præsentis temporis moderatione me consolet, & illam Attii similitudinem non modo jam ad invidiam, sed ad fortunam transferam: quam existimo levem, & imbecillam, ab animo firmo, & gravi tanquam fluctum a saxo frangi oportere. Etenim, cum plena sint monumenta Græcorum, quemadmodum sapientissimi viri regna tulerint vel Athenis, vel Syracusis, cum, servientibus suis civitatibus, fuerint ipsi quodam modo liberi: ego me non putem tueri meum statum sic posse, ut neque offendam animum cuiusquam nec frangam dignitatem meam? Nunc venio ad jocationes tuas: quando tu, secundum OEnomaum Attii, non ut olim solebat, Atellanum, sed, ut nunc fit, mimum introduxisti, quem tu mihi Popilium, quem denarium narras? quam tyrotarichi patinam? facilitate mea ista ferebantur antea: nunc mutata res est. Hinc tium ego, & Dolabella dicendi discipulos habeo: cœnandi magistros, puto enim te audisse (si forte ad vos omnia perferuntur) illos apud me declamitare, me apud illos cœnare. Tu autem, quod mihi bonam copiam ejures, nihil est, cum enim, cum rem augebas, quæsticulis te faciebam attentiores, nunc, cum tam æquo animo bona perdas, non eo sis confilio, ut cum me hospitio recipias, æstimationem te aliquam putes accipere; etiam hæc levior est plaga ab amico, quam a debitore. Nec tamen eas cœnas, quæro, ut magnæ reliquæ fiant, quod erit, magnificum sit, & lautum, memini te mihi Phæneæ cœnam narrare, temperius fiat, cetera eodem modo. Quod si perseveras me ad matris tuæ cœnam vocare; feram id quoque, volo enim videre animum, qui mihi audeat ista, quæ scribis apponere, aut etiam polypum Minjani Jovis similem. Crede mihi, non audebis, ante meum adventum fama vitæ de mea nova laetitia veniet: eam extimesces, neque est, quod in

promulsi de spei ponas aliquid : quam vitam fustuli , solebam enim antea delectari oleis , & lucanicis tuis . Sed quid hæc loquimur ? liceat modo ista venire , tu vero ( volo enim abstergere animi tui metum ) ad tyrotarichum antiquum redi , ego tibi unum sumptum afferam , quod balneum calefacias oportebit : cetera more nostro , superiora illa lusimus . De villa Seliciana & curasti diligenter , & scripsisti facetissime : itaque puto me prætermisurum : salis enim satis est , fannionum parum . Vale .

## A R G U M E N T U M .

*Agros quosdam Caesar militibus divisurus videbatur , ea divisio veritus est Patrus ne ad ipsius agros perveniret : id querenti Cicero respondet .*

## XVII. M. T. C. PAPIRIO PÆTO S. D.

**N**on tu homo ridiculus es , qui , cum Balbus noster apud te fuerit , ex me quæras , quid de istis municipiis , & agris futurum putem ? quasi aut ego quicquam sciam , quod iste nesciat ; aut , si quid aliquando scio , non ex isto soleam scire . Imo vero , si me amas , tu fac , ut sciam , quid de nobis futurum sit , habuisti enim in tua potestate , ex quo vel ex sobrio , vehemente ex ebrio scire posses . Sed ego ista , mi Pæte , non quero : primum quia de lucro prope jam quadriennium vivimus : ( si aut hoc lucrum est , aut hæc vita , superstitem reip. vivere ) deinde , quod scire quoque mihi videor , quid futurum sit , fiet enim quodcumque volent , qui valebunt : valebunt autem semper arma , nobis igitur satis esse debet , quicquid conceditur , hoc si quis pariri non potuit , mori debuit . Veientem quidem agrum , & Capenatem metiuntur , hic non longe abest a Tusculano , nihil tamen timeo : frui dum licet : opto , ut semper liceat , si id minus contigerit : tamen , quando ego , vir fortis , idemque philosophus , vivere pulcherrimum duxi , non possum eum non diligere , cuius beneficio id cona sequutus sum , qui si cupiat esse reip. qualem fortasse & ille vult , & omnes optare debemus : quid faciat , tamen non habet : ita se cum multis colligavit : Sed longius progredior , scribo enim

ad te. Hoc tamen scito, non modo me, qui consiliis non intersum, sed ne ipsum quidem principem scire, quid futurum sit, nos enim illi servimus, ipse temporibus, ita nec ille, quid tempora postulatura sint; nec nos, quid ille cogitet, scire possumus. Hæc tibi antea non rescripsi: non quo cessator esse solerem, præsertim in litteris, sed, cum explorati nihil haberem, nec tibi sollicitudinem ex dubitatione mea, nec spem ex affirmatione afferre volui. Illud tamen adscribam, quod est verissimum, me his temporibus adhuc de isto periculo nihil audisse, tu tamen pro tua sapientia debebis optare optima, cogitare difficillima, ferre quæcumque erunt. Vale.

## A R G U M E N T U M.

*Exponit quibus causis adductus, quasi aperto ludo, suos familiares in eloquentia cæperit exercere. Addit nonnulla per jocum de cœnarum lautitia.*

## XVIII. M. T. C. PAPIRIO PÆTO S. D.

Cum essem otiosus in Tusculano, propterea quod discipulos obviam miseram, ut iidem me quam maxime conciliarent familiari suo; accepi tuas litteras plenissimas suavitatis; ex quibus intellexi, probari tibi meum consilium, quod, ut Dionysius tyrannus, cum Syracusis expulsus esset, Corinthi dicitur ludum aperuisse: sic ego, sublatis iudiciis, amisso regno forensi, ludum quasi habere cæperim. Quid quæris? me quoque delectat consilium, multa enim consequor, primum, id quod maxime nunc opus est, munio me ad hæc tempora, id cuiusmodi sit, nescio; tantum video, nullius adhuc consilia me huic antepone: nisi forte mori melius fuit: in lectulo, fateor: sed non accidit, in acie non fui. Ceteri quidem Pompejus, Lentulus tuus, Scipio, Afranius, fœde perierunt: at Cato præclare. Jam istuc quidem, cum volemus, licebit: demus modo operam, ne tam necesse nobis sit, quam illi fuit: id quod agimus. Ergo hoc primum, sequitur illud: ipse melior fio, primum valetudine, quam, intermissis exercitationibus, amiseram: deinde ipsa illa.



si qua fuit in me, facultas orationis, nisi me ad has exercitationes retulissem, exaruisset. Extremum illud est, quod tu nescio an primum putes: plures jam pavones confeci, quam tu pullos columbinos, tu istuc te Atteriano jure delectato, ege me hic Hirtiano. Veni igitur, si vir es, & discce προαγομέας, quas quaris, etsi sus Minervam. Sed quando, ut video, estimationes tuas vendere non potes, neque ollam denariorum implere: Romam tibi remigrandum est, satius est hic cruditate, quam istuc fame. video te bona perdidisse: spero idem istuc familiares tuos. Actum igitur de te est, nisi provides. Potesmulo isto, quem tibi reliquum dicis esse (quando cantherium comedisti) Romam pervehi. Sella tibi erit in ludo, tanquam hypodidascalo, proxima; eam pulvinus sequetur. Vale.

### ARGUMENTUM.

*Cum scripisset Patus, Balbum tenuiculo apparatus fuisse contentum; joci materiam inde arripit Cicero: idque eum arguit malitiose scripserit, ne majorem apparatus ipse requireret.*

### XIX. M. T. C. PAPIRIO PÆTO S. D.

**T** Amen a malitia non discedis: tenuiculo apparatus significas Balbum fuisse contentum. hoc videris dicere, cum reges tam sint continentes, multo magis consulares esse oportere. Nescis me ab illo omnia expiscatum: recta enim a porta domum meam venisse; neque hoc admiror, quod non ad tuam potius, sed illud, quod nec ad suam, ego autem tribus primis verbis; Quid noster Pætus? At ille adjurans, nusquam se unquam libentius, hoc si verbis assequutus es: aures ad te afferam non minus elegantes; sin autem obsonio; peto a te, ne pluris esse Balbos, quam disertos putes, me quotidie aliud ex alio impedit; sed si me expediero, ut in ista loca venire possim; non commitram, ut refero a me certiore factum putes. Vale.

ARGUMENTUM.

*Jocatur (suo more cum Pato ; Epicureum se ait esse factum ; abiectaque Reip. judiciorumque cura.*

XX. M. T. C. PAPIRIO PÆTO S. D.

**D**upliciter delectatus sum tuis litteris , & quod ipse risi , & quod te intellexi jam posse ridere , me autem a te , ut scurram velitem , malis oneratum esse , non moleste tuli . Illud doleo , in ista loca venire me , ut constiteram , non potuisse , habuisses enim non hospitem , sed contubernalem ; ac quem virum ? non cum , quem tu es solitus promulsidae conficere , integram famem ad ovum affero ; itaque ad alium vitulinum opera perdueitur . Illa mea quæ solebas antea laudare , o hominem facilem ! o hospitem non gravem ! abierunt , nam omnem nostram de repub. curam , cogitationem de dicenda in senatu sententia , commentationem causarum abjecimus : in Epicuri nos , adversarii nostri , castra coniecimus : nec tamen ad hanc insolentiam , sed ad illam tuam lautitiam : veterem , dico , cum in sumptum habebas : etsi nunquam plura prædia habuisti . Proinde te para : cum homine , & edaci tibi res est , & qui jam , aliquid intelligat , ἀπὸ οὐδενος autem homines scis , quam insolentes sint , dediscendæ tibi sunt sportellæ , & artolagani tui . Nos jam ex arcis tantum habemus . ut Verrium tuum , & Camillum ( qua munditia homines ? qua elegantia ; ) vocare sæpius audeamus . Sed vide audaciam , etiam Hirtio cenam dedi , sine pavone tamen , in ea cenæ coquus meus , præter jus fervens , nihil potuit imitari . Hæc igitur est nunc vita nostra , mane salutamus domi , & bonos viros multos , sed tristes , & hos lætos victores : qui me quidem perofficiose , & peramanter observant , ubi salutatio defluit , litteris me involvo , aut scribo , aut lego . Veniunt etiam qui me audiunt , quasi doctum hominem , quia paulosum , quam ipsi , doctior , inde corpori omne tempus datur , patriam eluxi jam & gravius , & diutius , quam ulla mater unicui

filium, sed cura, si me amas, ut valeas: ne ego, te iacente, bona tua comedam, statui enim tibi ne ægroto quidem parcere. Vale.

### ARGUMENTUM.

*Confutat, quod Papirius scripserat, fulmina quædam verborum esse in Ciceronis Epistolis, quæ ipse stulte imitaretur. Confutat & illud, quod negarat, Papirium quemquam fuisse patricium.*

### XXI. M. T. C. PAPIRIO PÆTO S. D.

**A**In tandem? insanire tibi videris, quod imitere verborum meorum, ut scribis, fulmina? tum insanires, si consequi non posses, cum vero etiam vincas, me prius irrideas, quam te, oportet. Quare nihil tibi opus est illud a Trabea, sed potius ἀπόδρῦμα meum. Veruntamen quid tibi ego videor in Epistolis? nonne plebejo sermone agere tecum? nec enim semper eodem modo, quid enim simile habet epistola aut iudicio, aut concioni? quin ipsa iudicia non solemus omnia tractare uno modo, privatas causas, & eas tenues, agimus subtilius: capitis, aut famæ, scilicet ornatus, Epistolas vero quotidianis verbis texere solemus. Sed tamen, mi Pæte, qui tibi venit in mentem negare, Papirium quemquam unquam nisi plebejum fuisse? fuerunt enim patricii minorum gentium: quorum princeps L. Papirius Mugillanus, qui consul cum L. Sempronio Atratinio fuit, cum antea censor cum eodem fuisset, annis post R. C. ccxii. sed tum Papirii dicebamini. Post hunc xiiii. fuerunt, sella curuli, ante L. Papirium Crassum, qui primus Papirius est vocari desitus, is dictator cum L. Papirio Cursorẽ magistro equitum factus est, annis post R. C. cccxv. & quadriennio post consul cum C. Duillio. Hunc sequutus est Cursor, homo valde honoratus: deinde L. Maso adilitus, inde multi Massones: quorum quidem tu omnium patriciorum imagines habeas volo, deinde Carbores, & Turdi insequuntur, hi plebeji fuerunt: quos contempnas censeo, nam præter hunc Cn. Carbonem, quem Damasippus occidit, civis e rep. Carbonum nemo fuit. Co-

gnovimus Cn. Carbonem, & ejus fratrem scura-  
ram: quid his improbius? De hoc amico meo  
Rubriæ filio, nihil dico; tres illi fratres fue-  
re, C. Cn. M. Carboes Marcus, P. Flaccus accusante  
condemnatus, fur magnus ex Sicilia. Cajus,  
accusante L. Crasso, cantharidas sumplisse dicitur,  
is & tribunus plebis seditiosus, & P.  
Africano vim attulisse existimatus est, hoc ve-  
ro, qui Lilybæi a Pompejo nostro interfectus  
est, improbius nemo (meo judicio) fuit, jam  
pater ejus accusatus a M. Antonio, sutorio atra-  
mento absolutus putatur. Quare ad patres cen-  
seo revertare, plebei quam fuerint importuni,  
vides. Vale.

## A R G U M E N T U M.

*Disputat pro Stoicis de libertate loquendi; quos  
tamen ait se non imitari.*

## XXII. M. T. C. PAPIRIOPÆTO S. D.

**A** Mo verecundiam, vel potius libertatem  
loquendi, atque hoc Zenoni placuit, ho-  
mini mehercule acuto: etsi Academix nostræ  
cum eo magna rixa est, sed, ut dico, placeat  
Stoicis suo quamque rem nomine appellare,  
sic enim differunt, nihil esse obscenum, ni-  
hil turpe dictu: nam si quod sit in obscœnita-  
te flagitium, id aut in re esse, aut in verbo;  
nihil esse tertium, in re non est: itaque non  
modo in comœdiis res ipsa narratur, ut ille  
in Demiurgo modo, forte nosti canti-  
cum: meministi Roscium.) Ita me destituit nu-  
dum: totus est sermo verbis rectus, re impuden-  
tior; sed etiam in tragœdiis, quid est enim il-  
lud? Quæ mulier una? quid, inquam, est? U-  
surpata duplex cubile, quid illud? Pheræ hic  
cubile mire est ausus, quid est? Virginem me  
quondam invitam per vim violat. Jupiter bo-  
nè, violat? Atqui idem significat, sed alterum  
nemo tulisset. Vides igitur, cum eadem res  
sit, quia verba non sint, nihil videri turpe,  
ergo in re non est, multo minus in verbis, si  
enim, quod verbo significatur, id turpe non  
est; verbum, quod significat, turpe esse non  
potest. Anum appellas alieno nomine; cur

non suo potius? si turpe est, ne alieno quidem; si non est, suo potius. Caudam antiqui penem vocabant, ex quo est propter similitudinem peniculus: at hodie penis est in obscenis, at vero Piso ille Frugi in annalibus suis queritur, adolescentes peni deditos esse, quod tu in Epistola appellas suo nomine, ille rectius penem, sed quia multi, factum est tam obscenum, quam id verbum, quo tu usus es. Quid, quod vulgo dicitur, cum nos te volumus convenire, num obscenum est? Memiri in senatu disertum consularem ita eloqui. Hanc culpam majorem, an illam dicam? Potuit obscenius? non, inquis; non enim ita sensit, non ergo in verbo est, docui autem in re non esse: nusquam igitur est. Liberis dare operam, quam honeste dicitur? etiam patres rogans filios: ejus operæ nomen non audent dicere. Socratem fidibus docuit nobilissimus fidicen. Is Connus vocitatus est, num id obscenum putas? cum loquimur, termini, nihil flagitii dicimus; at, cum bini, obscenum est. Græcis quidem, inquit, nihil est ergo in verbo; quando & ego Græce scio, & tamen tibi dico, bini: idque tu facis, quasi ego Græce, non Latine dixerim. Ruta, & menta, recte utrumque, volo mentam pusillam ita appellare, ut rutulam; non licet. Bella testoriosa dicis: dic ergo etiam pavimenta isto modo: non potes. Vides igitur nihil esse: nisi ineptias, turpitudinem nec in verbo esse, nec in re, itaque nusquam esse. Ergo in verbis honestis obscena ponimus, quid enim? non honestum verbum est divisio? at inest obscenum, cui respondet intercapedo, num hæc ergo obscena sunt? nos autem ridicule, si dicimus. ille patrem strangulavit, honorem non præsumimus de Aurelia aliquid, aut Lollia, honos præfandus. est. Et quidem jam non etiam obscena verba pro obscenis sunt, batuit, inquit, impudenter: desit, multo impudentius; atqui neutrum est obscenum. **STULTORUM** plena sunt omnia. Testes, verbum honestissimum in judicio, alio loco non nimis, at honesti Colei Lanuvini, Cliternini non honesti. Quid ipsa res modo honesta, modo turpis, suppetit,

dit, flagitium est: jam erit nudus in balneo, non reprehendes. Habes scholam Stoicam, & σοφὸς ἰσχυρὸς μὲν ἵκται quam multa ex uno verbo tuo; Te adversus me omnia audere gratum est, ego servo, & servabo (sic enim assuevi) Platonis verecundiam. Itaque tectis verbis ea ad te scripsi, quæ apertissimis agunt Stoici, sed illi etiam crepitus ajunt æque liberos, ac ructus esse oportere, honorem igitur Kalendis Martiis. Tu me diliges, & valebis.

## A R G U M E N T U M.

*Pronuntiat Peto adventum suum, quamquam enim audierit cum pedibus laborare, se tamen putare ait, coquum illius articulari morbo non impediri, quominus cœnam possit apparare.*

XXIII. M. T. C. PAPIRIO PÆTO S. D.

**H**eri veni in Cumanum: cras ad te fortasse: sed, cum certum sciam, faciam te paulo ante certiores, erſi M. Ceparius, cum mihi in sylva Gallinaria obviam venisset, quæsissemque, quid ageres, dixit, te in lecto esse, quod ex pedibus laborares, tuli scilicet moleſte, ut debui: sed tamen constitui ad te venire, ut & viderem te, & viſerem, & cœnarem etiam, non enim arbitror, coquum etiam te arthriticum habere. Exspecta igitur hospitem cum minime edacem, tum inimicum cœnis sumptuosius. Vale.

## A R G U M E N T U M.

*Rufum a Peto commendatum ait sibi curæ etiam atque etiam fore. Dein monet ut omnino ad cœnas, & conviſtum amicorum redeat, Concludit. nihil sibi esse Repub. carius.*

XXIV. M. T. C. PAPIRIO PÆTO S. D.

**R**ufum istum, amicum tuum, de quo iterum jam ad me scribis, adjuvarem quantum possem, etiam si ab eo læsus essem, cum te tantopere viderem ejus causa laborare: cum vero & ex tuis litteris, & illius ad me

missis intelligam, & judicem magnæ curæ ei salutem meam fuisse, non possum ei non amicus esse: neque solum tua commendatione, quæ apud me, ut debet, valet plurimum, sed etiam voluntate, ac judicio meo; volo enim, te scire, mi Pate, initium mihi suspicionis, & cautionis & diligentia fuisse litterarum tuarum, quibus litteris congruentes fuerunt aliæ postea multorum: nam & Aquini, & Fabrateria consilia sunt inita de me, quæ te video inaudisse: & quasi divinarent, quam his molestus essem futurus, nihil aliud egerunt, nisi, me ut opprimerent, quod ego non suspicans, incautior fuisset, nisi a te admonitus essem. Quamobrem iste tuus amicus apud me commendatione non eget, utinam ea fortuna reipub. sit, ut ille me quam gratissimum possit cognoscere. Sed hæc hæc. Te ad cœnas itare desiste, moleste fero, magna enim te delectatione, & voluptate privasti (deinde etiam vereor (licet enim verum dicere) ne, nescio quid illud quod solebas; dediskas, & obliviscare cœnulas facere; nam, si tum, cum habebas, quos imitare, non multum proficiebas; quid nunc te facturum putem? Spuria quidem, cum ei rem demonstrassem, & vitam tuam superiorem exposuissem, magnum periculum summæ reip. demonstrabat, nisi ad superiorem consuetudinem, tum, cum favonius flaret, revertisses: hoc tempore ferri posse, si forte tu frigus ferre non posses. Sed mehercule, mi Pate, extra jocum, moneo te, quod pertinere ad beate vivendum arbitror, ut cum viris bonis, jucundis, amantibus tui vivas, nihil est aptius vitæ, nihil ad beate vivendum accommodatius, nec id ad voluptatem refero, sed ad communitatem vitæ, atque victus remissionemque animorum, quæ maxime sermone efficitur familiari, qui est in conviviiis dulcissimus: ut sapientius nostri, quam Græci; illi συμποσία, aut συνέστινα, idest, comperationes, aut concenationes: nos convivia; quod tum maxime simul vivitur. Vides, ut te philosophando revocare coner ad cœnas? Cura, ut valeas; id foris cœnitando facile consequere. Sed cave, si me amas, existimes me, quod jocosus

sius scribam abjecisse curant reip. Sic tibi, mi Pate, persuade, me dies, & noctes nihil aliud agere, nihil curare, nisi ut mei cives salvi; liberi que sint, nullum locum prætermitto inveniendi, agendi, providendi, hoc denique animo sum, ut, si in hac cura, atque administratione vita mihi ponenda sit, præclare actum mecum putem. Etiam atque etiam Vale.

## A R G U M E N T U M.

*Scripta hanc epistolam ante bellum civile, cum esset in Sicilia Proconsul. Cavillatur in eo, quod sibi Papius præcepta de re militari litteris tradiderat. Dein M. Fabium commendat.*

XXV. M. T. C. IMP. PAPIRIO PÆTO S. D.

**S**uum me ducem litteræ tuæ reddidere, planè nesciebam, te tam peritum esse rei militaris. Pyrrhi te libros, & Cynæ video lætasse, itaque obtemperare cogito præceptis tuis, hoc amplius navicularum habere aliquid in ora maritima, contra equitem Parthum negant ullam armaturam meliorem inveniri posse. Sed quid ludimus? nescis, quocum imperatore tibi negotium sit. *Κόρη πηδεται*, quam contriveram legendo, totam in hoc imperio explicavi. Sed jocabimur alias coram, & ut spero, brevi; nunc ades ad imperandum vel ad parendum potius; sic enim antiqui loquebantur. Cum M. Fabio (quod scitè te arbitror) summus mihi est usus, valdeque eum diligo, cum propter summam probitatem ejus, ac singularem modestiam tum quod in illis controversiis, quas habeo cum tuis combibonibus, Apicureis, optima opera ejus uti soleo. Is cum ad me Laodiceam venisset, mecumque cum ego esse vellem, repente percussus est atrocissimis litteris; in quibus scriptum erat, fundum Herculanensem a Q. Fabio fratre proscriptum esse, qui fundus cum eo communibus esset. Id M. Fabius pergravidè tulit; existimavitque, fratrem suum, hominem non sapientem, impulsu inimicorum suorum eo progressum esse. Nunc, si me amas, mi Pate, negotium totum suscipe, molestia Fabium



bera ; auctoritate tua nobis opus est , & consilio , & etiam gratia , nolī pati litigare fratres , & judiciis turpibus conflictari . Machonem , & Pollionem inimicos habet Fabius , quid multa ? non nehercule tam perscribere possum , quam mihi gratum feceris , si otiosum Fabium reddideris . id ille in te positum esse putat , mihi que persuadet . Vale .

## A R G U M E N T U M .

*Descriptio & excusatio cœnæ hilarioris , præsertim accumbente Cytheride meretrice mœnæ .*

## XXVI. M. T. C. PAPIRIO PÆTO S. D.

**A** Ccubueram hora nona , cum ad te harum exemplum in codicillis exaravi . Dices , ubi ? Apud Volumnium Eutrapelum ; & quidem supra me Atticus , infra Verrius , familiares cui . Miraris tam exhilaratam esse severitatem nostram ? quid ergo faciam ? te consulo , qui philosophum audis , angar ? excruciemne me ? quid assequar ? deinde quem ad finem ? Vivas , inquis , in litteris , an quicquam me aliud agere censes ? haud possem vivere , nisi in litteris viverem , sed est earum etiam non satietas ; sed quidam modus , a quibus cum discessi , etsi minimum mihi est in cœna , quod tu unum *ῥίσημα* Dioni Philosopho posuisti : tamen quid potius faciam , prius , quam me dormitum conferam , non reperio . Audi reliqua . Infra Eutrapelum Cytheris accubuit , in eo igitur , inquis , convivio Cicero ille . Quem adspectabant , cuius ob os Grafi ora obvertebant sua ? Non mehercule suspicatus sum illam affore ; sed tamen ne Aristippus quidem ille Socraticus erubuit , cum esset objectum , habere cum Laïda : Habeo , inquit , non habeor a Laïde : Græce hoc melius , tu , si voles , interpretabere , me vero nihil istorum ne juvenem quidem movit unquam , ne nunc senem , convivio delector , ibi loquer aliquid , quod in solum , ut dicitur : & gemitum etiam in risus maximos transfero . An tu id melius , qui etiam philosophum irriseris ? cum ille , si quis quid quæreret , dixisset cœnam te quærere a mane dixeris ? Ille Baro te putabar quæsciturum ,  
unum

unum cœlum esset, an innumerabilia, quid ad te? at hercule cœna nunquid ad te? ibi præfertim; sic igitur vivitur: quotidie aliquid legitur; aut scribitur: deinde, ne amicis nihil tribuamus, epulamur una non modo non contra legem, si ulla nunc lex est, sed etiam intra legem, & quidem aliquanto. Quare nihil est, quod adventum nostrum extimescas, non multi cibi hospitem accipies, sed multi joci. Vale.



## LIBER X.

## ARGUMENTUM.

*Invohitur in Antonii immoderatam potentiam, & Plancum, Transalpinam Galliam, quam ultimam Cæcero Philippicarum lib. 5. vocat, administrantem hortatur, ut in Remp. omni cogitatione, studioque incumbat. Postremo agit gratias de Furnio honorifice tractato.*

I. M. T. C. C. MUNATIO PLANCO IMP.  
COS. DES. S. D.

**E**T abfui, proficiscens in Græciam: & postea quam de medio cursu reip. sum voce revocatus, nunquam per M. Antonium quietus fui: cujus tanta est non insolentia, (nam id quidem vulgare vitium est) sed immanitas, non modo ut vocem, sed ne vultum quidem liberum possit ferre cujusquam. Itaque mihi maximæ curæ est, non de mea quidem vîta, cui satisfeci vel ætate, vel factis, vel (si quid etiam hoc ad rem pertrinet) gloria: sed me patria sollicitat, in primisque, mi Plance, exspectatio consulatus tui: quæ ita longa est, ut optandum sit: ut possimus ad id tempus reip. spiritum ducere. Quæ potest enim spes esse in ea rep. in qua hominis impotentissimi, atque intemperantissimi armis oppressa sunt omnia? & in quâ nec senatus, nec populus vim habet ullam? nec leges ullæ sunt, nec judicia, nec omnino simulacrum aliquod, aut vestigium civitatis. Sed, quando acta omnia mittet  
ad

promulsi de spei ponas aliquid : quam totam sustuli , solebam enim antea delectari oleis , & lucanicis tuis . Sed quid hæc loquimur ? liceat modo isto venire , tu vero ( volo enim abstergere animi tui metum ) ad tyrotarichum antiquum redi , ego tibi unum sumptum afferam , quod balneum calefacias oportebit : cetera more nostro , superiora illa lusimus . De villa Seliciana & curasti diligenter , & scripsisti facetissime : itaque puto me prætermisurum : salis enim satis est , fannionum parum . Vale .

## A R G U M E N T U M .

*Agros quosdam Caesar militibus divisurus videbatur , ea divisio veritus est Patrus ne ad ipsius agros perveniret : id querenti Cicero respondet .*

## XVII. M. T. C. PAPIRIO PÆTO S. D.

**N**on tu homo ridiculus es , qui , cum Balbus noster apud te fuerit , ex me quæras , quid de istis municipiis , & agris futurum putem ? quasi aut ego quicquam sciam , quod iste nesciat ; aut , si quid aliquando scio , non ex isto soleam scire . Imo vero , si me amas , tu fac , ut sciam , quid de nobis futurum sit , habuisti enim in tua potestate , ex quo vel ex sebricio , vel certe ex ebrio scire posses . Sed ego ista , mi Pæte , non quæro : primum quia de lucro prope jam quadriennium vivimus : ( si aut hoc lucrum est , aut hæc vita , superstitem resp. vivere ) deinde , quod scire quoque mihi videor , quid futurum sit , fiet enim quodcumque volent , qui valebunt valebunt autem semper arma , nobis igitur satis esse debet , quicquid conceditur , hoc si quis parari non potuit , mori debuit . Vejentem quidem agrum , & Capenatem metiuntur , hic non longe abest a Tusculano , nihil tamen timeo : frui dum licet ; opto , ut semper liceat , si id minus contigerit : tamen , quando ego , vir fortis , idemque philosophus , vivere pulcherrimum duxi , non possum eum non diligere , cujus beneficio laconæ sequutus sum , qui si cupiat esse resp. qualem fortasse & ille vult , & omnes optare debemus : quid faciat , tamen non habet : ita se cum mulcis colligavit : Sed longius progredior , scribo enim

ad

ad te. Hoc tamen scito, non modo me, qui consiliis non intersum, sed ne ipsum quidem principem scire, quid futurum sit, nos enim illi servimus, ipse temporibus, ita nec ille, quid tempora postulatura sint; nec nos, quid ille cogitet, scire possumus. Hæc tibi antea non rescripsi: non quo cessator esse solum, præsertim in litteris, sed, cum explorati nihil haberem, nec tibi sollicitudinem ex dubitatione mea, nec spem ex affirmatione afferre volui. Illud tamen adscribam, quod est verissimum, me his temporibus adhuc de isto periculo nihil audisse, tu tamen pro tua sapientia debebis optare optima, cogitare difficillima, ferre quæcumque erunt. Vale.

## A R G U M E N T U M.

*Exponit quibus causis adductus, quasi aperto ludo, suos familiares in eloquentia cæperit exercere. Addit nonnulla per jocum de cenarum lautitia.*

## XVIII. M. T. C. PAPIRIO PÆTO S. D.

Cum essem otiosus in Tusculano, propterea quod discipulos obviam miseram, ut iidem me quam maxime conciliarent familiari suo; accepi tuas litteras plenissimas suavitatis; ex quibus intellexi, probari tibi meum consilium, quod, ut Dionysius tyrannus, cum Syracusis expulsus esset; Corinthi dicitur ludum aperuisse: sic ego, sublatiis judiciis, amisso regno forensi, ludum quasi habere cæperim. Quid quæris? me quoque delectat consilium, multa enim consequor, primum, id quod maxime nunc opus est, munio me ad hæc tempora, id cuiusmodi sit, nescio; tantum video; nullius adhuc consilia me huic antepone: nisi forte mori melius fuit: in lectulo, fateor: sed non accidit, in acie non fui. Ceteri quidem Pompejus, Lentulus avus, Scipio, Afranius, scæde perierunt: ac Cato præclare. Jam istuc quidem, cum volemus, licebit: demus modo operam, ne tam necesse nobis sit, quam illi fuit: id quod agimus. Ergo hoc primum, sequitur illud: ipse melior homo, primum valetudine, quam, intermissis exercitationibus, amiseram: deinde ipsa illa,

si qua fuit in me, facultas orationis, nisi me ad has exercitationes retulissem, exaruisset. Extremum illud est, quod tu nescio an primum putes: plures jam pavones confeci, quam tu pullos columbinos, tu istuc te Atteriano jure delectato, ege me hic Hirtiano. Veni igitur, si vir es, & discce προαγομένας, quas quæris, etsi sus Minervam. Sed quando, ut video, estimationes tuas vendere non potes, neque ollam denariorum implere: Romam tibi remigrandum est, satius est hic cruditate, quam istuc fame. video te bona perdidisse: spero idem istuc familiares tuos. Actum igitur de te est, nisi provides. Potes mulo isto, quem tibi reliquum dicis esse (quando cantherium comedisti) Romam pervehi. Sella tibi erit in ludo, tanquam hypodidascalo, proxima; eam pulvinus sequetur. Vale.

### ARGUMENTUM.

*Cum scripisset Patus, Balbum tenuiculo apparatus fuisse contentum; joci materiam inde arripit Cicero: idque eum arguit malitiose scripisse, ne majorem apparatus ipse requireret.*

### XIX. M. T. C. PAPIRIO PÆTO S. D.

**T** Amen a malitia non discedis: tenuiculo apparatus significas Balbum fuisse contentum. hoc videris dicere, cum reges tam sint continentes, multo magis consulares esse oportere. Nescis me ab illo omnia expiscatum: recta enim a porta domum meam venisse; neque hoc admiror, quod non ad tuam potius, sed illud, quod nec ad suam, ego autem tribus primis verbis; Quid noster Pætus? At ille adjurans, nusquam se unquam libentius, hoc si verbis assequutus es: aures ad te afferam non minus elegantes: sin autem obsonio; peto a te, ne pluris esse Balbos, quam disertos putes, me quotidie aliud ex alio impedit; sed si me expediero, ut in ista loca venire possim; non committam, ut te sero a me certiorum factum putes. Vale.

## ARGUMENTUM.

*Jocatur suo more cum Pato ; Epicureum se ait esse factum ; abiectaque Reip. judiciorumque cura.*

XX. M. T. C. PAPIRIO PÆTO S. D.

**D**upliciter delectatus sum tuis litteris , & quod ipse risi , & quod te intellexi jam posse ridere , me autem a te , ut scurram velitem , malis oneratum esse , non moleste tuli . Illud doleo , in ista loca venire me , ut constiteram , non potuisse , habuisses enim non hospitem , sed contubernalem ; at quem virum ? non cum , quem tu es solitus promulsidae conficere , integram famem ad ovum affero ; itaque ad alium vitulinum opera perducitur . Illa mea quæ solebas antea laudare , o hominem facilem ! o hospitem non gravem ! abierunt , nam omnem nostram de repub. curam , cogitationem de dicenda in senatu sententia , commentationem causarum abjecimus : in Epicuri nos , adversarii nostri , castra coniecimus : nec tamen ad hanc insolentiam , sed ad illam tuam lautitiam : veterem , dico , cum in sumptum habebas : etsi nunquam plura prædia habuisti . Proinde te para : cum homine , & edaci tibi res est , & qui jam , aliquid intelligat , ἀντιόδῳμα autem homines scis , quam insolentes sint , dediscendæ tibi sunt sportellæ , & artolagani tui . Nos jam ex areis tantum habemus . ut Verrium tuum , & Camillum ( qua mundicia homines ? qua elegancia ; ) vocare sæpius audeamus . Sed vide audaciam , etiam Hirtio cœnam dedi , sine pavone tamen , in ea cœna coquus meus , præter jus fervens , nihil potuit imitari . Hæc igitur est nunc vita nostra , mane salutamus domi , & bonos viros multos , sed tristes , & hos latos victores : qui me quidem perofficiose , & peramanter observant , ubi salutatio desinit , litteris me involvo , aut scribo , aut lego . Veniunt etiam qui me audiunt , quasi doctum hominem , quia paulosum , quam ipsi , doctior , inde corpori omne tempus datur , patriam eluxi jam & gravius , & diutius , quam ulla mater unicum

236. EPIST. FAMIL.  
filium, sed cura, si me amas, ut valeas: ne  
ego, te jacentem, bona tua comedam, statui  
enim tibi ne ægroto quidem parcere. Vale.

ARGUMENTUM.

*Confutat, quod Papirius scripserat, fulmina quæ-  
dam verborum esse in Ciceronis Epistolis, quæ  
ipse stulte imitaretur. Confutat & illud, quod  
negarat, Papirium quemquam fuisse patricium.*

XXI. M. T. C. PAPIRIO PÆTO S. D.

**A**In tandem? insanire tibi videris, quod  
imitere verborum meorum, ut scribis, ful-  
mina? tum insanires, si consequi non posses,  
cum vero etiam vincas, me prius irrideas,  
quam te, oportet. Quare nihil tibi opus est il-  
lud a Trabea, sed potius ἀποφθίγμα meum.  
Veruntamen quid tibi ego videor in Epistolis?  
nonne plebejo sermone agere tecum? nec enim  
semper eodem modo, quid enim simile habet  
epistola aut iudicio, aut concioni? quin ipsa ju-  
dicia non solemus omnia tractare uno modo,  
privatas causas, & eas tenues, agimus subtili-  
us: capitis, aut famæ, scilicet ornatius, Epi-  
stolas vero quotidianis verbis texere, solemus.  
Sed tamen, mi Pæte, qui tibi venit in men-  
tem negare, Papirium quemquam unquam nisi  
plebejum fuisse? fuerunt enim patricii mino-  
rum gentium: quorum princeps L. Papirius Mu-  
gillanus, qui consul cum L. Sempronio Atra-  
tino fuit, cum antea censor cum eodem fuis-  
set, annis post R. C. ccxii. sed tum Papirii di-  
cebamini. Post hunc xiii. fuerunt, sella curu-  
li, ante L. Papirium Crassum, qui primus Pa-  
pirius est vocari desitus, is dictator cum L. Pa-  
pirio Cursore magistro equitum factus est, annis  
post R. C. cccxv. & quadriennio post consul  
cum C. Duillio. Hunc sequutus est Cursor, ho-  
mò valde honoratus: deinde L. Maso adiliti-  
us, inde multi Masones: quorum quidem tu  
omnium patriciorum imagines haberas volo, de-  
inde Carbones, & Turdi insequuntur, hi ple-  
beji fuerunt: quos contempnas censeo, nam præ-  
ter hunc Cn. Carbonem, quem Damasippus oc-  
cidit, civis & rep. Carbonum nemo fuit. Co-

gno-

novimus Cn. Carbonem, & ejus fratrem scuram: quid his improbius? De hoc amico meo, Rubriæ filio, nihil dico; tres illi fratres fuerunt, C. Cn. M. Carbones Marcus, P. Flaccus accusante condemnatus, fur magnus ex Sicilia. Cajus, accusante L. Crasso, cantharidas sumplisse dicitur, is & tribunus plebis seditiosus, & P. Africano vim attulisse existimatus est, hoc vero, qui Lilybæi a Pompejo nostro interfectus est, improbius nemo (meo judicio) fuit, jam pater ejus accusatus a M. Antonio, sutorio atramento absolutus putatur. Quare ad patres cenæ seo revertare, plebei quam fuerint importuni, vides. Vale.

## A R G U M E N T U M.

*Disputat pro Stoicis de libertate loquendi; quos tamen ait se non imitari.*

## XXII. M. T. C. PAPIRIOPÆTO S. D.

**A** Mo verecundiam, vel potius libertatem loquendi, atque hoc Zenoni placuit, h. e. mihi mehercule acuto: etsi Academia nostra cum eo magna rixa est, sed, ut dico, placeat Stoicis suo quamque rem nomine appellare, sic enim differunt, nihil esse obscœnum, nihil turpe dictum: nam si quod sit in obscœnitate flagitium, id aut in re esse, aut in verbo, nihil esse tertium, in re non est: itaque non modo in comœdiis res ipsa narratur, ut ille in Demiurgo modo, forte nosti canticum: meministi Roscium. Ita me destituit nudum: totus est sermo verbis rectus, re impudentior; sed etiam in tragœdiis, quid est enim illud? Quæ mulier una? quid, inquam, est? Ursurpata duplex cubile, quid illud? Pheræ hic cubile mire est ausus, quid est? Virginem me quondam invitam per vim violat. Jupiter bone, violat? Atqui idem significat, sed alterum nemo tulisset. Vides igitur, cum eadem res sit, quia verba non sint, nihil videri turpe, ergo in re non est, multo minus in verbis, si enim, quod verbo significatur, id turpe non est; verbum, quod significat, turpe esse non potest. Anum appellas alieno nomine; cur



non suo potius? si turpe est, ne alieno quidem; si non est, suo potius. Caudam antiqui penem vocabant, ex quo est propter similitudinem peniculus: at hodie penis est in obscœnis, at vero Piso ille Frugi in annalibus suis queritur, adolescentes peni deditos esse, quod tu in Epistola appellas suo nomine, ille testatur penem, sed quia multi, factum est tam obscœnum, quam id verbum, quo tu usus es. Quid, quod vulgo dicitur, cum nos te volumus convenire, num obscœnum est? Memiri in senatu disertum consularem ita eloqui. Hanc culpam majorem, an illam dicam? Potuit obscœnius? non, inquis; non enim ita sensit, non ergo in verbo est, docui autem in re non esse: nusquam igitur est. Liberis dare operam, quam honeste dicitur? etiam patres rogans filios: ejus operæ nomen non audent dicere. Socratem fidibus docuit nobilissimus fidicen. Is Connus vocitatus est, num id obscœnum putas? cum loquimur, termini, nihil flagitii dicimus; at, cum bini, obscœnum est. Græcis quidem, inquires, nihil est ergo in verbo; quando & ego Græce scio, & tamen tibi dico, bini: idque tu facis, quasi ego Græce, non Latine dixerim. Ruta, & menta, recte utrumque, volo mentam pusillam ita appellare, ut rutulam; non licet. Bella testoriosa dicis: dic ergo etiam pavimenta isto modo: non potes. Vides igitur nihil esse: nisi ineptias, turpitudinem nec in verbo esse, nec in re, itaque nusquam esse. Ergo in verbis honestis obscœna ponimus, quid enim? non honestum verbum est divisio? at inest obscœnum, cui respondet intercapedo, num hæc ergo obscœna sunt? nos autem ridicule, si dicimus. ille patrem strangulavit, honorem non præsumus: sin de Aurelia aliquid, aut Lollia, honos præfandus. est. Et quidem jam non etiam obscœna verba pro obscœnis sunt, baruit, inquit, impudenter: densit, multo impudentius; atqui neutrum est obscœnum. **STULTORUM** plena sunt omnia. Testes, verbum honestissimum in judicio, alio loco non nimis, at honesti Colei Lanuvini, Cliternini non honesti. Quid? ipsa res modo honesta, modo turpis, suppetit,

dit, flagitium est: jam erit nudus in balneo, non reprehendes. Habes scholam Stoicam, ὅσαυτ' αὐτοῦ ἡμῶν ἴσα quam multa ex uno verbo tuo; Te adversus me omnia audere gratum est, ego servo, & servabo (sic enim assuevi) Platonis verecundiam. Itaque tectis verbis ea ad te scripsi, quæ apertissimis agunt Stoici, sed illi etiam crepitus ajunt æque liberos, ac ructus esse oportere, honorem igitur Kalendis Martiis. Tu me diliges, & valebis.

A R G U M E N T U M.

*Prænuntiat Peto adventum suum, quamquam enim audierit cum pedibus laborare, se tamen putare ait, coquum illius articulari morbo non impediri, quominus canam possit apparare.*

XXIII. M. T. C. PAPIRIO PÆTO S. D.

**H**Eri veni in Cumanum: cras ad te fortasse: sed, cum certum sciam, faciam te paulo ante certiore, erſi M. Ceparius, cum mihi in sylvâ Gallinaria obviam venisset, quæsissemque, quid ageres, dixit, te in lecto esse, quod ex pedibus laborares, tuli scilicet molestæ, ut debui: sed tamen constitui ad te venire, ut & viderem te, & viserem, & cœnarem etiam, non enim arbitror, coquum etiam te arthriticum habere. Exspecta igitur hospitem cum minime edacem, tum inimicum cœnis sumptuosis. Vale.

A R G U M E N T U M.

*Rufum a Peto commendatum ait sibi curæ etiam atque etiam fore. Dein monet ut omnino ad cœnas, & convivium amicorum redeat, Concludit. nihil sibi esse Repub. carius.*

XXIV. M. T. C. PAPIRIO PÆTO S. D.

**R**Ufum istum, amicum tuum, de quo iterum jam ad me scribis, adjuvarem quantum possem, etiam si ab eo læsus essem, cum te tantopere viderem ejus causa laborare: cum vero & ex tuis litteris, & illius ad me

missis intelligam, & judicem magnæ curæ ei salutem meam fuisse, non possum ei non amicus esse: neque solum tua commendatione, quæ apud me, ut debet, valet plurimum, sed etiam voluntate, ac judicio meo; volo enim, te scire, mi Patre, initium mihi suspicionis, & cautionis & diligentia fuisse litterarum tuarum, quibus litteris congruentes fuerunt aliæ postea multorum: nam & Aquini, & Fabrateria consilia sunt inita de me, quæ te video inaudisse: & quasi divinarent, quam his molestus essem futurus, nihil aliud egerunt, nisi, me ut opprimerent, quod ego non suspicans, incautior fuisset, nisi a te admonitus essem. Quamobrem iste tuus amicus apud me commendatione non eget, utinam ea fortuna reipub. sit, ut ille me quam gratissimum possit cognoscere. Sed hæc hæc. Te ad cœnas itare desiste, moleste fero, magna enim te delectatione, & voluptate privasti (deinde etiam vereor (licet enim verum dicere) ne, nescio quid illud quod solebas, dediscas, & obliviscare cœnulas facere; nam, si tum, cum habebas, quos imitare, non multum proficiebas; quid nunc te facturum putem? Spurina quidem, cum ei rem demonstrassem, & vitam tuam superiorem exposuissem, magnum periculum summæ reip. demonstrabat, nisi ad superiorem consuetudinem, tum, cum favonius flaret, revertisses: hoc tempore ferri posse, si forte tu frigus ferre non posses. Sed mehercule, mi Patre, extra jocum, moneo te, quod pertinere ad beate vivendum arbitror, ut cum viris bonis, jucundis, amantibus tui vivas, nihil est aptius vitæ, nihil ad beate vivendum accommodatius, nec id ad voluptatem refero, sed ad communitatem vitæ, atque victus remissionemque animorum, quæ maxime sermone efficitur familiari, qui est in conviviiis dulcissimus: ut sapientius nostri, quam Græci; illi *εὐπρόσια*, aut *σὺ δειπνῶ*, idest, compotationes, aut concœnationes: nos convivias; quod tum maxime simul vivitur. Vides, ut te philosophando revocare coner ad cœnas? Cura, ut valeas; id foris cœnitando facile consequere. Sed cave, si me amas, existimes me, quod joco-

fius

sius scribam abjecisse curam reip. Sic tibi, mi Pate, persuade, me dies, & noctes nihil aliud agere, nihil curare, nisi ut mei cives salvi; liberique sint, nullum locum prætermitto mōnendi, agandi, providendi, hoc denique animo sum, ut, si in hac cūra, atque administratione vita mihi ponenda sit, præclare actum mecum putem. Etiam atque etiam Vale.

## A R G U M E N T U M.

*Scripta hanc epistolam ante bellum civile, cum esset in Sicilia Proconsul. Cavillatur in eo, quia sibi Papirius præcepta de re militari litteris tradiderat. Dein M. Fabium commendat.*

XXV. M. T. C. IMP. PAPIRIO PÆTO S. D.

**S**Ummum me ducem litteræ tuæ reddidere, plane nesciebam, te tam peritum esse rei militaris. Pyrrhi te libros, & Cynæ video lætasce, itaque obtemperare cogito præceptis tuis, hoc amplius navicularum habere aliquid in ora maritima, contra equitem Parthum negant ullam armaturam meliorem inveniri posse. Sed quid ludinus? nescis, quocum imperatore tibi negotium sit. Κόρυς πῆσαια, quam contriveram legendo, totam in hoc imperio explicavi. Sed jocabimur alias coram, & ut spero, brevi; nunc ades ad imperandum vel ad parendum potius; sic enim antiqui loquebantur. Cum M. Fabio (quod scitè te arbitror) summus mihi est usus, valdeque eum diligo, cum propter summam probitatem ejus, ac singularem modestiam tum quod in illis controversiis, quas habeo cum tuis combibonibus, Apicureis, optima opera ejus uti soleo. Is cum ad me Laodiceam venisset, mecumque cum ego esse vellem, repente percussus est atrocissimis litteris; in quibus scriptum erat, fundum Herculansensem a Q. Fabio fratre proscriptum esse, qui fundus cum eo communibus esset. Id M. Fabius petgaviter tulit; existimavitque, fratrem suum, hominem non sapientem, impulsu inimicorum suorum eo progreßum esse. Nunc, si me amas, mi Pate, negotium totum suscipe, molestia Fabium

bera ; auctoritate tua nobis opus est , & consilio , & etiam gratia , noli pati litigare fratres , & judiciis turpibus conflictari . Mathonem , & Pollionem inimicos habet Fabius , quid multa ? non mehercule tam perscribere possum , quam mihi gratum feceris , si otiosum Fabium reddideris . id ille in te positum esse putat , mihi que persuadet . Vale .

## A R G U M E N T U M .

*Descriptio & excusatio cœnæ hilarioris , præsertim accumbente Cytheride meretrice minima .*

## XXVI. M. T. C. PAPIRIO PÆTO S. D.

**A**ccubueram hora nona , cum ad te harum exemplum in codicillis exaravi . Dices , ubi ? Apud Volumnium Eutrapelum , & quidem supra me Atticus , infra Verrius , familiares tui . Miraris tam exhilaratam esse severitatem nostram ? quid ergo faciam ? te consulo , qui philosophum audis , angar ? excruciemne me ? quid assequar ? deinde quem ad finem ? Vivas , inquis , in litteris , an quicquam me aliud agere censes ? haud possem vivere , nisi in litteris viverem , sed est earum etiam non satietas , sed quidam modus , a quibus cum discessi , etsi minimum mihi est in cœna , quod tu unum *ῥίσημα* Dioni Philosopho posuisti : tamen quid potius faciam , prius , quam me dormitum conferam , non reperio . Audi reliqua . Infra Eutrapelum Cytheris accubuit , in eo igitur , inquis , convivio Cicero ille . Quem ad spectabant , cuius ob os Grafi ora obvertebant sua ? Non mehercule suspicatus sum illam affore ; sed tamen ne Aristippus quidem ille Socraticus erubuit , cum esset obiectum , habere cum Laïda : Habeo , inquit , non habeor a Laïde : Græce hoc melius , tu , si voles , interpretabere , me vero nihil istorum ne juvenem quidem movit unquam , ne nunc senem , convivio delector , ibi loquer aliquid , quod in solum , ut dicitur : & gemitum etiam in risus maximos transfero . An tu id melius , qui etiam philosophum irriseris ? cum ille , si quis quid quæreret , dixisset cœnam te quærere a mane dixeris ? Ille Baro te putabat quæsiturum ,  
unum

unum cœlum esset, an innumerabilia, quid ad te? at hercule cœna nunquid ad te? ibi præferim; sic igitur vivitur: quotidie aliquid legitur; aut scribitur: deinde, ne amicis nihil tribuamus, epulamur una non modo non contra legem, si ulla nunc lex est, sed etiam intra legem, & quidem aliquanto. Quare nihil est, quod adventum nostrum extimescas, non multi cibi hospitem accipies, sed multi joci. Vale.



## LIBER X.

## A R G U M E N T U M.

*Invohitur in Antonii immoderatam potentiam, & Plancum, Transalpinam Galliam, quam ultimam Cicero Philippicarum lib. 5. vocat, ad ministrantem hortatur, ut in Remp. omni cogitatione, studioque incumbat. Postremo agit gratias de Furnio honorifice tractato.*

I. M. T. C. C. MUNATIO PLANCO IMP.  
COS. DES. S. D.

**E**T abfui, proficiscens in Græciam: & posteaquam de medio cursu reip. sum voce revocatus, nunquam per M. Antonium quietus fui: cujus tanta est non insolentia, (nam id quidem vulgare vitium est) sed immanitas, non modo ut vocem, sed ne vultum quidem liberum possit ferre cujusquam. Itaque mihi maximæ curæ est, non de mea quidem vsta, cui satisfacere vel ætate, vel factis, vel (si quid etiam hoc ad rem pertrinet) gloria: sed me patria sollicitat, in primisque, mi Plance, expectatio consulatus tui: quæ ita longa est, ut optandum sit: ut possimus ad id tempus reip. spiritum ducere. Quæ potest enim spes esse in ea rep. in qua hominis impotentissimi, atque intemperantissimi armis oppressa sunt omnia? & in qua nec senatus, nec populus vim habet ullam? nec leges ullæ sunt, nec iudicia, nec omnino simulacrum aliquod, aut vestigium civitatis. Sed, quando acta omnia mitti  
ad

ad te arbitrabar, nihil erat, quod singulis de rebus scriberem. Illud autem erat amoris mei, quem a tua pueritia susceptum non servavi solum, sed etiam auxilium monere te, atque horari, ut in repub. omni cogitatione, curaque incumberes; quæ si ad tuum tempus perducitur, facilis gubernatio est; ut perducatur autem, magnæ tum diligentia est, tum etiam fortunæ. Sed & te aliquanto ante, ut spero, habebimus, & præterquam quod reipub. consulere debemus, tamen tuæ dignitati, ita favemus, ut omne nostrum consilium, studium, officium, operam, laborem, diligentiam ad amplitudinem tuam conferamus, ita facillime & reipub. quæ mihi charissima est, & amicitiæ nostræ, quam sanctissime nobis colendam puto, me intelligo satisfacturum. Furnium nostrum tanti a te fieri, quantum ipsius humanitas, & dignitas postulat, nec miror, & gaudeo, teque hoc existimare volo, quidquid in cum iudicii, officiique contuleris, id ita me accipere, ut in me ipsum te putem contulisse. Vale.

## A R G U M E N T U M.

*Extusat se, quod in senatum ad agendam Plan-  
ci causam non venerit; & officium suum polli-  
cetur in iis rebus, quæ præsentiam suam re-  
quirere videbuntur.*

II. M. T. C. PLANCO IMP. COS. DES. S. D.

**M**Eum studium honori tuo, pro necessitudine nostra non defuisset, si aut tuto in senatum, aut honeste venire potuissem, sed nec sine periculo quisquam, libere de republica sentiens, versari potest in summa impunitate gladiatorum, nec nostræ dignitatis videtur esse, ibi sententiam de republica dicere, ubi me & melius, & propius audiant armati, quam senatores. Quapropter in privatis rebus nullum neque officium, neque studium meum desiderabis, ne in publicis quidem, si quid erit, in quo me interesse necesse sit, unquam decero, ne cum periculo quidem meo dignitati tuæ, in iis autem rebus, quæ nihilominus, ut ego absim, confici possunt, peto a te, ut mei rationem habere velis, & salutis, & dignitatis meæ. Vale.

A R-

## ARGUMENTUM.

*Ancupatur benevolentiam Planci, partim laudibus, partim commemoratione veteris amicitiae, & hortatur, ut Rempublicam suscipiat, veritus id, quod accidit, ne se cum Antonio conjungeret.*

III. M. T. C. PLANCO IMP. COS. DES.  
S. D.

CUM ipsum Furnium per se vidi libentissime me, tum hoc libentius, quod, illum audiens, te videbar audire. nam & in re militari virtutem, & in administranda provincia iustitiam, & in omni genere prudentiam mihi tuam exposuit, & praeterea mihi non ignotam in consuetudine, & familiaritate suavitatem tuam adiunxit; praeterea summam erga se liberalitatem, quae omnia mihi jucunda. Hoc extremum etiam gratum fuit. Ego, Plance, necessitudinem constitutam habui cum domo vestra ante aliquanto, quam tu natus es; amorem autem erga te ab ineunte pueritia tua, confirmata jam aetate familiaritatem, cum studio meo, tum iudicio tuo constitutam. His de causis mirabiliter faveo dignitati tuae, quam mihi tecum statuo esse communem. Omnia summa consequutus es, virtute duce, comite fortuna, eaque es adeptus adolescens multis invidentibus, quos ingenio, industriaque fragisti, nunc me, amantissimum tui, nemini concedentem, qui tibi vetustate necessitudinis potior possit esse, si audies, omnem tibi reliqua vitae dignitatem ex optimo reipublicae statu acquires. Scis profecto (nihil enim te fugere potuit, fuisse quoddam tempus, quum homines existimarent, te nimis servire temporibus, quod ego quoque existimarem, si te ea, quae patiebare, probasse etiam arbitrarer. Sed cum intelligerem, quid sentiret, prudenter te arbitrabar videre, quid posses, nunc alia ratio est omnium rerum, tuum iudicium est, idque liberum, consul es designatus; optima aetate, summa eloquentia, maxima orbitate reip. virorum talium, incumbere, per deos immortales, in eam curam, & cogitationem, quae tibi sum-

man-



nam dignitatem, & gloriam afferat, unus autem est, hoc præsertim tempore per tot annos repub. devexata, reipub. bene gerendæ cursus ad gloriam. Hæc amore magis impulsus scribenda ad te putavi, quam quod arbitrarer te monitis, & præceptis meis egere. sciebam enim ex iisdem te hæc haurire fontibus, ex quibus ipse hauseram quare modum faciam, hoc tantum significandum putavi, ut potius amorem tibi ostenderem meum, quam ostentarem prudentiam. Interea quæ ad dignitatem tuam pertinere arbitrabor, studiose, diligenterque curabo. Vale.

#### ARGUMENTUM.

*Agit gratias Ciceroni, quod eum ad verissimæ gloriæ studium cohortatus sit: sequæ in Reipub. potestate totum fore pallicetur.*

#### IV. PLANCUS CICERONI S.D.

**G**ratissimæ mihi tuæ litteræ fuerunt quas ex Furnii sermone, te scripsisse animadverto, ego autem præteriti temporis excusationem afferro, quod te profectum audieram, nec multo ante rediisse scivi, quam ex epistola tua cognovi, nullum enim in te officium, ne minimum quidem, sine maxima culpa videor posse præterire, in quo tuendo habeo causas plurimas vel paternæ necessitudinis, vel meæ a pueritia observantiæ, vel tui erga me mutui amoris. Quare, mi Cicero, quod mea, tuæque patitur ætas, persuade tibi, te unum esse, in quo ego colendo patriam mihi constituerim sanctitatem: omnia igitur tua consilia mihi non magis prudentiæ plena (quæ summa est) videntur, quam fidelitatis, quam ego ex mea conscientia metior. Quare, si aut aliter sentirem, certe admonitio tua me reprimere: aut, si dubitarem, hortatio impellere posset, ut id sequerer, quod tu optimum putares. Nunc vero quid est, quod me in aliam partem trahere possit? quæcunque in me bona sunt, aut fortunæ beneficio tributa, aut meo labore parta, etli a te propter amorem carius sunt aestimata, tamen vel inimicissimi iudicio tantæ sunt, ut, præter bonam famam, nihil desiderare videantur. Quare hoc unum tibi

tibi persuade, quantum viribus eniti, consilio providere, auctoritate movere potuero, hoc omne reipub. semper futurum. Non est ignotus mihi sensus tuus: neque, si facultas, optabilis mihi quidem, tui presentis esset, unquam a tuis consiliis discreparem: nec nunc committam, ut ullum meum factum reprehendere jure possis. Sum in expectatione omnium rerum: quid in Gallia citeriore, quid in urbe Januario mense geratur, ut sciam. interim maximam hic sollicitudinem, curamque sustineo, ne inter aliena vitia hæ gentes nostra mala suam putent occasionem. Quod si proinde, ut ipse mereor, mihi successerit, certe & tibi, cui maxime cupio & omnibus viris bonis satisfaciam. Fac valeas, meque mutuo diligas.

### ARGUMENTUM.

*Hic quoque Plancum ad suscipiendam, tuendamque Rempub. gloria stimulis incitat.*

V. M. T. PLANCO IMP. COS. DES. S. D.

**B**Inas a te accepi litteras eodem exemplo: quod ipsum argumento mihi fuit diligentiae tuae, intellexi enim te laborare, ut ad me tuæ expectatissimæ litteræ perferrentur: ex quibus cepi fructum duplicem: mihiq; in comparatione difficilem ad judicandum, amorem ne erga me tuum, an animum in rempublicam pluris æstimandum putarem. Est omnino patriæ caritas meo quidem judicio maxima; sed amor, voluntatisq; conjunctio plus certe habet suavitatis. Itaque commemoratio tua paternæ necessitudinis, benevolentiaq; ejus, quam erga me a pueritia contulisses, ceterarumq; rerum, quæ ad eam sententiam pertinebant, incedibilem mihi lætitiæ attulerat. Rursus declaratio animi tui, quem haberes de republ. quemq; habiturus esses, mihi erat jucundissima: eoque major erat hæc lætitiæ, quod ad illa superiora accedebat. Itaque te non hortor solum, mi Plance, sed plane etiam oro (quod feci tuis litteris, quibus tu humanissime respondisti) ut tota mente, omniq; animi impetu in rempub. incumbas. nihil est, quod tibi majori fructui

glo-

gloriarque esse possit: NEC quicquam ex omnibus rebus humanis est præclarior, aut præstantius quam de repub. bene mereri, adhuc enim paritur tua summa humanitas & sapientia, me quod sentiam libere dicere. Fortuna suffragante videris res maximas consequutus, quod quanquam sine virtute non potuisses: tamen ex maxima parte ea, quæ es adeptus, fortunæ, temporibusque tribuuntur, his temporibus difficillimis reipublicæ quicquid subveneris, id erit totum, & proprium tuum. Incredibile est omnium civium, latronibus exceptis, odium in Antonium, magna spes in te, & in tuo exercitu, magna expectatio; cujus, per deos, gratiæ, gloriæque cave tempus amittas. Sic moneo, ut filium: sic faveo, ut mihi: sic hortor, ut & pro patria, & amicissimum. Vale.

## A R G U M E N T U M.

*Cum Plancus, litteris ad Senatum scriptis, pacem cum Antonio suavisset; suadet Cicero, ut pacem armis potius, quam pacatione querat, & ut se a societate malorum civium aliquando sejungens, totum ad Rempubl. transferat.*

VI. M. T. C. PLANCO IMP. COS. DES. S. D.

**Q**Uæ loquutus est Furnius noster de animo tuo in rempublicam, ea gratissima fuerunt senatui, populoque Romano, probatissima, quæ autem recitatæ sunt literæ in senatu, nequaquam consentire cum Furnii oratione visæ sunt, pacis enim auctor eras; cum collega tuus, vir clarissimus, a fœdissimis latronibus obsideretur: qui aut positis armis, pacem petere debent; aut, si pugnantes eam postulant, victoria pax, non pacatione parienda est. Sed de pace literæ vel Lepidi vel tuæ, quam in partem acceptæ sint: ex viro optimo fratre tuo, & C. Furnio poteris cognoscere: Me autem impulit tui caritas ut quanquam nec tibi ipsi consilium deesset, & fratris, Furnique benevolentia, fidelisque prudentia tibi præsto esset futura; vellem tamen meæ quoque auctoritatis pro plurimis nostris sollicitudinibus præceptum ad te aliquod pervenire. Crede igitur mihi, Plance, omnes, quos adhuc gradus digni-

dignitatis consecutus sis ( es autem adeptus amplissimos ) eos honorum vocabula habituros , non dignitatis insignia , nisi te cum libertate pop. Rom. & cum senatus auctoritate conjunxeris . Se-  
 junge te , quæso , aliquando ab iis , cum quibus te non tuum judicium , sed temporum vincula conjunxerunt . Complures in perturbatione rei-  
 publicæ consules dicti : quorum nemo consularis habitus , nisi qui animo exstitit in rempub. consulari . Talem igitur te esse oportet , qui pri-  
 mum te ab impiorum civium , tui dissimillimo-  
 rum , societate sejungas : deinde te senatui , bonisq ;  
 omnibus auctorem , principem , ducem præbeas :  
 postremo , ut pacem esse judices non in armis po-  
 sitis , sed in abjecto armorum , & servitutis metu .  
 Hæc si & ages , & senties , tum eris non modo con-  
 sul , & consularis , sed magnus etiam consul , &  
 consularis , sin aliter , tum in istis amplissimis  
 nominibus honorum non modo dignitas nulla  
 erit , sed erit summa deformitas . Hæc impulsus  
 benevolentia scripsi paulo severius : quæ tu in ex-  
 periendo ea ratione , quæ te digna est , vera esse  
 cognosces . xiiii. Kal. Apr.

## A R G U M E N T U M .

*Exponit , cur brevior sit hæc epistola , & cur flu-  
 dium suum in Rempub. serius patefecerit ; suam-  
 que dignitatem Ciceroni commendat .*

VII. PLANCUS IMP. COS. DES. CI-  
CERONI S. D.

**P**Lura tibi de meis consiliis scriberem , ratio-  
 nemque omnium rerum redderem verbosius ,  
 quo magis judicares , omnia me reipubl. præsti-  
 tisse ; quæ & tua exhortatione excepi , & mea af-  
 firmatione tibi recepi ( non minus enim a te pro-  
 bari , quam diligi semper volui : nec te magis in  
 culpa defensorem mihi paravi , quam prædicato-  
 rem meritorum meorum esse volui ) sed brevio-  
 rem me duz res faciunt : una , quod publicis lit-  
 teris omnia sum persequutus , altera , quod M.  
 Varilidium , equitem Romanum , familiarem me-  
 um , ad te ipsum transire jussi , ex quo omnia  
 cognoscere posses . Non medius fidius mediocris  
 do-

dolore afficiebar, cum alii occupare possessionem laudis viderentur; sed usq; mihi temperavi, dum perducerem eo rem, ut dignum aliquid & consulationi meo, & vestra expectatione efficerem, quod spero, si me fortuna non sefellerit, me consequuturum: ut, maximo praesidio reipub. nos fuisse, & nunc sentiant homines, & in posterum memoria teneant. A te peto, ut dignitati meae suffrageris. &, quarum rerum spe ad laudem me vocasti, harum fructu in reliquum facias alacriorem, non minus posse te, quam velle, exploratum mihi est. Fac valeas, meque mutuo diligas.

### ARGUMENTUM.

*Causas affert, quibus adductus non ita mature, ut homines expectabant, defensorem se publicae libertatis professus sit: deque exercitu suo, & statu Provinciae significat.*

VIII. PLANCUS IMP. COS. DES. COS. PRÆT. TRIB. PL. SP. Q. R. S. D.

**S**I cui forte videor diutius & hominum expectationem, & spem reipub. de mea voluntate tenuisse suspensam, huic prius excusandum me esse arbitror, quam de insequenti officio quicquam ulli pollicendum, non enim præteritam culpam videri volo redemisse; sed optimæ mentis cogitata jampridem maturo tempore enuntiare. Non me præteribat, in tanta sollicitudine hominum, & tam perturbato statu civitatis, fructuosissimam esse professionem bonæ voluntatis, magnosque honores ex ea re complures consequutos videbam; sed cum in eum casum me fortuna demisisset, ut, aut celeriter pollicendo, magna in spe ad proficiendum impedimenta opponerem, aut, si in eo mihi temperavissem, majores occasiones ad opitulandum haberem, expeditius iter communis salutis, quam meae laudis, esse volui. Nam quis in ea fortuna, quæ mea est, & ab ea vita, quam in me cognitam hominibus arbitror, & cum ea spe, quam in manibus habeo, aut sordidum quicquam parit, aut perniciosum concupiscere potest? sed alio quantum nobis temperis, & magni laboris, & multa

multæ impensæ opus fuit, ut, quæ reipubl. bonique omnibus polliceremur, exitu præstaremus; neque ad auxilium patriæ nudi cum bona voluntate, sed cum facultatibus accederemus. Confirmandus erat exercitus nobis; magnis sæpe præmiis sollicitatus, ut ab repub. potius moderata, quam ab uno infinita speraret. confirmandæ complures civitates, quæ superiore anno largitionibus, concessionibusque præmiorum erant obligatæ: ut & illa vana putarent; & eadem a melioribus auctoribus petenda existimarent. Eliciendæ etiam voluntates reliquorum, qui finitimis provinciis, exercitibusque præfuerunt; ut potius cum pluribus societatem defendendæ libertatis iniremus, quam cum paucioribus funestam orbi terrarum victoriam pareremus. Muniendi vero nosmetipsi fuimus, aucto exercitu, auxiliisque multiplicatis; ut, cum præferremus sensus aperte, tum etiam invitis quibusdam, sciri, quid defensuri essemus, non esset periculosum. Itaque nunquam diffitebor, multa me, ut ad effectum horum consiliorum pervenirem, & simulasse invitum, & dissimulasse cum dolore, quod præmatura denuntiatio boni civis imparati quam periculosa esset, ex casu collegæ videbam. Quo nomine etiam C. Farnio legato, viro forti, atque strenuo, plura etiam verbo, quam scriptura, mandata dedimus; ut & testius ad vos perferrentur, & nos essemus tutiores; quibusque rebus & communem salutem muniri, & nos armari conveniret, præcepimus, ex quo intelligi potest, curam reipubl. summæ defendendæ jampridem apud nos excubare. Nunc, cum, Deum benignitate, ab omni re sumus paratiores, non solum bene sperare de nobis homines, sed explorate judicare volumus. Legiones habeo quinque sub signis, & sua fide virtuteque reipubl. conjunctissimas, & nostra liberalitate nobis obsequentes; provinciam omnium civitatum consensu paratissimam, & summa contentione ad officia certantem; equitatus, auxiliorumque tantas copias, quantas hæ gentes ad defendendam suam salutem, libertatemque conficere possunt. Ipse ita sum animo paratus, vel provinciam rueri, vel ire.

quo respub. vocet, vel eradere exercitum, auxilia, provinciamque, ut vel omnem impactum belli in me convertere non recusem; si modo meo casu aut confirmare patriæ salutem, aut periculum morari possim. Hæc si jam expeditis omnibus rebus tranquilloque statu civitatis polliceor, in damno meæ laudis, reipubl. commodo lætabor: sin ad societatem integerrimorum, & maximorum periculorum accedam, consilia mea aquis iudiciis ab obtreptione invidorum, defendenda commendo. Mihi quidem ipsi fructus meritorum meorum in reipublicæ incolumitate satis magnus est paratus. Eos vero, qui meam auctoritatem, & multo magis vestram fidem sequuti, nec ulla spe decipi, nec ullo metu terri potuerunt, ut commendatos vobis habeatis, petendum videtur. Valete.

### ARGUMENTUM.

*Spem studium erga Rempublicam præferre; modestè dignitatem suam commendat: quid egarit, quid acturus sit, exponit: qualem ducat exercitum significat.*

IX. PLANCUS IMP. COS. DES. C. S. D.

**N**ihil me tibi temere scripisse, aut te ceteris de me frustra recepisse, lætor; certe hoc majus habes testimonium amoris mei, quo maturius tibi, quam ceteris, consilia mea volui esse nota, in dies vero meritorum meorum fieri acquisitiones, pervidere te spero, cogniturum magis recepto. Quod ad me attinet, mi Cicero, si ita ab imminetibus malis resp. me adjuvante liberetur, sic honores, præmiaque vestra suspicio, conferenda certe cum immortalitate, ut sine his nihil de meo studio, perseverantiaque sin remissus. Nisi in multitudine optimorum civium impetus animi mei fuerit singularis, & opera præcipua; nihil ad meam dignitatem accedere volo suffragatione vestra, concupisco autem nihil mihi, contra quam ipse pugno: sed & temporis, & rei te moderatorem facile patior esse. Nihil aut sero, aut exigue a patria civi tributum potest videri. Exercitum ad vi. Kal. Majas Rhodanum transjeci; magnis itineribus Vienna equi-

res mille via breviorē pramisi; ipse, si a Lepi-  
do non impediatur, celeritate satisfaciam: sin au-  
tem in itinere meo se opposuerit, ad tempus  
consilium capiam. Copias adduco & genere, &  
numero, & fidelitate firmissimas. Te, ut dili-  
gas me, si mutuo te facturum scis, rogo. Vale.

## A R G U M E N T U M .

*Laudat Plantum de optima voluntate, studioque  
juvanda Reipub. pramiæque illum a Senatu  
honorificentissima sperare vult: operamque in ea  
suam pollicetur, & hortatur, ut egregie per-  
gat in Rep. tuenda.*

X. M. T. C. PLANCO IMP. COS. DES. S. D.

**E**T si satis ex Furnio nostro cognoveram, quæ  
tua voluntas, quod consilium de repub. es-  
set; tamen, lectis tuis litteris, liquidius de toto  
sensu tuo judicavi. Quamobrem, quamquam in  
uno prælio omnis fortuna reipub. disceptat (quod  
quidem, cum hæc legeres, jam decretum arbi-  
trabar fore) tamen ipsa fama, quæ de tua vo-  
luntate percrebuit, magnam es laudem conse-  
quutus. Itaque, si consulem Romæ habuissimus,  
declaratum esset a senatu cum tuis magnis ho-  
noribus, quam gratus esset conatus, & appa-  
tus tuus. Cujus rei non modo non præterit tem-  
pus, sed ne maturum quidem etiam nunc meo  
quidem iudicio fuit. IS ENIM denique honos  
mihi videri solet, qui non propter spem futuræ  
beneficii, sed propter magna merita claris vi-  
ris defertur, & datur. Quare, si modo aliqua  
res, in qua honos elucere possit: omnibus,  
mihi crede, amplissimis honoribus abundabis.  
IS AUTEM, qui vere appellari potest honos,  
non invitamentum ad tempus, sed perpetuæ vir-  
tutis est præmium. Quamobrem, mi Plance,  
incumbe toto pectore ad laudem: subveni pa-  
triae: opitulare collegæ: omnium gentium con-  
sensus, & incredibilem conspirationem adju-  
va. me tuorum consiliorum adiutorem, digni-  
tatis fautorem, annibus in rebus tibi amicis-  
simum, fidelissimumque cognosces. Ad eas enim  
cau-



causas, quibus inter nos amore sumus, officiis, vetustate conjuncti, patriæ caritas accessit, eaque effecit, ut tuam vitam anteferrem meæ. iv. Kal. April.

### ARGUMENTUM.

*Gratias agit pro officiis, quæ in ipsum Cicero contulerat; & de suo studio erga Remp. omnia pollicetur.*

#### XI. PLANCUS CICERONI S. D.

**I**mmortales ago tibi gratias, agamque dum vivam: nam, relaturum me, affirmare non possum, tantis enim tuis officiis non videor mihi respondere posse: nisi forte (ut tu gravissime, disertissimeque scripsisti) ita sensurus es, ut me referre gratiam putes, cum memoria tenebo. Si de filii tui dignitate esset actum, amabilius certe nihil facere potuisses. Primæ tuæ sententiæ infinitis cum muneribus, posteriores ad tempus, arbitriumque amicorum meorum compositæ, oratio assidua, & perpetua de me, jurgia cum obtrektoribus propter me, notissima mihi sunt, non mediocris adhibenda mihi est cura, ut reipub. me civem dignum tuis laudibus præstem, in amicitia tua memorem, atque gratum. Quod reliquum est, tuum munus tuere; & me, si quem esse voluisti, cum exitu, rebusque cognoscis, defende, ac suscipe. Cum Rhodanum copias transjecissem, fratremque cum tribus millibus equitum præmissem, ipse iter ad Mutinam dirigerem; in itinere de prælio facto, Brutoque, & Mutina obsidione liberatis audiui. Animadverti nullum alium receptum Antonium, reliquiasque, quæ cum eo essent; habere, nisi in his partibus: duasque ei spes esse propositas, unam Lepidi, ipsius, alteram exercitus: quod quædam pars; exercitus non minus furiosa est, quam qui cum Antonio fuerunt, equitatum revocavi: ipse in Allobrogibus constiti, ut proinde ad omnia paratus essem, ac res me moneret. Si nudus huc se Antonius conferet, facile mihi videor per me sustinere posse, remque publicam ex vestra sententia administrare, quamvis ab exercitu Lepidi recipiatur; si vero copiarum aliquid secum adducet, etsi

et si decima legio veterana, quæ nostra opera revocata cum reliquis est, ad eundem furorem redierit: tamen, ne quid detrimenti fiat, dabitur opera a me, idque me præstaturum spero, dum istinc copiarum transjiciantur, conjunctæque nobiscum facilius perditos opprimant. Hoc tibi spondeo, mi Cicero, neque animum, neque diligentiam mihi defuturam. cupio meherecule nullam residuam sollicitudinem esse: sed, si fuerit, nec animo, nec benevolentia, nec patientia cujusquam pro vobis cedam. Do quidem ego operam, ut etiam Lepidum ad hujus rei societatem incitem; omniaque ei obsequia polliceor, si modo rempub. respicere velit. Utor in hac re adjutoribus, interpretibusque fratre meo, & Laterense, & Furnio nostro. non me impediunt privatae offensiones, quominus pro reipub. salute etiam cum inimicissimo consensiam, quod si nihil profecero, nihilominus maximo sum animo, & majore fortasse cum mea gloria vobis satisfaciam. Fac valeas, meque mutuo diligas.

## A R G U M E N T U M.

*Significat, quam grata Senatui fuerint ejus litteræ de apparatu, studiisque defendenda Reipub. quidque ex ejus litteris actum sit; & hortatur eum, ut solet, ad recuperandam libertatem.*

XII. M. T. C. P L A N C O I M P. COS.  
D E S. S. D.

**E**T si reipublicæ causa maxime gaudere debeo, tantum ei te præsidii, tantum opis attulisse extremis pene temporibus, tamen ita te victorem complectar, repub. recuperata, ut magnam partem mihi lætitiæ tua dignitas afferat: quam & esse jam, & futuram amplissimam intelligo. Cave enim putes, ullas litteras unquam gratiores, quam tuas, in senatu esse recitatas, idque contigit tum meritorum tuorum in rempubl. eximia quadam magnitudine, tum verborum, sententiarumque gravitate, quod mihi quidem minime novum, qui & te nossem, & tuarum

litterarum ad me missarum promissam mentissem, & haberem a Furnio nostro tua penitus consilia cognita; sed senatui majora visa sunt, quam erant expectata, non quod unquam de tua voluntate dubitasset; sed nec, quantum facere posses, nec, quo progredi velles; exploratum satis habebat. Itaque cum ad VII. id. Ap. mane mihi tuas litteras M. Varisidius reddidisset, easque legissem, incredibili gaudio sum elatus, cumque magna multitudo optimorum virorum, & civium me de domo deduceret, feci continuo omnes participes meae voluptatis. Interim ad me venit Munatius noster, ut consueverat, & ego ei litteras tuas ostendi, nihil dum enim sciebat; nam ad me primum Varisidius; idque sibi a te mandatum esse dicebat, paulo post idem mihi Munatius eas litteras legendas dedit, quas ipsi miseras, & eas, quas publice, placuit nobis, ut statim ad Cornutum praetorem urbis litteras deferremus, qui, quod consules aberant, consulare munus sustinebat more majorum. Senatus est continuo convocatus, frequensque convenit propter famam, atque expectationem tuarum litterarum. recitatis litteris, oblata religio Cornuto est pullariorum admonitu, non satis diligenter cum auspiciis operam dedisse; idque a nostro collegio comprobatum est; itaque res dilata est in posterum. Eo autem die magna mihi fuit pro tua dignitate contentio cum Servilio, qui cum gratia effecisset, ut sua sententia prima pronuntiaretur: frequens eum senatus reliquit, & in alia omnia discessit: meaeque sententiae, quae secunda pronuntiata erat, cum frequens assentiretur senatus, rogatu Servilii P. Titius intercessit. Res in posterum dilata, venit paratus Servilius, Jovi ipsi iniquus, cujus in templo res agebatur. hunc quemadmodum fregerim, quantaque contentione Titium intercessorem abjecerim, ex aliorum te litteris malo cognoscere: unum hoc ex meis: senatus gravior, constantior, amiciores tuis laudibus esse non potuit, quam tum fuit, nec vero tibi senatus amiciores, quam cuncta civitas; mirabiliter enim populus R. universus, & omnium generum, ordinumque consensus ad liberandam rempub. con-

spi-

21 inspiravit. Perge igitur, ut agis, nomenque tuum  
 22 cum laudanda immortalitati: atque hæc omnia, quæ  
 23 habent speciem gloriæ collectam ex inanissimis  
 24 splendoris insignibus, contemne; brevia, fugacia,  
 25 caduca existima. VERUM DECUS in virtute  
 26 positum est, quæ maxime illustratur magnis  
 27 in reip. meritis. Eam facultatem habes  
 28 maximam, quam quando complexus es tene, &  
 29 perface, ut ne minus reipub. tibi, quam tu reipub.  
 30 debeas, me tuæ dignitatis non modo fautorem,  
 31 sed etiam amplificatorem cognosces, id  
 32 vultum reipub. quæ mihi est mea vita charior, tum  
 33 nostræ necessitudini debere me, iudico. Atque in  
 34 his curis, quas contuli ad dignitatem tuam, cepi  
 35 magnam voluptatem, quod bene cognitam mihi  
 36 T. Munatii prudentiam, & fidem, magis etiam  
 37 perspexi in ejus incredibili erga te benevolentia,  
 38 & diligentia. III. id. April. Vale.

## ARGUMENTUM.

*Scribit de S. C. in suam sententiam falso ad augendam Planci dignitatem, hortaturque, ut Antoniani belli reliquias conficiat.*

XIII. M. T. C. PLANCO IMP. COS. DES. S. D.

1 UT primum potestas data est augendæ dignitatis  
 2 tuæ, nihil prætermisi in te ornando, quod positum  
 3 esset aut in præmio virtutis, aut in honore verborum. Id ex ipso S. C. poteris  
 4 cognoscere: ita enim est perscriptum, ut a me  
 5 de scripto dicta sententia est: quam senatus frequens  
 6 secutus est summo studio, magnoque consensu. Ego, quanquam ex tuis litteris, quas  
 7 mihi misisti, perspexeram, te magis iudicio bonorum,  
 8 quam insignibus gloriæ delectari: tamen considerandum nobis existimaui, etiam si tu  
 9 nihil postulares, quantum tibi a reipub. deberetur.  
 10 Tu contexes extrema cum primis; qui enim M. Antonium oppresserit, is bellum confecerit,  
 11 itaque Homerus non Ajacem, nec Achillem, sed Ulysssem appellavit *ἄτολιν ἄρσεν*.  
 12 Vale.

## A R G U M E N T U M.

*Laudat Plancum de subsidio reipub. ferendo; & hortatur, ut Antonium ad Mutinam fufum persequatur, ac perdat.*

XIV. M. T. C. PLANCO IMP. COS. DES. S. D.

**O** Gratam famam biduo ante victoriam, de subsidio tuo, de studio, de celeritate, de copiis. Atqui etiam hostibus fufis, spes omnis in te est, fugisse enim ex prælio Mutinensi dicuntur notissimi latronum duces. EST autem non minus gratum extrema delere, quam prima depellere. Equidem exspectabam jam tuas litteras, idque cum multis: sperabamque etiam Lepidum temporibus admonitum, tecum & reip. satis esse facturum. In illam igitur curam incumbe, mi Plance, ut ne qua scintilla teterrimi belli relinquantur, quod si erit factum, & reip. divino beneficio affeceris, & ipse æternam gloriam consequere. III. id. Maji. Vale.

## A R G U M E N T U M.

*Nuntiat, quid ad opprimendum Antonium paret.*

XV. PLANCUS IMP. C. S. D.

**H**Is litteris scriptis, quæ postea accidissent, scire te, ad reipub. putavi pertinere. Sedulitas mea, ut spero, & mihi, & reip. tulit fructum, namque assiduis internuntiis cum Lepido egi, ut missa omni contentione, reconciliataque voluntate nostra, communi consilio reipub. succurreret: se liberos, urbem pluris, quam unum perditum, abjectumque latronem, putaret: obsequioque meo, si ita faceret, ad omnes res abuteretur. Profeci itaque per Laterensem internuntium: fidem mihi dedit, se Antonium, si prohibere sua provincia non potuisset, bello persequuturum: me, ut venirem, copiasque conjungerem, rogavit: eoque magis, quod & Antonius ab equitatu firmus esse dicebatur, & Lepidus ne mediocrem quidem equitatum habebat; nam etiam ex paucitate ejus, non multis  
anté

ante diebus, decem, qui optimi fuerant, ad me transferunt. Quibus rebus ego cognitis, cunctatus non sum: in cursu bonorum consiliorum Lepidum adiuvandum putavi. Adventus meus quid profecturus esset, vidi: vel quod equitatu meo persequi, atque opprimere equitatum ejus possem; vel quod exercitus Lepidi eam partem, quæ corrupta est, & ab rep. alienata, & corrigere, & coercere præsentia mei exercitus possem. Itaque in Isara, flumine maximo, quod in finibus est Allobrogum, ponte, uno die facto, exercitum ad iv. id. Maji transduxi. Cum vero mihi nuntiatum esset, L. Antonium, præmissum cum equitibus, & cohortibus, ad Forum Julii venisse: fratrem cum equitum quatuor millibus, ut occurreret ei, misi ad prid. id. Maji. Ipse maximis itineribus cum quatuor legionibus expeditis, & reliquo equitatu subsequar, si nos mediocri modo fortuna reip. adjuverit, & audaciæ perditorum, & nostræ sollicitudinis hic finem reperiemus. Quod si latro, præcognito nostro adventu, rursus in Italiam se recipere cœperit, Bruti erit officium occurrere ei: cui scio nec consilium, nec animum defuturum. Ego tamen, si id acciderit, fratrem cum equitatu mittam, qui sequatur, Italiam a vastatione defendat. Fac valeas, meque mutuo diligas.

## A R G U M E N T U M.

*Gratissimas Senatui fuisse Planci litteras, Maximeque opportunas significat: eique auctor est, ut in rebus tam subitis consilium Senatus ne expectet, ipse a sese consilium rapiat.*

XVI. M. T. C. P L A N C O S. D.

**N**ihil post hominum memoriam gloriosius, nihil gratius, ne tempore quidem ipso opportunius accidere vidi, quam tuas, Plance, litteras. Rediit enim, frequenter senatu, Cornuto, cum is frigidas sane, & inconstantes recitasset litteras Lepidi, sub eas statim recitatae sunt tuæ, non sine magnis quidem clamoribus: cum rebus enim ipsis essent, & studiis, beneficiisque in remp. gratissimæ, tum

erant gravissimis verbis, & sententiis. Flagitare senatus institit Cornutum; ut referret statim de tuis litteris, ille se considerare ait velle, cum ei magnum convicium fieret cuncto a senatu, quinque tribuni pleb. retulerunt, Servilius rogatus rem distulit, ego eam sententiam dixi, cui sunt assensi ad unum, ea, quæ fuerit, ex S. C. cognosces. Tu quamquam consilio non eges, vel abundas potius, tamen hoc animo esse debes, ut nihil huc reiicias, neve in rebus tam subitis, tamque angustis a senatu consilium petendum putes, ipse tibi sis senatus, quocunque te ratio reipub. ducet, sequare. Cures, ut ante factum aliquid a te egregium audiamus, quam futurum putarimus. Illud tibi promitto, quicquid erit a te factum, id senatum non modo ut fideliter, sed etiam ut sapienter factum comprobaturum. Vale.

## A R G U M E N T U M.

*Præsentem belli statum describit, cum excusatione fratris a se dimissi, & commendatione suæ dignitatis.*

## XVII. P L A N C U S I M P. C. S. D.

**A**ntonius Idib. Maji ad Forum Julii cum primis copiis venit. Ventidius bidui spatium abest ab eo. Lepidus ad Forum Voconii castra habet: qui locus a foro Julii quatuor, & viginti millia passuum abest: ibique me expectare constituit, quemadmodum ipse mihi scripsit. Quod si omnia mihi integra & ipse, & fortuna servaverit: recipio vobis, celeriter me negotium ex sententia confecturum. Fratrem meum, assiduis laboribus, concursationibusque confectum graviter se habuisse, antea tibi scripsi; sed tamen, cum primum posse ingredi cepit, non magis sibi, quam reipub. convaluisse se existimans, ad omnia pericula princeps esse non recusabat. Sed ego eum non solum hortatus sum, verum etiam coegi isto proficisci: quod illa valetudine magis conficere se, quam me tueri posset in castris; & quod acerbissimo interitu consulum reipub. nudatam, tali cive prætoris in urbanis officiis indigere existimabam. Quod si quis vestrum

strum non probabit, mibi prudentiam in consilio defuisse sciat, non illi erga patriam fidelitatem. Lepidus tandem, quod ego desiderabam, fecit ut Appellam ad me mitteret, quo obside fide illius & societatis in repub. administranda uterer, studium in ea re suum mihi L. Gellius, de tribus fratribus, Sex. Gaviano probavit: quo ego interprete novissime ad Lepidum sum usus. amicum eum reip. cognoscere videor: libenterque ei sum testimonio, & omnibus ero, qui bene merentur. Fac valeas, meque mutuo diligas, dignitatemque meam, si mereor, tuearis, sicut adhuc singulari cum benevolentia fecisti. Vale.

## A R G U M E N T U M.

*Narrat, quibus de causis ad Lepidum proficiscatur.*

## XVIII. PLANCUS CICERONI S. D.

Q Uid in animo habuerim, cum Lævus, Nervaque disceserunt a me, & ex litteris, quas eis dedi, & ex ipsis cognoscere potuisti, qui omnibus rebus, consiliisque meis interfuerunt. Accidit mihi, quod homini prudenti, & cupido satisfaciendi reipublicæ, bonisque omnibus accidere solet, ut consilium sequeretur periculosum magis, dum me probarem, quam tutum, quod habere posset obtestationem. Itaque post discessum legatorum, cum binis continuis litteris, & Lepidus me, ut venirem, rogaret, & Laterensis multo etiam magis, prope implorans, obtestaretur, non ullam rem aliam extimescens quam eandem, quæ mihi quoque facit timorem, varietatem, atque infidelitatem exercitus ejus, non dubitandum putavi quin succurrerem, meque communi periculo offerrem. sciebam enim, & si cautius illud erat consilium, exspectare me ad Isaram, dum Brutus transjiceret exercitum, & cum collega consentiente, exercitu concordi, & bene de Rep. sentiente, hostibus obviam ire: tamen si quid Lepidus bene sentiens detrimenti cepisset, hoc omne assignatum iri aut pertinaciz meæ aut timori videbam, si aut hominem offensum mihi, conjunctum cum rep. non sublevassem, aut ipse a certamine belli tam necessarij me removis-



sem. Itaque potius periclitari volui, si possem mea præsentia & Lepidum tueri, & exercitum facere meliorem, quam nimis cautus videri. Sollicitiorem certe hominem non suis contractis neminem puto fuisse, nam quæ res nullam habebat dubitationem, si exercitus Lepidi absit, ea nunc magnam affert sollicitudinem, magnumq; habet casum, mihi enim si contigisset, ut prior occurrerem Antonio, non mehercule horam constitisset: tantum ego & mihi confido, & sic percussas illius copias, Ventidique mulionis castra despicio. Sed non possum non exhorrescere, si quid intra cutem subest vulneris, quod prius nocere potest, quam sciri, curarique possit. sed certe, nisi uno loco metaremur, magnum periculum ipse Lepidus, magnum ea pars exercitus adiret, quæ bene de rep. sentit. magnam etiam perdit hostes accessionem sibi fecissent, si quas copias a Lepido abstraxissent, quæ si adventus meus repræferit, agam gratias fortunæ, constantique meæ, quæ me ad hanc experientiam excitavit. Itaque ad XII. Kal. Jun. ab Isara castra movi: pontem tamen, quem in Isara feceram, castellis duobus ad capita positis reliqui, præsidiaque ibi firma posui, ut venienti Bruto, exercituique ejus sine mora transitus esset paratus. Ipse, ut spero, diebus octo, quibus hæc litteras dabam, cum Lepidi copiis me conjungam. Vale.

### ARGUMENTUM.

*Officium Planci in actione gratiarum sibi fuisse gratissimum fatetur, hortaturque, ut ad extinguendas belli reliquias omni studio incumbat.*

XIX. M. T. C. PLANCO IMP. S. D.

**Q**Uamquam gratiarum actionem a te non desiderabam, cum te re ipsa, atque animo scirem esse gratissimum: tamen (fatendum est enim) fuit ea mihi per jucunda, sic enim vidi, quati ea, quæ oculis cernuntur, me a te amari. Dices, quid antea? Semper quidem, sed nunquam illustrius. Litteræ tuæ mirabiliter gratæ sunt senatui, cum rebus ipsis, quæ erant gravissimæ, & maximæ, fortissimi animi, summique consilii, tum

etiam gravitate sententiarum, atque verborum. Sed, mi Plance, incumbes, ut belli extrema perficias, in hoc erit summa & gratia, & gloria. cupio omnia reip. causa; sed inextinguibile in ea conservanda jam defatigatus, non multo plus faveo patriæ, quam tuae gloriæ: cujus maximam facultatem tibi Dii immortales, ut spero, dedere: quam complectere, obsecro; qui enim Antonium oppresserit, is hoc teterrimum bellum, periculosissimumque confecerit. Vale.

## A R G U M E N T U M.

*Petit, ut de Lepidi fide significet, utrum pro Rep. sit, an se cum Antonio conjunxerit: & hortatur ad belli reliquias opprimendas.*

XX. M. T. C. P L A N C O S. D.

**I**Ta erant omnia, quæ illinc afferebantur, incerta, ut, quid ad te scriberem, non occurreret, modo enim, quæ vellemus, de Lepido, modo contra nuntiabantur. De te tamén constans fama, nec decipi posse, nec vinci, quorum alterius fortuna partem habet quamdam, alterum proprium est prudentiæ tuæ. Sed accepi litteras a collega tuo, datas id. Maji; in quibus erat, te ad se scripsisse, a Lepido non recipi Antonium, quod erit certius, si tu ad nos idem scripseris, sed minus audes fortasse propter inanem latitiam litterarum superiorum. Verum ut errare, mi Plance, potuisti (quis enim id effugerit?) sic, decipi te non potuisse, quis non videt? nunc vero etiam erroris causa sublata est, culpa enim illa, his ad eundem, vulgari reprehensa proverbio est. Sin, ut scripsisti ad collegam, ita se res habet, omni cura liberati sumus: nec tamén erimus prius, quam ita esse, tu nos feceris certiores. Mea quidem, ut ad te sæpius scripsi, hæc sententia est: qui reliquias huius belli oppresserit, cum totius belli confectorem fore: quem te & opto esse, & confido futurum. Studia mea erga te, quibus certe nulla esse maiora potuerunt, tibi tam grata esse, quam ego putavi fore, minime minor, vehementerque laetor: quæ quidem tu, si recte iudicaris, maiora, & graviora cognosces. IV. Kal. Iun.

## A R G U M E N T U M.

*Nunciat de Lepidi perfidia, & conjunctione cum Antonio: novarumque copiarum subsidium postulat, & suam commendat dignitatem.*

## XXI. PLANCUS CICERONI S. D.

**P**Uderet me inconstantiae mearum litterarum, si non hæc ex aliena levitate penderent. Omnia feci, quare, Lepido conjuncto ad remp. defendendam; minore sollicitudine vestra perditis resisterem. omnia ei & petenti recepi, & ultro pollicitus sum; scripsique tibi biduo ante, considere me bono Lepido esse usurum, communique consilio bellum administraturum. Credidi chirographis ejus, affirmationi præsentis Laterensis, qui tum apud me erat: reconciliaremque me Lepido, fidemque haberem; orabat, non licuit diutius bene de eo sperare, illud certe cavi, & cavebo, ne mea credulitate reip. summa fallatur. Cum Isaram flumen, uno die ponte confecto, exercitum transduxissem, pro magnitudine rei celeritatem adhibens, quod petierat per litteras ipse, ut maturarem venire: præsto mihi fuit stator ejus cum litteris, quibus, ne venirem, denuntiabat, se posse conficere per se negotium: interea ad Isaram expectarem. Indicabo temerarium meum consilium tibi: nihilominus ire decreveram, existimans cum socium gloriæ vitare, putabam, posse me nec de laude jejuni hominis deliberare quicquam & subesse tamen propinquis locis, ut, si durius aliquid esset, succurrere celeriter possem. Ego non malus homo hoc suspicabar, at Laterensis, vir sanctissimus, suo chirographo mittit mihi litteras: in eisque desperans de se, de exercitu, de Lepidi fide, querensque, se destitutum, aperte denuntiat videam, ne fallar; suam fidem solutam esse: reip. ne desim, exemplar ejus chirographi Titio dedi, ipsa chirographa omnia, & quibus credidi, & ea, quibus fidem non habendam putavi, Lavo Claspio dabo perferenda, qui omnibus his interfuit rebus. Accessit eo, ut milites ejus, cum

Le-

Lepidus concionaretur, improbi per se, corrupti etiam per eos, qui præsunt, Canidios, Rufrenosque & ceteros, quos cum opus erit scietis, conclamarint viri boni pacem se velle, neque esse cum ullis pugnatuuros, duobus jam consulibus singularibus occisis, tot civibus pro patria amissis, hostibus denique omnibus iudicatis, bonisque, publicatis, neque hoc aut vindicarat Lepidus, aut sanarat. Huc me venire, & duobus exercitibus junctis objicere exercitum fidelissimum, maxima auxilia, principes Galliarum, provinciam cunctam, summæ dementiæ, & temeritatis esse vidi: mihiq; si ita oppressus essem, renique pub. mecum perdidissem, mortuo non modo honorem, sed misericordiam quoque defuturam. Itaque rediturus sum, nec tanta munera perditis hominibus dari posse, sinam. Exercitum locis ut habeam opportunis, provinciam tuear, etiam si ille exercitus desciverit, omnia ut integra servem, dabo operam, quoad exercitus huc summittatis, parique felicitate temp. hic vindicetis, nec depugnare, si occasio tulerit; nec obsideri, si necesse fuerit; nec mori, si casus inciderit, pro vobis paratior fuerit quisquam. Quare hortor te, mi Cicero, exercitum huc transjiciendum quam primum cures, & matures prius, quam hostes magis corroborentur, & nostri perturbentur, in quo si celeritas erit adhibita; resp. in possessione victoriæ, delebis sceleratis, permanebit. Fac valeas, meque diligas. Fratrem meum tibi fortissimum civem, & ad omnia paratissimum, excusam litteris? qui ex labore in febriculam incidit assiduam, & satis molestam. Cum primum poterit, istuc recurrere non dubitabit, ne quo loco reip. desit. meam dignitatem commendatam habeas, rogo: concupiscere me nihil oportet, habeo te & amantissimum mei, & quod optavi, summæ auctoritatis, tu videris, quantum, & quando tuum munus apud me velis esse. Tantum te rogo, in Hirtii locum me subdas, & ad tuum amorem, & ad meam observantiam. Vale.

*Agris dividendis præfici Plancus cupiebat ad militum gratiam colligendam; de ea re Citero respondet.*

## XXII. M. T. C. P L A N C O S. D.

**I**N te, & in collega omnis spes est, Diis ap-  
probantibus. concordia vestra, quæ senatui  
declarata litteris vestris est, mirifice & senatus,  
& cuncta civitas delectata est. Quod ad me scri-  
pseras de re agraria: si consultus senatus esset,  
ut quisque de te honorificentissimam sententiam  
dixisset, eam sequutus essem, qui certe ego fuil-  
sem: sed propter tarditatem sententiarum, mo-  
ramque rerum, cum ea, quæ consulebantur, ad  
exitum non pervenirent, commodissimum mihi,  
Plancoque fratri visum est, uti eo, quod ne no-  
stro arbitratu componeretur, quis fuerit impe-  
dimento, arbitror, te ex Planci litteris cogno-  
visse. Sed sive in S. C. sive in ceteris rebus de-  
sideras aliquid, sic tibi persuade, tantam esse  
apud omnes bonos tui caritatem, ut nullum ge-  
nus amplissimæ dignitatis excogitari possit, quod  
tibi non paratum sit. Litteras tuas vehementer  
expecto, & quidem tales, quales maxime o-  
pto. Vale.

## A R G U M E N T U M.

*Excusat se, quod Lepido crediderit; & suam di-  
ligentiam in copiis tuto reducendis declarat;  
accepto nuntio de Lepidi, Antonique conjun-  
ctione; quo in periculo subsidium Cesariani ex-  
ercitus postulat.*

## XXIII. P L A N C U S C I C E R O N I S. D.

**N**Unquam mehercule, mi Cicero, me pœni-  
tebit maxima pericula pro patria subire,  
dum, si quid acciderit mihi, a reprehensione re-  
meritis absim. Confiterer imprudentia me la-  
psum, si unquam Lepido ex animo credidissem.  
CREDULITAS enim error est magis, quam cul-  
pa; & quidem in optimi cujusque mentem facillime  
me irrepit, sed ego non hoc vitio pene sum dece-  
ptus:

ptus: Lepidum enim pulchre noram. Quid ergo est? pudor me, qui in bello maxime est periculosus, hunc casum coegit subire. nam si uno loco essem, verebar, ne cui obrectatorum viderer, & minimum pertinaciter Lepido offensus, & mea patientia etiam alere bellum. Itaque copias prope in conspectum Lepidii, Antonique adduxi; quadragintaque millium passuum spatio relicto, confedi, eo consilio, ut vel celeriter accedere, vel salutariter recipere me possem; adunxi hæc in loco eligendo, flumen oppositum ut haberem, in quo mora transitus esset. Vocontii sub manu ut essent, per quorum loca mihi fideliter pateret iter. Lepidus, desperato adventu meo, quem non mediocriter captabat, se cum Antonio conjunxit ad iv. Kal. Jun. eodemque die ad me castra moverunt. Viginti millia passuum cum abessent, res mihi nuntiata est. dedi operam deum benignitate, ut & celeriter me reciperem, & hic discessus nihil fugæ simile haberet; non miles ullus, non eques, non quidquam impedimentorum amitteretur, aut ab illis feruentibus latronibus interciperetur. Itaque pridie non. Jun. omnes copias Isaram transjeci, pontesque, quos feceram, interrupi, ut spatium ad se colligendum homines haberent, & ego me interea cum collega conjungerem: quem triduo, cum has dabam litteras, expectabam. Laterensis nostri & fidem, & animum singularem in remp. semper fatebor, sed certe nimia ejus indulgentia in Lepidum ad hæc pericula perspicuenda fecit eum minus sagacem, qui quidem cum in fraudem se deductum videret, manus, quas justius in Lepidi perniciem armasset, sibi afferre conatus est, in quo casu tamen interpellatus, adhuc vivit, & dicitur victurus. Sed tamen de hoc mihi parum certum est, & magno cum dolore parricidarum elapsus sum iis, veniebant enim eodem furore in me, quo in patriam, incitaci: iracundias autem harum rerum recentes habebant, quod Lepidum castigare non destiteram, ut extingueret bellum: quod colloquia facta improbabam: quod lezatos, fide Lepidi missos, ad me, in conspectum venire vetueram: quod

C. Catinium Vestinum tribunum mil. missum ab Antonio ad eum cum litteris exceperam, in quo hanc capio voluptatem, quod certe, quo magis me petiverunt, tanto maiorem iis frustratio do- lorem attulit. Tu, mi Cicero, quod adhuc fecisti, idem præsta, ut vigilanter, nervoseque nos, qui stamus in acie, subornes: veniat Caesar cum copiis, quas habet firmissimas: aut, si ipsum aliqua res impedit, exercitus ejus mittatur: cujus ipsius magnam periculum agitur, quicquid aliquando futurum fuit in castris perditorum contra patriam, hoc omne jam convenit. Pro urbis vero salute cur non omnibus facultatibus, quas habemus, utamur? quod si vos istuc non defueritis; profecto, quod ad me attinet, omnibus rebus abunde reipub. satisfaciam. Te quidem, mi Cicero, in dies mehercule habeo tariorem; sollicitudinesque meas quotidie magis tua merita exacuunt, ne quid aut ex amore, aut ex judicio tuo perdam. Opto, ut mihi liceat jam præsentī pietate meorum officiorum tua beneficia tibi facere jucundiora. Valde, VIII. Idus Jun. Civarone, ex finibus Allobrogum.

### ARGUMENTUM.

*Pollicetur se memorem beneficiorum: suas copias narrat: subsidium aut ab Octaviano, aut Africano exercitu postulat; Octavianum quasi negligentem in tuenda Rep. accusat.*

### XXIV. PLANCUS IMP. COS. DES. CICERONI S. D.

**F**Acere non possum, quin in singulas res, meritaque tua tibi gratias agam, sed mehercule facio cum pudore, neque enim tanta necessitudo, quantam tu mihi tecum esse voluisti, desiderate videtur gratiarum actionem; neque ego lubenter pro maximis tuis beneficiis tam vili munere defungor orationis; & malo præsens observantia, indulgentia, assiduitate memorem tibi probare. Quod si mihi vita contigerit, omnes gratas amicitias, atque etiam pias propinquitates in tua observantia, indulgentia assiduitate vincam, amor enim tuus, ac judicium de me,

me, utrum mihi plus dignitatis in perpetuum, an voluptatis quotidie sit allaturus, non facile dixerim. De militum commodis fuit cura: quos ego non potentiae meae causa (nihil enim me non salutariter cogitare scio) ornari volui senatu: sed primum, quod ita meritos iudicabam; deinde, quod ad omnes casus conjunctiores reip. esse volebam: novissime, ut ab omni omnium sollicitatione aversos eos tales vobis prestare possem, quales adhuc fuerunt. Nos adhuc hic omnia integra sustinimus, quod consilium nostrum, etsi quanta sit aviditas hominum, non sine causa, talis victoriae, scio; tamen vobis probari spero, non enim, si quid in his exercitibus sit offensum, magna subsidia respublica habet expedita, quibus subito impetu, ac latrocinio parriedarum resistat. Copias vero nostras notas tibi esse arbitror, in castris meis legiones sunt veteranae tres, tironum vel luculentissima ex omnibus una, in castris Bruti una veterana legio, altera bima, octo tyronum, ita universus exercitus numero amplissimus est, firmitate exiguus. quantum autem in acie tironi sit committendum, nimium saepe expertum habemus. Ad hoc robur nostrorum exercituum, siue Africanus exercitus, qui est veteranus, siue Caesaris accessisset, æquo animo summam rempub. in discrimen deduceremus, aliquanto autem propius esse, quod ad Caesarem attinet, videbamus. Nihil destitit cum literis hortari: neque ille intermisit affirmare, se sine mora venire: quum interea aversum illum ab hac cogitatione, ad alia consilia video se contulisse, ego tamen ad eum Furnium nostrum cum mandatis, literisque misi, si quid forte proficere posset. Scis tu, mi Cicerone, quod ad Caesaris amorem attinet, societatem mihi esse tecum: vel quod in familiaritate Caesaris, vivo illo, jam tueri eum, & diligere mihi fuit necesse: vel quod ipse, quoad ego nosse potui, moderatissimi, atque humanissimi fuit sensus: vel quod ex tam insigni amicitia mea, atque Caesaris hunc filii loco & illius, & vestro iudicio substitutum, non perinde habere mihi turpe videtur; sed quicquid tibi scribo, dolenter mehercule magis, quam



quam inimici facio. Quod vivit Antonius hodie, quod Lepidus una est, quod exercitus habent non contemnendos, quod sperant, quod audent; id omne Cæsari acceptum referre possunt, neque ego superiora repetam; sed ex eo tempore, quo ipse mihi professus est venire, si venire voluisset, aut oppressum jam bellum esset, aut in adversissimam illis Hispaniam cum detrimento eorum maximo extrusum. quæ mens eum, aut quorum consilia a tanta gloria, sibi vero etiam necessaria, ac salutaria avocant, & ad cogitationem consulatus bimestris, summo cum terrore hominum, & insulsa cum effugitatione transfulerit, exputare non possum. Multum in hac re mihi videntur necessarii eius, & reip. & ipsius causa proficere posse: plurimum, ut puto, tu quoque: cuius ille tanta merita habet, quanta nemo præter me, nunquam enim obliviscar, maxima, ac plurima me tibi debere. De his rebus, ut exigeret cum eo, Furnio mandavi. quod si, quantam debeo, habuerim apud eum auctoritatem, plurimum ipsum juvero. Nos interea duriori conditione bellum sustinemus: quod neque expeditissimam dimicationem putamus; neque tamen refugiendo commissuri sumus, ut majus detrimentum resp. accipere possit. Quod si aut Cæsar se respexerit, aut Africanæ legiones celeriter venerint, securos vos ab hac parte reddemus. Tu, ut institui, me diligas, rogo, proprieque tuum esse, tibi persuadeas. v. Kal. Sex. ex castris.

## A R G U M E N T U M.

*Modeste reprehendit in Furnio præproperam adipiscenda Pratura festinationem.*

XXV. M. T. C. C. FURNIO S. D.

**S**I interest, id quod homines arbitrantur, reip. ac, ut institui, atque fecisti, navare operam, rebusque maximis, quæ ad extinguendas reliquias belli pertinent, interesse, nihil videris melius, neque laudabilius, neque honestius facere posse: istamque operam tuam,

navitatem, animum in tempore celeritati præturae anteponendum censeo. Nolo enim te ignorare, quantum laudem consequutus sis; mihi crede, proximam Planco, idque ipsius testimonio: præterea fama, scientiaque omnium. Quamobrem, si quid operis tibi etiam nunc restat, id maxime opere censeo persequendum, quid enim honestius? aut quid honesto anteponendum? sin autem satisfactum reip. putas; celeriter ad comitia, quando mature futura sunt, veniendum censeo, dummodo ne quid hæc ambitiosa festinatio imminuat ejus gloriæ, quam consequuti sumus. Multi clarissimi viri, cum reip. darent operam, annum petitionis suæ non obierunt, quod eo facilius nobis est, quod non est annus hæc tibi destinatus; ut, si ædilis fuisses, post biennium tuus annus esset. nunc nihil prætermittere videbere usitati, & quasi legitimi temporis ad petendum. Video autem, Planco consule, etsi etiam sine eo rationes expeditas haberes, tamen splendidiorem petitionem tuam fore, si modo ista ex sententia confecta essent. Omnino plura me scribere, cum tuum tantum consilium, judiciumque sit, non ita necesse arbitrabar: sed tamen sententiam meam tibi ignotam esse nolebam: cujus est hæc summa, ut omnia te metiri dignitate malim, quam ambitione; majoremque fructum ponere in perpetuitate laudis, quam in celeritate præturae. Hæc eadem loquutus sum domi meæ, adhibito Quinto fratre meo, & Cæcina, & Calvisio, studiosissimis tui, cum Dardanus, libertus tuus, interesset. omnibus probari videbatur oratio mea: sed tu optime judicabis. Vale.

## A R G U M E N T U M.

*Scripserat Furnius, ad comitia Prætoria se venturum; Cicero dissuadet, Comitæque dilata significat.*

XXVI. M. T. C. FURNIO S. D.

**L**ectis tuis litteris, quibus declarabas, aut omittendos Narbonenses, aut cum periculo

lo dimicandum; illud magis timui; quod vir-  
tutum, non moleste fero. Quod de Planci, &  
Bruti concordia scribis, in eo vel maximam  
ipem pono victorie. De Gallorum studio nos  
aliquando cognoscemus, ut scribis, cujus id  
opera maxime excitatum sit; sed jam, mihi  
crede, cognovimus. Itaque jucundissimis tuis  
litteris stomachatus sum in extremo, scribis e-  
nim, si in Sextilem comitia, cito te: si jam  
confecta, citius, ne diutius cum periculo fa-  
tuus sis. O mi Furni, quam tu causam tuam  
non nosti, qui alienas tam facile discas: tu  
nunc candidatum te putas: & id cogitas, ut  
aut ad comitia curras: aut, si jam confecta,  
domi tuz sis: scilicet ne cum maximo pericu-  
lo, ut scribis, stultissimus sis. Non arbitror,  
te ita sentire, omnes enim tuos ad laudem im-  
petus novi, quod si, ut scribis, ita sentis,  
non magis te, quam de te iudicium reprehendo  
meum. Te adipiscendi magistratus levissimi,  
& divulgatissimi, si ita adipiscere, ut plerique,  
præpropera festinatio abducat a tantis laudi-  
bus, quibus te omnes in cælum jure, & vere  
ferunt? Scilicet id agitur, utrum hac petiti-  
one, an proxima prætor fias, non ut ita de repu-  
blica mereare, omni honore ut dignissimus ju-  
dicere? Utrum nescis, quam alte ascenderis?  
an pro nihilo id putas? si nescis, tibi ignosco:  
nos in culpa sumus, si intelligis, ulla tibi  
est prætura vel officio, quod pauci, vel glo-  
ria, quam omnes sequuntur, dulcior? Hac de  
re & ego, & Calvisius, homo magni iudicii,  
tuique amantiſſimus, te accusamus quotidie:  
comitia tamen, quando ex his pendes, quan-  
tum facere possumus, quod multis de causa  
reip. arbitramur conducere, in Januarium men-  
sem protrudimus. Vince igitur, & vale.

## ARGUMENTUM.

*Lepidum quasi molli brachio objurgat, quia summis honoribus a Senatu ornatus, gratiarum agendarum officium neglexerat. Tum pacem inter Antonium, & bonos cives conciliare cupientem hortatur, ne se interponat.*

## XXVII. M. T. C. M. LEPIDO S. D.

**Q**Uod mihi pro mea summa erga te benevolentia magnæ curæ est, ut quam amplissima dignitate sis; moleste tui te senatui gratias non egisse, cum esses ab eo ordine ornatus summis honoribus. Pacis inter cives conciliandæ te cupidum esse lætor, pacem eam si a servitute sejungis, consules & reip. & dignitati tuæ: sin ista pax perditum hominem in possessionem impotentissimi dominatus restitutura est; hoc animo scito esse omnes sanos, ut mortem servituti anteponant. Itaque sapientius, meo quidem iudicio, facies, si te in istam pacificationem non interpones, quæ neque senatui, neque populo, neque cuiquam bono probatur. Sed hæc audies ex aliis, aut certior fies litteris. tu pro tua prudentia, quid optimum factu sit, videbis.

## ARGUMENTUM.

*Dolet, se non fuisse participem conjurationis in Casarem, quia superstes Antonius perniciem Reipub. molitur, deinde suum libertatis recuperandæ studium declarat.*

## XXVIII. M. T. C. C. TREBONIO S. D.

**Q**Uam vellem ad istas pulcherrimas epulas me Id. Mart. invitasses! reliquiarum nihil haberemus; at nunc cum his tantum negotii est, ut vestrum illud divinum in remp. beneficium nonnullam habeat querelam. Quod vero a te, viro optimo, seductus est, tuoque beneficio adhuc vivit hæc pestis; interdum, quod mihi vix fas est, tibi subirascor, mihi enim negotii plus reliquisti uni, quam præter me omnibus. Ut enim primum post Antonii fœdissimum discessum senatus haberi libere potuit,

ad

ad illum animum meum reverti pristinum, quem tu cum cive acerrimo, patre tuo, in ordo, & amore semper habuisti. Nam, cum senatum ad XIII. Kal. Jan. trib. plebis vocavissent, deque alia re referrent, totam remp. sum complexus, egique acerrime, senatumque jam languentem, & defessum ad pristinam virtutem, consuetudinemque revocavi, magis animi, quam ingenii viribus. Hic dies, meaque contentio, atque actio spem primum populo Rom. attulit libertatis recuperandæ: nec vero ipse postea tempus ullum intermisi de rep. non cogitandi solum, sed etiam agendi. Quod nisi res urbanas, actaque omnia ad te perferri arbitrarer, ipse perscriberem; quamquam eram maximis occupationibus impeditus; sed illa cognosces ex aliis, a me pauca, & ea summatim. Habemus fortem senatum, consulares partim timidos, partim male sentientes, magnum damnum factum est in Servio. L. Cæsar optime sentit; sed, quod avunculus est, non acerrimas dicit sententias: consules egregii; præclarus D. Brutus: egregius puer Cæsar, de quo spero equidem reliqua: hoc vero certum habeto, nisi ille veteranos celeriter conscripsisset, legionesque dux de exercitu Antonii ad ejus se auctoritatem contulissent, atque is oppositus esset terror Antonio, nihil Antonium sceleris, nihil crudelitatis præteriturum fuisse. Hæc tibi celsi audita esse arbitrabar, volui tamen notoria esse, plura scribam, si plus otii habuero. Vale.

## A R G U M E N T U M.

*Scribit de suo studio erga salutem Ampii exultantis, bonamque spem habere jubet.*

XXIX. M. T. C. AMPIO BALBO S. D.

**D**E meo studio erga salutem, & incolumitatem tuam credo te cognosse ex litteris tuorum: quibus me cumulatissime satisfecisse, certo scio, nec iis concedo, quamquam sunt singulari in te benevolentia, ut te salvum malint, quam ego; illi mihi necesse est concedant, ut tibi plus, quam ipsi, hoc tempore prodesse possim, quod quidem nec destiti facere, nec desistam, & jam  
in

in maxima re feci & fundamenta jeci salutis tuae.  
 Tu fac bono animo, magnoque sis, meque tibi  
 nulla in re defuturum esse confidas. Prid. Non.  
 Quint. Vale.

## A R G U M E N T U M.

*Prælium, victoriaque de Antonia palata  
 nuntiantur.*

XXX. SER. GALBA CICERONI S. D.

**D**ecimo septimo Kal. Maji, quo die Panfa in  
 castris Hirtiæ erat futurus, cum quo ego  
 eram, (nam ei obviam processeram millia passuum  
 centum, quo maturius veniret) Antonius legiones  
 eduxit duas, secundam, & quintam trigesimam,  
 & cohortes prætorias duas, unam suam, alteram  
 Silani, & evocatorum partem. Ita obviam  
 venit nobis, quod nos quatuor legiones tironum  
 habere solum arbitrabatur, sed noctu, quo tutius  
 venire in castra possemus, legionem Martiam,  
 cui ego præesse solebam, & duas cohortes  
 prætorias miserat Hirtius nobis. Cum equites  
 Antonii apparuissent, contineri neque legio Martia,  
 neque cohortes prætoriae potuerunt: quas  
 sequi cœpimus coacti, quando eas retinere non  
 poteramus. Antonius ad Forum Gallorum suas  
 copias continebat: neque sciri volebat, se legiones  
 habere: tantum equitatum, & levem armaturam  
 ostendebat. Posteaquam vidit se invito legionem  
 ire Panfa, sequi se duas legiones jussit tironum.  
 posteaquam angustias paludis, & silvarum  
 transivimus, acies est instructa a nobis duodecim  
 cohortium. Nondum venerant legiones duæ,  
 cum repente Antonius in aciem suas copias de  
 vico produxit, & sine mora concurrat. Primo  
 ita pugnatum est, ut acrius non posset ex utraque  
 parte pugnari; sed dexterius cornu, in quo  
 ego eram cum Martiæ legionis cohortibus octo,  
 impetu primo fugaverat legionem trigesimam  
 quintam Antonii, ut amplius passus quingentos  
 ultra aciem, quo loco steterat, processerit.  
 Itaque cum equites nostrum cornu circuire vel-  
 lent, recipere me cœpi, & levem armaturam  
 opponere Maurorum equitibus, ne aversos nos-  
 tros aggrederentur. Interim video me esse inter

Ad

Antonianos, Antoniumque post me esse aliquanto, repente equum immisi ad eam legionem tironum, quæ veniebat ex castris, scuto rejecto. Antoniani me insequi: nostri pila conicere velle, ita nescio quæ fato sum servatus, quod cito sum a nostris cognitus. In ipsa Æmilia, ubi cohors Cæsaris prætoria erat, diu pugnatum est, cornu sinisterius, quod erat infirmius, ubi Martiæ legionis duæ cohortes erant, & cohors prætoria, pedem referre cœperunt, quod ab equitatu circumabantur, quo vel plurimum valet Antonius. Cum omnes se recepissent nostri ordines, recipere me novissimus cœpi ad castra. Antonius, tanquam victor, castra putavit se posse capere, quo cum venit, complures ibi amisit, nec egit quicquam. Audita re, Hirtius cum cohortibus viginti veteranis redeunti Antonio in sua castra occurrit, copiasque omnes ejus delet, fugavitque eodem loco, ubi erat pugnatum, ad forum Gallorum. Antonius cum equitibus hora noctis quarta se in castra sua ad Mutinam recepit. Hirtius in ea castra rediit, unde Pansa exierat, ubi duas legiones reliquerat, quæ ab Antonio erant oppugnatae; sic partem majorem suarum copiarum Antonius amittit veteranarum; nec id tamen sine aliqua jactura cohortium prætoriarum nostrarum, & legionis Martiæ fieri potuit. aquilæ duæ, signa sexaginta sunt relata Antonii, res bene gesta est, ad XII. Kal. Maii, ex castris. Vale.

## A R G U M E N T U M.

*Excusat se, quod studium suum erga Remp. literis nondum declaraverit, sequæ libertatis recuperandæ cupidum ostendit.*

XXXI. C. ASINIUS POLLIO CIC. S. D.

**M**Inime mirum debet tibi videri, nihil me scripsisse de rep. posteaquam itum est ad arma, nam saltus Castulonensis, qui semper tenuit nostros tabellarios, etsi nunc frequentioribus latrociniis infestior factus est, tamen nequaquam tanta in mora est, quanta qui locis omnibus dispositi ab utraque parte scrutantur tabul.

bellarios, & retinent. itaque nisi nave perlatæ litteræ essent, omnino nescirem, quid illis fieret. Nunc vero nactus occasionem, posteaquam navigari coeptum est, cupidissime, & quam creberrime potero, scribam ad te. Ne movear ejus sermonibus, quem tamen nemo est qui videre velit, tamen nequaquam proinde, ac dignus est, oderunt homines, periculum non est. adeo est enim invisus mihi, ut nihil non acerbum putem, quod commune cum illo sit. Natura autem mea, & studia trahunt me ad pacis & libertatis cupiditatem. Itaque illud initium civilis belli sæpe deflevi; cum vero non liceret mihi nullius partis esse, quia utrobique magnos inimicos habebam; ea castra fugi, in quibus plane tutum me ab insidiis inimici sciebam non futurum, compulsus eo, quo minime volebam, ne in extremis essem, plane pericula non dubitanter adii. Cæsarem vero, quod me in tanta fortuna, modo cognitum, vetustissimorum familiarium loco habuit, dilexi summa cum pietate, & fide. quæ mea sententia gerere mihi licuit, ita feci, ut optimus quisque maxime probaret; quod jussus sum, eo tempore, atque ita feci, ut appareret, invito imperatum esse. Cujus facti injustissima invidia erudire me potuit, quam jucunda libertas, & quam misera sub dominatione vita esset. Iam, si id agitur, ut rursus in potestate omnia unius sint; quicumque is est, ei me profiteor inimicum, nec periculum est ullum, quod pro libertate aut refugiam, aut deprecer. Sed Consules neque S. C. neque litteris suis præceperant mihi, quid facerem, unas enim post idus Martias demum a Panfa litteras accepi; in quibus hortatur me, ut senatui scribam, me, & exercitum in potestate ejus futurum, quod, cum Lepidus concionaretur, atque omnibus scriberet, se consentire cum Antonio, maxime contrarium fuit, nam quibus comitatibus, invito illo, per illius provinciam legiones ducerem? aut, si cetera transissem, num etiam Alpes poteram transvolare, quæ præsidio illius tenentur? Adde hæc, quod perferri litteræ nulla conditione potuerunt, sexcentis enim locis excutuntur deinceps.



deinde etiam retinentur a Lepido tabellarii. Illud me Cordubæ pro concione dixisse, nemo vocabit in dubium, provinciam me nulli, nisi qui a senatu missus venisset, traditurum. Nam de legione trigesima tradenda quantas habuerim contentiones, quid ego scribam? qua tradita, quanto pro rep. infirmior futurus fuerim, quis ignorat? hac enim legione noli acrius, aut pugnacius quicquam putare esse. Quare me cum existima esse, qui primum pacis cupidissimus sim; (omnes enim cives plane studeo esse salvos) deinde qui & me, & rep. vindicare in libertatem paratus sim. Quod familiarem meum in tuorum numero habes, opinione tua mihi gratius est: invideo illi tamen, quod ambulat, & jocatur tecum. Quæres, quanti æstimem, si unquam licuerit vivere in otio, experieris, nullum enim vestigium abs te discessurus sum. Illud vehementer admiror, non scripsisse te mihi, manendo in provincia ne an ducendo exercitum in Italiam, reip. magis satisfacere possim. Ego quidem, etsi mihi tutius, ac minus laboriosum est manere; tamen, quia video tali tempore multo magis legionibus opus esse, quam provinciis, quæ præsertim recuperari nullo modo possunt, constitui, ut nunc est, cum exercitu proficisci. deinde ex litteris, quas Pansa misi, cognoscēs omnia, nam earum tibi exemplar misi, xvii. Kal. April. Cordubæ.

### ARGUMENTUM.

*Enumerat, quæ Balbus Quæstor suus flagitiose commiserit, quæque ipse fecerit ad exercitum in Reip. potestate continendum.*

XXXII. C. ASINIUS POLLIO CIC. S. D.

**B**Albus quæstor, magna numerata pecuniâ, magno pondere auri, majore argenti coacto de publicis exactionibus, ne stipendio quidem militibus reddito, duxit se a Gadibus; & triduum tempestate retentus ad Calpen, Kal. Jun. trajecit sese in regnum Bogudis, plane bene peculiat. His rumoribus utrum Gades referatur, an Romam (ad singulos enim nuntios turpissime consilia mutat) nondum scio, sed præter furta,

furta, & rapinas, & virgis caecos socios, hæc quoque fecit, ut ipse gloriari solet, eadem, quæ C. Cæsar; ludis, quos Gadibus fecit, Herennium Gallum histrionem, summo ludorum die annulo aureo donatum, in quatuordecim sessum deduxit; tot enim fecerat ordines equestris loci, quatuorviratum sibi prorogavit, comitia biennii biduo habuit, hoc est renuntiavit quos ei visum est; exules reduxit, non horum temporum, sed illorum, quibus a seditiosis senatus trucidatus, aut expulsus est, Sex. Varo procos. Illa vero jam ne Cæsaris quidem exemplo, quod ludis prætextam de suo itinere ad L. Lentulum procos, sollicitandum posuit, & quidem, cum ageretur, flevit memoria rerum gestarum commotus. Gladiatoribus autem Fadium quendam, militem Pompejanum, quia, cum depressus in ludum, blis gratis depugnasset, auctorari sese volebat, & ad populum confugerat, primum Gallos equites immisit in populum (conjecti enim sunt lapides in eum, cum arriperetur Fadius) deinde abstractum defodit in ludo, & vivum combussit, cum quidem præfusus nudis pedibus, tunica soluta, manibus ad tergum reiectis, inambularet, & illi misero quiritanti, Civis Romanus sum, responderet, Abi nunc, populi fidem implora. Bestiis vero cives Rom. in his circulatorem quendam auctionum, notissimum hominem Hispali, quia deformis erat, objecit. Cum huiusmodi portento res mihi fuit, sed de illo plura coram. Nunc quod præstat, quid me velitis facere, constituite, tres legiones firmas habeo; quarum unam vigesimam octavam, cum ad se initio belli accersisset Antonius hac pollicitatione, quo die in castra venisset, denarios quingenos singulis militibus daturum, in victoria vero eadem præmia, quæ suis legionibus (quorum quis ullum finem, aut modum futurum putavit?) incitatissimum retinui, ægre mehercule; nec retinuissem, si uno loco habuissem, ut pote cum singulæ quædam cohortes seditionem fecerint. Reliquas quoque legiones non destitit litteris atque infinitis pollicitationibus incitare, nec vero mi-

hus Lepidus urisit me & suis, & Antonii litteris, ut legionem trigessimam mitterem sibi. Itaque, quem exercitum neque vendere ullis præmiis volui, nec eorum periculorum metu, quæ, victoribus illis, portendebantur, diminueret, debetis existimare retentum, & conservatum reip. esse; atque ita credere, quodcumque imperassetis, facturum fuisse, si quod jussistis, feci. Nam & provinciam in otio, & exercitum in mea potestate tenui: finibus meæ provincie nusquam excessi; militem non modo legionarium, sed ne auxilium quidem ullum quoquam misi; & si quos equites decedentes nactus sum, supplicio affeci; quarum rerum fructum satis magnum, repub. salva, tulisse me putabo. sed respub. si me satis novisset, & major pars senatus, majores ex me fructus tulisset. Epistolam, quam Balbo cum etiam nunc in provincia esset, scripsi, legendam tibi misi, etiam prætextam, si voles legere, Gallum Cornelium familiarem meum polcito. VI. Id. Aug. Cordubæ. Vale.

## A R G U M E N T U M.

*Deplorat calamitatem Reip. quæ Mutinensi prælio & consules, & robur, sobolemque militum amiserat.*

XXXIII. ASINIUS POLLIO CICERONI S.D.

**Q**UO tardius certior fierem de præliis apud Mutinam factis, Lepidus effecit, qui meos tabellarios novem dies retinuit: tametsi tantam calamitatem reip. quam tardissime audire optandum est; sed illis, qui prodesse nihil possunt, neque mederi. Atque utinam eodem S. C. quo Plancum, & Lepidum in Italiam arcessistis, me quoque jussissetis venire, profecto non accepisset resp. hoc vulnus, quo si qui darentur in præsentia; quia videntur & duces & veterani Caesaris partium interiisse; tamen postmodum necesse est doleant, cum vastitatem Italiae respexerint; nam & robur, & soboles militum interiit: si quidem quæ nuntiantur, ulla

ex parte vera sunt. Neque ego non videbam, quanto usui reip. essem futurus, si ad Lepidum venissem, omnem enim cunctationem ejus discussissem, præsertim adjutore Planco, sed scribenti ad me ejusmodi litteras, quas leges, & concionibus, videlicet quas Narbone habuisse dicitur, similes, palparer necesse erat, si vellem commeatum, per provinciam ejus iter faciens, habere. Præterea verebar, ne, si antequam ego incepta perficerem, prælium confectum esset, pium meum consilium raperent in contrariam partem obrectatores mei, propter amicitiam, quæ mihi cum Antonio, non major tamen quam Planco, fuit. Itaque a Gadibus mense Aprili binos tabellarios in duas naves imposui; & tibi, & consulis, & Octaviano scripsi, ut me faceretur certiorem, quonam modo plurimum possem prodesse reipub. Sed, ut rationem in eo, quo die prælium Pansa commisit, eodem a Gadibus naves profectæ sunt, nulla enim post hiemem fuit ante eam diem navigatio; & hercule, longe remotus ab omni suspitione futuri civilis tumultus, penitus in Lusitania legiones in hibernis collocaram. Ita porro festinavit uterque confingere, tanquam nihil pejus timerent, quam ne sine maximo reipub. detrimento bellum componeretur, sed, si properandum fuit; nihil non summi ducis consilio gessisse Hirtium video. Nam hæc mihi scribuntur ex Gallia Lepidi, & nuntiantur: Pansa exercitum concisum esse: Pansam ex vulneribus mortuum: eodem prælio Martiam legionem interiisse, & L. Fabium, & C. Peducum, & D. Carfulenum: Hirtiano autem prælio & quartam legionem, & omnes peræque Antonii castris: item Hirtii quartam vero, cum castra quoque Antonii cepisset, a quinta legione concisam esse: ibi Hirtium quoque periisse, & Pontium Aquilam: dici etiam Octavianum cecidisse: (quæ si, quod Dii prohibeant, vera sunt, non mediocriter doleo.) Antonium iuspiter Mutinæ obsessiōnem reliquisse, sed habere equitatum, ac legiones sub signis armatas tres, & P. Bagieninam, inermes bene multos: Ventidium quoque secum legione septima, octava, nona conjun-

xisse; si nihil in Lepido spei sit, descensurum ad extrema, & non modo nationes, sed etiam servitia concitaturum. Parmam direptam. L. Antonium Alpes occupasse. Quæ si vera sunt, nemini nostrum cessandum est; neque expectandum, quid decernat senatus, res enim cogit huic tanto incendio succurrere omnes, qui aut imperium, aut nomen denique populi Romani salvum esse volunt. Brutum enim xvii. cohortes, & duas non frequentes tyronum legiones, quas conscripserat Antonius, habere audio. neque tamen dubito, quin omnes, qui supersint de Hirtii exercitu, confluant ad eum, nam in delectu non multum spei puto esse, præsertim cum nihil sit periculosius, quam patium confirmandi se se Antonio dari, anni autem tempus libertatem majorem mihi dat; propterea quia frumenta aut in agris, aut in villis sunt. Itaque proximis litteris consilium meum expedietur, nam neque deesse, neque superesse reipub. volo, maxime tamen doleo, adeo & longo, & infesto itinere ad me veniri, ut die quadragesimo post, aut ultra etiam, quam facta sunt, omnia nuntientur. Vale.

### ARGUMENTUM.

*Narrat in Antonii adventu, quid egerit; & agit gratias Ciceroni, quod iniquis de se rumoribus non crediderit.*

### XXXIV. M. LEPIDUS IMP. ITERUM, PONT. MAX. CICERONI S. D.

**S**I vales, bene est, ego quoque vafco. Cum audissem, Antonium cum suis copiis præmisso L. Antonio cum parte equitatus, in provinciam meam venire, cum exercitu meo a confluyente Rhodano castra movere, ac contra eos venire institui. Itaque continuis itineribus ad Forum Vocontium veni, & ultra castra ad flumen Argenteum contra Antonios feci. P. Ventidius suas legiones tres conjunxit cum eo, & ultra me castra posuit, habebat antea legionem secundam, & ex reliquis legionibus magnam multi-  
tudine

tudinem, sed inermium. Equitatum habet magnum; nam omnis ex prælio integer discessit, ita ut sint amplius equitum xxx. itaque ad me complures milites, & equites ab eo transferunt, & in dies singulos ejus copiz minuuntur. Silvanus, & Culeo ab eo discesserunt, nos, etsi graviter ab his læsi eramus, quod contra nostram voluntatem ad Antonium ierant; tamen, nostre humanitatis & necessitudinis causa, eorum salutis rationem habuimus nec tamen eorum opera utimur, neque in castris habemus; neque ulli negotio præfecimus. Quod ad bellum hoc attinet, nec senatui, nec reip. deerimus, quæ postea egerimus, faciam te certior. Etsi omni tempore summa studia officii mutuo inter nos certatim constiterunt pro nostra inter nos familiaritate, & proinde diligenter ab utroque conservata sunt, tamen non dubito, in tanto, & tam repentino motu reip. quin nonnulla de meis falsis rumoribus a meis obtreptatoribus, me indigna, ad te delata sint, quæ tuum animum magnopere moverent, pro tuo amore in rep. Ea te moderate accepisse, neque temere credendum judicasse, a meis procuratoribus certior sum factus; quæ mihi, ut debent, gratissima sunt. Memini autem & illa superiora, quæ abs tua voluntate protecta sunt ad meam dignitatem augendam, & ornandam, quæ perpetuo animo meo fixa manebunt. Abs te, mi Cicero, magnopere peto, si meam vitam, studium, diligentissime superioribus temporibus in rep. administranda, quæ Lepido digna sunt, perspecta habes, ut paria, aut eo ampliora reliquo tempore exspectes, & proinde tua auctoritate merendum existimes, quo tibi plura tuo merito debeo. Vale. xii. Kalend. Jun. ex castris, in Ponte Argenteo.

## A R G U M E N T U M.

*Antonii recepti causam confert in milites suos, dissensionem civium inique ferentes.*

XXXV. M. LEPIDUS IMP. ITERUM, PONT.  
MAX. S. P. PL. Q. R. S. D.

**S**I vos, liberique vestri valetis, bene est; ego quidem valeo. Deos, hominesque testor, P. C. qua mente, & quo animo semper in reimpulerim, & quam nihil antiquius communi salute, ac libertate judicarem: quod vobis brevi probassem, nisi mihi fortuna proprium consilium extorsisset, nam exercitus cunctus consuetudinem suam in civibus conservandis, communique pace, seditione facta, retinuit: meque tantæ multitudinis civium Romanorum salutis, acque incolumitatis causam suscipere, ut vere dicam, coegit. In qua re ego vos, P. C. oro, atque obsecro, ut privatis offensionibus omisis, summa reipub. consulatis, neve misericordiam nostram exercitusque nostri in civili dissensione sceleris loco ponatis. Quod si salutis omnium, ac dignitatis rationem habueritis, melius & vobis, & reip. consulereis. Data iv. Kal. Jun. à Ponte Argenteo. Valete.

## L I B E R X I.

## A R G U M E N T U M.

*D. Brutus M. Bruto, & C. Cassio, quibus cum Casarem occiderat, sermonem cum Hirtio habitum exponit, postulatamque a se liberam legationem significat.*

I. D. BRUTUS M. BRUTO, ET  
C. CASSIO S. D.

**Q**UO in statu simus, cognoscite. Heri vespere apud me Hirtius fuit: qua mente esset Antonius demonstravit; pessima scilicet,  
&

& infidelissima, nam se neque mihi provinciam dare posse aiebat, neque arbitrari tuto in urbe esse quemquam nostrum: adeo esse militum concitatos animos, & plebis. Quod utrumque esse falsum, puto vos animadvertere; atque illud esse verum, quod Hirtius demonstrabat, tirere eum, ne si mediocre auxilium dignitatis nostrae habuissemus, nullae partes iis in rep. relinquerentur. Cum in his angustiis versarer, placuit mihi, ut postularem legationem liberam mihi, reliquisque nostris, ut aliqua causa proficiscendi honesta quaereretur. Hoc se impetraturum pollicitus est, nec tamen impetraturum confido: tanta est hominum insolentia, & nostri insectatio, ac si dederint, quod petimus, tamen paulo post futurum puto, ut hostes judicemur, aut aqua, & igni nobis interdicatur. Quid ergo est, inquis, tui consilii? Dandus est locus fortunae: cedendum ex Italia, migrandum Rhodum, aut aliquo terrarum arbitror, si melior casus fuerit, revertemur Romam; si mediocris, in exilio vivemus; si pessimus, ad novissima auxilia descendemus. Succurret fortasse hoc loco alicui vestrum, cur novissimum tempus expectemus potius, quam nunc aliquid moliamur? Quia, ubi consistamus, non habemus, praeter Sex. Pompejum, & Basum Caecilium, qui mihi videntur, hoc nuntio de Caesare allato, firmiores futuri, satis in tempore ad eos accedemus, ubi, quid valeant, sciemus. Pro Cassio, & te, si quid velitis me recipere, recipiam, postulat enim hoc Hirtius, ut faciam. Rogo vos, quantum mihi rescribatis: nam non dubito, quin de his rebus ante horam quartam Hirtius me certiore sit facturus, quem in locum convenire possimus, quo me velitis venire, rescribi te. Post novissimum Hirtii sermonem, placuit mihi postulare, ut liceret nobis esse Romae publico praesidio, quod illos nobis concessuros non puto, magna enim invidiam iis faceremus, nihil tamen postulandum putavi, quod aequum esse statuerem. Valete.



## ARGUMENTUM.

*Petunt ab Antonio, an putet ipsos in Urbe, magna veteranorum militum frequentia, tutos fore.*

II. M. BRUTUS, ET C. CASSIUS PRÆT. T.  
M. ANTONIO COS. S. D.

**D**E tua fide, & benevolentia in nos, nisi persuasum esset nobis, non conscripsissemus hæc tibi; quæ profecto, quando istum animum habes, in optimam partem accipies. Scribitur nobis magnam veteranorum multitudinem Romam convenisse jam, & ad Kal. Jun. futuram multo majorem. De te si dubitemus, aut vereamur; sumus nostri dissimiles, sed certe, cum ipsi in tua potestate fuerimus, tuoque adducti consilio dimiserimus ex municipiis postros necessarios; neque solum edicto, sed etiam literis id fecerimus; digni sumus, quos habeas tui consilii participes, in ea præsertim re, quæ ad nos pertinet. Quare petimus a te, facias nos certiores tuæ voluntatis in nos; putetne nos tutos fore in tanta frequentia veteranorum, quos etiam de rep. pendæ ara cogitare audimus; quod velle te, probare vix quisquam posse videtur, qui nos salvos, & honestos velit. Nos ab initio spectasse otium, nec quicquam aliud a libertate communi quasisse, exitus declarat. Fallere nemo nos potest, nisi tu; quod certe abest a virtute tua, & fide, sed alius nemo facultatem habet decipiendi nos, tibi enim uni credidimus, & credituri sumus. Maximo de nobis timore afficiatur amici nostri, quibus etsi tua fides explorata est, tamen illud in mentem venit, multitudinem veteranorum facilius impelli ab alio quolibet, quam a te retineri posse. Rescribas nobis ad omnia, rogamus. Nam illud valde leve est, ac pugnatorum, ea re denunciatum esse veteranis, quod de commodis eorum mense Junio laturus esses, quem enim in pedimento futurum putas, cum de nobis certum sit nos quieturos? Non debemus cuiquam videri nimium vitæ cupidi, cum accidere nobis nihil possit sine perniciæ, & confusione omnium rerum. Vale.

## ARGUMENTUM.

*Expositulatio ad contumeliosas, & minaces Antonii litteras.*

III. BRUTUS, ET CASSIUS PRÆT.  
ANTONIO COS. S. D.

**L**itteras tuas legimus, simillimas edicti tui, contumeliosas, minaces, minime dignas, quæ a te nobis mitterentur. nos, Antoni, te nulla laceffivimus injuria, neque miraturum credidimus, si prætores, & ea dignitate homines, aliquid edicto postulassemus a consule; quod si indignaris, ausos esse id facere, concede nobis, ut doceamus, ne hoc quidem abs te Bruto, & Cassio tribui. Nam de delectibus habitis, & pecuniis imperatis, exercitibus sollicitatis, & nuntiis trans mare missis, quod te questum esse negas, nos quidem tibi credimus, optimo animo te fecisse; sed tamen neque agnosceimus quidquam eorum; & te miramur, cum hæreticueris, non potuisse continere iracundiam tuam, quin nobis de morte Cæsaris objiceres. Illud vero quemadmodum ferendum sit, tute cogita; non licere prætoribus, concordia, ac libertatis causa, per edictum de suo jure decedere, quin consul arma minetur. Quorum fiducia, nihil est, quod nos terreas, neque enim decet, aut convenit nobis, periculo ulli submittere animum nostrum: neque est Antonio postulandum, ut iis imperet, quorum opera liber est. Nos si alia hortarentur, ut bellum civile suscitare vellemus, litteræ tuæ nihil proficerent. NULLA enim minantis auctoritas apud liberos est, sed pulchre intelligis, non posse nos quam impelli, & fortassis ea re minaciter agis, ut judicium nostrum metus videatur. Nos in hac sententia sumus, ut te cupiamus etiam in libera repub. magnum, atque honestum esse; vocamus te ad nullas inimicitias; sed tamen pluris nostram libertatem, quam tuam amicitiam æstimemus. Tu etiam atque etiam vide, quid suscipias quid sustinere possis; neque quam diu vixerit Cæsar, sed quam non diu regnarit, fac

egites. Deos quæsumus, consilia tua reipubl. salutaria sint, ac tibi: sin minus, ut salva atque honesta republica, tibi quam minimum nocent optamus. Pridie Non. Sext.

### ARGUMENTUM.

*Res a se gestas exponit; pro quibus rogat Ciceronem, ut sibi sua sententia supplicationem decernat.*

IV. D. BRUTUS IMP. COS. DES. CICERONI S. D.

**S**I de tua in me voluntate dubitarem, multis a te verbis peterem, ut dignitatem meam tuerere; sed profecto est ita, ut mihi persuasum, me tibi esse curæ. Progressus sum ad Inalpinos cum exercitu, non tam nomen captans imperatorium, quam cupiens militibus satisfacere, firmosque eos ad tuendas nostras res efficere: quod mihi videor consequutus, nam & liberalitatem nostram, & animum sunt experti. Cum omnium bellicosissimis bellum gessi: multa castella cepi, multa vastavi: non sine causa ad senatum litteras misi. Adjuva nos tua sententia, quod cum facies, ex magna parte communi commodo inservieris. Vale.

### ARGUMENTUM.

*Excusat se, quod Bruti litteris non responderit; hortatur ad libertatem recuperandam; sua studia, officiaque pollicetur.*

V. M. T. C. BRUTO IMP. S. D.

**L**upus, familiaris noster, cum a te venisset, cumque Romæ quosdam dies commoraretur; ego eram in iis locis, in quibus maxime me tuto esse arbitrabar. eo factum est, ut ad te Lupus sine meis litteris rediret, cum tamen curasset tuas ad me perferendas. Romam autem veni ad v. id. Dec. nec habui quidquam antiquius, quam ut Panfam statim convenirem: ex quo ea de te cognovi, quæ maxime optabam. Quæte hortatione tu quidem non egēs, si ne illa quidem in re, quæ a te gesta est post hominū

me-

memoriam maximam, hortatorem desiderasti: illud tamen breviter significandum videtur, populum Rom. omnia a te expectare, atque in te aliquando recuperandæ libertatis omnem spem ponere. Tu, si dies, noctesque memineris, quod te facere certo scio; quantam rem gesseris; non obliviscere profecto, quantæ tibi etiam nunc gerendæ sint, si enim iste provinciam nactus eris, cui quidem ego semper amicus fui, antequam illum intellexi non modo aperte, sed etiam libenter cum repub. bellum gerere: spem reliquam nullam video salutis. Quamobrem te obsecro iisdem precibus, quibus senatus, populusque Rom. ut in perperum Rempublicam dominatu regio liberes, ut principiis consentiant exitus, tuum est hoc munus, tuæ partes, a te hoc civitas, vel omnes potius gentes non expectant solum, sed etiam postulant. Quamquam, cum hortatione non egeas, ut supra scripsi, non utar ea pluribus verbis. faciam illud, quod meum est, ut tibi omnia mea officia, studia, curas, cogitationes pollicear, quæ ad tuam laudem, & gloriam pertinebunt, quamobrem velim tibi ita persuadeas, me cum reipublicæ causa, quæ mihi vita mea carior est, tum quod tibi ipsi faveam, tuamque dignitatem amplificari velim, tuis optimis consiliis, amplitudini, gloriæ nullo loco defuturum. Vale.

## A R G U M E N T U M.

*Suam dignitatem Brutus commendaverat, respondet Cicero, sibi eam etiam atque etiam curam fore; idque jam in Senatu declaratum.*

V. L. M. T. C. B R U T O I M P. S. D.

**L**Upus noster cum Romam sexto die Musina venisset, postridie me mane convenit, tuque mihi mandata diligentissime exosuit, & litteras reddidit. Quod mihi tuam dignitatem commendas; eodem tempore existimo, te mihi meam dignitatem commendare, quam me hercule non habeo tua cariorum. Quare mihi gratissimum facies, si exploratum habebis.

N 6 tuis

tuis laudibus nullo loco nec consilium, nec studium meum defuturum. Cum tribuni pleb. edixissent, senatus adesset ad xiii. Kalend. Jan. haberentque in animo de praesidio consulum des. referre; quanquam statueram in senatum ante Kal. Jun. non venire; tamen, cum eodie ipso edictum tuum propositum esset, nefas esse duxi, aut ita haberi senatum, ut de tuis divinis in rempublicam meritis sileretur; quod factum esset, nisi ego venissem; aut etiam, si quid honorifice de te diceretur, me non adesse. Itaque in senatu veni mane, quod cum esset animadvertum, frequentissimi senatores convenerunt. quæ de te in senatu egerim, quæ in concione maxima dixerim, aliorum te litteris malo cognoscere. Illud tibi pertuadeas velim, me omnia, quæ ad tuam dignitatem augendam pertinebunt, quæ est per se amplissima, summo semper studio suscepturum, & defensurum. Quod quanquam intelligo me cum multis esse facturum; tamen appetam hujus rei principatum. Vale.

### ARGUMENTUM.

*Hortatur Brutum, ne in salute populi Rom. conservanda S. natæ auctoritatem expectet, sed voluntatem Senatus pro auctoritate habeat.*

VII. M. T. C. D. BRUTO IMP. S. D.

**Q**Uum adhibuisses domi meæ Lupus me, & Libonem, & Servium, consobrinum tuum, quæ mea fuerit sententia, cognosse te ex C. Seio arbitror, qui nostro sermoni interfuit. reliqua, quanquam statim Sejum Græcejas est subsequutus, tamen ex Græcejo poteris cognoscere. Caput autem est hoc, quod te diligentissime percipere, & meminisse velim, ut ne in libertate, & salute pop. Rom. conservanda auctoritatem senatus expectes nondum liberi; ne & tuum factum condemnes (nullo enim publico consilio rempub. liberaisti; quo est etiam res illa major, & clarior) & adolescentem, vel puerum potius, Cæsarem iudices temere fecisse, qui tantam causam publicam privato consilio susce-

perit ; denique homines rusticos , sed fortissimos viros , civesque optimos dementes fuisse iudices , primum milites veteranos , commilitones tuos , deinde legionem Martiam , legionem quartam , quæ suum consulem hostem judicaverunt , seque ad salutem reip. defendendam contulerunt . Voluntas senatus pro auctoritate haberi debet , cum auctoritas impeditur meru . Postremo suscepta tibi causa jam bis est , ut non sit integrum ; primum idib. Mart. deinde proxime , exercitu novo , & copiis comparatis . Quamobrem ad omnia ita paratus , atque animatus esse debes , non ut nihil facias , nisi iussus , sed ut ea geras , quæ ab omnibus summa cum admiratione laudentur . Vale .

### ARGUMENTUM.

*Scribit de legatis ad Antonium de pace missis , quæque sit omnium de Bruto expectatio , consensioque ad libertatem recuperandam .*

### VIII. M. T. C. D. BRUTO IMP. S. D.

**E**O tempore Polla tua misit , ut ad te , si quid vellem , darem litterarum , cum , quid scriberem , non habebam ; omnia enim erant suspensa propter expectationem legatorum ; qui quid egissent , nihil dum nuntiabatur , hæc tamen scribenda existimavi ; primum senatum , populumque Rom. de te laborare non solum salutis suæ causa , sed etiam dignitatis tuæ , admirabilis est enim quædam tui nominis caritas , amorque in te singularis omnium civium , ita enim sperant , atque confidunt , ut antea rege , sic hoc tempore regno te rempubl. liberaturum . Romæ delectus habetur , totaque Italia ; si hic delectus appellandus est , cum ultro te offerunt omnes ; tantus ardor animos hominum occupavit desiderio libertatis , odioque diutinæ servitutis . De reliquis rebus a te jam expectare litteras debemus , quid ipse agas , quid noster Hirrius , quid Cæsar meus ; quos spero brevi tempore societate victoriæ tecum copulatos fore . Reliquum est , ut de me  
id.

Id scribam, quod te ex tuorum litteris & spero, & malo cognoscere, me neque deesse ulla in te, neque unquam defuturum dignitati tuæ, Fac valeas.

## A R G U M E N T U M.

*Rogat Ciceronem, prospiciat, ne utroque Consule ad Mutinam occiso, hostes Reip. convalescant: monetque quid agendum.*

## IX. BRUTUS CICERONI S. D.

**P**ansa amisso, quantum detrimenti resp. acceperit, non te præterit, nunc auctoritate, & prudentia tua prospicias oportet, ne inimici nostri, consulibus sublati, sperent se convalescere posse. ego, ne consistere possit in Italia Antonius, dabo operam, sequar eum confestim, utrumque me præstiturum spero, ne aut Ventidius elabatur, aut Antonius in Italia moretur. in primis rogo te, ad hominem ventosissimum Lepidum mittas, ne nobis bellum redintegrare possit, Antonio sibi conjuncto. Nam de Pollione Asinio puto te perspicere, quid sit facturus: multæ, & bonæ, & firmæ sunt legiones Lepidi, & Asinii; neque hæc idcirco tibi scribo, quod te non eadem animadvertere sciam; sed quod mihi persuasissimum est, Lepidum recte facturum nunquam; si forte vobis id de hoc dubium est. Plancum quoque confirmetis, orōe quem spero, pulso Antonio, reipub. non defuturum. Si se Alpes Antonius transiecerit, constitui præsidium in Alpibus collocare, & te de omni re facere certiorē. 14. Kalend. Maji, ex castris Rhegii.

## A R G U M E N T U M.

*Queritur de quorundam malevolentia, & Reip. periculum exponit.*

## X. BRUTUS CICERONI S. D.

**N**on mihi rempublicam plus debere arbitror, quam me tibi, gratiorem me esse in te posse, quam isti perversi sint. in me, exploratum habes; si tamen hæc temporis videantur dici

dicī causa, malle me tuum iudiciū, quam ex altera parte omnium istorum. tu enim a certo sensu, & vero iudicas de nobis: quod isti ne faciant, summa malevolentia, & livore impediuntur. Interpellent me quominus honoratus sim, dum ne interpellent, quominus respub. a me commode administrari possit, quæ quanto sit in periculo, quam poterō brevissime exponam. Primum omnium, quantam perturbationem rerum urbanarum afferat obitus consulū, quantamque cupiditatem hominibus injiciat vacuitas, non te fugit. Satis me multa scripsisse, quæ litteris commendari possint, arbitror. scio enim cui scribam. Revertor nunc ad Antonium, qui ex fuga cum parvulam manū peditū haberet inermiū, ergastula solvendo, omneque genus hominū arripiendo, satis magnum numerū videtur effecisse. Huc accessit manū Ventidii: quæ trans Apenninū itinere factō difficillimo, ad Vada pervenit, atque se ibi cum Antonio conjunxit. est numerus veteranorū, & armatorū satis frequens cum Ventidio, consilia Antonii hæc sint necesse est, aut ad Lepidū ut se conferat, si recipitur, aut Apenninō, Alpibusque se teneat, & decursionibus per equites, quos habet multos, vasset ea loca, in quæ incurrerit; aut rursus se in Etruriā referat; quod ea pars Italiæ sine exercitu est. Quod si me Cæsar audisset, atque Apenninū trahisset, in tantas angustias Antonium compulisset, ut inopia potius, quam ferro conficeretur, sed neque Cæsari imperari potest: nec Cæsar exercitui suo: quod utrumque pessimum est. Cum hæc talia sint: quominus, quod ad me pertinebit, homines interpellent, ut supra scripsi, non impedio: hæc quemadmodum explicari possint, aut a te cum explicabuntur, ne impediuntur, timeo. Alere jam milites non possum. cum ad rempublicam liberandam accessi, H. S. mihi fuit pecuniæ CD amplius, tantum abest, ut meæ rei familiaris liberum sit quidquam; ut meos jam omnes amicos are alieno obstrinxerim, septennum numerum legionū alo, quæ difficultate, tu arbitrare, non si Varronis thesauros haberem, sustinere sumptus possem. Cum p. imum



de Antonio exploratum habuero, faciam te certiore. Tu me amabis ita, si hoc idem me in te facere senseris. 111. Non. Maji, ex castris, Dertona. Vale.

## A R G U M E N T U M.

*Scribit de Antonii profectioe ad Lepidum, & de dubia Planci fide, suoque in Remp. studio, atque constantia.*

XI. D. BRUTUS IMP. COS. DES.  
CICERONI S. D.

**E**odem exemplo litterarum tuarum a te mihi redditarum sunt, quo pueri mei attulerunt. Tantum me tibi debere existimo, quantum persolvere difficile est. Scripsi tibi, quae hic gererentur, in itinere est Antonius: ad Lepidum proficiscitur: ne de Planco quidem spem adhuc abiecit, ut ex libellis ejus animadverti, qui in me inciderunt: in quibus quos ad Asinium, quos ad Lepidum, quos ad Plancum mitteret, scribebat, ego tamen non habui ambiguum, & statim ad Plancum misi, & biduo ab Allobrogibus, & totius Galliarum legatos expecto, quos confirmatos domum remittam. Tu, quae istic opus erunt administrari prospicies, ut ex tua voluntate rei publicae commodo fiant. Malevolentiae hominum in me, si poteris, occurre: si non poteris, hoc te consolabere, quod me de statu meo nullis contumeliis deterrere possunt. Pridie Non. Maji ex castris, finibus Statiensium.

## A R G U M E N T U M.

*Queritur, bellum ab Antonio renovatum: & in eo Bruti culpam videtur agnoscere.*

XII. M. T. C. BRUTO IMP. COS. DES.  
S. D.

**T**res uno die a te accepi epistolas; unam brevem, quam Flacco Volumnio dederas; duas pleniores, quarum alteram tabellarius T. Vibii attulit, alteram ad me misit Lupus. Ex tuis  
lit.

litteris, & ex Græceji oratione, non modo non restinctum bellum, sed etiam inflammatum videtur. Non dubitare autem pro tua singulari prudentia quin perspicias si aliquid firmitatis natum sit Antonius, omnia illa tua præclara in rempubl. merita ad nihilum esse ventura. Ita enim Romani erat nuntiatus, ita persuasum omnibus, cum paucis incermibus, perterritis metu, fracto animo fugisse Antonium, qui si ita se habet, ut, quemadmodum audiebam de Græcejo, configi cum eo sine periculo non possit: non ille mihi fugisse a Mutina videtur, sed locum belli gerendi mutasse. Itaque homines alii fracti sunt, nonnulli etiam queruntur: quod persequuti non sitis, opprimi potuisse, si celeritas adhibita esset, existimant. Omnino EST hoc populi, maximeque nostri, in eo potissimum abuti libertate, per quem eam consequutus sit: sed tamen providendum est, ne qua iusta querela esse possit. Res sic se habet. is bellum confecerit, qui Antonium oppresserit. hoc quam habeat vim, te existimare malo, quam me apertius scribere. Vale.

### ARGUMENTUM.

*Excusat tarditatem suam in Antonio persequendo, & quo res in statu sit, exponit.*

### XIII. BRUTUS IMP. COS. DES. C. S. D.

**J**AM non ago tibi gratias; cui enim re vix referre possum, huic verbis non patitur res satisfieri. Attendere te volo, quæ in manibus sunt, qua enim prudentia es, nihil te fugiet, si meas litteras diligenter legeris. Sequi confestim Antonium his de causis, Cicero, non potui, eram sine equitibus, sine jumentis: Hirtium periisse nesciebam: Cæsari non credebam prius, quam convenissem, & colloctus essem, hic dies hoc modo abiit. Postridie mane a Pansa sum accersitus Bononiam. cum in itinere essem, nuntiatum mihi est, eum mortuum esse, recurri ad meas copulas, sic enim vere eas appellare possum. sunt extenuatissima, & inopia omnium rerum

Pessime accepta, biduo me Antonius antecessit, itinere multo maiore fugiens, quam ego sequens, ille enim iit passim, ego ordinatim, quacun- que ivit, ergastula solvit, homines arripuit: constitit nusquam prius, quam ad Vada venit: quem locum volo tibi esse notum. jacet inter Apenninum, & Alpes, impeditissimus ad iter faciendum. Cum abessem ab eo millia passuum triginta, & se jam Ventidio coniunxisset, concio ejus ad me est allata, in qua petere cepit a militibus, ut se trans Alpes sequerentur: sibi cum M. Lepido convenire. Succlamatum est, & frequenter a militibus Ventidianis (nam suos valde quam paucos habet) sibi aut in Italia pereundum esse, aut vincendum, etiam orate coeperunt, ut Pollentiam iter facerent, cum sustinere eos non posset, in posterum diem iter suum contulit, hac re mihi nuntiata statim quinque cohortes Pollentiam praemissi, trevunque iter eo contuli, hora ante praesidium meum Pollentiam venit, quam Trebellius cum equitibus, sane quam sum gavisus, in hoc enim victoriam puto consistere, in spem venerant, quod neque Planci quatuor legiones omnibus suis copis pares arbitrabantur: neque ex Italia tam celeriter exercitum transjici posse credebant, quos ipsi adhuc satis arroganter Allobroges, equitatuque omnis, qui eo praemissus erat a nobis, sustinebant: nostroque adventu sustineri facilius posse confidimus, tamen, si quo etiam casu Isaram se transjecerint; ne quid detrimenti resp. injungant, summa a nobis dabitur opera. Vos magnum animi, optimamque spem de summa repub. habere volumus, cum & nos, & exercitus nostros, singulati concordia conjunctos, ad omnia pro vobis videatis paratos. Sed tamen nihil de diligentia remittere debetis, dareque operam, ut quam paratissimi ab exercitu, reliquisque rebus pro vestra salute contra sceleratissimam conspirationem hostium confligamus: qui quidem eas copias, quas diu simulatione reipub. comparabant, subito ad patriae periculum converterunt.

## A R G U M E N T U M.

*Ad Bruti litteras respondet de Octaviano ornando, de legionibus ad Brutum perducendis, de pecunia, aliisque rebus.*

XIV. M. T. C. BRUNO IMP. S. D.

**M**irabiliter mi Brute, laetor, mea consilia, measque sententias a te probari de Decem viris, de ornando adolescente, sed quid refert? mihi crede homini non glorioso, plane jam, Brute, frigeo ὑπὸ πύλων enim erat meum senatus: id jam est dissolutum. tantam spem attulerat exploratae victoriae tua praecleara Mutinae eruptio, fuga Antonii, conciso exercitu, ut omnium animi relaxati sint: meaque illa vehementes contentiones tanquam εὐταμανίας esse videantur. Sed, ut ad rem redeam, legionem Martiam, & quartam negant, qui illas norunt, ulla conditione ad te posse perducere Pecuniam, quam consideras, ratio potest haberi, eaque habebitur. De Bruto accersendo, Casareque ad Italiae praesidium tenendo, valde tibi assentior; sed, ut scribis, habes obrectatores, quos equidem facillime sustineo: sed impediunt tamen. Ex Africa legiones expectantur; sed bellum istuc renatum homines mirantur, nihil tam praeter spem unquam; nam, die tuo natali victoria nuntiata, in multa saecula videbamus remp. liberatam, novi timores retexunt superiora. Scripsisti autem ad me iis, quas idibus Maji dedisti, modo te accepisse a Plancio litteras, non recipi a Lepido Antoniam, id si ita est, omnia facilio-  
ra: sin aliter, magnum negotium: cujus exitum ne extimescam, tuae partes sunt. ego plus, quam feci, facere non possum, te tamen, id, quod spero, omnium maximum, & clarissimum videre cupio. Vale.

## ARGUMENTUM.

*Laudat officium, & diligentiam Bruti: voluptatem, latitiamque omnium significat ex Bruti, Plancique conjunctione; eumque hortatur, ut in tuenda Repub. seipsum vincat.*

## XV. M.T.C. BRUTO IMP. S.D.

**E**tsi mihi tuarum litterarum jucundissimae sunt; tamen jucundius fuit, quod in summa occupatione tua Planco collegae mandasti, ut te mihi per litteras excusaret; quod fecit ille diligenter, mihi autem nihil amabilius officio tuo, & diligentia. Conjunctio tua cum collega, concordiae vestra, quae litteris communibus declarata est, senatui, populoque Rom. gratissima accidit. Quod superest, perge, mi Brute, & jam non cum aliis, sed tecum ipse certa. Plura scribere non debeo, praesertim ad te, quo magistro brevitatis uti cogito. Litteras tuas vehementer exspecto, & quidem tales, quales maxime opto.

## ARGUMENTUM.

*Commendat L. Aelium Lamiam in petitione Praeturae.*

## XVI. M.T.C. BRUTO IMP. S.D.

**P**ermagni interest, quo tibi hac tempore epistola reddita sit; utrum cum sollicitudinis aliquid haberes, an, cum ab omni molestia vacuus esses. Itaque ei praeci, quem ad te misi, ut tempus observaret epistolae tibi reddendae, nam quemadmodum coram, qui ad nos intempestive adeunt, molesti saepe sunt: sic epistolae offendunt; non loco redditae. Si autem, ut spero, nihil te perturbat, nihil impedit, & ille, cui mandavi, satis scite, & commode tempus ad te cepit adeundi: confido me, quod velim, a te facile impetraturum. L. Lamia praeturam petit, hoc ego utor uno omnium plurimum, magna vetustas, magna consuetudo intercedit: quodque plurimum valet, nihil mihi ejus est familiaritate jucundius. Magno praeterea beneficio ejus, magnoque merito sum obligatus, nam Clodianis temporibus, cum equestri ordinis princeps esset, proque mea salute acerrime propugnaret,

a Gabinio CO.S. relegatus est: quod ante id tempus civi Romano Romæ contigit nemini. hoc cum pop. Rom. meminerit, me ipsum non meminisse turpissimum est. Quapropter persuade tibi, mi Brute, me petere præturam, quanquam enim Lamia summo splendore, summa gratia est, usus magnificentissimo munere ædilitio: tamen, quasi ea ita non essent, ego suscepi totum negotium. Nunc, si me tanti facis, quanti certe facis, quando equitum centurias tenes, in quibus regnas, mitte ad Lupum nostrum, ut is nobis eas centurias conficiat. Non tenebo te pluribus: ponam in extremo, quod sentio, nihil est, Brute, cum omnia a te expectem, quod mihi gratius facere possis. Vale.

## A R G U M E N T U M.

*Commendat eundem Lamiam.*

XVII. M.T.C. BRUTO IMP. S.D.

**L**amia uno omnium familiarissime utor, magna ejus in me non dico officia, sed merita, eaque sunt populo Rom. notissima, is magnificentissimo munere ædilitatis perfunctus, petit præturam: omnesque intelligunt, nec dignitatem ei deesse, nec gratiam, sed is ambicias exstare videtur, ut ego omnia pertimescam, totamque petitionem Lamiæ mihi sustinendam putem. in ea re quantum me possis adjuvare, facile perspicio: nec vero, quantum mea causa velis, dubito. Velim igitur, mi Brute, tibi persuadeas, nihil me majore studio a te petere, nihil te mihi gratius facere posse, quam si omnibus tuis opibus, omni studio Lamiam in petitione juveris, quod ut facias, vehementer te rogo.

## A R G U M E N T U M.

*Reprehendit in Bruto nonnullam timoris significationem.*

XVIII. M.T.C. BRUTO IMP. S.D.

**E**t si ex mandatis, quæ Galba, Volum-  
nioque ad senatum dedisti, quid cimen-  
dum,

dum, suspicandumque putare, suspicabamur: tamen timidiora mandata videbantur, quam erat dignum tua, populiue Rom. victoria. Senatus autem, mi Brute, fortis est, & habet fortes duces. Itaque moleste ferebat, se a te quem omnium, quicumque fuissent, fortissimum iudicaret, timidum, atque ignavum iudicari, etertum cum, te incluso, spem maximam omnes habuissent in tua virtute, florente Antonio; quis erat, qui quidquam timeret, profligato illo, te liberato? Nec vero Lepidum timebamus, quis enim esset, qui illum tam furiosum arbitraretur, ut, qui in maximo bello pacem velle se dixisset, is in optatissima pace bellum reipub. indiceret? Nec dubito, quin tu plus provideas, sed tamen, tam recenti gratulatione, quam tuo nomine ad omnia deorum templa fecimus, renovatio timoris magnam molestiam afferebat. Quare velim equidem, id, quod spero, ut plane abiectus, & fractus sit Antonius: sin aliquid virium forte collegerit, sentiet nec senatui consilium, nec Pop. Rom. virtutem deesse, nec reipub. te vivo imperatorem. xiv. Kal. Jun. Vale.

## ARGUMENTUM.

*Timere se scribit Reip. vicem, & Vicetinos commendat.*

XIX. D. BRUTUS CICERONI S. D.

**A**D senatum quas litteras misi, velim prius perlegas: & si qua tibi videbuntur, commutes, necessario me scripsisse, ipse animadvertes: nam cum putarem quartam, & Martiam legiones mecum futuras, ut Druso, Pauloque placuerat, vobis assentientibus, minus de reliquis rebus laborandum existimaui, nunc vero cum sint cum vironibus egentissimis; valde & meam, & vestram vicem timeam, necesse est. Vicetini me, & M. Brutum praecipue observant, his ne quam patiari injuriam fieri in senatu vernerum causa, a te peto, causam habent optimam, officium in reipub. summum, genus hominum adversariorum seditiosum, & inertissimum. xiv. Kal. Jun. Vercellis.

## A R G U M E N T U M .

*Timere se ait Ciceronis causa , cumque mones , ut veteranorum animos sibi conciliet .*

XX. BRUTUS IMP. CICERONI S. D.

**Q**UOD pro me non facio , id pro te facere meus in te amor tuaque officia cogunt , ut timeam . Sape enim mihi cum esset dictum , neq; a me contemptum , povissime Labeo Segulius homo sui simillimus , narravit mihi , apud Caesarem se fuisse , multumque sermonem de te habitum esse : ipsum Caesarem nihil sane de te questum , nisi dictum quod diceret te dixisse laudandum adolescentem ornandum , tollendum ; se non esse commissurum , ut tolli possit , hoc ego Labeonem credo illi retulisse , aut finxisse dictum , non ab adolescente prolatum . Veteranus vero pessime loqui volebat Labeo me credere & tibi ab iis instare periculum , maximeque indignari , quod in X. viris neque Caesar , neque ego habitus essemus , atque omnia ad vestrum arbitrium essent collata . Hæc cum audissem , & jam in itinere essem , committendum non putavi , prius ut Alpes transgrederer , quam quid illuc ageretur , scirem . Nam de tuo periculo crede mihi iactione verborum , & denunciatione periculi sperare eos , te perterrefacto , adolescente impulso , posse magna consequi præmia , & totam istam cantilenam ex hoc pendere , ut quamplurimum lucri faciant . Neque tamen non te cautum esse volo & insidias vitantem , nihil enim tua mihi vita potest esse jucundius , neque carius . Illud vide , ne timendo , magis timere cogare ( & quibus rebus potest occurrere veteranis , occurras : primum , quod desiderant de X. viris , facias : deinde de præmiis , si tibi videtur , agros militum eorum , qui cum Antonio veterani fuerunt , his dandos censeas ab utrisque nobis : de nummis , leate , ac ratione habita pecuniæ : senatum de ea re constitutum . quatuor legionibus iis , quibus agros dandos censuisti , video facultatem fore ex agris Syllanis , & agro Campano aqualiter , aut forte agros legionibus assignari puto oportere . Hæc me tibi scribere



bere non prudentia mea hortatur, sed amor in te, & cupiditas otii, quod sine te consistere non potest. Ego, nisi valde necesse fuerit, ex Italia non excedam, legiones armo, paro: spero, me non pessimum exercitum habiturum ad omnes casus, & impetus hominum. de exercitu, quem Pansa habuit, legionem mihi Cæsar non remittit. Ad has litteras statim mihi rescribe, tuumque aliquem mitte, si quid reconditum magis erit, meque scire opus esse putaris. Vale.  
VIII. Kal. Jun. Eporedia.

### ARGUMENTUM.

*Respondet proxima superiori epistola.*

XXI. M.T.C. BRUTO IMP. S.D.

**D**ii isti Segulio male faciant, homini nequissimo omnium, qui sunt, qui fuerunt, qui futuri sunt, quid? tu illum tecum solum, aut cum Cæsare, qui neminem prætermiserit, quicum loqui potuerit, cui non eadem ista dixerit? te tamen, mi Brute, sic amo, ut debeo, quod istud, quicquid esset nugarum, me scire voluisti: signum enim magnum amoris dedisti. Nam, quod idem Segulius ait, veteranos queri, quod tu, & Cæsar in decemviris non essetis: utinam ne ego quidem essem: quid enim molestius? sed tamen, cum ego sensissem, de iis, qui exercitus haberent, sententiam ferri oportere, iidem illi, qui solent, reclamant: itaque excepti etiam estis, me vehementer repugnante; quocirca Segulium negligamus, qui res novas quærit: non quod veterem comederit, (nullam enim habuit) sed hanc ipsam recentem novam devoravit. Quod autem scribis, te, quod pro te ipso non facias, id pro me facere, ut de me timeas aliquid, omni te, vir optime, mihiq; charissime Brute, de me metu libero; ego enim, quæ provideri poterunt, non fallar in iis; quæ cautionem non habebunt, de iis non ita valde laboro, si metenim impudens, si plus postulem, quam homini a rerum natura tribui potest. Quod mihi præcipis, ut caveam, ne timendo magis timere cogar, & sapienter, & amicissime præcipis: sed velim

im tibi persuadeas ; cum te constet excellere hoc genere virtutis , ut nunquam extimescas , nunquam perturbare , me huic tuæ virtuti proxime accedere . Quamobrem neque metuum quidquam , & cavebo omnia . sed vide , ne tua jam , mi Brute , culpa futura sit , si ego quidquam timeam , tuis enim opibus , & consularu tuo , etiam si timidi essemus , tamen omnem timorem abjiceremus , præsertim cum persuasum omnibus esset , mihiq; maxime , nos a te unice diligi . Consiliis tuis , quæ scribis , de quatuor legionibus , deque agris assignandis ab utrisque vestrum , vehementer assentior . Itaque cum quidam de collegis nostris agrariam curationem ligurirent , disturbavi rem , totamque vobis integram reservavi . Si quid erit occultius , & , ut scribis , reconditum , meorum aliquem mittam , quo fidelius ad te litteræ perferantur . Vale . Prid. Non. Jun.

## ARGUMENTUM.

*Petit a Bruto , ut Ap. Claudium , qui Antonii partes secutus erat , in civitate retineat .*

## XXII. M. T. C. BRUTO IMP. S. D.

CUM Ap. Claudio C. F. summa mihi necessitudo est , multis ejus officiis , & meis mutis constituta . peto a te majorem in modum , vel humanitatis tuæ , vel meæ causa , ut eum auctoritate tuæ , quæ plurimum valet , conservatum velis . volo te , cum fortissimus vir cognitus sis , etiam clementissimum existimari , magno tibi erit ornamento , nobilissimum adolescentem beneficio tuo esse salvum , cujus quidem causa hoc melior debet esse , quod , pietate adductus , propter patris restitutionem se cum Antonio conjunxit . Quare , etsi minus veram causam habebis , tamen vel probabilem aliquam poteris inducere . nutus tuus potest hominem summo loco natum , summo ingenio , summa virtute , officiosissimum præterea & gratissimum , incolumem in civitate retinere . quod ut facias , ita a te peto , ut majore studio magisve ex animo petere non possim . Vale .

*Hortatur Ciceronem ad bene sperandum.*

## XXIII. BRUTUS CICERONI S. D.

**N**os hic valeamus recte: & quo melius valamus, operam dabimus. Lepidus commode de nobis sentire videtur; omni timore deposito, debemus libere reip. consulere. Quod si omnia essent aliena, tamen tribus tantis exercitibus propriis reip. valentibus, magnum animum habere debebas, quem & semper habuisti, & nunc, fortuna adjuvante, augere potes. Quæ tibi superioribus litteris mea manu scripsi, terrendi tua causa homines loquuntur. si frænum momorderis; peream, si te omnes quotquot sunt, conantem loqui ferre poterunt. Ego, tibi ut antea scripsi, dum mihi a te litteræ veniant, in Italia morabor. Vale. viii. Kal. Jun. Eporædia.

## ARGUMENTUM.

*Bruti epistola, si quid antea fuerat timoris, ademptum significat. Addit, quid Bruto sit agendum, & de pecunia decreta.*

## XXIV. M. T. C. BRUTO S. D.

**N**arro tibi: antea subirascebar brevitæ tuarum litterarum: nunc mihi loquax esse videor, te igitur imitabor. Quam multa, quam paucis! te recte valere, operamque dare, ut quotidie melius: Lepidum commode sentire: tribus exercitibus quidvis nos oportere confidere. Si timidus essem, tamen ista epistola mihi omnem metum abstersisses, sed, ut mones, frænum momordi, etenim qui, te incluso, omnem spem habuerim in te, quid nunc putas? cupio jam vigiliam meam. Brute, tibi tradere, sed ita, ut ne desim constantiæ meæ. Quod scribis in Italia te moraturum, dum tibi litteræ meæ veniant: si per hostem licet, non erraris; multa enim Romæ, sin adventu tuo bellum confici potest; nihil sit antiquius. Pecunia expeditissima quæ erat, tibi decreta est. Habes amantissimum Servilium, nos non desumus. Vale. viii. id. Jun.

A R-

## ARGUMENTUM.

*Scribit, se brevitatem in scribendo amare, Bruti exemplo: Reip. spem in ipso, & in Plancio esse: de M. Bruto, nihil certi.*

XXV. M. T. C. BRUTO IMP. S. D.

**E**Xspectanti mihi tuas quotidie litteras Lupa noster subito denuntiavit, ut ad te scriberem, si quid vellem: ego autem, etsi, quid scriberem, non habebam (acta enim ad te mitti sciebam, inanem autem sermonem litterarum tibi inuicundum esse audiebam) brevitatem sequutus sum, te magistro. Scito igitur, in te, & in collega spem omnem esse. De Bruto autem nihil adhuc certi: quem, ego, quemadmodum præcipis, privatis litteris ad bellum commune vocare non desino, qui utinam jam adesset: intestinum urbis malum, quod est non mediocre, minus timeremus. Sed quid ago? non imitor *Ἀντιστομένης* tuum; altera jam pagella procedit, vince; & vale. xiv. Kal. Quint.

## ARGUMENTUM.

*Solicitus ob Antonii cum Lepido conjunctionem postulat, ut legiones ad eum mittantur, & stipendium.*

XXVI. BRUTUS IMP. CICERONI S. D.

**I**N maximo meo dolore hoc solatio utor, quod intelligunt homines, non sine causa me timuisse ista, quæ acciderunt. Deliberent, utrum transjiciant legiones ex Africa, nec ne, & ex Sardinia: Brutum accersant, nec ne; mihi stipendium dent, an non; decernant, ad senatum litteras misi. Credo mihi, nisi ista omnia ita sunt, quemadmodum scribo, magnum nos omnes adituros periculum. Rego te, vide te, quibus hominibus negotium detis, qui ad me legiones adducant: & fride opus est, & celeritate. Vale: iiii. Non. Jun. ex castris.

## ARGUMENTUM.

*Questus erat Matius, se a Cicerone, ut libertatis inimicum, accusari: Cicero factum negat.*

XXVII. M. T. C. MATIO S. D.

**N**ondum satis constitui, molestiæne plus, an voluptatis attulerit mihi Trebatius noster, homo tum plenus officii, tum utriusque nostrum amantissimus. nam cum in Tusculanum vesperti venissem, postridie ille ad me, nondum satis firmo corpore cum esset, mane venit, quem cum objurgarem, quod parum valerudini parceret: tum ille, nihil sibi fuisse longius, quam ut me videret. Nunquidnam, inquam, novi? detulit ad me querelam tuam: de qua prius, quam respondeo, pauca præponam. Quantum memoria repetere præterita possum, nemo est mihi te amicus antiquior. Sed VETUSTAS habet aliquid commune cum multis, amor non habet. dilexi te, quo die cognovi, meque a te diligi judicavi, tuus deinde discessus, isque diuturnus, ambitio nostra, & vitæ dissimilitudo non est passa, voluntates nostras consuetudine conglutinari, tuum tamen erga me animum agnovi multis annis ante bellum civile, cum Cæsar esset in Gallia, quod enim vehementer mihi utile esse patabas, nec inutile ipsi Cæsari, perfecisti, ut ille me diligeret, coleret, haberet in suis. Multa prætereo, quæ temporibus illis inter nos familiarissime dicta, scripta, communicata sunt: graviora enim sunt consequuta, & initio belli civilis, cum Brundisium versus ires ad Cæsarem, venisti ad me in Formianum. Primum, hoc ipsum quanti, præsertim temporibus illis? deinde, oblitum me putas consilii, sermonis, humanitatis tuæ? quibus rebus interesse memini Trebatium. Nec vero oblitus sum litterarum tuarum, quas ad me misisti, cum Cæsari obviam venissem in agro, ut arbitror, Trebulano. Sequitur illud tempus est, cum me ad Pompejum proficisci sive pudor meus coegit, sive officium, sive fortuna, quod officium tuum, quod studium vel in absentem me, vel in præsentem

mea

meos defuit ? quem porro omnes mei & mihi ,  
 & sibi te amiciores judicaverunt ? Veni Brundisium : oblitum ne me putas , qua celeritate ,  
 ut primum audieris , ad me Tarento advolaris ?  
 quæ tua fuerit assellio , oratio , confirmatio animi mei , fracti communium miseriorum metu ?  
 Tandem aliquando Romæ esse cœpimus : quid defuit nostræ familiaritati ? in maximis rebus ,  
 quonam modo me gererem adversus Cæsarem ,  
 usus tuo consilio sum , in reliquis officiis cui tu tribuisti , excepto Cæsare , præter me , ut domum ventitares , horasque multas sæpe suavissimo sermone consumeres ? tum , quum etiam , si meministi , ut hæc φιλοσοφίμια scriberem , tu me impulisti . Post Cæsaris reditum quid tibi majori curæ fuit , quam ut essem ego illi quam familiarissimus ? quod effeceras . Quorsum igitur hæc oratio longior , quam putaram ? quia sum admiratus , te , qui hæc nosse deberes , quidquam a me commissum , quod esset alienum nostræ amicitia , credidisse . nam præter hæc , quæ commemoravi , quæ testata sunt , & illustria , habeo multa occultiora , quæ vix verbis exequi possum , omnia me tua delectant , sed maxime maxima cum fides in amicitia , consilium , gravitas , constantia , tum lepos , humanitas , litteræ , quapropter redeo nunc ad querelam . Ego , te suffragium tulisse in illa lege , primum non credidi : deinde , si credidissem , nunquam id sine aliqua justa causa existimarem te fecisse , dignitas tua facit , ut animadvertatur , quidquid facias : malevolentia autem hominum , ut nonnulla durius , quam a te facta sint , proferantur , ea si tu non audis , quid dicam nescio ; equidem , si quando audio , tam defendendo , quam me scio a te contra iniquos meos solere defendi . Defensio autem est duplex . alia sunt , quæ liquido negare soleam , ut de isto ipso suffragio : alia , quæ defendam a te pie fieri , & humane , ut de curatione ludorum , sed te , hominem doctissimum , non fugit , si Cæsar rex fuerit , quod mihi quidem videtur , in utramque partem de tuo officio disputari posse : vel in eam , quæ ego uti soleo , laudandam esse fidem , & humanitatem tuam , qui amicum etiam mortuum dili-

gas; vel in eam, qua nonnulli utuntur, libertatem patriæ vitæ amici anteponendam, ex his sermonibus utinam essent delatæ ad te disputationes meæ. Illa vero duo, quæ maxima sunt laudum tuarum, quis aut libentius, quam ego, commemorat, aut sapius, te & non suscipiendi belli civilis gravissimum auctorem fuisse, & moderandæ victoriæ? in quo qui mihi non assentiretur, inveni neminem. Quare habeo gratiam Trebatio, familiari nostro, qui mihi dedit causam harum litterarum, quibus nisi credideris, me omnis officii, & humanitatis expertem judicaris, quo nec mihi gravius quicquam potest esse, nec a te alienius. Vale.

## A R G U M E N T U M.

*Excusatio Matii & pro seipso, & contra calumniatores.*

## XXVIII. C. MATIUS CICERONI S. D.

**M**agnam voluptatem ex tuis litteris cepi, quod, quam speraram, atque optaram, habere te de me opinionem cognovi, de qua etsi non dubitabam; tamen, quia maximi aestimabam, ut incorrupta maneret, laborabam. Conscius autem mihi eram, mihi a me commissum esse, quod boni cujusquam offenderet animum, eo minus credebam plurimis, atque optimis artibus ornato tibi temere quidquam persuaderi potuisse, præsertim in quem meæ propensa, & perpetua fuisset, atque esset benevolentia. Quod quando, ut volui, scio esse; respondebo criminibus, quibus tu pro me, ut par erat, tua singulari bonitate, & amicitia nostra sæpe restitisti; nota enim mihi sunt, quæ in me post Cæsaris mortem contulerint. Vitio mihi dant, quod mortem hominis necessari graviter fero, atque eum, quem dilexi, perxisse indignor, ajunt enim patriam amicitie præponendam esse: perinde ac si jam vicefint, obitum ejus reipub. fuisse utilem, sed non agam astute: fateor, me ad istum gradum sapientiæ non pervenisse, neque enim Cæsarem in dissensione civili sum sequutus: sed amicum, quamquam se offendebar, tamen non deserui: neque bellum umquam civile, aut etiam causam dissensionis

pro-

probavi, quam etiam nascentem extingui, summe studui: Itaque in victoria hominis necessarii, neque honoris, neque pecuniæ dulcedine sum captus, quibus præmiis reliqui minus apud eum, quam ego, cum possent, immoderate sunt abusi. Atque etiam res familiaris mea lege Cæsaris diminuta est; cuius beneficio plerique, qui Cæsaris morte lætantur, remanserunt in civitate. Civibus victis ut parceretur, æque ac pro mea salute laboravi. Possum igitur, qui omnes voluerim incolumes, cum, a quo id impetratum est, petiisse, non indignari? quum præsertim iidem homines illi & invidiæ, & exitio fuerint. Plerisque ergo, inquiunt; quando factum nostrum improbare audes. o superbiam inauditam! alios in facinore gloriari, alias ne dolere quidem impune licere: at hæc etiam servis semper libera fuerunt, timerent, gauderent, dolerent suo potius, quam alterius arbitrio, quæ nunc, ut quidam isti dicunt, libertatis auctores metu nobis extorquere conantur. sed nihil agunt, nullius unquam periculi terroribus ab officio, aut ab humanitate desciscam. NUMQUAM enim honestam mortem fugiendam sæpe etiam appetendam putavi. Sed quid mihi succensent, si id opto, ut pœniteat eos sui facti? cupio enim Cæsaris mortem omnibus esse acerbam. At debeo pro civili parte remp. velle salvam, id quidem me cupere, nisi & antea vita, & reliqua mea spes, tacente me, probat, dicendo vincere non postulo. Quare maiorem in modum te rogo, ut rem potiore oratione ducas: mihi que, si sentis expedire recte fieri, credas, nullam communionem cum improbis esse posse. An quod adolescens præstiti, quum etiam errare cum excusatione possem, id nunc, ætate præcipitata, commutem, ac me ipse retexam? non faciam, neque quod displiceat, committam, præterquam quod hominis mihi conjunctissimi, ac viri amplissimi doleo gravem casum. Quod si aliter essem animatus, numquam, quod facerem, negarem, ne & in peccando improbus, & in dissimulando timidus, ac vanus existimarer. At ludos, quos Cæsaris victoriæ Cæsar adolescent fecit, curavi. At id ad priva-



rum officium, non ad statum reipub. pertinebat, quod tamen munus & hominis amicissimi memoriz, ac honoribus præstare etiam mortui debui; & optimæ spei adolescenti, ac dignissimo Cæsari, petenti negare non potui. Veni etiam consulis Antonii sæpe domum salutandi causa: ad quem, qui me parum patriæ amantem esse existimant, rogandi quidem aliquid, aut auferendi causa frequentes ventitasse reperies. sed quæ hæc est arrogantia, quod Cæsar nunquam interpellavit, quin, quibus vellem, atque etiam quos ipse non diligebat, tamen iis uterem; eos qui mihi amicum eripuerunt, carpendo me, efficere conari, ne, quos velim, diligam? sed non vereor, ne aut meæ vitæ modestia parum valitura sit in posterum contra falsos rumores; aut etiam ii, qui me non amant propter meam in Cæsarem constantiam, non malint mei, quam sui similes amicos habere. Mihi quidem si optata contingent, quod reliquum est vitæ, in otio Rhodi degam: sin casus aliquis interpellarit, ita ero Romæ, ut recte fieri semper cupiam. Trebatio nostro magnas gratias ago, quod tuum erga me animum, simplicem, atque amicum aperuit; & quod eum, quem semper dilexi lubenter, quo magis iure colere, atque observare deberem, fecit. Bene vale, & me dilige.

## A R G U M E N T U M.

*Profecturus in Graciam, suas res Oppio commendat, commemoratis antea beneficiis ab ipso acceptis.*

XXIX. M. T. C. M. OPPIO S. D.

**D**Ubitanti mihi, quod scit Atticus noster, de hoc toto consilio professionis, quod in utramque partem in mentem multa veniebant, magnum pondus accessit ad tollendam dubitationem iudicium, & consilium tuum. nam & scripsisti aperte, quid tibi videretur, & Atticus ad me sermonem tuum pertulit. Semper iudicavi, in te & in capiendo consilio prudentiam summam esse, & in dando fidem: maximeque sum expertus, quum initio civilis belli per-

litteras te consuluissem, quid mihi faciendum esse censeret, eundem ne ad Pompejum, an manendum in Italia. suastisti, ut consulerem dignitati meae, ex quo, quid sentiret, intellexi: & sum admiratus fidem tuam, & in consilio dando religionem: quod quum aliud male amicissimum tuum putares, antiquius tibi officium meum, quam illius voluntas fuit. Equidem & ante hoc tempus te dilexi, & semper me a te diligere sensi: & quum abessem, atque in magnis periculis essem, & me absentem, & meos praesentes a te cultos, & defensos esse memini: & post meum reditum quam familiariter mecum vixeres, quaeque ego de te & senserim & praedicari, omnes, qui solent haec animadvertere, testes habemus. Gravissimum vero iudicium de mea fide, & de constantia fecisti, quum post mortem Caesaris totum te ad amicitiam meam contulisti, quod tuum iudicium nisi mea summa benevolentia erga te, omnibusque meritis comprobaro, ipse me hominem non putabo. Tu, mi Oppi, conservabis amorem tuum (etsi more magis hoc quidem scribo, quam quo te admonendum putem) meaque omnia tuebere, quae tibi ne ignota essent; Attico mandavi. A me autem, quum paullum otii nostri erimus, uberiores litteras expectato. Da operam, ut valeas, hoc mihi gratius facere nihil potes.

## L I B E R XII.

### A R G U M E N T U M.

*Queritur, Tyranno occiso, tyrannidem tamen non esse sublatam: Cassiumque hortatur, ut una cum M. Bruto, ejus uxoris fratre, omni perturbatione Rempub. liberet.*

I. M. T. C. C. CASSIO S. P. D.

**F**Inem nullum facio mihi, crede, Cassi, de te, & de Bruto nostro, id est de tota republ. cogitandi: cujus omnis spes in vobis

LIBER XII. 113  
ARGUMENTUM.

*Invehitur in M. Antonii tyrannicam potentiam;  
& Resp. statum describit.*

II. M. T. C. CASSIO S. P. D.

**V**Ehementer lator, tibi probari sententiam,  
& orationem meam, qua si sapius uti li-  
ceret, nihil esset negotii, libertatem, & ré-  
publicam recuperare, sed homo amens, & per-  
ditus, multoque nequior, quam ille ipse, quem  
tu nequissimum occisum esse dixisti, cædis ini-  
tium querit: nullamque aliam ob causam me au-  
ctorem fuisse Cæsaris interficiendi criminatur,  
nisi ut in me veterani incitentur, quod ego pe-  
riculum non extimesco, modo facti vestri gloriam  
cum mea laude communicet. Ita nec Pisoni, qui  
in eum primus invehitus est, nullo assentiente; nec  
mihi, qui idem tricesimo post die feci; nec P. Ser-  
vilio, qui me est consequutus, tuto in senatum  
venire licet, eadem enim gladiator querit, ejus-  
que initium ad XIII. Kal. Octob. à me se factu-  
rum putavit, ad quam paratus venerat, cum in  
villa Metelli complures dies commentatus esset,  
quæ autem in lustris, & in vino commentatio  
potuit esse? Itaque omnibus est visus, ut ad te  
antea scripsi, suo more vomere, non dicere.  
Quare quod scribis te confidere, auctoritate &  
eloquentia nostra aliquid profici posse: non nihil,  
ut in tantis malis, est profectum: intelligit enim  
pop. Rom. tres esse consulares, qui, quia, quæ de  
republica bene senserint, libere loquuti sunt, tuto  
in senatum venire non possint, nec est præterea  
quod quidquam expectes, tuus enim necessarius  
affinitate nova delectatur; itaque jam non est stu-  
diosus ludorum, infinitoque fratris tui plausu  
dirumpitur, alter item affinis novis commentariis  
Cæsaris delinitus est. Sed hæc tolerabilia: il-  
lud non ferendum, quod est, qui vestro anno  
consulem filium suum futurum putet, ob eam-  
que causam se huic latroni deservire præferat,  
nam L. Cotta, familiaris meus, fatali quadam  
desperatione, ut ait, minus in Senatum venit.  
L. Cæsar, optimus, & fortissimus civis, valetu-  
dine

dine impeditur. Ser. Sulpitius & summa auctoritate, & optime sentiens, non adest: reliquos, exceptis designatis, ignosce mihi si non numero consulares. Habes auctores consilii publici: qui numerus etiam bonis rebus exiguus esset: quid censes perditis? Quare spes est omnis in vobis: qui si idcirco abestis, ut sitis tuto, ne in vobis quidem: si aliquid dignum vestra gloria cogitatis, velim, salvis nobis: si id minus, res tamen publica per vos breviter tempore jus suum recuperabit. Ego tuis neque desum, neque deero: qui sive ad me referent, sive non, mea tibi tamen benevolentia, fidesque præstabitur. Vale.

### ARGUMENTUM.

*Et hic in Antonium, ejusque sectam invohitur.*

II. M. T. C. C. CASSIO S. P. D.

**A**Uget tuus amicus furorem in dies, primum in statua, quam posuit in rostris, inscripsit: PARENTI OPTIME MERITO: ut non modo sicarii, sed jam etiam parricidæ judicemini; quid dico, judicemini? judicemur potius: vestri enim pulcherrimi facti ille furiosus me principem dicit fuisse. utinam quidem fuisset: molestus nobis non esset; sed hoc vestrum fuit: quod quando præterit, utinam haberem quid darem vobis consilii, sed ne mihi quidem ipsi reperio, quid faciendum sit. QUID enim est, quod contra vim sine vi fieri possit? consilium autem omne hoc est illorum, ut mortem Cæsaris persequantur. Itaque ante diem vi. Non. Oct. productus in concionem a Canutio, turpissime ille quidem discessit, sed tamen ea dixit de conservatoribus patriæ, quæ dici deberent de proditoribus: de me quidem non dubitanter, quin omnia de meo consilio & vos fecissetis, & Canutius faceret. Cetera cujusmodi sint, ex hoc judica, quod legato tuo viaticum eripuerunt. quid eos interpretari putas, quum hoc faciunt? ad hostem scilicet portari, o rem miseram! dominum ferre non potuimus; conservo servimus;

mus ; & tamen , me quidem favente magis , quam sperante , etiam nunc residet spes in virtute tua , sed ubi sunt copiz ? de reliquo malo te ipsum loqui tecum , quam dicta nostra cognoscere . Vale .

## A R G U M E N T U M .

*Varia complectitur hæc epistola , de Antonii nequitia , de Senatu , de populo , de legatis ad Antonium missis , de ipso Cassio .*

## IV. M. T. C. C. CASSIO S. P. D.

**V**ellem idib. Mart. me ad cœnam invitasses : reliquiarum nihil fuisset , nunc me reliquiz vestræ exercent , & quidem præter ceteros me . quamquam egregios consules habemus , sed turpissimos consulares : Senatum fortem , sed in infimo quemque honore fortissimum : populo vero nihil fortius , nihil melius , Italiaque universa , nihil autem fœdus Philippo , & Pisone legatis , nihil flagitiosius , qui cum essent missi , ut Antonio ex Senatus sententia certas res renuntiarent ; quum ille earum rerum nulli parvisset , ultro ab illo ad nos intolerabilia postulata retulerunt . itaque ad nos concurritur : factique jam in re salutari populares sumus . Sed tu quid ageres , quid acturus , ubi denique esses , nesciebam , fama nuntiabat , te esse in Syria : auctor erat nemo . De Bruto , quo propius est , eo firmiora videntur esse , quæ nuntiantur . Dolabella valde vituperabatur ab hominibus non insulis , quod tibi tam cito succederet , cum tu vix dum triginta dies in Syria fuisses , itaque constabat , eum recipi in Syriam non oportere . Summa laus & tua , & Bruti est , quod exercitum præter spem existimamini comparasse . Scriberem plura , si rem , causamque nossem : nunc quæ scribo , scribo ex opinione hominum , atque fama . Tuas litteras avide expecto . Vale .

*M. Brutum laudat, ut ad ejus imitationem Cassium accendat. Addit de bello, quod in Italia contra M. Antonium Resp. gerebat.*

V. M. T. C. C. CASSIO S. P. D.

**H**icem credo adhuc prohibuisse, quominus de te certum haberemus, quid ageres, maximeque ubi esses, loquebantur omnes tamquam, credo, quod volebant, in Syria te esse, habere copias, id autem eo facilius credebatur, quia simile vero videbatur. Brutus quidem noster egregiam laudem est consequutus, res enim tantas gessit, tamque inopinatas, ut ex cum per se gratæ essent, tum gratiores propter celeritatem. Quod si tu ea tenes, quæ putamus; magnis subsidiis fulta respubl. est, a prima enim ora Græciæ usque ad Ægyptum optimorum civium imperiis muniti erimus; & copiis. Quamquam, nisi me falleret, res sic se habebat, ut totius belli omne discrimen in D. Bruto positum videretur: qui si, ut sperabamus, erupisset Mutina, nihil belli reliquum fore videbatur, parvis omnino jam copiis obsidebatur, quod magno præsidio Bononiam tenebat Antonius, erat autem Clærentæ noster Hirtius, ad Forum Cornelium Cæsar, uterque cum firmo exercitu: magnasque Romæ Pansa copias ex delectu Italiæ compararat: hiems adhuc rem gerere prohibuerat. Hirtius nihil nisi considerate, ut mihi crebris litteris significat, acturus videbatur. præter Bononiam, Rhægium Lepidi, Parmam, totam Galliam tenebamus studiosissimam reip. Tuos etiam clientes transpadanos mirifice conjunctos cum causa habebamus; erat firmissimus senatus, exceptis consularibus: ex quibus unus L. Cæsar firmus est, & rectus. Ser. Sulpitii morte magnum præsidium amisimus, reliqui partim inertes, partim improbi; nonnulli invident eorum laudi, quos in rep. probati vident; populi vero Rom. totiusque Italiæ mira consensus est. Hæc erant fere, quæ tibi nota esse vellem, nunc autem opto, ut ab istis Orientis partibus virtutis tuæ lumen eluceat. Vale.

## ARGUMENTUM.

*Strabonem commendat, quasi aliud agens; & in Cassio, Brutoque spem omnem Reip. sitam esse dicit, si ad Mutinam res male gerantur.*

VI. M. T. C. C. P. CASSIO S. D.

**Q**uis status rerum fuerit tum, cum has litteras dedi, scire poteris ex C. Tidio Strabone, viro bono, & optime de rep. sentiente, nam quid dicam, cupidissimo tui, qui domo, & fortunis relictis, ad te potissimum profectus sit? itaque eum tibi ne commendo quidem, adventus ipsius ad te satis eum commendabit. Tu velim sic existimes, tibi que persuadeas, omne periculum bonorum in te, & Bruto esse positum, si, quod nolim, adversi quid evenerit. res, quum hæc scribebam, erat in extremum deducta discriminem. Brutus enim Mutinæ vix jam sustinebat, qui, si conservatus eris, vicinus: sin, (quod Dii omen avertant) omnis omnium cursus est ad vos. Proinde fac tantum animum habeas, tantumque apparatus, quanto opus est ad universam remp. recuperandam. Vale.

## ARGUMENTUM.

*Significat sententiam a se in Senatu dictam ex Cassii dignitate, eamque a se etiam in concione defensam.*

VII. M. T. C. C. CASSIO S. P. D.

**Q**uanto studio dignitatem tuam & in Senatu, & ad populum defenderem, ex tuis te malo, quam ex me, cognoscere. quæ mea sententia in Senatu facile valuisset, nisi Pansa vehementer obstitisset. Ea sententia dicta, productus sum in concionem a tribuno pleb. M. Servilio. Dixi de te, quæ potui, tantâ concione, quantum forum est, tantò clamorè, consensuque populi, ut nihil unquam simile viderim; id velim mihi ignoscas, quod invita

secru

socrum tua fecerim, mulier timida verebatur, ne Panse animus offenderetur, in concione quidem Panse dixit, matrem quoque tuam & fratrem, illam a me sententiam noluisse dici, sed me hæc non movebant: alia malebam: favebam & reip. cui semper favi, & dignitari, & gloriæ tuæ. Quod autem & in Senatu pluribus verbis disse- rui, & dixi in concione, in eo velim fidem meam liberes: promisi enim, & prope confir- mavi, te non expectasse, nec expectaturum de- creta nostra, sed te ipsum tuo more rempublicam defensurum. & quamquam nihil dum audiera- mus, nec ubi esses, nec quas copias haberes: tamen sic stavebam, omnes, quæ in istis par- tibus essent, opes, copiasque tuas esse: per teque Asiam provinciam confidebam jam reipublicæ re- cuperatam. Tu fac in augenda gloria te ipsum vincas. Vale.

### ARGUMENTUM.

*Lepidus victum Antonium receperat: unaque bel- lum administrabant: id queritur Cicero, & Cassium ad liberandam Remp. hortatur.*

VIII. M. T. C. C. CASSIO S.P.D.

**S**celus affinis tui Lepidi, summamque levita- tem, & inconstantiam ex actis, quæ ad te mitti certo scio, cognosse te arbitror. Itaque nos, confecto bello, ut arbitrabamur, renova- tum bellum gerimus: spemque omnem in D. Bru- to, & Planco habemus: si verum quæris, in te, & in meo Bruto non solum ad præsens per- fugium, si, quod nolim, adversi quid acciderit, sed etiam ad confirmationem perpetuæ liberta- tis. Nos hic de Dolabella audiebamur, quæ vellemus: sed certos auctores non habebamus. Te quidem magnum hominem & præsentem judi- cio, & reliqui temporis expectatione scito esse, hoc tibi proposito, fac, ut ad summa contem- das, nihil est tantum, quod non pop. Rom. a te perfici, atque obtineri posse judicet. Vale,



## ARGUMENTUM.

*Scribit de bello propter Lepidi perfidiam renovato;  
Cassium hortatur, ut in Italiam properet.*

IX. M. T. C. C. P. CASSIO S. D.

**B**revitas tuarum litterarum me quoque breviorē in scribendo facit: &, vere ut dicam, non satis occurrit, quod scribam; nostras enim res in actis perferri ad te certo scio; tuas autem ignoramus, tanquam enim clausa sit Asia, sic nihil perfertur ad nos, præter rumores de oppresso Dolabella, satis illos quidem constantes, sed adhuc sine auctore. Nos confectum bellum cum putaremus, repente a Lepido tuo in summam sollicitudinem adducti sumus. Itaque persuade tibi, maximam reipub. spem in te, & in tuis copiis esse, firmos omnino exercitus habemus; sed tamen, ut omnia, ut spero, prospere procedant, multum interest, te venire, exigua est enim spes reip. nam nullam non libet dicere; sed, quæcumque est, ea despondetur anno consulatus tui. Vale.

## ARGUMENTUM.

*Lepidum hostem indicatum scribis: & omnino rem  
poscere, ut Cassius cum exercitu in Italiam  
veniat.*

X. M. T. C. C. P. CASSIO S. D.

**L**epidus, tuus affinis, meus familiaris, prid. Kal. Quint. sententiis omnibus hostis a senatu judicatus est, ceterique, qui una cum illo a rep. defecerunt, quibus tamen ad sanitatem redeundi ante Kal. Sept. potestas facta est. Fortis sane Senatus, sed maxime spe subsidii tui; bellum quidem, cum hæc scribebam, sane magnum erat scelere, & levitate Lepidi. Nos de Dolabella quotidie, quæ volumus, audimus: sed adhuc sine capite, sine auctore, rumore nuntio. Quod cum ita esset, tamen litteris tuis, quas nonis Maji ex castris datas acceperamus, ita persuasum erat civitati, ut illum jam oppress-

oppressum omnes arbitrarentur, te autem in Italiam venire cum exercitu, ut si hæc ex sententia confecta essent, consilio, atque auctoritate tua, sin quid forte titubatum esset, ut sit in bello, exercitu tuo niteremur, quem quidem ego exercitum quibuscumque potero rebus ornabo, cuius rei tum tempus erit, cum, quid opis reipublicæ laturus exercitus sit, aut quid jam tulerit, notum esse cœperit, nam adhuc tamen conatus audiuntur, optimi illi quidem, & præclarissimi, sed gesta res expectatur, quam quidem aut jam esse aliquam, aut appropinquare confido. Tua virtute, & magnitudine animi nihil est nobilius; itaque optamus, ut quamprimum te in Italia videamus. rempublicam nos habere arbitrabimur, si vos habebimus. Præclare vicramus: nisi spoliatum, inermem, fugientem Lepidus receperisset Antonium. Itaque nunquam tanto odio civitati Antonius fuit, quanto est Lepidus; ille enim ex turbulenta republ. hic ex pace, & victoria bellum excitavit. Huic oppositos consules designatos habemus; in quibus est magna illa quidem spes, sed anceps cura propter incertos exitus præliorum. Persuade tibi igitur, in te, & in Bruto tum esse omnia, vos expectari, Brutum quidem jam jamque. quod si, ut spero, victis hostibus nostris, veneritis, tamen auctoritate vestra respublica exsurgat, & in aliquo statu tolerabili consistet, sunt enim perniuta, quibus erit medendum, etiam si republ. satis esse videbitur sceleribus hostium liberata. Vale.

## A R G U M E N T U M.

*Scribit, a quibus copias acceperit, seque, & Remp. commendat. Scripta est autem hæc epistola ante prælium Mutinense.*

XL. CASSIUS PROCOS C. S. D.

**S**I vales, bene est: ego quidem valeo. In Syriam me profectum esse sciro ad L. Marcum, & Q. Crispum Impp. Viri fortes, optimique cives, posteaquam audierunt, quæ Romæ gererentur, exercitus mihi tradiderunt, ipseque mecum

meum omnia fortissimo animo remp. administrant, item legionem, quam Q. Cæcilius Bassus habuit, ad me venisse, scito; quatuorque legiones, quas A. Alienus ex Ægypto eduxit, traditas ab eo mihi esse, scito. Nunc te cohortatione non putō indigere, ut nos absentes, relique publicam, quantum opus est, defendas. scire te volo, firma præsidia vobis, senatuique non deesse, ut optima spe, & maximo animo remp. defendas, reliqua tecum aget L. Cartejus, familiaris meus. Vale. Data Non. Mart. ex castris Taricheis.

A R G U M E N T U M .

*Facta mentione benevolentia Ciceronis erga se, suam dignitatem, suosque milites commendat; sequæ, & illos optime de Repub. meritos affirmat.*

XII. CASSIUS PROCOS. CICE-  
RONI S. P. D.

**S**I vales, bene est: ego quidem valeo. Legi tuas litteras, in quibus mirificum tuum erga me amorem recognovi, videbaris enim non solum favere nobis, id quod & nostra, & reipublicæ causa semper fecisti; sed etiam gravem curam suscepisse, vehementerque esse de nobis sollicitus. Itaque, quod te primum existimare putabam, nos oppressa repub. quiescere non posse; deinde, cum suspicari, nos moliri, quod te, sollicitum esse & de salute nostra, & de rerum eventu putabam: simul ac legiones accepi, quas A. Alienus eduxerat ex Ægypto, scripsi ad te, tabellariosque complures Romam misi. scripsi etiam ad Senatum litteras, quas redli vetui prius, quam tibi recitatae essent, si forte mei obtemperare mihi voluerunt, quod si litteræ perlatae non sunt, non dubito, quin Dolabella, qui, nefarie Trebonio occiso, Asiam occupavit, tabellarios meos deprehenderit, litterasque interceperit. Exercitus omnes, qui in Syria fuerent, teneo, habui paululum moræ, dum promissa milicibus persolvero, nunc jam sum expeditus. A te peto, ut dignitatem meam tibi commendatam habeas; si me intelligis nullum, neque

periculum, neque laborem patriæ denegasse: si contra importunissimos latrones arma cepi, te hortante, & auctore: si non solum exercitum ad rempublicam, libertatemque defendendam comparavi, sed etiam crudelissimis tyrannis eripui: quos si occupasset Dolabella, non solum adventu, sed etiam opinione, & expectatione exercitus sui Antonium confirmasset, quas ob res milites tuere, si eos mirifice de republ. meritos esse animadvertis, & effice, ne quem pœniteat, republ. quam spem prædæ, & rapinarum, sequi maluisse, item Murci, & Crispi Imp. dignitatem, quantum est in te tuere, nam Bassus misere noluit mihi legionem tradere, quod nisi milites, invito eo, legatos ad me misissent; clausam Apameam tenuisset, quoad vi esset expugnata. Hæc a te peto non solum reipub. quæ tibi semper fuit carissima, sed etiam amicitiz nostræ nomine, quam confido apud te plurimum posse. Crede mihi, hunc exercitum, quem habeo, Senatus, atque optimi cuiusque esse, maximeque tuum: de cuius voluntate assidue audiendo, mirifice te diligit, carumque habet, qui si intellexerit, commoda sua curæ tibi esse, debere etiam se tibi omnia putabit. Literis scriptis, audiui, Dolabellam in Ciliciam venisse cum suis copiis, proficiscar in Ciliciam. quid egerim, celeriter ut scias, dabo operam, ac velim, ut mereamur de republ. sic felices simus. Fac valcas, meque ames. Nonis Maji, ex castris.

### ARGUMENTUM.

*Gratulatur de victoria Mutinensi, & res a se gestas enumerat.*

XIII. Q. CASSIUS CICERONI S. D.

**S**I vales, bene est: ego quidem valeo. Cum reipublicæ vel salute, vel victoria gaudeamus, tum instauratione tuarum laudum: quod maximus consularis maximum consulem te ipse vicisti, & lætamur, & mirari satis non possumus, fatale nescio quid tuz virtuti datum; id quod jam sæpe experti sumus; est enim tua toga omnium armis felicior; quæ nunc quo-

quoque nobis pene victam rempublicam ex manibus hostium eripuit, ac reddidit. Nunc ergo vivemus liberi: nunc te, omnium maxime civis, & mihi carissime, id quod maxime reipublicæ tenebris comperisti, nunc te habebimus testem nostri & in te, & in conjunctissimam tibi rempublicam amoris: &, quæ sæpe pollicitus es, te & taciturnum, dum serviremus, & dicturum de me tum, cum profutura essent; nunc illa non ego quidem dici tantopere desiderabo, quam sentiri a te ipso, neque enim omnium judicio malim me a te commendari, quam ipse tuo judicio digne, ac mereor, commendatus esse: ut hæc novissima nostra facta non subita, nec inconvenientia, sed similia illis cogitationibus, quarum tu testis es, fuisse judices: meque ad optimam spem patriæ non minimum tibi ipsi producendum putes. Sunt tibi, M. Tulli, liberi, propinquireque digni quidem te, & merito tibi carissimi: esse etiam debent in repub. proxime hos cari, qui studiorum tuorum sunt æmuli: quorum esse cupio tibi copiam; sed tamen non maxima me turba puto excludi, quominus tibi vacet me excipere, & ad omnia, quæ velis, & probes, producere. animum tibi nostrum fortasse probavimus, ingenium certe diutina servitus, quaecunque est, minus, tamen, quam erat, passa est videri. Nos ex ora maritima Asiæ provinciæ, & ex insulis, quas potuimus, naves deduximus, delectum remigum, magna contumacia civitatum, tamen satis celeriter habuimus. sequuti sumus classem Dolabellæ, cui Lucilius præerat: qui, spem sæpe transitionis præbendo, neque unquam non decedendo, novissime Corycum se contulit, & clauso portu se tenere cœpit, nos, illa relicta, quod & in castra pervenire satius esse putabamus, & sequebatur classis altera, quam anno priore in Bithynia Tullius Cimber compararat, cui Turulius quæstor præerat, Cyprum petivimus, ibi, quæ cognovimus, scribere ad vos quam celerrime volumus. Dolabellam ut Tarsenses pessimi socii, ita Lacedæni multo amentiores ultro accersierunt, ex quibus utrisque civitatibus, Græcorum mili-

militum numero, speciem exercitus effecit. castra habet ante oppidum Laodiceam posita; & partem muri demolitus est; & castra oppido conjunxit. Cassius noster cum decem legionibus, & cohortibus viginti auxiliariis, & quatuor millibus equitum a millibus passuum viginti castra habet posita Παλτοῖ: & existimat, se sine praelio posse vincere. Nam jam ternis tetradracmis triticum penes Dolabellam est, nisi quid navibus Laodicenorum supportarit, cito fame pereat, necesse est; ne supportare possit, & Cassii classis bene magna, cui praest Sextilius Rufus, & tres, quas nos adduximus, ego, Tullius, & Parischus, facile praestabunt. Volo igitur vos bene sperare, & temp. ut vos illic expeditis, ita pro nostra parte celeriter a nobis expediri posse, confidere. Vale. Data id. Jun. Cypro, Acromaniacride.

## A R G U M E N T U M.

*Exponit res a se gestas; Rhodios accusat: procurrationem Asia petit: merita sua erga Remp. commemorat.*

## XIV. LENTULUS C. SUO S. D.

**C**UM Brutum nostrum convenissem, eumque tardius in Asiam venturum animadvertetem; in Asiam redii, ut reliquias mei laboris colligerem, & pecuniam quamprimum Romam mitterem. Interim cornovi, in Lycia esse classem Dolabellae, ampliusque centum nautes onerarias, in quas exercitus ejus imponi posset: idque Dolabellam ea mente comparasse, ut, si Syriae spes eum frustrata esset, conscenderet in nautes, & Italiam peteret, seque cum Antonio, & reliquis latronibus conjungeret. Cujus rei tanto timore fui, ut omnibus rebus relictis, cum paucioribus, & minoribus navibus ad illas ire conatus sim, quae res, si a Rhodiis non essem interpellatus, fortasse tota sublata esset; tamen magna ex parte profligata est, quandoquidem classis dissipata est, adventus nostri timore milites, ducesque effugerunt, onerariae omnes ad unam a nobis sunt exceptae, certe, quod

maxime timui, videor esse consequutus, ut non possit classe Dolabella in Italiam pervenire, nec sociis suis firmatis, durius vobis efficere negotium. Rhodii nos, & rempub. quam valde desperaverint, ex litteris, quas publice misi, cognosces; & quidem multo parcius scripsi, quam revera furere eos inveni, quod vero aliquid de his scripsi, mirari noli; mira est eorum amentia. Nec me mea ullæ privatim injuriæ moverunt unquam; malus animus eorum in nostra salute, cupiditas partium aliarum, perseverantia in contemptione optimi cuiusque ferenda mihi non fuit, nec tamen omnes perditos esse puto, sed iidem illi, qui tum fugientem patrem meum, qui L. Lentulum, qui Pompejum, qui ceteros viros clarissimos non receperunt; iidem, tanquam aliquo fato, & nunc aut magistratum gerunt, aut eos, qui sunt in magistratu, in sua habent potestate. Itaque eadem superbia in pravitate utuntur, quorum improbitatem aliquando retundi. & non pati impunitate augeri, non solum utile est reip. nostræ, sed etiam necessarium. De nostra dignitate velim tibi ut semper curæ sit, & quocumque tempore occasionem habueris, & in senatu, & in ceteris rebus laudi nostræ suffragere. Quoniam consulibus decreta est Asia, & permissum est iis, ut, dum ipsi venirent, darent negotium, qui Asiam obtineant; rogo te petas ab iis, ut hanc dignitatem potissimum nobis tribuant, & mihi dent negotium, ut Asiam obtineam, dum ipsorum alteruter venit. nam, quod huc properent in magistratu venire, aut exercitum mittere, causam non habent. Dolabella enim in Syria est, & ut tu divina tua mente prospexisti, & prædicasti, dum isti venient, Cassius eum opprimeret; exclusus enim ab Antiochia Dolabella, & in oppugnando male acceptus, nulla alia consilii urbe, Laodiceam, quæ est in Syria ad mare, se contulit, ibi spero celeriter eum pœnas daturum, nam neque, quo refugiat, habet: neque diutius ibi poterit tantum exercitum Cassii sustinere, spero etiam confectum esse jam, & oppressum. Quare non puto, Panfam, & Hirtium in consulatu properaturos in provincias.

cias exire, sed Romæ acturos consulatum. Itaque, si ab his petieris, ut interea nobis procurationem Asiæ dent, spero te posse impetrare, præterea mihi promiserunt Pansa, & Hirtius coram, & absenti mihi scripserunt, Verriusque nostro Pansa affirmavit se daturum operam, ne in suo consulatu mihi succedatur. Ego porrò non medius fidius cupiditate provinciæ produci longius spatium mihi volo. nam mihi fuit ista provincia plena laboris, periculi, detrimenti, quæ ego ne frustra subierim, neve prius, quam reliquias meæ diligentia consequar, decedere cogar, valde laboro; nam si potuissem, quam exegeram, pecuniam universam mittere, postularer, ut mihi succederetur, nunc, quod Cassio dedi, quod Trebonii morte amisimus, quod etiam crudelitate Dolabellæ, aut perfidia eorum, qui mihi fidem, reique pub. non præstiterunt, id consequi, & rescire volo, quod aliter non potest fieri, nisi spatium habuerò, id ut per te consequar, velim, ut solet, tibi curæ sit. Ego me de repub. ita puto esse meritum, ut non provinciæ istius beneficium expectare debeam, sed tantum, quantum Cassius, & Bruti, non solum illius facti, periculique societate, sed etiam hujus temporis studio, & virtute. Primus enim ego leges Antonianas fregi: primus equitatum Dolabellæ ad rempub. transduxi, Cassioque tradidi: primus delectus habui pro salute omnium contra conjurationem sceleratissimam: solus Cassio, & reipub. Syriam exercitusque qui ibi erant, conjunxi. nam, nisi ego tantam pecuniam, tantaque præsidia, & tam celeriter Cassio dedissem, ne ausus quidem esset ire in Syriam; & nunc non minora pericula reipub. a Dolabella instarent, quam ab Antonio; atque hæc omnia is feci, qui & sodalis, & familiarissimus Dolabellæ eram, conjunctissimus sanguine Antoniis; provinciam quoque illorum beneficio habebam, sed παρὶς αὐτῶν μόνον οὐκ ὄντων, omnibus meis bellum primus indixi. Hæc etsi adhuc non magnopere mihi tulisse fructum animadverto: tamen non despero, nec defatigabor permanere non solum in studio libertatis, sed etiam  
 in



in labore, & periculis: attamen, si etiam aliqua gloria iusta, & merita provocabimur, senatus, & optimi cuiusque officii; maiore cum auctoritate apud ceteros erimus, & eo plus proficere reip. poterimus. Filium tuum, ad Brutum cum veni, videre non potui, ideo quod iam in hiberna cum equitibus erat profectus, sed medius fidius, ea esse cum opinione, & tua, & ipsius, & in primis mea causa gaudeo, fratris enim loco mihi est, qui ex te natus, teque dignus est. Vale. Data iv. Kal. Jun. Pergæ.

### ARGUMENTUM.

*Hic quoque res a se gestas exponit; invehitur in Rhodios: de Dolabella optabilia nuntiat.*

XV. P. LENTULUS P. F. PROQUÆST.  
PROPRÆT. S. D. COSS. PRÆT. TRIB.  
PL. SENATUI, POPULO, PLEBI-  
QUE ROMANÆ.

**S**I valetis, liberique vestri valent, bene est: ego quoque valco. Scelere Dolabellæ ap-  
pressa Asia, in proximam provinciam Macedoniam, præsidiaque reipub. quæ M. Brutus, vir clarissimus tenebat, me contuli, & id egi, ut, per quos celerrime posset, Asia provincia, vectigaliquem in vestram potestatem redigerentur: quod cum pertinuisset Dolabella, &, vastata provincia, correptis vectigalibus, præcipue civibus Rom. omnibus crudelissime denudatis, ac divenditis, celerius Asia excessisset, quam eo præsidium adduci potuisset: diutius morari, aut expectare præsidium non necesse habui, & quamprimum ad meum officium revertendum mihi esse existimavi: ut & reliqua vectigalia exigere, &, quam deposui, pecuniam colligerem; quidquid ex ea correptum esset, aut quorum id culpa accidisset, cognoscerem quamprimum, & vos de omni re facerem certiores. Interim cum per insulas in Asiam naviganti mihi nuntiatum esset, classem Dolabellæ in Lycia esse, Rhodiosque naves complures instructas, & paratas

in aqua habere; cum his navibus, quas aut mecum adduxeram, aut comoraverat Patiscus Pro-  
 quas. homo mihi cum familiaritate, tum etiam  
 sensibus in repub. conjunctissimus; Rhodum re-  
 verti, confusus auctoritate vestra, senatusque  
 consulto, quo hostem Dolabellam judicaretis,  
 fœdere quoque, quod cum iis M. Marcello, Ser.  
 Sulpitio cols. renovatum erat; quo juraverant  
 Rhodii, eosdem hostes se habituros; quos sena-  
 tus, populusque Rom. quæ res nos vehementer  
 fefellit, tantum enim abfuit, ut illorum præ-  
 dio nostram firmaremus classem, ut etiam a  
 Rhodiis urbe, portu, statione, quæ extra ur-  
 bem est, comœatu, aqua denique prohiberen-  
 tur nostri milites, nos vix ipsi singulis cum na-  
 vigiis recipere: quam indignitatem, di-  
 minutionemque majestatis non solum juris no-  
 stri, sed etiam imperii, populi que Rom. idcir-  
 co tulimus, quod, interceptis litteris, cognov-  
 ramus, Dolabellam, si desperasset de Syria,  
 Aëgyptoque, quod necess. erat fieri, in naves  
 cum omnibus suis latronibus, atque omni pe-  
 cunia conscendere esse paratum Italiamque pe-  
 tere: idcirco etiam naves onerarias, quarum mi-  
 nor nulla erat duum millium amphorarum,  
 contractas in Lycia a classe eius obsideri. Hu-  
 jus rei timore, P. C. percitus, injurias perpe-  
 ri, & cum contumelia etiam nostra omnia prius  
 experiri malui. Itaque ad illorum voluntatem  
 introductus in urbem, & in senatum eorum,  
 quam diligentissime potui, causam reipub. egi,  
 periculumque omne, quod instaret, si ille laro  
 cum omnibus suis naves conscendisset, exposui.  
 Rhodios autem tanta in pravitate animadverti,  
 ut omnes firmiores putarent, quam bonos; ut  
 hanc concordiam, & conspirationem omnium  
 ordinum ad defendendam libertatem propene  
 non crederent esse factam: ut patientiam Se-  
 natus, & optimi cujusque manere etiam nunc  
 considerent, nec potuisse audere quemquam Do-  
 labellam hostem judicare, ut denique omnia,  
 quæ improbi fingeant, magis vera existima-  
 rent, quam quæ vere facta erant, & a nobis  
 docebantur: qua mente etiam ante nostrum ad-  
 ventum, post Trebonii indignissimam eadem,

ceteraque tot, tamque nefaria facinora, binz profectæ erant ad Dolabellam legationes eorum, & quidem novo exemplo, contra leces ipsorum, prohibentibus iis, qui tum magistratus gerebant. Hæc siue timore (ut dicitant) de agris, quos in continenti habent; siue furore, siue potentia paucorum (qui & antea pari contumelia viros clarissimos affecerant, & nunc maximos magistratus gerentes) nullo exemplo, neque vestra ex parte, neque nostro presentium, neque imminenti Italiz, urbiue nostræ periculo, si ille parricida cum suis latronibus, navibus ex Asia, Syriæque expulsus, Italiam petiisset, mederi, cum facile possent, voluerunt. Nonnullis etiam ipsi magistratus veniebant in suspicionem detinuisse nos, & demorati esse, dum classis Dolabellæ certior fieret de adventu nostro, quam suspicionem consequutæ res aliquot auxerunt, maximeque, quod subito ex Lycia Sext. Marius, & C. Titius, legati Dolabellæ, a classe discesserunt, navique longa profugerunt, onerariis relictis, in quibus colligendis non minimum temporis, laborisque consumpserunt. Itaque, cum Rhoda cum iis, quas habueramus, navibus in Lyciam venissemus, naves onerarias recepimus, dominisque restituiimus; iidemque, quod maxime verebatur, ne posset Dolabella cum suis latronibus in Italiam venire, timere desiimus: classem fugientem persequuti sumus usque Sydam, quæ extrema regio est provinciæ meæ, ibi cognovi, partem navium Dolabellæ diffugisse, reliquas Syriam Cypriumque petiisse; quibus disiectis, cum scirem C. Cassi, singularis civis, & ducis, classem maximam fore præsto in Syria, ad meum officium reverti: daboque operam, ut meum studium, & diligentiam vobis P. C. & reipub. præstem, pecuniamque, quam maximam potero, & quam celerrime, cogam, omnibusque cum rationibus ad vos mittam, si percurrero provinciam, & cognovero, qui nobis, & reipub. fidem præstiterunt in conservanda pecunia a me deposita: quique scelere, ultro deferentes pecuniam publicam, hoc munere sollicitatam facinorum cum Dolabella iungunt, faciam vos certiores, de quibus, si vobis videbitur,

bitur, si, ut meriti sunt, graviter constitueritis, nosque vestra auctoritate firmaveritis; facilius & reliqua exigere vestigalia, & exacta servare poterimus; Interea, quo commodius vestigalix tueri, provinciamque ab injuria defendere possim, praesidium necessarium, voluntariumque comparavi. His litteris scriptis milites circiter xxx. quos Dolabella ex Asia conscripserat, e Syria fugientes in Pamphyliam venerunt: hi nuntiaverunt, Dolabellam Antiochiam, quae in Syria est, venisse, non receptum, conatum esse aliquoties vi introire: repulsum semper esse cum magno suo detrimento; itaque centum circiter amissis agrisque compluribus relictis, noctu Antiochia profugisse Laodiceam versus: ea nocte omnes fere Asiaticos milites ab eo discessisse: ex his ad octingentos Antiochiam rediisse, & se iis tradidisse, qui, a Cassio relictis, urbi illi praeerant; ceteros per Amanum in Ciliciam descendisse: quo ex numero se quoque esse dicebant. Cassium autem cum suis omnibus copiis, nuntiatum esse, quatruidui iter a Laodicea abfuisse, tum, cum Dolabella eo tenderet. Quamobrem opinione celerius, confido, sceleratissimum latronem poenas daturum. iv. Non. Jun. Pergæ.

### ARGUMENTUM.

*Gratulatur de Ciceronis filii indole ad virtutem: versus, in malum civem a se conscriptos, mittit: petit, ut includatur in Ciceronis scripta de Caesaris interitu.*

### XVI. C. TREBONIUS CICERONI S.D.

**S**ives, bene est. Athenas veni ad xi. Kal. Jun. atque ibi, quod maxime optabam, vidi filium tuum, deditum optimis studiis, summaque modestiae fama, qua ex re quantam voluptatem ceperim, scire potes etiam me tacente, non enim nescis, quanti te faciam, & quam pro nostro veterrimo, verissimoque amore omnibus tuis etiam minimis commodis, non modo tanto bono, gaudeam. Noli putare, mi Cicero, me hoc auribus tuis dare, nihil adole-

Iescente tuo, atque adeo nostro ( nihil enim  
 mihi a te potest esse sejunctum ) aut amabilius  
 omnibus iis, qui Athenis sunt, est, aut studio-  
 sius earum artium, quas tu maxime amas, hoc  
 est, optimarum; itaque tibi quod vere facere  
 possum, libenter quoque gratulor, nec minus  
 etiam nobis, quod cum, quem necesse erat di-  
 ligere, qualiscumque esset, talem habemus, ut  
 libenter quoque diligamus; qui cum mihi in  
 sermone iniecisset, se velle Asiam visere, non  
 modo invitatus, sed etiam rogatus est a me, ut  
 id potissimum, nobis obtinentibus provinciam,  
 faceret, cui nos & caritate, & amore tuum  
 officium prastaturos, non debes dubitare: illud  
 quoque erit nobis curæ, ut Cratippus una cum  
 eo sit, ne putes in Asia seriatum illum ab iis  
 studiis, in quæ tua cohortatione incitatur, futu-  
 rum. Nam illum paratum, ut video, & ingres-  
 sum pleno gradu cohortari non intermitteremus,  
 quo in dies longius, descendendo, exercendoque se,  
 procedat. Vos quid ageretis in repub. cum has  
 litteras dabam, non sciebam; audiebam quædam  
 turbulenta: quæ scilicet cupio esse falsa, ut  
 aliquando otiosa libertate fruamur: quod vel  
 minime adhuc mihi contigit. Ego tamen nactus  
 in navigatione nostra pusillum laxamenti, con-  
 cinnavi tibi munusculum ex instituto meo, &  
 dictum, cum magno nostro honore a te dictum,  
 conclusi, & tibi infra subscripsi, in quibus  
 versiculis si tibi quibusdam verbis *λυδὸν ῥ' ἄμω-  
 ρέσσας* videbor; turpitudine personæ ejus, in  
 quam liberius invehimur, nos vindicabit. Ignor-  
 sces etiam iracundiæ nostræ, quæ iusta est in  
 ejusmodi & homines, & ciues. Deinde, qui  
 magis hoc Lucilio licuerit assumere libertatis,  
 quam nobis? cum, etiam si odio par fuerit in  
 eos, quos læsit, tamen certe non magis dignos  
 habuerit, in quos tanta libertate verborum in-  
 curreret. Tu, sicut mihi pollicitus es, adju-  
 ges me quamprimum ad tuos sermones; nam-  
 que illud non dubito, quin, si quid de interi-  
 tu Caesaris scribas, non patiaris, me minimam  
 partem & rei, & amoris tui ferre. Vale, & m-  
 matrem, meosque tibi commendatos habeo.  
 Die viii. Kalend. Jun. Athenis.

## A R G U M E N T U M.

*Maria scribit, de rumoribus e Syria allatis, de Civitatis otio, de Creatore a se scripto, de suo studio in Cornificium; is autem Syriam regembat, ut infra patet.*

XVII. M. T. C. Q. CORNIFICIO COL-  
L E G Æ S. D.

**G**Rata mihi vehementer est memoria nostri tua: quam significasti litteris: quam ut conserves, non quo de tua constantia dubitem, sed quia mos est ita rogandi, rogo. Ex Syria nobis tumultuosiora quadam nuntiata sunt, quæ, quia tibi sunt propiora, quam nobis, tua me causa magis movent, quam mea. Romæ summum otium est, sed ita, ut malis salubre ali- quod, & honestum negotium, quod spero fore, quia video id curæ esse Cæsari. Me scito, dum tu absis, quasi occasionem quamdam, & licentiam nactum, scribere audacius, & cetera quidem fortasse, quæ etiam tu concederes: sed proxime scripsi de optimo genere dicendi, in quo sæpe suspicatus sum, te a iudicio nostro, sic scilicet, ut doctum hominem a non indocto, paululum dissidere. huic tu libro maxime velim ex animo, si minus, gratiæ causa suffragere, dicam tuis, ut eum, si velint, describant, ad teque mittant, puto enim, etiam si rem minus probabis, tamen in ista solitudine quidquid, a me profectum sit, iacundum tibi fore. Quod mihi existimationem tuam, dignitatemque commendas: facis tu quidem omnium more, sed velim sic existimes, me cum amori, quem inter nos mutuum esse intelligam, plurimum tribuere, tum de summo ingenio, & de optimis tuis studiis, & de sue amplissimæ dignitatis ita iudicare, ut neminem tibi antepōnam; comparem paucos. Vale.

## ARGUMENTUM.

*Purgat se de infrequentia litterarum; prudentiam Cornificii, gravitatemque laudat; presentem Respublicam statum accusat, cum Caesaris excusatione.*

## XVIII. M. T. C. CORNIFICIO COLLEGÆ S. D.

**Q**UOD extremum fuit in epistola, quam a te proxime accepi, ad id primum respondebo. Animadverti enim hoc vos magnos oratores facere nonnunquam. Epistolas requiris meas, ego autem nunquam, cum mihi denuntiatum elset a tuis, ire aliquem, non dedi. Quod mihi videor ex tuis litteris intelligere, te nihil commissurum esse temere, nec ante, quam scisses, quo iste hescio qui Cæcilius Bassus erumperet, quidquam certi constituturum: id ego & speraram prudentia tua fretus, & ut considerem, fecerunt tuæ gravissimæ litteræ; idque ut facias quam sepe scis, ut, & quid tu agas, & quid agatur, scire possim, & etiam quid acturus sis, vale te rogo. Etsi periniquo patiebar animo, te a me digredi: tamen eo tempore te me consolabar, quod & in summum titulum te iste arbitrabar, & ab impendentibus magnis negotiis discedere. Ursumque contra accidit; illic enim bellum est exortum, hic pax consequuta: sed ejusmodi pax in qua si adesses, multa te non delectarent: ea tamen quæ ne ipsum Cæsarem quidem delectent. BELLORUM enim civilium ii semper exitus sunt, ut non ea solum fiant, quæ velit victor, sed etiam ut iis mos gerendus sit, quibus adiutoribus parva sit victoria. Equidem sic jant obdurui, ut ludis Cæsaris nostri æquissimo animo viderem T. Plancum, audirem Laberii, & Publii poemata. Nihil tam deesse scito, quam quicum hæc familiariter, doctæque rideam. is tu eris, si quamprimum veneris, quod ut facias, non mea solum, sed etiam tuâ interesse arbitror. Vale.

## A R G U M E N T U M.

*Gratulatur de Syriae administratione, eamque optat a bello vacuam: quod si bellum sit, suadet, quid sit agendum.*

## XIX. M. T. C. CORNIFICIO S. D.

**L**ibentissime legi tuas litteras: in quibus jucundissimum mihi fuit, quod cognovi, meas tibi redditas esse. non enim dubitabam, quin eas libenter lecturus esses: verebar, ut redderentur. Bellum, quod est in Syria, Syriamque provinciam tibi tributam esse a Caesare, ex tuis litteris cognovi: eandem rem tibi volo bene & feliciter evenire, quod ita fore confido, fretus & industria, & prudentia tua. Sed de Parthici belli suspitione quod scribis, sane me commovit; quantum copiarum haberes, cum apte conjectura consequi poteram, tum ex tuis litteris cognovi. Itaque opto, ne se illa gens moveat hoc tempore, dum ad te legiones experducantur, quas audio duci; quod si pares copias ad confligendum non habebis, non te fugiet uti consilio M. Bibuli, qui se oppido munitissimo, & copiosissimo tamdiu tenuit, quamdiu in provincia Parthi fuerunt. Sed hæc melius ex te, & ex tempore constitues, mihi quidem usque curæ erit, quid agas, dum, quid egeris, sciero. Litteras ad te nunquam habui cui darem, quin dederim: a te, ut idem facias, peto; in primisque, ut ita ad tuos scribas, ut me tuum sentiant esse. Vale.

## A R G U M E N T U M.

*Jocatur, quia Cornificius Sinuessanæ villæ hospitio uti noluerat, & crebras ab eo litteras petit.*

## XX. M. T. C. CORNIFICIO COLLEGE S. D.

**G**ratæ mihi tuæ litteræ, nisi quod Sinuessanum diversoriolum contempsisti; quam quidem contumeliam villa pusilla iniquo animo



mo feret, nisi in Cumanis, & Pompejano red-  
dideris *παρα πρὸ πάντων*. Sic igitur facies,  
meque amabis, & scripto aliquo laceſſes, ego  
enim respondere facilius possum, quam provo-  
care. Quod si, ut es, cessabis, laceſſam: nec  
tua ignavia etiam inertiam afferet. Plura otio-  
sus, hæc, cum essem in senatu, exaravi. Vale.

ARGUMENTUM.

*Commendat Anicium Senatorem, ejusque nego-  
tia, & dignitatem.*

XXI. M. T. C. CORNIFICIO S. D.

*Anicij*  
**E**x quoque familiaris meus, vir omnibus rebus  
ornatus, negotiorum suorum causa legatus  
est in Africam legatione libera: eum, velim,  
rebus omnibus adjuves, operamque des, ut  
quam commodissime sua negotia conficiat, in  
primisque, quod ei carissimum est, dignitatem  
ejus tibi commendo: idque a te peto, quod ipse  
in provincia facere solitus sum non rogatus,  
ut omnibus senatoribus liſtores darem: quod  
idem acceperam, & cognoveram, a summis vi-  
ris factitatum. Hoc igitur, ni Cornifici, fa-  
cies: ceterisque rebus omnibus ejus dignitati,  
reique, si me amas, consules, id erit mihi gra-  
tissimum. Da operam, ut valeas.

ARGUMENTUM.

*Narrat de statu Reip. post Caesaris mortem; her-  
taturque Cornificium, ut Provinciam retineat  
in potestate Reipub.*

XXII. M. T. C. CORNIFICIO S. D.

**N**Os hic cum homine gladiatore omnium  
nequissimo, collega nostro, Antonio bel-  
lum gerimus, sed non pari conditione, con-  
tra arma verbis: at etiam de te concionatur:  
nec impune; nam sentiet quos laceſſierit. Ego  
autem acta ad te omnia arbitror perscribi ab  
aliis; a me futura debes cognoscere; quorum  
quidem non est difficilis conjectura. Oppressa

## ARGUMENTUM.

*Gratulatur de Syriae administratione, eamque v. piat a bello vacuum: quod si bellum sit, suadet, quid sit agendum.*

## XIX. M. T. C. CORNIFICIO S. D.

**L**ibentissime legi tuas litteras: in quibus jucundissimum mihi fuit, quod cognovi, meas tibi redditas esse. non enim dubitabam, quin eas libenter lecturus esses: verebar, ut redderentur. Bellum, quod est in Syria, Syriamque provinciam tibi tributam esse a Cæsare, ex tuis litteris cognovi: eandem rem tibi volo bene & feliciter evenire, quod ita fore confido, fretus & industria, & prudentia tua. Sed de Parthici belli suspitione quod scribis, sane me commovit; quantum copiarum haberes, cum ipse conjectura consequi poteram, tum ex tuis litteris cognovi. Itaque opto, ne se illa gens moveat hoc tempore, dum ad te legiones expeducantur, quas audio duci; quod si pares copias ad configendum non habebis, non te fugiet uti consilio M. Bibuli, qui se oppido munitissimo, & copiosissimo tamdiu tenuit, quamdiu in provincia Parthi fuerunt. Sed hæc melius ex te, & ex tempore constitues, mihi quidem usque cære erit, quid agas, dum, quid egeris, sciero. Litteras ad te nunquam habui cui darem, quin dederim: a te, ut idem facias, peto; in primisque, ut ita ad tuos scribas, ut me tuum sentiant esse. Vale.

## ARGUMENTUM.

*Jocatur, quia Cornificius Sinuessanæ villæ hospitio uti noluerat, & crebras ab eo litteras petit.*

## XX. M. T. C. CORNIFICIO COLLEGE S. D.

**G**Ratæ mihi tuæ litteræ, nisi quod Sinuessanum diversoriolum contempsisti; quam quidem contumeliam villa pusilla iniquo animo

mo feret, nisi in Cumano, & Pompejano red-  
dideris πάντα περί πάντων. Sic igitur facies,  
meque amabis, & scripto aliquo laceſſes, ego  
enim respondere facilius possum, quam provo-  
cate. Quod si, ut es, cessabis, laceſſam: nec  
tua ignavia etiam inertiam afferet. Plura otio-  
sus, hæc, cum essem in senatu, exaravi. Vale.

A R G U M E N T U M.

*Commendat Anicium Senatorem, ejusque nego-  
tia, & dignitatem.*

XXI. M. T. C. CORNIFICIO S. D.

*Anicius*  
**E**rnicius familiaris meus; vir omnibus rebus  
ornatus, negotiorum suorum causa legatus  
est in Africam legatione libera: cum, velim,  
rebus omnibus adjuves, operamque des, ut  
quam commodissime sua negotia conficiat, in  
primisque, quod ei carissimum est, dignitatem  
ejus tibi commendo: idque a te peto, quod ipse  
in provincia facere solitus sum non rogatus,  
ut omnibus senatoribus liſtores darem: quod  
idem acceperam, & cognoveram, a summis vi-  
ris factitatum. Hoc igitur, mi Cornifici, fa-  
cies: ceterisque rebus omnibus ejus dignitati,  
reique, si me amas, consules, id erit mihi gra-  
tissimum. Da operam, ut valeas.

A R G U M E N T U M.

*Narrat de statu Reip. post Caesaris mortem; her-  
taturque Cornificium, ut Provinciam retineat  
in potestate Reipub.*

XXII. M. T. C. CORNIFICIO S. D.

**N**Os hic cum homine gladiatore omnium  
nequissimo, collega nostro, Antonio bel-  
lum gerimus, sed non pari conditione, con-  
tra arma verbis: at etiam de te concionatur:  
nec impune; nam sentiet quos laceſſierit. Ego  
autem acta ad te omnia arbitror perscribi ab  
aliis; a me futura debes cognoscere; quorum  
quidem non est difficilis conjectura. Oppressa

Cæsaris Octaviani conatum; de quo multitudi-  
niam adolescentis impetum videtur, ut in pecu-  
niam adolescentis impetum faceret. Prudentes  
autem; & boni viri & credunt factum; & pro-  
bant. Quid queris? magna spes est in eo, ni-  
hil est quod non existimetur laudis; & gloriæ  
causa facturus. Antonius autem; noster fami-  
liaris; tanto se odio esse intelligit; ut cum  
interfectores suos domi comprehenderit; rem  
proferre non audeat. Ad vii. Id. Octob. Brun-  
dium venerat; profectus obviam legionibus  
Macedonicis quatuor; quas sibi conciliare pe-  
cunia cogitabat; easque ad urbem adducere;  
& in cervicibus nostris collocare. Habes for-  
mam reipub. si in castris potest esse resp. in  
qua tuam vicem sæpe doleo, quod nullam par-  
tem per ætatem sanæ; & salvæ reipub. gustare  
potuisti. Atque antehac quidem sperare saltem  
licebat; nunc etiam illud ereptum est; quæ  
enim spes est; cum in concione dicere ausus  
sit Antonius; Canutium apud eos locum sibi  
querere; quibus; se salvo; locus in civitate  
esse non posset? Equidem & hæc; & omnia;  
quæ homini accidere possunt; sic fero; ut mi-  
nam habeam philosophiæ gratiam; quæ me non  
modo a sollicitudine abducit; sed etiam con-  
tra omnes fortunæ impetus armat; tibi quæ i-tem  
censeo faciendum; nec; a quo culpa absit;  
quidquam in malis numerandum. Sed hæc tu  
melius. Stratorium nostrum cum semper pro-  
eius fidem; diligentiam; prudentiamque cogno-  
vi. Da operam; ut valeas; hoc mihi gratius  
facere nihil potes.

## ARGUMENTUM.

*Hortatur Cornificium, ut omni cura in Rempub.  
incumbat. Scribit de legatis ad Antonium a  
Senatu missis. Pinarium commendat.*

### XXIV. M. T. C. CORNIFICIO S. D.

**E**GO nullum locum prætermitto (nec enim debeo) non modo laudandi tui; sed  
ne ornandi quidem. sed mea studia erga te;  
P. Pinarius &

& officia malo tibi ex tuorum litteris, quam ex meis esse nota. Te tamen hortor, ut omni cura in rempub. incumbas. hoc est animi, hoc est ingenii tui, hoc ejus spei, quam habere debes amplificandæ dignitatis tuæ. Sed hac de re alias ad re pluribus; cum enim hæc scribam, in expectatione erant omnia: nondum legati redierant, quos senatus non ad pacem deprecandam, sed ad bellum denuntiandum miserat, nisi legatorum nuntio paruisset. Ego tamen, ut primum occasio data est, meo pristino more remp. defendi: me principem Senatui, populoque Rom. professus sum, nec, posteaquam suscepi causam libertatis, mirum tempus amisi tuendæ salutis, libertatisque communis, sed hæc quoque te ex aliis malo. T. Pinarium, familiarissimum meum, tanto tibi studio commendo, ut majore non possim: cui cum propter omnes virtutes, tum etiam propter studia communia sum amicissimus. Is procurat rationes, negotiaque Dionysii nostri, quem & tu multum amas, & ego omnium plurimum. Ea tibi ego non debeo commendare, sed commendo tamen. Facies igitur, ut ex Pinarii, gratissimi hominis, litteris tuum & erga illum, & erga Dionysium studium perspiciamus. Vale.

## A R G U M E N T U M.

*Scribit, ex litteris Cornificii S. C. esse factum; hortatur, ut Reip. causam amplectatur: Lucejo se nulla re defuturum pollicetur.*

## XXV. M. T. C. CORNIFICIO S. D.

**L**iberales litteras accepi tuas, quas mihi Cornificus altero vicesimo die, ut dicebat, reddidit, eo die non fuit senatus, neque postero. Quinquatribus, frequenti senata, causam tuam egi, non invita Minerva: etenim eo ipso die senatus decrevit, ut Minerva nostra, custes urbis, quam turbo dejecerat, restitueretur. Pansa tuas litteras recitavit, magna senatus approbatio consequuta est cum summo gaudio, & offensione Minotauri, id est Calvisii, & Tauri. Factum de te S. C. honorificum; postula-

labatur, ut etiam illi notarentur: sed Panfa clementior. Ego, mi Cornifici, quo die primum in spem libertatis ingressus sum, & cunctantibus ceteris, ad xiiii. Kal. Jan. fundamenta reip. jeci; eo ipso die providi multum, atque habui rationem dignitatis tuæ, mihi enim est assensus Senatus de obtinendis provinciis, nec vero postea destitit labefactare eum, qui summa cum tua injuria, contumeliaque reipub. provinciam absens obtinebat; itaque crebras, vel potius quotidianas compellationes meas non tulit, seque in urbem recepit invitus: neque solum spe, sed certa re jam, & possessione deturbatus est. Meo justissimo, honestissimoque convicio te tuam dignitatem summa tua virtute tenuisse, provinciarumque honoribus amplissimis affectum, vehementer gaudeo. Quod te mihi de Sempronio purgas, accipio excusationem: fuit enim illud quoddam cæcum tempus servitutis. Ego tuorum consiliorum auctor, dignitatisque fautor, iratus temporibus, in Græciam, desperata libertate, rapiebar, cum me Etæsiæ, quasi boni cives, relinquentem temp. prosequi noluerunt: Austerque adversus maximo flatu me ad tribules tuos Rhegium retulit; atque inde ventis, remisque in patriam omni festinatione properavi: postridieque in summa reliquorum servitute liber unus fui: sic sum in Antonium investus, ut ille non ferret, omnemque suum vinolentum furorem in me unum effunderet, meque cum elicere vellet ad cædis causam, cum tentaret insidiis: quem ego rusticantem, & nauseantem conjeci in Cæsaris Octavianæ plagas, puer enim egregius præsidium tibi primum, & nobis, deinde summæ reipubl. comparavit: qui nisi fuisset, Antonii reditus a Brundusio pestis patriæ fuisset. Quæ deinceps acta sint, scire te arbitror, sed redeamus ad illud, urde divertimus. Accipio excusationem tuam de Sempronio, neque enim statuti quid in tanta perturbatione habere potuisti. Nunc hic dies aliam vitam affert, alios mores postulat, ut ait Terentius. Quamobrem, mi Quinte, conscende nobiscum, & quidem ad puppim; una navis est jam bonorum omnium: quam

quam quidem ; nos damus operam , ut rectam  
teneamus ; utinam prospero cursu : sed quicum-  
que venti prunt ; ars nostra certe non aberit ;  
quid enim præstare aliud virtus potest ? Tu  
fac ; ut animo magno sis , & excelso ; cogites-  
que , omnem dignitatem tuam cum repub. con-  
iunctam esse debere . P. Lucretium mihi meum  
commendas , quem quibuscumque rebus potero ;  
diligenter tuebor . Hirtium quidem , & Pansam  
collegas nostros , homines in consulatu repub.  
salutares ; alieno sane tempore amisimus , repub-  
lica Antoniano quidem latrocinio liberata , sed  
hondum omnino explicata : quam nos , si lice-  
bit , more nostro tuebimur : quanquam admo-  
dum sumus jam defatigati : sed NULLA lassitudo  
impedire officium , & fidem debet . Ve-  
rum hæc hactenus . ab aliis te de me , quam a  
me ipso , malo cognoscere . De te audiebamus  
ea ; quæ maxime vellemus . De Cn. Minutio ;  
quem tu quibusdam litteris ad cælum laudibus  
exulisti , rumores duriores erant . id quale sit  
omninoque quid istic agatur , facias me velim  
censuere . Vale .

### ARGUMENTUM.

*Hæredes Turli commendat .*

XXVI. M. T. C. CORNIFICIO. S. D.

**Q** Turlius , qui in Africa negotiatus est , vir  
bonus ; & honestus hæredes fecit similes  
sui Cn. Saturninum Sex. Aufidium , C. Anne-  
jum , Q. Considium Gallum , L. Setvili-  
um Posthumum , C. Rubellinum . ex eorum oratio-  
ne intellexi , gratiarum actione eos magis ege-  
re , quam commendatione , tanta enim liberali-  
tate se tua usus prædicabant , ut iis plus a  
te tributum intelligerem , quam ego audeam te  
rogare . Audebo tamen ; scio enim , quantum  
ponderis mea commendatio sit habitura . Quare  
a te peto , ut ad eam liberalitatem , qua sine  
meis litteris usus es , quam maximus his litte-  
ris cumulus accedat . Caput autem est meæ com-  
mendationis , ne patiari Erotem Turium , Q.  
Turli libertum , ut adhuc fecit , hæreditatem  
Tu-

Turianam avertere ; ceterisque omnibus rebus habeas eos a me commendatissimos. Magnam eorum splendore , & observantia capies voluntatem . Quid ut velis , te vehementer etiam atque etiam rogo . Vale .

## A R G U M E N T U M .

*Aufidii equitis Romi. Africana negotia commendat .*

## XXVII. M. T. C. CORNIFICIO S. D.

**S**Ex: Aufidius , observantia , qua me colit , accedit ad proximos , & splendore equitum Romano nemini cedit , est autem ita temperatis , moderatisque moribus , ut summa severitas summa cum humanitate fungatur , cujus tibi negotia , quæ sunt in Africa , ita commendo , ut majore studio , magisque ex animo commendare non possim . Pergratum mihi feceris , si dederis operam , ut is intelligat , meas apud te litteras maximum pondus habuisse , hoc te vehementer , mi Cornifici , rogo . Vale .

## A R G U M E N T U M .

*Cornificii factum non probat , quia non animadvertenter in quosdam Lilybæominantes : studium in Remp. laudat : de omittenda gratiarum actione assentitur : addit de pecunia , & de Rep.*

## XXVIII. M. T. C. CORNIFICIO S. D.

**A**ssentior tibi , eos , quos scribis Lilybæominati , istic pœnas dare debuisse : sed metuisti , ut ais , ne nimis liber in ulciscendo viderere , metuisti igitur , ne gravis civis , ne nimis fortis , ne nimis te dignus viderere . Quod societatem reip. conservandæ , tibi mecum a patre acceptam , renovas , gratum est : quæ societas inter nos semper , mi Cornifici , manebit . Gratum etiam illud , quod mihi tuo nomine gratias agendas non putas , nec enim id inter nos facere debemus . Senatus sapius pro dignitate tua appellaretur , si , absentibus consilibus , unquam , nisi ad rem novam con-



geretur. Itaque nec de H. S. XX. nec de H. S. DCC. quidquam agi nunc per senatum potest, tibi autem ex S. C. imperandum, mutuumque sumendum censeo. In republica quid agatur, credo, te ex eorum litteris cognoscere, qui ad te acta debent perscribere. Ego sum spe bona: consilio, cura, labore non desum, omnibus inimicis reip. esse me acerrimum hostem prae me fero. Res neque nunc difficili loco mihi videtur esse: & fuisset facillimo, si culpa a quibusdam abfuisset. Vale.

### ARGUMENTUM.

*Commendas studiose L. Aelii Lamiae negotia; eumque suspectum Cornificio, quasi affuisset cuidam S. C. contra dignitatem ejus, excusas.*

### XXIX. M. T. C. CORNIFICIO S. D.

**N**on modo tibi, cui omnia nostra notissima sunt, sed neminem in populo Romano arbitror esse, cui sit ignota ea familiaritas, quae mihi cum L. Lamia est: etenim magno theatro spectata est tum, cum est ab A. Gabinio Cos. relegatus, quod libere, & fortiter salutem meam defendisset. Nec ex eo amor inter nos natus est: sed, quod erat vetus, & magnus, propterea nullum periculum pro me adire dubitavit. Ad haec officia, vel merita potius jucundissima consuetudo accedit, ut nullo prorsus plus homine delecter. Non puto, te jam expectare, quibuscum tibi verbis commendem, causam enim tanti amoris intelligis, quae verba desideret, iis me omnibus usum putato; tantum velim existimes, si negotia Lamiae, procuratores, liberos, familiam, quibuscumque rebus opus erit, defenderis, gratus mihi futurum, quam si ea tua liberalitas pertinuisset ad rem familiarem meam. Nec dubito, quin sine mea commendatione, quod tuum est iudicium de hominibus, ipsius Lamiae causa studiose omnia facturus sis, quanquam erat nobis dictum, te existinare, alicui S. C. quod contra dignitatem tuam fieret, scribendo Lamiam affuisse.

te : qui omnino consulibus illis nunquam affuit scribendo , deinde omnia tum falsa S. C. deferrebantur : nisi forte etiam illi Semproniano S. C. me censes affuisse ; qui ne Romæ quidem tum fui , ut de eo ad te scripsi re recenti . Sed hæc hætenus . Te , mi Cornifici , etiam atque etiam rogo , ut omnia Lamie negotia , mea putes esse ; curesque , ut intelligat , hanc commendationem maximo sibi usui fuisse : hoc mihi gratius facere nihil potes . Cura , ut valeas .

## ARGUMENTUM.

*Officium litterarum requirenti Cornificio se purgat ; scribit de bello Antoniano renovato , de suo studio in amicitia colenda , aliisque de rebus .*

## XXX. M. T. C. CORNIFICIO S. D.

**I**Ta ne ? præter litigatores nemo ad te meas litteras ? multæ istæ quidem , tu enim perfecisti , ut nemo sine litteris meis tibi se commendatum putaret . Sed quis unquam tuorum mihi dixit esse , cui darem , quin dederim ? aut quid mihi jucundius , quam , cum coram te loqui non possim , aut scribere ad te , aut tuas legere litteras ? illud magis mihi solet esse molestum , tantis me impediari occupationibus , ut ad te scribendi meo arbitratu facultas nulla datur , non enim te epistolis , sed voluminibus lacefferem , quibus quidem me a te provocari oporteret ; quamvis enim occupatus sis , otii tamen plus habes ; aut , si ne tu quidem vacas , noli impudens esse , nec mihi molestiam exhibere , & a me litteras crebriores , cum tu mihi raras mittas , flagitare : nam cum antea distinebar maximis occupationibus , propterea quod omnibus curis rempublicam mihi tuendam putabam , tum hoc tempore multo distineor vehementius . Ut enim gravius ægrotant ii , qui , cum levati morbo viderentur , in eum de integro inciderunt : sic vehementius nos laboramus , qui , profligato bello , ac pene sublato , renovatum bellum gerere conamur . Sed hæc hætenus .

Tu

Tu tibi, mi Cornifici, fac ut persuadeas, non esse me tam imbecillo animo, ne dicam inhuma-  
no, ut a te vinci possim aut officiis, aut amo-  
re. Non dubitabam equidem; verumtamen mul-  
to mihi notio rem amorem tuum effecit Cherip-  
pus. O hominem semper illum quidem mihi  
aptum, nunc vero etiam suavem! vultus meher-  
cule tuos mihi expressit omnes, non solum ani-  
mum, ac verba pertulit. itaque noli vereri, ne  
tibi succensuerim, quod eodem exemplo ad me,  
quo ad ceteros. Requisivi equidem proprias ad  
me unum a te litteras, sed neque vehementer,  
& amanter. De sumptu, quem te in rem mili-  
tarem facere, & fecisse dicis, nihil sane possum  
tibi opitulari: propterea quod & orbis est Se-  
natus, Consulibus amissis; & incredibiles an-  
gustiae pecuniae publicae: quae conquiruntur undi-  
que, ut optime meritis militibus promissa sol-  
vantur: quod quidem fieri sine tributo posse non  
arbitror. De Attio Dionysio nihil puto esse,  
quoniam mihi nihil dixit Stratorius. De P. Luc-  
cejo nihil tibi concedo, quod studiosior ejus sit,  
quam ego sum, est enim nobis necessarius. sed  
a magistris cum contenderem de proferendo die,  
probaverunt mihi, sese, quominus id facerent,  
& compromisso, & jurejurando impediri, qua-  
re veniendum arbitror Luccejo: quamquam, si  
meis litteris obtemperavit, cum tu haec leges,  
illum Romae esse oportebit: ceteris de rebus,  
maximeque de pecunia, cum Panfa mortem  
ignores, scripsisti, quae per nos ab eo conse-  
qui te posse arbitrare, quae te non fefellerit-  
sent, si viveret; nam te diligebat; post mor-  
tem autem ejus quid fieri posset, non videba-  
mus. De Venulejo, Latino, Horatio, valde  
laudo, illud non nimium probo, quod scribis,  
quo illi animo aequiore ferrent, te tuis etiam  
legatis lictores ademisse, honore enim digni  
cum ignominia dignis non erant comparandi:  
eosque ex S. C. si non decedunt, cogendos, ut  
decedant, existimo. Haec fere ad eas litteras,  
quas eodem exemplo binas accepi. De reliquo,  
velim tibi persuadeas, non esse mihi meam di-  
gnitatem tua cariorum. Vale.

# LIBER XIII.

## ARGUMENTUM.

*Memmius lege Pompeja de ambitu, ut Appianus tradit lib. 2. de bel. civ. condemnatus, Athenis exul habitabat. Ab eo petit Cicero, ut in gratiam redeat cum Patrone Epicureo: eique locum concedat, ubi Epicurus habitaverat. Ibat Cicero in provinciam, cum hac scripsit, ut in epist. 11. l. 5. ad Att.*

L. M. T. C. MEMMIUS S. D.

**E**TSI non satis mihi constiterat, cum aliqua ne animi mei molestia, an potius libenter te Athenis visurus essem; quod injuria, quam accepisti, dolore me afficeret, sapientia tua, qua fers injuriam, lætitia; tamen vidisse te malletm; nam, quod est molestiæ, non sane multo levius est, cum te non video: quod esse potuit voluptatis, certe, si vidissem te, plus fuisset. itaque non dubitabo dare operam, ut te videam, cum id satis commode facere potero; interea quod per litteras & agi tecum, & ut arbitror, confici potest, agam. Nunc a te illud primum rogabo, ne quid invitus mea causa facias; sed id, quod mea intelliges multum, tua nullam in partem interesse, ita mihi des, si tibi, ut id libenter facias, ante persuaseris. Cum Patrone Epicureo mihi omnia sunt; nisi quod in philosophia vehementer ab eo dissensio, sed & initio Romæ, cum te quoque, & tuos omnes observabat, me coluit in primis: & nuper cum ea, quæ voluit, de suis commodis, & præmiis consequutus est, me habuit suorum defensorum, & amicorum fere principem, & jam a Phædro, qui nobis, cum pueri essemus, antequam Philonem cognovimus, valde, ut philosophus, postea tamen, ut vir bonus, & suavis, & officiosus probabatur, traditus mihi commendatusque est. Is igitur Patro cum ad me Romam litteras misisset, uti te sibi placere, peteremque, ut nescio quid illud Epicu-

ri parietinarum sibi concederes, nihil scripsi ad te ob eam rem, quod ædificationis tuæ consilium mea commendatione nolebam impediri. Idem, ut veni Athenas, cum idem, ut te ad scriberem, rogasset, ob eam causam impetravit, quod, te abjecisse illam ædificationem, constabat inter omnes amicos tuos. Quod si ita est, & si jam plane tua nihil interest: velim, si qua offensuscula facta est animi tui, perversitate aliquorum, ( novi enim gentem illam ) des te ad lenitatem, vel propter tuam summam humanitatem, vel etiam honoris mei causa. Equidem, si quid ipse sentiam, quæris; nec, cur ille tantopere contendat, video, nec cur tu repugnes: nisi tanten multo minus tibi concedi potest quam illi, laborare sine causa. Quamquam, Patronis & orationem, & causam tibi cognitam esse, certo sciò, honorem, officium, testamentorum jus, Epicuri auctoritatem, Phædri oblationem, sedem, domicilium, vestigia, summorum hominum sibi tuenda esse dicit. Totam hominis vitam, rationemque, quam sequitur in philosophia, derideamus licet, si hanc ejus contentionem volumus reprehendere. Sed mehercule, quando illi, ceterisque, quos illa delectant, non valde inimici sumus; nescio, an ignoscendum sit huic, si tantopere laborat: in quo etiam si peccat, magis ineptiis, quam improbitate peccat. Sed ne plura; ( dicendum enim aliquando est ) Pomponium Atticum sic amo, ut alterum fratrem, nihil est illo mihi, nec carius, nec jucundius, is, non quo sit existis, ( est enim omni liberali doctrina politissimus; sed valde diligit Patronem, valde Phædrum amavit ) sic a me hoc contendit, homo minime ambitiosus, minime in rogitando molestus, ut nihil unquam magis: nec dubitat, quin ego a te nutu hoc consequi possim; ita etiam, si ædificaturus esses: nunc vero, si audierit te ædificationem deposuisse, neque tamen me a te impetrasse, non te in me illiberalem, sed me in se negligentem putabit. Quamobrem peto a te ut scribas ad tuos, posse tua voluntate decretum illud Areopagitarum, quem *ὑπομνηματισμὸν* illi vocant, tolli. Sed redeo ad

ad prima. Prius velim tibi persuadeas, ut hoc mea causa libenter facias, quam ut facias, sic tamen habeto, si feceris, quod rogo, fore mihi gratissimum. Vale.

## ARGUMENTUM.

*Petit, ut Evandro statuario de sacrarii habitatione accommodes.*

## II. M. T. C. MEMMIUS S. D.

**C**Aviano Evandro, qui habitat in tuo sacrario, & ipso multum utor, & patrono ejus M. Emilio familiarissime. Peto igitur a te majorem in modum, quod sine tua molestia fiat, ut ei de habitatione accommodes, nam, propter opera instituta multa multorum, subitum est ei remigrare Kal. Quint. Impedior verecundia, ne te pluribus verbis rogem, neque tamen dubito, quin, si tua nihil, aut non multum intersit, eo sis animo, quo ego essem, si quid tu me rogares: mihi certe gratissimum feceris. Vale.

## ARGUMENTUM.

*Fussum commendat, quem & ante praesens praesentis commendarat.*

## III. M. T. C. MEMMIUS S. D.

**A**Fussum, unum ex meis intimis, observantissimum, studiosissimumque nostri, eruditum hominem, & summa humanitate, tuaque amicitia dignissimum, velim ita tractes, ut mihi coram recepisti: tam mihi gratum id erit, quam quod gratissimum; ipsum praeterea, summo officio, & summa observantia, tibi in perpetuum devinveris. Vale.

Forum ego domicilia, sedes, rem, fortunas, quæ  
& a diis immortalibus, & a præstantissimis in  
nostra rep. civibus summo Senatus, populiq;  
Romani studio conservatæ sunt, tuæ fidei, ju-  
stitiæ, bonitatiq; commendo. Si pro meis pri-  
vatis opibus facultatem mihi res hoc tempore  
daret, ut ita defendere possem Volaterranos,  
quemadmodum consuevi tueri meos; nullum of-  
ficium, nullum denique certamen, in quo illis  
prodesse possem, prætermitterem. sed, quando  
apud te nihilo minus hoc tempore valere me  
confido, quam valuerim semper apud omnes;  
pro nostra summa necessitudine, parique inter-  
nos, & mutua benevolentia abs te peto, ut ita  
de Volaterranis mereare, ut existiment, cum  
quali divino consilio isti negotio præpositum es-  
set, apud quem unum nos, eorum perpetui de-  
fensores, plurimum valere possemus. Vale.

# A R G U M E N T U M.

*Rogat ne Curtii ager dividatur; idque etiam  
rationibus conatur persuadere.*

V. M. T. C. Q. VALERIO Q. F. ORCÆ, LE-  
GATO, PROPÆT. S. D.

**N**on moleste fero, cum necessitudinem, quæ  
mihi tecum est, notam esse quamplurimis,  
neque tamen ob eam causam, quod tu optime  
existimare poret, te impedio, quo minus su-  
scceptum negotium pro tua fide, & diligentia ex-  
voluntate. Caesaris, qui tibi rem magnam, dif-  
ficilemque commisit, gerere possis. nam, cum  
multi a me petant multa, quod de tua erga me  
voluntate non dubitent, non committo, ut  
ambicione mea conturbem officium tuum. C. Cur-  
tius ab ineunte ætate familiarissime sum vius,  
et ejus & Syllani temporis injutissima calamita-  
te doluit, & cum his, qui similem injuriam  
acceperant, amissis omnibus fortune, redditus  
intra mensuram patriam voluntate annuum concedi  
videretur; adiutor incolumitatis fui. Is ha-  
beo in Volaterrano possessionem, cum in eam,  
tanquam in naufragio reliquias contulisset, hoc

autem tempore cum Cæsar in Senatum legie-  
 quem ordinem ille, ista possessione amissa, tue-  
 ri vix potest, gravissimum autem est, cum  
 superior factus sit ordine, inferiorem esse for-  
 tuna; minimeque convenit, ex eo agro qui Cæ-  
 saris jussu dividatur, cum moveri, qui Cæsa-  
 ris beneficio senator sit. Sed mihi minus libet  
 multa de æquitate rei scribere, ne causa potius  
 apud te valuisse videar, quam gratia. Quame-  
 brem te majorem in modum rogo, ut C. Curtii  
 rem meam putes esse: quidquid mea causa fe-  
 ceres, ut id, C. Curtii causa cum feceris, me-  
 um existimes, quod ille per me habuerit, id  
 me habere abs te putato, hoc te vehementer  
 etiam atque etiam rogo. Vale.

### ARGUMENTUM.

*Generatim omnes amicos Cuspri commendat, no-  
 minatim L. Julium, & P. Cornelium.*

VI. M. T. C. Q. VALERIO. Q. F. OR-  
 CÆ, LEGATO, PROPRÆT. S. D.

**S**I vales, bene est, ego quidem valeo: Cre-  
 do, te memoria tenere, me & coram P. Cu-  
 spio tecum loquutum esse, cum te prosequeretur  
 paludatum; & item postea plurimis verbis te-  
 cum egisse, ut, quoscunque tibi ejus necessarios  
 commendarem, haberes eos in numero meorum  
 necessariorum: id tu pro tua summa erga me  
 benevolentia, perpetuaque observantia mihi li-  
 beralissime, atque humanissime recepisti. Cu-  
 spius, homo in omnes suos officiosissimus, mi-  
 risque quosdam homines ex ista provincia tue-  
 tur, & diligit; propterea quod fuit in Africa  
 his, cum maximis societatis negotiis præset.  
 Itaque hoc ejus officium, quod adhibet erga il-  
 los, ego mea facultate, & gratia soleo, quan-  
 tum possum, adjuvare. Quare Cuspianorum om-  
 nium commendationis causam hac tibi epistola  
 exponendam putavi: reliquis epistolis tantum  
 faciam, ut notam apponam eam, quæ mihi te-  
 cum convenit, & simul significem, de numero  
 esse Cuspri amicorum. Sed hanc commendatio-  
 nem,



nem, quam his litteris consignare volui, scire esse omnium gravissimam; nam P. Cuspius singulari studio contendit a me, ut tibi quam diligentissime L. Julium commendarem. Ejus ego studio vix videor mihi satisfacere posse, si utar verbis iis, quibus cum diligentissime quid agimus, uti solemus, nova quædam postulat, & putat, me ejus generis artificium quoddam tenere: ei ego pollicitus sum, me ex intima nostra arte deprompturum mirificum genus commendationis, id quando assequi non possum, tu re velim efficias, ut ille genere mearum litterarum incredibili quodam perfectum arbitretur. Id facies, si omne genus liberalitatis, quod & ab humanitate, & potestate tua proficisci poterit, non modo re, sed etiam verbis, vultu denique expresseris, quæ quantum in provincia valeant, vellem expertus esses. Sed tamen suspicor, ipsum hominem, quem tibi commendo, perdignum esse tua amicitia: non solum, quia mihi Cuspius dicit; credo, tametsi id satis esse debebat; sed quia novi ejus judicium in hominibus, & amicis diligendis. Harum litterarum vis quanta fuerit, propediem judicabo; tibi que ut confido, gratias agam; ego, quæ te velle, quæque ad te pertinere arbitror; omnia studiose, diligenterque curabo. Cura, ut valeas. P. Cornelius, qui tibi has litteras reddidit, est mihi a P. Cuspio commendatus, cujus causa quantopere cuperem, deberemque, profecto ex me facile cognovisti: vehementer te rogo, ut cures, ut ex hac commendatione mihi Cuspius quam maximas, quamprimum, quam sapissime gratias agat.

## A R G U M E N T U M.

*Petit a Cluvio, ne vestigal Atellano municipio impositum exigat: sed integram causam Casavi reserves.*

VIL. M. T. C. C. C L U V I O S. D.

**C**UM in Galliam proficiscens, pro nostra necessitudine, tuæque summa in me ob-

*Servantia*, ad me domum venisses: loquutus  
 sum tecum de agro vectigali municipii Atella-  
 ni, qui esset in Gallia; quantoque opere ejus  
 municipii causa laborarem, tibi ostendi. Post  
 tuam autem professionem, cum & maxima res  
 municipii honestissimi, mihiq; conjunctissi-  
 mi, & summum meum officium ageretur, pro  
 tuo animo in me singulari existimavi, me o-  
 portare ad te accuratius scribere, etsi non sum  
 nescius, & quæ temporum ratio, & quæ tua po-  
 testas sit: tibiq; negotium datum esse a C.  
 Cæsare, non judicium, præclare intelligo. Qua-  
 re a te tantum peto, quantum & te facere pos-  
 se, & libenter mea causa facturum esse arbitror.  
 Et primum velim existimes, quod res est, mu-  
 nicipii fortunas omnes in isto vectigali consistere,  
 his autem temporibus hoc municipium, ma-  
 ximis oneribus pressum, summis affectum esse  
 difficultatibus. Hoc etsi commune ei videtur esse  
 cum multis: tamen mihi crede, singulares huic  
 municipio calamitates accidisse: quas idcirco  
 non commemoro, ne, de miseriis meorum ne-  
 cessariorum conquerens, homines, quos nolo,  
 videar offendere. Itaque nisi magnam spem habe-  
 rem, C. Cæsari nos causam municipii probatu-  
 ros; non erat causa, cur a te hoc tempore ali-  
 quid contenderem, sed, quia confido, mihiq;  
 persuasi, illum & dignitatis municipii, & æqui-  
 tatis, & voluntatis etiam erga se habiturum esse  
 rationem; ideo a te non dubitavi contendere,  
 ut hanc causam illi integram conservares. Quod  
 etsi nihilo minus a te peterem, si nihil audivis-  
 sem te tale fecisse; tamen majorem spem impe-  
 trandi nactus sum, posteaquam mihi dictum est,  
 hoc idem a te Rhegienses impetravisse, qui etsi  
 te aliqua necessitudine attingunt; tamen tuus  
 amor in me sperare me cogit, te, quod tuis ne-  
 cessariis tribueris, idem esse tributurum meis:  
 præsertim cum ego pro his unis petam, habeam  
 autem, qui simili causa laborent, complures  
 necessarios. Hoc me non sine causa facere, ne-  
 que aliqua levi ambitione commotum a te con-  
 tendere, etsi te existimare arbitror, tamen mihi  
 affirmanti credas velim, me huic municipio de-  
 bere plurimum: nullum unquam fuisse tempus

neque honorum, neque laborum meorum, in quo non hujus municipii studium in me exstiterit singulare. Quapropter a te etiam atque etiam pro nostra summa conjunctione, proque tua in me perpetua, & maxima benevolentia majorem in modum peto, atque contendo, ut cum fortunas agi ejus municipii intelligas, quod sit mihi necessitudine, officiis, benevolentia conjunctionissimum, id mihi des. quod erit hujusmodi, ut, si a Cesare, quod speramus, impetnaverimus, tuo beneficio nos id consequutos esse judicemus: sin minus, pro eo tamen id habeamus, quando a te data sit opera, ut impetraremus. Hoc cum mihi gratissimum feceris: tum viros optimos, homines honestissimos, eisdemque gratissimos, & tua necessitudine dignissimos, summo beneficio in perpetuum tibi, tuisque devinxeris. Vale.

## A R G U M E N T U M.

*Rogat Rutilium, ut in agrorum divisione Albini pradia ne attingat.*

VIII. M. T. C. M. RUTILIO S. P.

CUM & mihi conscius essem, quanti te facerem, & tuam erga me benevolentiam expertus essem; non dabitavi a te petere, quod mihi petendum esset. P. Sextium quanti faciam, ipse optime scio; quanti autem facere debeam, & tu, & omnes homines sciunt. Is cum ex aliis te mei studiosissimum esse cognosceret, petivit a me, ut ad te quam accuratissime scriberem de re C. Albini Senatoris: cuius ex filia natus est L. Sextius, optimus adolescens, filius P. Sextii. Hoc idcirco scripsi, ut intelligeres, non solum me pro P. Sextio laborare debere, sed Sextium etiam pro Albino: res autem hæc est. A M. Liberio C. Albinus pradia in ultimationem accepit, quæ pradia Liberius emerat a Cesare de bonis Plotianis, ea si dicam non esse republicæ dividi, docere te videar, non rogare: sed tamen cum Caesar Syllanas venditiones, & assignationes ratas esse velit, quo firmiores exi-

stimentur suæ: si ea prædia dividantur, quæ ipse Cæsar vendidit, quæ tandem in ejus venditionibus esse poterit auctoritas? sed hoc quale sit, tu pro tua prudentia considerabis. Ego te plane rogo, atque ita, ut maiore studio, justiore de causa, magis ex animo rogare nihil possim, ut Albino parcas, prædia Laberiana ne attingas: magna me affeceris non modo lætitia, sed etiam quodammodo gloria, si P. Sextius homini maxime necessario per me satisfecerit, cum ego illi plurimum debeam. Quod ut facias, te vehementer etiam atque etiam rogo; maius mihi dare beneficium nullum potes, id mihi intelliges esse gratissimum. Vale.

### ARGUMENTUM.

*Bithynicam publicanorum societatem, nominatimque Cn. Puppium commendat.*

#### IX. M. T. C. CRASSIPEDI S. D.

**Q**uanquam tibi præsens commendavi, ut potui diligentissime, socios Bithyniæ, teque cum mea commendatione, tum etiam tua sponte intellexi cupere et societati, quibuscunque rebus posses, commodare: tamen, cum ii, quorum res agitur, magni sua interesse arbitrantur, me etiam per litteras declarare tibi, qua essem erga ipsos voluntate; non dubitavi hæc ad te scribere; volo enim, te existimare, me, cum universo ordini publicanorum multum semper libentissime tribuerim; idque pro magnis ejus ordinis erga me meritis facere debuerim, tum in primis amicum esse huic Bithynicæ societati: quæ societas ordine iusto, & hominum genere pars est maximæ civitatis, constat enim ex ceteris societatibus: & casu permulti sunt in ea societate valde mihi familiæres, in primisque is, cujus præclarum officium agitur hoc tempore, P. Rupilius P. F. Men. qui est magister in ea societate. Quæ cum ita sint, maiorem in modum a te peto, Cn. Puppium, qui est in operis ejus societatis, omnibus tuis officiis, atque omni liberalitate tueare: curesque, ut ejus operæ, quod tibi facile

cille factu est, quam gratissima sint sociis; remque, & utilitatem sociorum (cujus rei quantam potestatem quæstor habeat, non sum ignarus) per te quam maxime defensam, & auctam velis, id cum mihi gratissimum feceris, tum illud tibi expertus promitto, & spondeo, te socios Bithyniæ, si iis commodatis, memores esse, & gratos cogniturum. Vale.

## A R G U M E N T U M.

*Terentium Varronem, Quæstorem M. Bruto commendat, quem Cæsar Gallia citeriori præfecerat: epist. 6. l. 6. & in Oratore.*

## X. M. T. C. M. B R U T O S. D.

CUM ad te tuus quæstor M. Varro proficisceretur, commendatione egere cum non putabam, satis enim commendatum tibi cum arbitrabar ab ipso more majorum: qui, ut te non fugit, hanc quæsturæ conjunctionem liberorum necessitudini proximam voluit esse: sed, cum sibi ita persuasisset ipse, meas de se accurate scriptas litteras maximum apud te pondus habituras: a meque contineretur, ut quam diligentissime scriberem; malui facere, quod meus familiaris tanti sua interesse arbitraretur. Ut igitur debere me facere hoc intelligas; cum primum M. Terentius in forum venit, ad amicitiam se meam contulit; deinde, ut se corroboravit, dux causæ accesserunt, quæ meam in illam benevolentiam augerent; una, quod versabatur in hoc studio nostro, quo etiam nunc maxime delectamur, & cum ingenio, ut nosti, nec sine industria: deinde, quod mature se contulit in societates publicanorum; quod quidem nostem: maximis enim damnis affectus est. Sed tamen causa communis ordinis mihi commendatissimi fecit amicitiam nostram firmiterem, deinde versatus in utrisque subselliis optima & fide, & fama, jam ante hanc commutationem reip. petitioni sese dedit, honoremque honestissimum existimavit fructum laboris sui; his autem temporibus a me Brundisio

dū cum litteris, & mandatis profectus est ad  
 Caesarem, qua in re & amorem ejus in susci-  
 piendo negotio perspexi, & fidem in conficien-  
 do, ac renuntiando. Videor mihi, cum separa-  
 tim de probitate ejus, & moribus dicturus fu-  
 issem, si prius causam, cur eum tantopere dili-  
 gerem, tibi exposuissem, in ipsa causa exponen-  
 da satis etiam de probitate dixisse: sed tamen  
 separatim promitto in meque recipio, fore eum  
 tibi & voluptati, & usui: nam & modestum ho-  
 minem cognosces, & prudentem, & a cupidita-  
 te omni remotissimum, praeterea magni laboris,  
 summaeque industriae. Neque ego haec polliceri  
 debeo, quae tibi ipsi, cum bene cognoveris, ju-  
 dicanda sunt: sed tamen IN omnibus novis con-  
 junctionibus interest, qualis primus aditus sit,  
 & qua commendatione quasi amicitiae fores ape-  
 riantur, quod ego his litteris efficere volui: etsi  
 id ipsa per se necessitudo quaestura effecisse de-  
 bet: sed tamen nihilo infirmius illud, hoc ad-  
 dito. Cura igitur, si me tanti facis, quanti &  
 Varro existimat, & ipse sentio, ut quamprimum  
 intelligam, hanc meam commendationem tan-  
 tum illi utilitatis attulisse, quantum & ipse  
 sperarit, nec ego dubitarim. Vale.

### ARGUMENTUM.

*Arpinatis municipii Gallicana vestigalia Bruto,  
 Galliam Cisalpinam administranti, commendat.*

XI. M. T. C. BRUTO S. D.

**Q**uia semper animadverti, studiose te ope-  
 ram dare, ut ne quid meorum tibi esset  
 ignotum: propterea non dubito, quin scias,  
 non solum, cujus municipii sim, sed etiam quam  
 diligenter soleam meos municipales Arpinates  
 tueri. Quorum quidem omnia commoda, om-  
 nesque facultates, quibus & sacra conficere, &  
 sacra recta adium sacrarum, locorumque com-  
 munium tueri possint, consistunt in iis vestiga-  
 libus, quae habent in provincia Gallia. Ad ea  
 visenda, pecuniasque, quae a colonis debentur,  
 exigendas, totamque rem & cognoscendam, &  
 administrandam, legatos equites Romanos mis-  
 mus,

Mus., Q. Fufidium Q. F. M. Faucium M. F. Q. Mamercum Q. F. Peto a te majorem in modum pro nostra necessitudine, ut ea res tibi curæ sit: operamque des, ut per te quam commodissime negotium municipii administretur, quamprimumque conficiatur: ipsosque, quorum nomina scripsi, ut quam honorificentissime pro tua natura, & quam liberalissime tractes. Bonos viros ad tuam necessitudinem adjunxeris; municipiumque gratissimum beneficio tuo devinxeris: mihi vero etiam eo gratius feceris, quod cum semper tueri municipes meos consuevi, tum hic annus præcipue ad meam curam, officiumque pertinet; nam, constituendi municipii causa, hoc anno ædilem filium meum fieri volui, & fratris filium, & M. Cæsum hominem mihi maxime necessarium; (is enim magistratus in nostro municipio, nec alius ullus creari solet) quos cohonestaris, in primisque me, si respub. municipii tuo studio, & diligentia bene administrata erit; quod ut facias, te vehementer etiam atque etiam rogo. Vale.

## A R G U M E N T U M.

*Q. Fufidium, Arpinatis municipii legatum. qui Tribunus mil. in Cilicia fuerat, diligenter commendat.*

## XII. M. T. C. BRUTO S. D.

**A**lia Epistola communiter commendavi tibi legatos Arpinatum, ut potui diligentissime; hac separatim Q. Fufidium, quocum mihi omnes necessitudines sunt, diligentius commendo; non ut aliquid de illa commendatione diminuam, sed ut hanc addam, nam & privignus est M. Cæsi, mei maxime & familiaris, & necessarii, & fuit in Cilicia mecum tribunus mil. quo in munere ita se tractavit, ut accepisse ab eo beneficium viderer, non dedisse: est præterea, quod apud te valet plurimum, a nostris studiis non abhorrens. Quare velim eum quam liberalissime complectare: operamque des, ut in ea legatione, quam su-

ſcepit contra ſuum commodum, ſequutus auctoritatem meam, quam maxime ejus excellat induſtria. Vult enim, id quod optimo cuique natura tributum eſt, quam maximam laudem cum a nobis, qui cum impulimus, tum a municipio conſequi, quod ei continget, ſi hac mea commendatione tuum erga ſe ſtudium erit conſequutus. Vale.

### ARGUMENTUM.

*L. Caſtrenium ex Lucenſi municipio commendat.*

XIII. M.T.C. BRUTO S.D.

**L** Caſtronius Pætus, longe princeps municipii Lucenſis, eſt honeſtus, gravis, plenus officii, bonus plane vir, & cum virtutibus, tum etiam fortuna, ſi quid hoc ad rem pertinet, ornatus: meus autem eſt familiariffimus, ſic prorſus, ut noſtri ordinis obſervet neminem diligentius: quare & ut meum amicum, & ut tua dignum amicitia, tibi commendo: cui quibuſcunque rebus commodaveris, tibi proſecto jucundum, mihi certe erit gratum. Vale.

### ARGUMENTUM.

*Petit, ut exactionem ejus pecunia, quam Straboni Cornelius debebat, ſuo ſtudio, & diligentia curet.*

XIV. M.T.C. BRUTO S.D. P.

**L** Titio Strabone, equite Romano in primis honeſto, & ornato, familiariffime utor: omnia mihi cum eo intercedunt jura ſummæ neceſſitudinis, huic in tua provincia pecuniam debet P. Cornelius: ea res a Volcatio, qui Romæ juſ dicit, rejecta in Galliam eſt; peto a te hoc diligentius, quam ſi mea res eſſet, quo eſt honeſtius de amicorum pecunia laborare, quam de ſua, ut negotium conſciendum cures, ipſe ſuſcipias, tranſigas, operamque des, quod tibi æquum, & rectum videbitur, ut quam commodiſſima conditione libertus Strabonis, qui ejus rei cauſa



missus est, negotium conficiat, ad nummosque perveniat. Id & mihi gratissimum erit; & tu ipse L. Titium cognosces amicitia tua dignissimum, quod ut tibi curæ sit, ut omnia solent esse, quæ me velle scis, te vehementer etiam atque etiam rogo. Vale.

## ARGUMENTUM.

*Præcilius adolescentem patre natum Cæsari amicissimo commendat.*

XV. M. T. C. CÆSARI IMP. S. D.

**P**RÆCILIO tibi commendo unice, tui necessarii, mei familiarissimi, viri optimi filium, quem cum adolescentem ipsum propter ejus modestiam, humanitatem, animum, & amorem erga me singularem mixtice diligo; tum patrem ejus, re doctus, intellexi, & didici mihi fuisse semper amicissimum. En hic ille est, de illis maxime, qui irridere, atque objurgare me solitus est, quod me non tecum, præsertim cum abs te honorificentissime invitaret, conjungerem.

ἀλλ' ἐμὸν ἔποτε θυμὸν ἐπὶ σῆθεσσι, ἔτι δὲ ἄλλοις  
Audiebam enim nostros proceres clamitantes,  
ἄλλοις ἔσσ', ἵνα τίν σε καὶ ὀφειλόντων εἴη,  
ὥς πρὸς ἡμᾶς ἐκάλυψε μέλαινα.

Sed tamen idem me consolatur; etiam, hominem perustum, etiamnum gloria volunt incendere: atque ita loquuntur.

μὴ μὰν ἀσπασίην, καὶ ἀκλειῶς ἀπολοιμῶ.  
ἀλλὰ μέγα ρέξας τί, καὶ ἑσσομένοισι πυθισθῶ;  
Sed me minus jam movent, ut vides: itaque ab Homeri magniloquentia confero me ad vera præcepta Εὐριπίδου.

Μισῶ σοφιστῶν ἔτις ἐκ αὐτῶ σοφῆς  
Quem versus senex Præcilius laudat, egregie,  
& ait posse eundem & ἄμα πρόσω καὶ ὀπίσω  
videre, & tamen nihilominus

καὶ ἐν ἀριστοῦν, καὶ ὑπεύθυνον ἱμμενεῖ ἄλλων.  
Sed ut redeam ad id unde cœpi, vehementer mihi gratum feceris, si hunc adolescentem humanitate tua, quæ est singularis, comprehenderis, & ad id, quod ipsorum Præcilio-  
Q 5 causa

causa te velle arbitror, addideris cumulum commendationis meae. Genere novo sum litterarum ad te usus, ut intelligeres, non vulgarem esse commendationem. Vale.

# ARGUMENTUM.

*Apollonium, P. Crassi libertum, Caesari, bellum in Hispania contra Pompeji liberos gerenti, commendat.*

## XVI. M. T. C. CAESARI IMP. S. D.

**P** Crassum, ex omni nobilitate, adolescentem dilexi plurimum: & ex eo cum ab incunte ejus aetate bene speravissem, tum optime existimare cepi ex iis judiciis, quae de eo feceram, cognitis; ejus libertum Apollonium, jam tum equidem, cum ille viveret, & magni faciebam, & probabam, erat enim & studiosus Crassi, & ad ejus optima studia vehementer aptus: itaque ab eo admodum diligebatur. Post mortem autem Crassi, eo mihi etiam dignior visus est, quem in fidem, aequae amicitiae meae recipere, quod eos a se observandos, & colendos putabat, quos ille dilexisset, & quibus carus fuisset. Itaque & ad me in Ciliciam venit, multisque in rebus mihi magno usui fuit & fides ejus, & prudentia, & ut opinor, tibi in Alexandrino bello, quantum studio, & fidelitate consequi potuit, non defuit: quod cum speraret, te quoque ita existimare, in Hispaniam ad te maxime ille quidem suo consilio, sed etiam me auctore est profectus. Cui ego commendationem non sum pollicitus: non quia eam valituram apud te arbitrarer: sed neque mihi egere commendatione videbatur, qui & in bello tecum fuisset, & propter memoriam Crassi de tuis unus esset: & si uti commendationibus vellet, etiam per alios eum videbam id consequi posse. Testimonium meum de eo iudicii, quod & ipse magni aestimabat, & ego apud te valere, eram expers, ei libenter dedi. Doctum igitur hominem cognovi, & studiis optimis deditum, idque a puero; nam domi meae cum Diodoro Staico, ho-

mine,

mine, meo iudicio, eruditissimo, multum a puero fuit: nunc autem incensus studio rerum tuarum, eas litteris Græcis mandare cupiebat; posse arbitror: valet ingenio; habet usum: jam pridem in eo genere studii; litterarumque versatur: satisfacere immortalitati laudum tuarum mirabiliter cupit. Habes opidionis meum testimonium: sed tu hoc facilius multo; pro tua singulari prudentia, iudicabis; & tamen quod negaveram, commendo tibi eum: quidquid ei commodaveris, erit mihi maiorem in modum gratum. Vale.

## A R G U M E N T U M.

*Sulpicio Aethaja præfetto Manium Curium commendat. Vide ep. 4. lib. 4. & epist. 6. lib. 6. & 29. lib. 7. & 50. hujus libri, & 1. lib. 16.*

XVII. M. T. C. SER. SULPICIO S. D.

**M** Curius, qui Patris negotiatur, multis, & magnis de causis a me diligitur; nam & amicitia per vetus mihi cum eo est, ut primum in forum venit, instituta: & Patris cum aliquoties antea, tum proxime hoc miserrimo bello domus ejus tota mihi patuit: qua si opus fuit, tam essem usus, quam mea; maximum autem mihi vinculum cum eo est, quasi sanctioris cujusdam necessitudinis, quod est Attici nostri familiarissimus, eumque unum præter ceteros observat, ac diligit, quem si tu jam forte cognovisti, puto me hoc, quod facio, facere serius: ea enim est humanitate, & observantia, ut eum tibi jam ipsum per se commendatum putem. Quod tamen si ita est, magnopere a te quaeso, ut ad eam voluntatem, si quam in illum ante has meas litteras contulisti, quam maximus postea commendatione cumulus accedat: sin autem propter verecundiam suam minus se tibi obtulit, aut eum nondum satis habes cognitum, aut quæ causa est, cur majoris commendationis indigeat; sic tibi eum commendo, ut neque maiore studio quemquam, neque iustioribus de causis commendare possim, faciamque id, quod debent facere ii, qui religiose, & sine

ambitione commendant ; spondebo enim tibi , vel potius spondeo , in meque recipio , eos esse M. Curii mores , eamque tum probitatem , tum etiam humanitatem , ut eum & amicitia tua , & tam accurata commendatione , si tibi sit cognitus , dignum sis existimaturus . Mihi certe gratissimum feceris , si intellexero has litteras tantum , quantum scribens confidebam , apud te pondus habuisse . Vale .

## A R G U M E N T U M .

*Primum agit gratias de optima in Pomponium Atticum voluntate . Deinde non necessariam commendationem addit , ut neque in Epiroticis negotiis , neque aliis in rebus Attico desit .*

## XVIII. M. T. C. S U L P I C I O S. D.

**N**on concedam , ut Attico nostro , quem elatum lætitia vidi , jucundiores tuæ , suavissime ad eum , & humanissime scriptæ litteræ fuerint , quam mihi ; nam etsi utrique nostrum prope æque gratae erant : tamen ego admirabar magis te quasi rogatus , aut certe admonitus liberaliter Attico respondisses ( quod tamen dubium nobis , quin ita futurum fuerit , non erat , ultro ad eum scripsisse , eique nec opinanti voluntatem tuam tantam per litteras detulisse . De quo non modo rogare te , ut eo studiosius mea quoque causa facias , non debeo ; ( nihil enim cumulatius fieri potest , quam polliceris ) sed ne gratias quidem agere , quod tu & ipsius causa , & tua sponte feceris . Illud tamen dicam , mihi id , quod fecisti , esse gratissimum : tale enim tuum iudicium de homine eo , quem ego unice diligo , non potest mihi non summe esse jucundum , quod cum ita sit , esse gratum necesse est . Sed tamen quando mihi , pro conjunctione nostra , vel peccare apud te in scribendo licet ; utrumque eorum , quæ negavi nihil faciendum esse , faciam ; nam & ad id , quod Attici causate ostendisti esse facturum , tantum velim addas , quantum ex nostro amore accessionis fieri potest : & , quod modo verebar , tibi gratias agere .

nunc

nunc plane ago : teque ita existimare volo , quibuscumque officiis in Epiroticis , reliquisque rebus Arriam obstrinxeris , illum me tibi obligatum fore . Vale .

## ARGUMENTUM.

*Rogat , ut Lysonem jam antea commendatum in fidem , necessitudinemque suam recipiat .*

### XIX. M. T. C. SULPICIO S. D.

**C**um Lysonem Patrensi est mihi quidem hospitium vetus ; quam ego necessitudinem sancte colendam puto : sed ea causa etiam cum aliis compluribus : familiaritas tanta nullo cum hospite , & ea cum officiis ejus multis , tum etiam consuetudine quotidiana sic est aucta , ut nihil sit familiaritate nostra conjunctius . Is cum Romæ annum prope ita fuisset , ut mecum viveret : etsi eramus in magna spe , te meis litteris , commendationeque diligentissime facturum id , quod fecisti , ut ejus rem , & fortunas absentis tuerere ; tamen , quod in unius potestate erant omnia ; & quo Lyso fuerat in nostra causa , nostrisque præsiidiis , quotidie aliquid timebamus : effectum tamen est & ipsius splendore , & nostro , reliquorumque hospitum studio , ut omnia , quæ vellemus , a Cæsare impetrarentur : quod intelliges ex iis litteris , quas Cæsar ad te dedit . Nunc non modo non remittimus tibi aliquid ex nostra commendatione , quasi adepti jam omnia : sed eo vehementius a te contendimus , ut Lysonem in fidem , necessitudinemque tuam recipias , cujus dubia fortuna timidius tecum agebamus , verentes , ne quid accideret ejusmodi , ut ne tu quidem mederi posses : explorata vero ejus incolumitate , omnia a te studia summa cura peto ; quæ ne singula enumerem , totam tibi domum commendando , in his adolescentem filium ejus , quem C. Memmius Gemellus , cliens meus , cum in calamitate exilii sui Patrensis civis factus esset , Patrensi legibus adoptavit : ut ejus ipsius hæreditatis jus , causamque tueri . Caput il-

Iud est, ut Lysonem, quem ego virum optimum, gratissimumque cognovi, recipias in necessitudinem tuam, quod si feceris, non dubito, quin in eo diligendo, ceterisque postea commendando, idem, quod ego, sis iudicii, & voluntatis habiturus. Quod cum fieri vehementer studeo, tum etiam illud vereor, ne, si minus cumulate videberis fecisse aliquid ejus causa, me ille negligenter scripsisse de se putet; non te oblitum mei; quanti enim me faceres, cum ex sermonibus quotidianis meis, tum ex epistolis etiam tuis potuit cognoscere. Vale.

## A R G U M E N T U M.

*Commendat Asclaponem medicum, ut amicum, ut doctum, ut fidelem.*

## XX. M. T. C. S U L P I C I O S. D.

**A**sclapone Patrensi, medico, utor valde familiariter; ejusque cum consuetudo mihi jucunda fuit, tum etiam ars, quam sum expertus in valetudine eorum: in qua mihi tum ipsa scientia, tum etiam fidelitate, benevolentiaque satisfecit. Hunc igitur tibi commendo, & a te peto, ut des operam, ut intelligat, diligenter me scripsisse de se, meamque commendationem usui magno sibi fuisse, erit id mihi vehementer gratum. Vale.

## A R G U M E N T U M.

*Domum, & rem familiarem M. Æmilii, maximeque C. Ammonium, libertum ejus, commendat.*

## XXI. M. T. C. S U L P I C I O S. D.

**M**Æmilius Avianus ab ineunte adolescentia me observavit, semperque dilexit, vir cum bonus, tum perhumanus, & in omni genere officii diligendus, quem si arbitrarer esse Sicyone, & nisi audirem, ibi eum etiam nunc, ubi ego reliqui, Cibyze commorari; nihil esset necesse plura me ad te de eo scribere: perficeret enim ipse profecto suis moribus, suaque huma-

nitate, ut sine cujusquam commendatione diligere-  
retur abs te non minus, quam & a me, &  
ceteris suis familiaribus; sed, cum illum abesse  
potem, commendo tibi majorem in modum do-  
mum ejus, quæ est Sicyone, remque familia-  
rem, maxime C. Avianum Ammonium, libera-  
tum ejus: quem quidem tibi etiam suo nomine  
commendo. Nam cum propterea mihi est proba-  
tus, quod est in patronum suum officio, & fide  
singulari, tum etiam, quod in me ipsum magna  
officia contulit, mihiq; molestissimis temporibus  
ita fideliter, benevoleque præsto fuit, ut  
si a me manumissus esset. Itaque peto a te, ut  
eum Ammonium & in patroni ejus negotio sic  
tueare, ut ejus procuratorem, quem tibi com-  
mendo, & ipsum suo nomine diligas, habeasque  
in numero tuorum: hominem prudentem, &  
officiosum cognosces, & dignum, qui a te dili-  
gatur. Vale.

## A R G U M E N T U M.

*T. Manlium suo, Varronisque nomine commendat.*

XXII. M. T. C. S U L P I C I O S. D.

**T** Manlium, qui negotiatur Thespis vehe-  
menter diligo, nam & semper me coluit,  
diligentissimeque observavit, & a studiis nostris  
non abhorret. Accedit eo, quod Varrō Murena  
magnopere ejus causa vult omnia; qui ita existi-  
mavit, etsi suis litteris, quibus tibi Manlium  
commendabat valde consideret, tamen mea com-  
mendatione aliquid accessionis fore. Me quidem  
cum Manlii familiaritas, tum Varronis studium  
commovit, ut ad te quam accuratissime scribe-  
rem. Gratissimum igitur mihi feceris, si huic  
commendationi meæ tantum tribueris, quantum  
cui tribuisti plurimum; id est, si T. Manlium  
quam maxime, quibuscumque rebus honeste, ac  
pro tua dignitate poteris, juveris, atque orna-  
veris. Ex ipsius præterea gratissimis, & humanis-  
simis moribus, confirmo tibi, cum re, quem  
soles fructum a bonorum virorum officiis expe-  
ctare, esse capturum. Vale.

A R-

## A R G U M E N T U M .

*L. Cossinium libertum commendat .*

XXIII. M. T. C. S U L P I C I O S. D.

**L** Cossinio, amico, & tribuli meo valde familiariter utor, nam & inter nosmetipsos vetus usus intercedit; & Atticus noster maiorem etiam mihi cum Cossinio consuetudinem fecit; itaque tota Cossinii domus me diligit, in primisque libertus ejus L. Cossinius Anchialus, homo & patrono & patroni necessariis, quo in numero ego sum, probatissimus. Hunc tibi ita commendo, ut si meus libertus esset, eodemque apud me loco esset, quo & est apud patronum suum, majore studio commendare non possem. Quare pergratum mihi feceris, si eum in amicitiam tuam receperis, atque cum, quod sine molestia tua fiat, si qua in re opus ei fuerit, juveris. Id & mihi vehementer gratum erit, & tibi postea jucundum: hominem enim summa probitate, humanitate, observantiaque cognoscas. Vale.

## A R G U M E N T U M .

*Primum agit gratias Sulpicio, quod se totum Lysoni remisisset. Deinde rogat, ut eundem omnibus officiis, omnique liberalitate complectatur.*

XXIV. M. T. C. S U L P I C I O S. D.

**C**Um antea capiebam ex officio meo voluptatem, quod memineram, quam tibi diligenter Lysonem, hospitem, & familiarem meum commendassem: tum vero posteaquam ex litteris ejus cognovi, tibi eum falsa suspectum fuisse, vehementissime latus sum, me tam diligentem in eo commendando fuisse. Ita enim scripsit ad me, sibi meam commendationem maximo adjumento fuisse, quod ad te delatum diceret, sese contra dignitatem tuam Romae de te loqui solitum esse. De quo etsi propria facilitate, & humanitate purgatum se tibi scri-



scribit esse; tamen primum, ut debeo, tibi maximas gratias ago, cum tantum litteræ meæ potuerunt, ut iis lectis, omnem offensionem suspicionis, quam habueras de Lyfone deponeres, deinde, credas mihi affirmanti, velim, me hoc non pro Lyfone magis, quam pro omnibus scribere; hominem esse neminem, qui unquam mentionem tui sine tua summa laude fecerit. Lyfo vero cum mecum prope quotidie esset, unaque viveret, non solum quia me libenter audire arbitrabatur, sed quia libentius ipse loquebatur, omnia mihi tua & facta, & dicta laudabat. Quapropter etsi a te ita tractatur, ut iam non desideret commendationem meam; unisque se litteris meis omnia consequutum putet, tamen a te peto maiorem in modum, ut cum etiam atque etiam tuis officiis, liberalitate complectare. Scriberem ad te, qualis vir esset, ut superioribus litteris feceram, nisi cum iam per seipsum tibi satis esse notum arbitrarer. Vale.

## A R G U M E N T U M.

*Hagesaretum breviter, sed accurate commendat.*

XXV. M. T. C. SER. SULPICIO S. D.

**H**agesaretus Larissæus, magnis meis beneficiis ornatus in consulatu meo, memor, & gratus fuit, meque postea diligentissime coluit: cum tibi magnopere commendo, ut & hospitem, & familiarem meum, & gratum hominem, & virum bonum, & principem civitatis suæ, & tua necessitudine dignissimum: pergratum mihi feceris, si dederis operam, ut is intelligat hanc meam commendationem magnum apud te pondus habuisse. Vale.

## A R G U M E N T U M.

*Commendat Messinii Achaica negotia ex fratris hereditate.*

XXVI. M. T. C. SULPICIO S. D.

**L** Messinius ea mecum necessitudine conjunctus est, quod mihi quaestor fuit: sed

sed hanc causam, quam ego, ut a majoribus accepi, semper gravem duxi, fecit virtute, & humanitate sua justiore; itaque eo sic utor, ut nec familiarius ullo, nec libentius. Is quamquam confidere videbatur, te sua causa, quæ honeste posses, libenter esse facturum: magnum tamen esse speravit apud te meas quoque litteras pondus habituras. Id cum ipse ita judicabat; tum pro familiari consuetudine sæpe ex me audierat, quam suavis esset inter nos, & quanta coniunctio. Petò igitur a te, tanto scilicet studio, quanto intelligis debere me petere pro homine tam mihi necessario, & tam familiari, ut ejus negotia, quæ sunt in Achaia, ex eo, quod hæres est M. Mindio fratri suo, qui Elide negotiosus est, explices, & expedias tum jure, & potestate, quam habes, tum etiam auctoritate, & consilio tuo. Sic enim præscripsimus iis, quibus ea negotia mandavimus; ut omnibus in rebus, quæ in aliquam controversiam vocarentur, te arbitro, & quod commodum tuo fieri posset, te disceptatore uerentur: id ut honoris mei causa suscipias, vehementer te etiam atque etiam rogo. Illud præterea, si non alienum a tua dignitate putabis esse, feceris mihi pergratum; si qui difficiliore erunt, ut rem sine controversia confici nolint, si eos, quando cum senatore res est, Romam rejeceris: quod quo minore dubitatione facere possis, litteras ad te a M. Lepido consule, non quæ te aliquid juberent, (neque enim id tuæ dignitatis esse arbitrabamur) sed quodam modo quasi commendatitias sumpsimus. Scribebam quam id beneficium bene apud Messinium positurus esses, nisi & te scire considerem, & mihi peterem; sic enim velim existimes, non minus me de illius re laborare, quam ipsum de sua. Sed tamen illam studeo quam facillime ad tuum pervenire, tum illud laboro, ut non minimum hac mea commendatione se consequutum arbitretur. Vale.

## ARGUMENTUM.

*Gratias agit Sulpicio, quod Æmilium Avianum liberaliter honorificeque tractasset, eundemque denuo commendat: laudat in extremo Servium filium.*

XXVII. M. T. C. S U L P I C I O S. D.

**L**icet eodem exemplo sæpius tibi hujus generis litteras mittam, cum gratias agam, quod meas commendationes tam diligenter observas; quod feci in aliis, & faciam, ut video, sæpius; sed tamen non parcam operæ, & vos in vestris formulis, sic ego in epistolis de eadem re alio modo. C. Avianus igitur Ammonius incredibiles mihi gratias per litteras egit, & suo, & Æmilii Aviani, patroni sui, nomine, nec liberalius, nec honorificentius potuisse tractari, nec se præsentem, nec rem familiarem absentis patroni sui. Id mihi cum jucundum est eorum causa, quos ego tibi, summa necessitudine, & summa conjunctione adductus, commendaveram, quod M. Æmilius unus est ex meis familiarissimis, atque intimis maxime necessariis, homo & magnis meis beneficiis devinctus, & prope omnium, qui mihi aliquid debere videntur, gratissimus: tum multo jucundius, te esse in me tali voluntate, ut plus pro sis amicis meis, quam ego præsens fortasse prodessem; credo, quod magis ego dubitarem, quid illorum causa facerem, quam tu, quid mea; sed hoc non dubito, quin existimes, mihi esse gratum: illud te rogo, ut illos quoque gratos homines esse putes: quod ita esse tibi promitto, atque confirmo. Quare velim, quidquid habent negotii, des operam, quod comodo tuo fiat, ut, te obtinente Achajam, conficiant. Ego cum tuo Servio jucundissime, conjunctissimeque vivo; magis quamque cum ex ingenio ejus, singularique studio, tum ex virtute, & probitate voluptatem capio. Vale.

## ARGUMENTUM.

*Agit gratias de Messinio humanissime tractato, rogatque, ut sua in eum beneficia, quibus rebus possit, augeat; commendat etiam Lacedæmonios.*

## XXVIII. M. T. C. S U L P I C I O S. D.

**E**T si libenter peter ea te soleo, si quid opus est meorum cuipiam: tamen multo libentius gratias tibi ago, cum fecisti aliquid commendatione mea: quod semper facis; incredibile est enim, quas mihi gratias omnes agant etiam mediocriter a me tibi commendati. Quæ mihi omnia grata, sed de L. Messinio gratissimum, sic enim est mecum loquutus, te, ut meas litteras legeris, statim procuratoribus suis pollicitum esse omnia, multo vero plura & majora fecisse: id igitur (puto enim etiam atque etiam mihi dicendum esse) velim existimes mihi te fecisse gratissimum, quod quidem hoc vehementius lætor, quod ex ipso Messinio te video magnam capturum voluptatem, est enim in eo cum virtus, & probitas, & summum officium, summaque observantia; tum studia illa nostra, quibus antea delectabamur, nunc etiam vivimus. Quod reliquum est, velim augeas tua in eum beneficia omnibus rebus quæ te erunt dignæ: sed duo, quæ te nominatim rogo: primum, ut, si quid satisfidandum erit, amplius eo nomine non peti, cures, ut satisfidetur fide mea: deinde, cum fere consistat hæreditas in iis rebus, quas avertit Oppia, quæ uxor Mindii fuit, adjuves, in easque rationem, quemadmodum ea mulier Romam perducatur, quod si putarit illa fore, ut opinio nostra est, negotium conficiemus: hoc ut assequamur, te vehementer etiam atque etiam rogo. Illud, quod supra scripsi, id tibi confirmo, in meque recipio, te ea, quæ fecisti Messinii causa, quæque feceris, ita bene collocaturum, ut ipse iudices, homini te gratissimo, jucundissimo benigne fecisse, volo enim ad id, quod mea causa fecisti, hoc etiam

iam accelerare. Nec Lacedæmonios dubitare arbitror, quin ipsi sua, majorumque suorum auctoritate satis commendati sint fidei, & iustitiæ tuæ: & ego, qui te optime novissem, non dubitavi, quin tibi notissima & jura, & merita populorum essent. Itaque, cum a me peteret Philippus Lacedæmonius, ut tibi civitatem commendarem; etsi memineram, me ei civitati omnia debere, tamen respondi, commendatione Lacedæmonios apud te non egere. Itaque sic velim existimes, me omnes Achæja civitates arbitrari pro horum temporum perturbatione felices, quod tu iis præsis; eundemque me ita judicare, te, quod unus optime nosset non nostra solum, sed etiam Græciæ monumenta omnia, tua sponte amicū Lacedæmoniis & esse, & fore. Quare tantum a te peto, ut, cum ea facies Lacedæmoniorum causa, quæ tua fides, amplitudo, iustitia postulat: his, si tibi videbitur, significes, te non moleste ferre, quod intelligas, ea, quæ facias, mihi quoque grata esse; pertinet enim ad officium meum, eos existimare, curæ mihi suas res esse: hoc te vehementer etiam atque etiam rogo. Vale.

# ARGUMENTUM.

*Diligentissima commendatio Capitonis pro hereditate Antistii.*

XXIX. M. T. C. PLANCO S. D.

**N**on dubito, quin scias, in iis necessariis, qui tibi a patre relictī sunt, me tibi esse vel conjunctissimum, non iis modo causis, quæ speciem habent magnæ conjunctionis, sed iis etiam, quæ familiaritate, & consuetudine tenentur; quam scis mihi jucundissimam cum patre tuo, & summam fuisse. Ab iis initiis noster in te amor profectus auxit paternam necessitudinem, & eo magis, quod intellexi, ut primum per ætatem judicium facere potueris, quanti quisque tibi faciendus esset, me a te in primis ceptum esse observari, coli, diligere. Accedebat non

non mediocre vinculum cum studiorum, quod  
insum est per se grave, tum eorum studiorum,  
earumque artium, quæ per se ipsæ eos, qui vo-  
luntate eadem sunt, etiam familiaritate devin-  
ciunt. Expectare te arbitror, hæc tam longe re-  
petita principia quo spectent. Id primum ergo  
habeto, non sine magna, iustaque causa hanc  
me commemorationem esse factam. C. Arejo Ca-  
pitone utor familiarissime: notæ tibi sunt va-  
rietates meorum temporum. In omni genere &  
honorum, & laborum meorum & animus, &  
opera, & auctoritas, & gratia, etiam res fa-  
miliaris C. Capitonis præsto fuit, & paruit &  
temporibus, & fortunæ meæ. Hujus propinquus  
fuit T. Antistius, qui cum forte quæstor Ma-  
cedoniam obtineret, neque ei successum esset,  
Pompejus in eam provinciam cum exercitu ve-  
nit: facere Antistius nihil potuit; nam si po-  
tuisset, nihil ei fuisset antiquius, quam ad Ca-  
pitonem, quem ut parentem diligebat, fever-  
ti, præfortim cum sciret, quanti is Cæsarem fa-  
ceret, semperque fecisset: sed oppressus tantum  
attigit negotii, quantum recusare non potuit.  
Cum signaretur argentum Apolloniæ, non pos-  
sum dicere, eum præfuisse, neque possum ne-  
gare eum affuisse, sed non plus duobus, aut  
tribus mensibus, deinde abfuit a castris; fugit  
omne negotium, hoc mihi, ut tibi, velim cre-  
das, meam enim ille mœsticiam in illo bello  
videbat: mecum omnia communicabat. Itaque  
abdidit se in intimam Macedoniam, quo po-  
tuit longissime a castris, non modo ut non  
præset ulli negotio, sed etiam ut ne interes-  
set quidem. Is post prælium se ad hominem ne-  
cessarium A. Plancium in Bithyniam contulit:  
ibi eum Cæsar cum vidisset, nihil asperæ, ni-  
hil acerbe dixit; Romam iussit venire. Ille  
in morbum continuo incidit; ex quo non con-  
valuit; æger Corcyram venit: ibi est mortuus.  
Testamento, quod Romæ Paulo, & Marcello  
COSS. fecerat, hæres ex parte dimidia, &  
tertia est Capito, in sextante sunt ii, quorum  
pars sine ulla cujusquam querela publica potest  
esse, ea est ad H. S. xxx sed de hoc Cæsar vi-  
derit. Te, mi Plance, pro paterna necessitu-  
di-

line, pro nostro amore, pro studiis, & omni cursu nostro totius vitæ simillimo rogo, & a te ita peto, ut majore cura, majore studio non possim; ut hanc rem suscipias, meam putes; enitare, contendas, efficias, ut mea commendatione, tuo studio, Cæsaris beneficio hereditatem propinqui sui C. Capito obtineat. Omnia quæ potui in hac summa gratia tua, ac potentia a te impetrare, si petivissem, ultro te ad me detulisse putabo, si hanc rem impetravero. Illud fore tibi adjumento spero; cujus ipse Cæsar esse optimus judex potest: semper Cæsarem Capito & dilexit, & coluit, sed ipse hujus rei testis est, novi hominis memoriam; itaque te nihil doceo: tantum tibi sumito pro Capitone apud Cæsarem. quantum ipsum meminisse senties. Ego, quod in me ipso experiri potui, ad te deferam: in eo quantum sit ponderis, tu videbis: quam partem in republ. causamque defenderim; per quos homines, ordinesque steterim, quibusque munitus fuerim, non ignoras; hoc mihi velim credas, si quid fecerim hoc ipso in bello minus ex Cæsaris voluntate, quod intellexerim scire ipsum Cæsarem, me invitissimum fecisse: id feci aliorum consilio, hortatu, auctoritate; quod fuerim moderatior, temperatiorque, quam in ea parte quilibet; id me fecisse maxime auctoritate Capitonis, cujus similes si reliquos necessarios habuissem, reip. fortasse nonnihil, mihi certe plurimum profuissem. Hanc rem, mi Plance, si effeceris, meam de tua erga me benevolentia spem confirmaveris; ipsumque Capitonem, gratissimum, officiosissimum, optimum virum, ad tuam necessitudinem tuo summo beneficio adjunxeris. Vale.

ARGUMENTUM.

*L. Manlium in hereditate fraterna, & omnibus in rebus commendat.*

XXX. M. T. C. ACILIO PROCOS. S. D.

**L** Manlius est Solis: is fuit Catinensis: sed est una cum reliquis Neapolitano civis  
Ro-

Romanus factus, decurioque Neapoli, erat enim adscriptus in id municipium ante civitatem sociis, & Latinis datam. Ejus frater Catina nuper mortuus est: nullam omnino arbitramur de ea hereditate controversiam eum habiturum: & est hodie in bonis; sed, quando habet præterea negotia vetera in Sicilia sua, & hanc hereditatem fraternam, & omnia ejus tibi commendo, in primisque ipsum, virum optimum, mihi que familiarissimum, his studiis litterarum, doctrinaeque præditum, quibus ego maxime delector. Peto igitur abs te, ut eum, siue aderit, siue non venerit in Siciliam, in meis intimis, maximeque necessariis scias esse: itaque tractes, ut intelligat, meam commendationem sibi magno adjumento fuisse. Vale.

## A R G U M E N T U M.

*Flavium Pisonis, generi sui, cum viveret, per necessarium, commendat.*

XXXI. M. T. C. ACILIO PROC. S. D.

**C** Flavio, honesto, & ornato equite Romano, utor valde familiariter; fuit enim generi mei C. Pisonis pernecessarius; meque diligentissime observat & ipse & L. Flavius, frater ejus. Quapropter velim honoris mei causa, quibus rebus honeste, & pro tua dignitate poteris, quam honorificentissime, & quam liberalissime C. Flavium tractes: id mihi sic erit gratum, ut gratus esse nihil possit, sed præterea tibi affirmo, neque id ambitione adductus facio, sed tum familiaritate, & necessitudine, tum etiam veritate, te ex C. Flavii officio, & observantia, & præterea splendore, atque inter suos gratia, magnam voluptatem esse caputurum. Vale.

## A R G U M E N T U M.

*Commendat duos hospites suos Alesinos.*

XXXII. M. T. C. ACILIO PROC. S. D.

**I**N Alesina civitate tam laeta, quam nobili, conjunctissimos habeo & hospicio, & familiar-



liaritate M. & C. Clodios, Archagathum, & Philonem: Sed vereor, ne, quia complures tibi præcipue commendo, exagquare videar ambitione quadam commendationes meas: quam a te quidem cumulate satisfit & mihi, & meis omnibus: sed velim sic existimes, hanc familiam, & hos mihi maxime esse conjunctos vetustate, officiis, benevolentia. Quamobrem peto a te majorem in modum, ut his omnibus in rebus, quantum tua dignitas, fidesque patietur, commodes, id si feceris, erit mihi vehementissime gratum. Vale.

## ARGUMENTUM.

*Libertos, & negotia Nasonis commendat.*

XXXIII. M. T. C. ACILIO PROC. S. D.

CN. Ottacilio Nafone utor familiarissime, ita prorsus, ut illius ordinis nullo familiaribus; nam & humanitate ejus, & probitate in consuetudine quotidiana magnopere delector. Nihil jam opus est expectare te, quibus cum verbis tibi commendem, quo sic utar, ut scripsi. Habet is in provincia tua negotia, quæ procurant liberti Hilarius, Antigonus, Demonstratus; quos tibi, negotiaque omnia Nasonis non lecus commendo, ac si mea essent. Gracissimum mihi feceris, si intellexero, hanc commendationem magnum apud te pondus habuisse. Vale.

## ARGUMENTUM.

*Commendat Lysonem, hospitem suum.*

XXXIV. M. T. C. ACILIO PROC. S. D.

A Vicum mihi hospitium est cum Lyfone, Lysonis filio Lilyætano, valdeque ab eo observor, cognovique dignum & patre & avo, est enim nobilissima familia; quapropter commendo tibi majorem in modum rem, & munusque ejus; magnoque opere abs te, peto,

R

cu-

195. EPIST. FAMIL.  
cures, ut is intelligat, meam commendationem  
maximo sibi apud te & adjumento, & ornamen-  
to fuisse. Vale.

### ARGUMENTUM.

*Commendat hospitem, & familiarem suum Philoxenum.*

XXXV. M. T. C. ACILIO PROC. S. D.

**C**AVIANUS Philoxenus antiquus est hospes meus, & præter hospitium, valde etiam familiaris; quem Cæsar meo beneficio in Novocomenses retulit. Nomen autem Aviani consequutus est, quod homine nullo plus est usus, quam Flaccò Aviano, meo, quemadmodum te scire arbitror, familiarissimo; quæ ego omnia collegi, ut intelligeres, non vulgarem esse commendationem hanc meam. Peto igitur abs te, ut omnibus rebus, quod sine molestia tua facere possis, ei commodes, habeasque in numero tuorum, perficiasque, ut intelligat, has litteras meas magno sibi usui fuisse, erit id mihi majorem in modum gratum. Vale.

### ARGUMENTUM.

*Commendat Demetrium Megam in jure civitatis, omnibusque in rebus.*

XXXVI. M. T. C. ACILIO PROCOS. S. D.

**C**UM Demetrio Mega mihi vetustum hospitium est, familiaritas autem tanta, quanta cum Siculo nullo. Ei Dolabella, rogatu meo, civitatem a Cæsare impetravit: qua in re ego interfui; itaque nunc P. Cornelius vocatur, eamque propter quosdam sordidos homines, qui Cæsaris beneficia vendebant, tabulam, in qua nomina civitate donatorum incisa essent, revelli jussisset, eidem Dolabella, me audiente, Cæsar dixit, nihil esse, quod de Mega vereretur beneficium suum in eo manere. Hoc te scire volui, ut eum in civium Romanorum numero haberes, ceterisque in rebus tibi cum ita com-  
men-

commendo, ut majore studio neminem commendarim. Gratissimum mihi feceris, si eum ira tractaris, ut intelligat, meam commendationem magno sibi ornamento fuisse. Vale.

## A R G U M E N T U M.

*Commendat Hippiam in liberatione bonorum, & omnibus in rebus.*

XXXVII. M. T. C. ACILIO PROC. S. D.

**H**ippiam Philoxeni filium, Calatinum, hospitem, & necessarium meum tibi commendo majorem in modum. Ejus bona, quemadmodum ad me delata res est, publice possidentur alieno nomine contra leges Calatinorum. Id si ita est, etiam sine mea commendatione ab aequitate tua res ipsa impetrare debet, ut ei subvenias. Quoquo modo autem se res habet; peto a te, ut honoris mei causa eum expedias, tantumque ei commodas & in hac re, & in ceteris, quantum tua fides, dignitasque patietur, id mihi vehementer gratum erit. Vale.

## A R G U M E N T U M.

*Bruti negotia, procuratoresque commendat.*

XXXVIII. M. T. C. ACILIO PROC. S. D.

**B**rutus, eques Romanus, adolescens omnibus rebus ornatus, in meis familiarissimis est, neque observat diligentissime: cujus cum patre magna mihi fuit amicitia jam inde a quaestura mea Siciliae. Ompino nunc ipse Brutus Roma mecum est: sed tamen domum ejus, & rem familiarem, & procuratores tibi sic commendo, ut majore studio commendare non possim, gratissimum mihi feceris, si curaris, ut intelligat, id quod ei recepi, hanc meam commendationem sibi magno adjumento fuisse. Vale.

## A R G U M E N T U M.

*Commendat Titurnium Rufum.*

XXXIX. M. T. C. ACHLIO PROC. S. D.

**C**um familia Titurnia necessitudo mihi intercedit vetus; ex qua reliquus est M. Titurnius Rufus, qui mihi omni diligentia, rateque officio est tuendus. Est igitur in tua potestate, ut ille in me satis sibi praesidii putet esse. Quapropter eum tibi commendo maiorem in modum; & ab te peto, efficias, ut is commendationem hanc intelligat sibi magno adjumento fuisse, erit id mihi vehementer gratum.

## A R G U M E N T U M.

*L. & C. Aurelios commendat.*XL. M. T. C. Q. ANCHARIO, Q. F.  
PROCOS. S. D.

**L** Et C. Aurelios L. F. quibus & ipsis, & patre eorum, viro optimo, familiarissime utor, commendo tibi maiorem in modum, adolescentes omnibus optimis artibus ornatos, meos pernecessarios, tua amicitia dignissimos. Si ulla mea apud te commendatio valuit, quod seio multas plurimum valuisse, hæc ut valeat, rogo. Quod si eos honorifice, liberaliterque tractaris, & tibi gratissimos, optimosque adolescentes adjunxeris; & mihi gratissimum feceris, Valde.

## A R G U M E N T U M.

*Gratias agit & suo, & Pompeji nomine de Luccejo benignissime tractato; eundemque de novo commendat.*

XLI. M. T. C. L. CULLEOLO S. D.

**Q**ua fecisti L. Lucceji causa, scire te plane volo, te homini gratissimo commodasse,  
&

& cum ipsi, quæ fecisti, pergrata sunt, tum Pompejus, quotiescumque me videt, (videt autem sapissime) gratias tibi agit singulares. Adde etiam illud, quod tibi jucundissimum esse certo scio, me ipsum ex tua erga Luccejum benignitate maxima voluptate affici. Quod superest, quanquam mihi non est dubium, quin cum antea nostra causa, nunc jam etiam tua constantia gratia mansurus sis in eadem ista liberalitate; tamen abs te vehementer etiam atque etiam peto, ut ea, quæ initio ostendisti, deindeque fecisti, etiam ad exitum augeri, & cumulari per te velis; id & Luccejo, & Pompejo valde gratum fore, teque apud eos præclare positurum; confirmo, & spondeo. De re, deque his negotiis, cogitationibusque nostris perscripseram ad te diligenter paucis ante diebus, easque litteras dederam pueris tuis. Vale.

## A R G U M E N T U M.

*Luccejum commendat, jam ante commendatum.*

XLII. M.T.C.L. CULLEOLO PROC. S.D.

**L**uccejus meus familiarissimus, homo omnium gratissimus, mirificas tibi apud me gratias egit, cum diceret, omnia te cumulatifime, & liberalissime procuratoribus suis pollicitum esse. Cum oratio tua tam ei grata fuerit, quam gratam rem ipsam existimas fore, cum, ut spero, quæ pollicitus es, feceris. Omnino ostenderunt Bulliones, sese Luccejo Pompeji arbitrato satisfacturos, sed vehementer opus est nobis & voluntatem, & auctoritatem, & imperium tuum accedere, quod ut facias te etiam atque etiam rogo. Illudque mihi gratissimum est, quod ita sciunt Lucceji procuratores, & ita Luccejus ipse ex litteris tuis, quas ad eum misisti, intellexit, hominis nullius apud te auctoritatem, aut gratiam valere plus quam meam, id ut re experiatur, iterum & sæpius te rogo. Vale.

LIBER XIII. CULLEOLO PROC. S.D.

LIBER XIII. CULLEOLO PROC. S.D.

## A R G U M E N T U M.

*Oppium commendat Gallio in Ciliciam proficiscenti.*

XLIII. M. T. C. Q. GALLIO S. D.

**E**T si plurimis rebus spero fore, ut perspiciam, quod tamen jam pridem perspicio, me à te amari: tamen nunc ea causa tibi datur, in qua facile declarare possis tuam erga me benevolentiam. L. Oppius M. F. Philomeli negotiatur, homo mihi familiaris, cum tibi uni ce commendo: eoque magis, quod cum ipsum diligo, tum quod negotia procurat L. Egnatii Ruri, quo ego uno equite Romano familiarissimè utor, & qui cum consuetudine quotidiana; tum officiis plurimis, maximisque mihi conjunctus est. Oppium igitur presentem ut diligas, Egnatii absentis rem ut tueri, æque à te peto, ac si mea negotia essent. Velim, memoriam tuam causa, des litterarum aliquid, quæ tibi in provincia reddantur; sed ita conscribas, ut tum, cum eas leges, facile recordari possis hujus meæ commendationis diligentiam, hoc te vehementer etiam atque etiam rogo. Vale.

## A R G U M E N T U M.

*Eundem Oppium rursus eidem commendat.*

XLIV. M. T. C. GALLIO S. D.

**E**T si ex tuis, & L. Oppi familiarissimi mei litteris cognovi te memorem commendationis meæ fuisse; idque pro tua fiamina erga me benevolentia, proque nostra necessitudine minime sum admiratus: tamen etiam atque etiam tibi L. Oppium presentem, & L. Egnatii mei familiarissimi absentis negotia commendando. Tanta mihi cum eo necessitudo est, familiaritasque, ut si mea res esset, non magis laborarem. Quapropter mihi gratissimum feceris, si curaris, ut is intelligat, me à te tantum amari, quantum ipse existimo; hoc mihi gratius facere nihil potes, idque ut facias, vehementer te rogo. Vale.

A R-

## A R G U M E N T U M.

*Egnatii & servum Anchialum, & negotia Appulejo commendat.*

XLV. M. T. C. APULEJO PROQUÆS. S. D.

**L** Egnatio uno equite Rom. vel familiarissime utor; ejus Anchialum servum, negotiaque qua habet in Asia, tibi commendo non minore studio, quam si rem meam commendarem, sic enim existimes velim, mihi cum eo non modo quotidianam consuetudinem summam intercedere, sed etiam officia magna, & mutua nostra inter nos esse. Quamobrem etiam atque etiam a te peto, ut cures, ut is intelligat, me ad te satis diligenter scripsisse, nam de tua erga me voluntate non dubitabat; id ut facias, te etiam atque etiam rogo. Vale.

## A R G U M E N T U M.

*Nostium cohæredem suum commendat.*

XLVI. M. T. C. APULEJO PROQUÆS. S. D.

**L** Nostius Zoilus est cohæres meus, hæres autem patroni sui; ea re utrumque scripsi, ut & mihi cum illo causam amicitiae scires esse, & hominem probum existimares, qui patroni judicio ornatus esset, eum tibi igitur sic commendo, ut unum ex nostra domo. Valde mihi gratum erit, si curaris, ut intelligat, hanc commendationem sibi apud te magno adjumento fuisse. Vale.

## A R G U M E N T U M.

*Egnatium, communem amicum, commendat.*

XLVII. M. T. C. SILIO S. D.

**Q**uid ego tibi commendem eum, quem tu ipse diligis? sed tamen, ut scires, eum non a me diligi solum, verum etiam amari, ob eam

rem tibi hæc scribo. Omnium tuorum officiorum, quæ & multa & magna sunt; mihi gratissimum fuerit, si ita tractaris Egnatium, ut sentiat, & se a me; & me a te amari, hoc vehementer etiam atque etiam rogo. Illa nostra scilicet ceciderunt. utamur igitur vulgari consolatione; quid; si hoc melius? sed hæc coram. Tu fac, quod facis, ut me ames, teque amari a me scias. Vale.

## A R G U M E N T U M.

*Omnes Cyprios, maximeque Paphios commendat.*

XLVIII. M. T. C. SEXTILIO RUFO

Q. U. Æ. S. S. D.

**O**Mnes tibi commendo Cyprios, sed magis Paphios; quibus tu quæcunque commodaris, erunt mihi gratissima. Eoque facio libentius, ut eos tibi commendem, quod & tux-laudii, cujus ego fautor sum; conducere arbitror, cum primus in eam insulam quæstor veneris, ea te instituere, quæ sequantur alii; quæ, ut spero, facilius consequere, si & P. Lentuli, necessarii tui, legem, & ea; quæ a me constituta sunt, sequi volueris; quam rem tibi confido magnæ laudi fore. Vale.

## A R G U M E N T U M.

*Commendat Q. Pompejum.*

XLIX. M. T. C. CURIO PROCOS. S. D.

**Q** Pompejus Sexti F. multis, & veteribus causis necessitudinis mihi conjunctus est. Is cum antea meis commendationibus & rem, & gratiam, & auctoritatem suam tueri conlucverit, nunc profecto, te provinciam obtinente, meis litteris assequi debet, ut nemini se intelligat commendationem unquam fuisse. Quamobrem a te majorem in modum peto, ut cum omnes meos æque, ac tuos observare pro nostra necessitudine debeas, hunc in primis ita in tuam fidem redipias, ut ipse intelligat nullam rem sibi majori usui, aut ornameto, quam meam commendationem, esse potuisse. Vale.

A R-



## ARGUMENTUM.

*Petit., ut Manium Curius ab omni incommodo, detrimento, molestia integrum conservet. V.ep. 17.*

L. M. T. C. ARISTO PROCOS. S. D.

**S**umpsi hoc mihi pro tua in me observantia, quam penitus perspexi, quamdiu Brundusii fuimus, ut ad te familiariter, & quasi pro meo jure scriberem, si qua res esset, de qua valde laborarem. M. Curius, qui Patris negotiatur, ita mihi familiaris est, ut nihil possit esse conjunctius; multa illius in me officia, multa in illum mea: quodque maximum est, summus inter nos amor & mutuus. Quæ cum ita sint, si ullam in amicitia mea spem habes; si ea, quæ in me officia & studia Brundusii contulisti, vis mihi etiam gratiora efficere, quanquam sunt gratissima; si me a tuis omnibus amari vides: hoc mihi da, atque largire, ut M. Curius factum & testum, ut ajunt, ab omni incommodo, detrimento, molestia sincerum, integrumque conserves. Et ipse spondeo, & omnes hoc tibi tui pro me recipient ex mea amicitia, & ex tuo in me officio maximum te fructum, summamque voluptatem esse capturum. Vale.

## ARGUMENTUM.

*P. Messienum commendat.*

L. M. T. C. P. CÆSIO S. D.

**P**Messienum, equitem Romanum, omnibus rebus ornatum, meumque perfamiliarem tibi commendo, ea commendatione, quæ potest esse diligentissima. Peto a te & pro nostra, & pro paterna amicitia, ut eum in tuam fidem recipias, ejusque rem famamque tuare. Virum bonum, tuæque amicitia dignum tibi adjunxeris, mihiq; gratissimum feceris. Vale.

## ARGUMENTUM. A

*Hospitem suum Aristotelem commendat.*

LII. M. T. C. REGI S. D.

**A** Licinius Aristoteles, Melitenis, antiquissimus est hospes meus, & præterea conjunctus magno usu familiaritatis. Hæc cum ita sint, non dubito, quin tibi satis commendatus sit, etenim ex multis cognosco, meam commendationem plurimum apud te valere. Hunc ego a Cæsare liberavi, frequens enim fuerat nobiscum: atque etiam diutius in causa est, quam nos, commoratus: quo melius te de eo existimaturum arbitror. Fac igitur, mi Rex, ut intelligat, has sibi litteras plurimum profuisse. Vale.

## ARGUMENTUM.

*Gemicilium Curvum commendat.*

LIII. M. T. C. Q. THERMO PROPRIÆT. S. D.

**L** Gemicilio Curvo jampridem familiarissimo, sine uter optimo viro, & homine gratissimo, cum tibi penitus commendo, atque trado: primum, ut omnibus in rebus ei te commodes, quoad fides tua, dignitasque patietur; patietur autem in omnibus, nihil enim abs te unquam, quod sit alienum tuis, aut etiam suis moribus, postulabit. Præcipue autem tibi commendo negotia ejus, quæ sunt in Hellesponto: primum, ut obtineat id juris in agris, quod ei Pariana civitas decrevit, & dedit, & quod semper obtinuit sine ulla controversia; deinde, si quid habebit cum aliquo Hellespontio controversia, ut in illam *discrepantiam* rejicias. Sedi non mihi videor, cum tibi totum hominem diligentissime commendarim, singulas ad te ejus causas perscribere debere. Summa illa sit: quidquid officii, beneficii, honoris in Gemicilium contuleris, id te existimabo in me ipsum, atque in rem meam contulisse. Vale.

A R-

## A R G U M E N T U M .

*Primum agit gratias Thermo, quod Marcilium liberalissime traxaverit: deinde petit, operam det, ne socrus Marcilii rea fiat,*

## LIV. M. T. C. Q. THERMO PROPRIET. S. D.

CUM mihi multa grata sunt, quæ tu, adductus mea commendatione, fecisti, tum in primis, quod M. Marcilium, amici, atque interpretis mei filium liberalissime traxavisti; vixit enim Laodiceam, & tibi apud me, mihiq; propter te gratias maximas egit. Quare, quod reliquum est, a te peto, quando apud gratos homines beneficium ponis, ut eo libentius his commodos operamque des, quoad fides tua patietur, ut socrus adolescentis rea ne fiat. Ego cum antea studiose commendabam Marcilium, tum multo nunc studiosius, quod in longa apparitione singularem, & prope incredibilem patris Marcilii fidem, abstinentiam, modestiamque cognovi. Vale.

## A R G U M E N T U M .

*Commendat Annejum, legatum suum, in controversia Sardoniana.*

## LV. M. T. C. THERMO PROPRIET. S. D.

ET si mihi videor intellexisse, cum tecum Ephesi de re M. Anneji, legati mei, loquutus sum, te ipsius causa vehementer omnia velle; tamen & M. Annejum tanti facio, ut mihi nihil putem pratermittendum, quod illi intersit; & me a te tanti fieri puto, ut non dubitem, quin ad tuam voluntatem magnus cumulus accedat commendationis meæ; nam cum jamdudum diligenter M. Annejum, deque eo sic existimarem, ut res declararet, quod ultro ei detrulerim legationem, cum multis potentibus denegasset; tum vero postea quam mecum in bello, atque in re militari fuit, tantam in eo virtutem, prudentiam, fidem, tantamque

erga me benevolentiam cognovi, ut hominem neminem pluris faciam. Eum cum Sardinis habere controversiam scis, causam tibi exposuimus Ephesi: quam tu tamen coram, facilius, meliusque cognosces. De reliquo mihi mehercule diu dubium fuit, quid ad te potissimum scriberem, jus enim quemadmodum dicas, clarum, & magna cum tua laude notum est; nobis autem in hac causa nihil aliud opus est, nisi te jus instructo tuo dicere. Sed tamen, cum me non fugeat, quanta sit in Pratore auctoritas, praesertim ista integritate, gravitate, clementia, qua te esse inter omnes constat: peto abs te pronostra conjunctissima necessitudine, plurimisque officiis paribus, ac muris, ut voluntate, auctoritate, studio tuo perficias, ut M. Annejus intelligat, te & sibi amicum esse, quod non dubitat, (saepe enim mecum loquutus est) & multo amiciores his meis litteris esse factum. In tuo toto imperio, atque provincia nihil est, quod mihi gratius facere possis. Jam apud ipsum, gratissimum hominem, atque optimum virum, quam bene positurus sis studium tuum, atque officium, dubitare te non existimo. Vale.

## A R G U M E N T U M.

*Negotia Cluvii Puteolani commendat.*

LVI. M. T. C. THERMO PROPRAET. S.D.

**C**luyus Puteolanus valde me observat, valdeque est mihi familiaris. Is ita sibi persuadet, quod in tua provincia negotii habet, nisi te provinciam obtinente, meis commendationibus confecerit, id se in perditis, & desperatis habiturum. Nunc, quando mihi ab amico officiosissimo tantum oneris imponitur, ut ego quoque tibi imponam pro tuis in me summis officiis; ita tamen, ut tibi nolim molestus esse. sed Mylasii, & Alabandenses pecuniam Cluyio debent. Dixerat mihi Euthydemus, cum Ephesi essem, se curaturum, ut Bedici Mylasii Romam mitterentur, id factum non est, legatos audio missos esse: sed malo Bedicos, ut aliquid confici possit.

possit. Quare peto a te, ut eos, & Alabanden-  
ses jubeas Ecdicos Romam mittere, præterea Phi-  
lotes Alabandensis prædixit Cluvio dedit: hæc  
commissa sunt: velim cures, ut aut de hypothe-  
cis decedat, easque procuratoribus Cluvii tra-  
dat, aut pecuniam solvat. Præterea Heracleotæ,  
& Bargyletæ, qui item debent, aut pecuniam  
solvant, aut fructibus suis satisfaciunt. Caunii  
præterea debent, sed ajunt, se depositam pecu-  
niam habuisse; id velim cognoscas. & si intel-  
lexeris, eos neque ex edicto, neque ex decreto  
depositam habuisse, des operam, ut usurz Clu-  
vio, instituto tuo, conserventur. His de rebus  
eo magis laboro, quod agitur res Cn. Pompeji  
etiam nostri necessarii, & quod is magis eti-  
am mihi laborare videtur, quam ipse Cluvius:  
cui satisfactum esse a nobis valde volo. His  
de rebus te vehementer etiam atque etiam ro-  
go. Vale.

### ARGUMENTUM.

*Petit a Thermo, ut Annejum, Legatum suum, re-  
mittat: cumque in negotio suo commendat.*

### LVII. M. T. C. THERMO PROPÆT. S. D.

Quo magis quotidie ex litteris, nuntiisque,  
bellum magnum esse in Syria, cognosco,  
eo vehementius a te pro nostra necessitudine  
contendo, ut mihi M. Annejum legatum pri-  
mo quoque tempore remittas, nam ejus opera,  
consilio, scientia rei militaris vel maxime in-  
telligo, me, & Remp. adjuvari posse, quod  
nisi tanta res ejus ageretur; nec ipse adduci  
potuisset, ut a me discederet; neque ego, ut  
eum a me dimitterem. Ego in Ciliciam proficisci  
cogito circiter Kal. Majas, ante eam diem An-  
nejus ad me redeat oportet. Illud, quod tecum  
& coram & per litteras diligentissime egi, id &  
nunc etiam atque etiam rogo, curæ tibi sit, ut  
suum negotium, quod habet cum populo Sardia-  
no, pro causæ veritate, & pro sua dignitate con-  
ficiat. Intellexi ex tua oratione, cum tecum E-  
phesi loquutus sum, te ipsius Anneji causam omnia  
velle:

velle : sed tamen sic velim existimes , te mihi nihil gratius facere posse , quam si intellexero , per te illum ipsum negotium ex sententia consecuisse , idque quamprimum ut efficias , te etiam atque etiam rogo . Vale .

### ARGUMENTUM.

*Commendat L. Custidium.*

LVIII. M. T. C. C. TITIO, L. F. RUFO  
PRÆT. URB. S. D.

**L** Custidius est tribulis , & municeps ; & familiaris meus ; is causam habet : quam causam ad te deferet . Commendo tibi hominem , sicuti tua fides , & meus pudor postulat , tantum , ut faciles ad te aditus habeat , quæ æqua postulat , ut , lubente te , impetret : sentiatque , meam sibi amicitiam , etiam cum longissime absum , prodesse in primis apud te . Vale .

### ARGUMENTUM.

*Commendat M. Fabium.*

LIX. M. T. C. CURTIO PEDUCEANO  
PRÆT. S. D.

**M** Fabium unice diligo , summaque mihi cum eo consuetudo , & familiaritas est pervetus ; in ejus controversiis quid decernas , te non peto ; ( servabis , ut tua fides , & dignitas postulat , edictum , & institutum tuum ) sed ut quam facillimos ad te aditus habeat ; quæ erunt æqua , lubente te , impetret : ut meam amicitiam sibi , etiam cum procul absum , prodesse sentiat præsertim apud te , hoc vehementer etiam atque etiam te rogo . Vale .

### ARGUMENTUM.

*Commendat Livinejum libertum.*

LX. M. T. C. C. MUNATIO S. D.

**L**ivinejus Trypho est omnino L. Reguli familiarissimus mei libertus , cujus calamitas

tas etiam officiosior me facit in illam: nam benevolentior, quam semper fui, esse non possum; sed ego libertum ejus per seipsum diligo, summa enim ejus erga me officia exstiterunt, ut nostris temporibus, quibus facillime bonam benevolentiam hominum, & fidem perspicere potui; cum tibi ita commendo, ut homines grati, & memores benemeritos de se commendare debent. Pergratum mihi feceris, si ille intellexerit, se, quod pro salute mea multa pericula adierit, sæpe hyeme summa navigarit, pro tua erga me benevolentia gratum etiam tibi fecisse. Vale.

ARGUMENTUM.

*Commendat Pinnium in exactione pecunia; quam ei Nicaenses debent.*

LXI. M. T. C. P. SILIO PROPRÆT. S. D.

**T** Pinnio familiarissime me usum esse, scire te arbitror, quod quidem ille testamento declaravit, qui me tum tutorem, tum etiam secundum heredem instituerit. Ejus filio, mire studioso, & erudito, & modesto pecuniam Nicæenses grandes debent ad H. S. octogies, & ut audio, in primis volunt ei solvere. Pergratum igitur mihi feceris, quando non modo reliqui tutores, qui sciunt, quanti me facias, sed etiam puer ipse sibi persuasit, te omnia mea causa facturum esse, si dederis operam, quoad tua fides, dignitasque parietur, ut quamprimum pecunia Pinnio solvatur Nicæensium nomine. Vale.

ARGUMENTUM.

*Primum de Atilio gratias agit, deinde Q. Fratrem commendat.*

LXII. M. T. S. SILIO PROPRÆT. S. D.

**E**T in Atilii negotio te amavi; cum enim sero venissem, tamen honestum equitem Romanum beneficio tuo conservavi; & mehercule semper sic in animo habui, te in meo

are esse propter Lamia nostri conjunctionem, & singularem necessitudinem. Itaque primum tibi ago gratias, quod me omni molestia liberas: deinde impudentia prosequor: sed idem sarciam: te enim semper sic colam, & tuebor, ut quem diligentissime. Q. Fratrem meum, si me diligis, eo numero cura ut habeas, quo me, ita magnum beneficium tuum magno cumulo auxeris. Vale.

## A R G U M E N T U M.

*Commendat M. Lanium studiose admodum.*

## LXIII. M. T. C. SILIO PROPRÆT. S. D.

**N**on putavi fieri posse, ut mihi verba deessent; sed tamen in M. Lanio commendando defunx, itaque rem tibi exponam paucis verbis, sed tamen ut plane perspicere possis voluntatem meam. Incredibile est, quanti faciamus & ego, & frater meus, qui mihi carissimus est, M. Lanium, id sit tum plurimis ejus officiis, tum summa probitate, & singulari modestia. Eum ego a me invitissimus dimisi, tum propter familiaritatem, & consuetudinis suavitatem, tum quod consilio ejus fideli, ac bono libenter utebar, sed vereor, ne jam mihi superesse verba putes, quæ dixeram defutura. Commendo tibi hominem, sicut intelligis, me de quo ea supra scripserim, debere commendare, a teque vehementer etiam atque etiam peto, ut, quod habet in tua provincia negotii, expedias: quod tibi videbitur rectum esse, ipsi dicas, hominem facillimum, liberalissimumque cognosces, itaque te rogo, ut eum solutum, liberum, confectis ejus negotiis per te quamprimum ad me remittas, id mihi, fratrique meo gratissimum feceris. Vale.

## A R G U M E N T U M.

*Agit gratias de Nerone honorificentissime tractato, eumque in omnibus rebus vehementer commendat.*

## LXIV. M. T. C. SILIO PROPRÆT. S. D.

**N**Ero meus mirificas apud me tibi gratias agit, prorsus incredibiles, ut nullum ho-



norem sibi haberi potuisse diceret, qui a te pratermissus esset: magnum fructum ex ipso capies, nihil est enim illo adolescente gratius, sed mehercule mihi quoque gratissimum fecisti, pluris enim ex omni nobilitate neminem facio. Itaque si ea feceris, quæ ille per me tecum agi voluit, gratissimum mihi feceris, primum de Pausania Alabandensi, sustentis rem, dum Nero veniat, vehementer enim ejus causa cupere cum intellexi, itaque hoc valde te rogo. Deinde Nisæos, quos Nero in primis habet necessarios, diligentissimeque tnetur, ac defendit, habeas tibi commendatissimos, ut intelligat illa civitas, sibi in Neronis patrocinio summum esse praesidium: Strabonem Servilium tibi saepe commendavi: nunc eo facio id impensius, quod ejus causam Nero suscepit. Tantum a te petimus, ut agas eam rem, nec relinquo hominem innocentem ad alicujus tui dissimilis questum, id tum gratum mihi erit: tum etiam existimabo, te humanitate tua esse usum. Summa hujus epistolæ hæc est, ut omnes omnibus rebus Neronem, sicut institui, atq; fecisti. Magnum theatrum habet ista provincia, non ut hæc nostra, adolescentis nobilis, ingeniosi, abstinentis commendationem, atque gloriam. Quare si te fautor usus erit, sicut & utetur profecto, & usus est, amplissimas clientelas acceptas a majoribus confirmare poterit, & beneficiis suis obligare. Hoc in genere si eum adjuveris eo studio, quo ostendisti, apud ipsum præclarissime posueris, sed mihi etiam gratissimum feceris. Vale.

## A R G U M E N T U M.

*Cupit pactiones per Hispanem cum civitatibus confici: in eoque ipsum Silio commendat.*

LXV. M. T. C. SILIO PROPRÆT. S. D.

CUM P. Terentio Hispano, qui operas in scriptura pro magistro dat, mihi summa familiaritas, consuetudoque est: multaque, & magna inter nos officia paria, & mutua intercedunt: ejus summa existimatio agitur in eo, ut pactiones cum civitatibus reliquis conficiat;

Nunc, quando iustitiam tuam sequutus, tutissimum sibi portum provinciam istam esse duxit; etiam atque etiam te rogo, atque oro, ut cum & in reliquis veteris negotiationis colligendis joves, & ceteris rebus tegas, atque tueare: hoc mihi gratius facere nihil potes. Vale.

## A R G U M E N T U M .

*Commendat Andronem, Arthemonis filium Laodicensem.*

LXVII. M. T. C. SERVILIO S. D.

**E**X provincia mea Ciliciensi, cui scis *περὶ Ἀσιας* Asiaticas attributas fuisse; nullo sum familiaris usus, quam Androne, Arthemonis filio, Laodicensi: eumque habui in civitate tum hospitem, tum vehementer ad meam vitam rationem, & consuetudinem accommodatum: quem quidem multo etiam pluris, posteaquam decessi, facere cœpi, quod multis rebus expertus sum gratum hominem; meique memorem: itaque cum Romæ libentissime vidi; non te enim fugit, qui plurimis in ista provincia benigne fecilli, quam multi grati reperiantur. Hac propterea scripsi, ut me non sine causa laborare intelligeres, & ut tu ipse eum dignum hospitio tuo judicares. Feceris igitur mihi gratissimum, si ei declararis, quanti me facias, id est, si receperis eum in fidem tuam, & quibuscumque rebus honeste, ac sine molestia tua poteris, adjuveris. Hoc mihi vehementer erit gratum, idque ut facias, te etiam atque etiam rogo. Vale.

## A R G U M E N T U M .

*Significat, quam sibi gratum fuerit, rursus illius navigationis cognoscere. Petit, ut de ista provincia, institutisque suis scribat, postremo suum officium ad omnia pollicetur.*

LXVIII. M. T. C. P. SERVILIO ISAURO  
P. R. O C O S. C O L L E G E S. D.

**G**ratæ mihi vehementer tuae litteræ fuerunt, ex quibus cognovi cursus navigationum tuarum.

tuarum; significabas enim memoriam tuam nostræ necessitudinis; quæ mihi nihil poterat esse jucundius. Quod reliquum est, multo etiam erit gratius, si ad me de reip. id est, de statu provinciarum de institutis tuis familiariter scribes, quæ quamquam ex multis pro tua claritate audiam, tamen libentissime ex tuis litteris cognoscam. Ego ad te de reip. summa quid sentiam, non sæpe scribam, propter periculum ejusmodi litterarum: quid agatur autem, scribam sæpius: sperare tamen videor, Cæsari collegæ nostro fore curæ, & esse, ut habeamus aliquam rempublicam, cujus consiliis magni referebat te interesse, sed, si tibi utilius est, id est gloriosius, Asiæ præesse, & istam partem reipublicæ male affectam tueri, mihi quoque idem, quod tibi, & laudi tuæ profuturum est, optatius debet esse. Ego, quæ ad tuam dignitatem pertinere arbitrabor, summo studio, diligentiaque curabo: in primisque tuebor omni observantia clarissimum virum, patrem tuum: quod & pro vetustate necessitudinis, & pro beneficiis vestris, & pro dignitate ipsius facere debeo. Vale.

## A R G U M E N T U M.

*Petit, ut C. Curtium in fidem recipiat, habeatque in numero suorum.*

### LXIX. M. T. C. SERVILIO COLLEGÆ S. D.

**C**urtius Mithres est ille quidem, ut scis libertus Posthumii, familiarissimi mei, sed me colit, & observat æque, atque illum ipsum patronum suum. Apud eum ego sic Ephesi fui, quotiescunque fui, tanquam domi meæ: multaq; acciderunt, in quibus & benevolentiam ejus erga me experirer, & fidem. Itaq; si quid aut mihi, aut meorum cuipiam in Asia opus est, ad hunc scribere consuevi, hujus cum opera, & fide, tum domo, & re uti, tanquam mea; hæc ad te eo pluribus scripsi, ut intelligeres, me non vulgariter, nec ambitiose, sed ut pro homine intimo ac mihi pernecessario scribere. Peto igitur a te, ut in ea controversia, quam habet de fundo cum quodam Colopho-

phono, & in ceteris rebus, quantum fides tua patietur, quantumque tuo commodo poteris, tantum ei honoris mei causa commodes: etsi, ut ejus modestiam cognovi, gravis tibi nulla in re erit. Si & mea commendatione, & sua probitate assequutus erit, ut de se bene existimes, omnia se adeptum arbitrabitur; ut igitur eum recipias in fidem, habeasque in numero tuorum, te vehementer etiam atque etiam rogo. Ego, quæ te velle, quæque ad te pertinere arbitror, omnia studiose, diligenterque cubabo. Vale.

## ARGUMENTUM.

*Ampium Menandrum non vulgariter commendat.*

LXX. M. T. C. SERVILIO COLLE-  
GÆ S. D.

**Q**uia non est obscura tua in me benevolentia, sic fit, ut multi per me tibi velint commendari; ego autem tribuo nonnunquam in vulgus, sed plerumque necessariis, ut hoc tempore: nam cum T. Ampio Balbo mihi summa familiaritas, necessitudoque est: ejus libertum T. Ampium Menandrum hominem frugi, & modestum, & patrono, & nobis vehementer probatum, tibi commendo majorem in modum; vehementer mihi gratum feceris, si, quibuscunque rebus sine tua molestia poteris, ei commendaris: quod ut facias, te vehementer etiam atque etiam rogo. Vale.

## ARGUMENTUM.

*Commendat T. Agnium veterem amicum.*

LXXI. M. T. C. SERVILIO COLLE-  
GÆ S. D.

**M**ultos tibi commendem necesse est; quando omnibus nota nostra necessitudo est, tuaque in me benevolentia; sed tamen omnium causa, quos commendo, velle debeo: tamen cum omnibus non eadem mihi causa est. T. Agnium & comes meus fuit illo miserrimo

tempore, & omnium itinerum, navigationum, laborum, periculorum meorum socius, neque hoc tempore discessisset a me, nisi ego ei permissem; quare sic tibi eum commendo, ut unum de meis domesticis, & maxime necessariis. Pergratum mihi feceris, si eum ita tractaris, ut intelligat, hanc commendationem sibi magno ususui, atque adjumento fuisse. Vale.

## A R G U M E N T U M.

*Petit a Servilio, ut omnibus rebus Cerelliae benigne faciat, quemadmodum receperat.*

LXXII. M. T. C. SERVILIO COLLEGÆ S. D.

Cerelliae, necessariae meae, rem, nomina, possessiones Asiaticas commendavi tibi praesens in hortis tuis, quam potui diligentissime: tuque mihi, pro tua consuetudine, proque tuis in me perpetuis, maximisque officiis, omnia te facturum liberalissime recepisti, meminisse te id spero: scio enim solere; sed tamen Cerelliae procuratores scripserunt, te propter magnitudinem provinciae, multitudinemque negotiorum, etiam atque etiam esse commonesatiendum. Pero igitur, ut memineris, te omnia, quae tua fides pateretur, mihi cumulate recepisse. Equidem existimo, habere te magnam facultatem (sed hoc tui est consilii, & iudicii) ex eo S. C. quod in haeredes C. Vennonii factum est, Cerelliae commodandi, id S. C. tu interpretabere pro tua sapientia, scio enim, ejus ordinis auctoritatem semper apud te magni fuisse. Quod reliquum est, sic velim existimes, quibuscumque rebus Cerelliae benigne feceris, mihi te gratissimum esse facturum. Vale.

## A R G U M E N T U M.

*Gratulatur de reditu incolumi: gratias agit quodammodo de Egnatio, & Oppio: petit, ut Antipatri filios sibi condonet.*

LXXIII. M. T. C. Q. PHILIPPO PROC. S. D.

Gratulor tibi, quod ex provincia salvum te ad tuos recepisti incolumi fama, & re-  
pub.

sub. quod si Romæ te vidissem, coram gratias  
 egissem, quod tibi L. Egnatius, familiarissimus  
 meus, abiens, L. Oppius præiens curæ tuisset.  
 Cum Antipatro Derbete mihi non solum hospi-  
 tium, verum etiam summa familiaritas interce-  
 dit; ei te vehementer succensuisse audivi; &  
 moleste tuli: de re nihil possum iudicare, nisi  
 illud mihi certe persuadeo, te talem virum ni-  
 hil temere fecisse. A te autem pro vetere no-  
 stra necessitudine etiam atque etiam peto, ut  
 ejus filios, qui in tua potestate sunt, mihi po-  
 tissimum condones; nisi quid existimas in ea  
 te violari, existimationem tuam: quod ego si  
 arbitrarer, nunquam te rogarem, mihiq; tua  
 fama multo antiquior esset, quam illa necessi-  
 tudo est. Sed mihi ita persuadeo, ( potest fieri,  
 ut fallar ) eam rem laudi tibi potius, quam  
 vituperationi fore: quid fieri possit, & quid  
 mea causa facere possis, ( nam, quid velis,  
 non dubito ) velim, si tibi grave non erit,  
 certior me facias. Vale.

## A R G U M E N T U M.

*Oppium præsentem, & Egnatii absentis negotia  
 commendat.*

LXXIV. M. T. C. Q. PHILIPPO PROCOS. S. D.

E-Tsi non dubito pro tua in me observantia,  
 proq; nostra necessitudine, quin commen-  
 dationem meam memoria teneas: tamen etiam  
 atque etiam eundem tibi L. Oppium familia-  
 rem meum, præsentem, & L. Egnatii familiaris-  
 simi mei abientis negotia commendo; tanta  
 mihi cum eo necessitudo est, familiaritasq; ut,  
 si mea res esset, non magis laborarem. Quapro-  
 pter gratissimum mihi feceris, si curaris, ut is  
 intelligat, me a te tantum amari, quantum  
 ipse existimo; hoc mihi gratius facere nihil  
 potes, idque ut facias, te vehementer rogo.  
 Vale.

## A R G U M E N T U M.

*Commendat Avianum Flaccum.*

LXXV. M. T. C. T. TITIO, T. F. LEGATO S. D.

**E**tti non dubito, quin apud te mea commendatio prima satis valeat: tamen, obsequer homini familiarissimo C. Aviano Flacco; cuius causa omnia tum cupio; tum mehercule etiam debeo, de quo & præsens tecum egi diligenter, cum tu mihi humanissime respondisti; & scripti ad te accurate antea. Sed putat interesse sua, me ad te quam sapissime scribere: quare velim mihi ignoscas, si, illius voluntati obtemperans, minus videbor meminisse constantiæ tuæ. A te idem illud peto, ut de loco, quo deportet instrumentum, & de tempore Aviano commodos, quorum utrumq; per eundem me obtinuit triennium, dum Pompejus isti negotio præsuit. Summa est, in quo mihi gratissimum facere possis, si curaris, ut Avianus, quando se a me amari putat, me a te amari sciat: erit id mihi pergratum. Vale.

## A R G U M E N T U M.

*Petit, ut C. Valgius emptam possessionem in agro Fregellano, liberam, immunemque habeat.*

LXXVI. M. T. C. QUATUOR VIRIS, ET DECURIONIBUS S. D.

**T**antez mihi cum Q. Hippio causæ necessitudinis sunt, ut nihil possit esse conjunctus, quam nos inter nos sumus; quod nisi ita esset, uterer mea consuetudine, ut vobis nulla in re molestus essem, etenim vos mihi optimi testes estis, cum mihi persuasum esset, nihil esse, quod a vobis impetrare non possem, nunquam me tamen gravem vobis esse voluisse. Vehementer igitur vos etiam atque etiam rogo, ut honoris mei causa liberalissime C. Valgium Hippianum tractetis, remq; cum eo conficiatis; ut quam possessionem habet in agro Fregellano, a vobis emptam, eam liberam, & immunem habere possit: id si a vobis impetraro, summo me beneficio vestro affectum arbitrabor. Valete.

A. F.

## ARGUMENTUM.

*Narrat officium suum; commendat M. Bollanum; petit, ut sibi servum suum Dionysium restituendum curet.*

LXXVII. M. T. C. P. S U L P I C I O  
I M P. S. D.

Cum his temporibus non sane in Senatum ventitarem, tamen ut tuas litteras legi, non existimavi, me, salvo jure nostra veteris amicitiae, multorumque inter nos officiorum, facere posse, ut honori tuo deessem; itaque adfui, supplicationemque tibi lubenter decrevi: nec reliquo tempore ullo aut rei, aut existimationi, aut dignitati tuae deero. Ique ut hoc tui necessarii sciant, hoc me animo erga te esse, velim facias eos per litteras certiores: ut si quid tibi opus sit, ne dubitent mihi jure suo denuntiare. M. Bollanum, virum bonum, & fortem, & omnibus rebus ornatum, meumque veterem amicum, tibi magnopere commendo, pergratum mihi feceris, si curaris, ut is intel- ligat, hanc commendationem sibi magno adju- mento fuisse: ipsumque virum optimum, gratif- simumque cognosces; promitto tibi, te ex eius amicitia magnam voluptatem esse capturum. Præterea a te peto majorem in modum pro no- stra amicitia, & pro tuo perpetuo in me studio, ut in hac re etiam elaborēs. Dionysius servus meus, qui meam bibliothecam multorum num- morum traxerat, cum multos libros surripisset, nec se impune laturum putaret, aufugit: is est in provincia tua, cum & M. Bollanus fa- miliaris meus, & multi alii Narone viderunt, sed cum se a me manumissum esse diceret, cre- diderunt. Hanc tu si mihi restituendum cura- ris, non possum dicere, quam mihi gratum fu- turum sit. Res ipsa parva, sed animi mei dolor magnus est: ubi sit, & quid fieri possit, Bol- lanus te docebit; ego, si hominem per te re- cuperaro, summo me a te beneficio, affectum arbitrabor. Vale.



## ARGUMENTUM.

*Petit, ut Democritum Sicyonium in suam fidem recipiat.*

LXXVIII. M. T. C. ALLIENO PROCOS. S. D.

**D**emocritus Sicyonius non solum hospes meus est, sed etiam, quod non multis contingit, Græcis præsertim, valde familiaris, est enim in eo summa probitas, summa virtus, summa in hospites liberalitas, & observantia: meque præ ceteris & colit, & observat, & diligit: cum tu non modo suorum civium, verum etiam prope Achajæ principem cognoscēs, huic ego tantummodo aditum ad tuam cognitionem patefacio, & munio; cognitum per te ipsum, quæ tua natura est, dignum tua amicitia atque hospitio judicabis. Peto igitur a te, ut, his litteris lectis, recipias eum in tuam fidem, polliceare omnia te facturum mea causa. De reliquo, si id, quod confido fore, dignum eum tua amicitia, hospitioque cognoveris, peto, ut eum complectare, diligas, in tuis habeas: erit id mihi majorem in modum gratum. Vale.

## ARGUMENTUM.

*Cajum, & Marcum Avianos fratres commendat, alterum præsentem, alterum absentem.*

LXXIX. M. T. C. ALLIENO PROCOS. S. D.

**E**T te scire arbitror, quanti fecerim C. Avianum Flaccum: & ego ex ipso audieram, optimo, & gratissimo homine, quam a te liberaliter esset tractatus: ejus filios dignissimos illo patre, meoque necessarios, quos ego unice diligo, commendo tibi sic, ut majore studio nullos commendare possim. C. Avianus in Sicilia est: Marcus est nobiscum. Ut illius dignitatem præsentis ornet, rem utriusque defendas, te rogo: hoc mihi gratius in ista provincia facere nihil potes, idque ut facias, te vehementer etiam atque etiam rogo. Vale.

## ARGUMENTUM.

*Exul deflet suam, suorumque calamitatem; ejusque culpam confert in amicorum consilia; Villa venditionem prorsus improbat; alia quaedam scribit.*

I. M. T. C. TERENTIIÆ, ET TULLIOLE,  
ET CICERONIS SUI S. D.

**E**T litteris multorum, & sermone omnium perfertur ad me, incredibilem tuam virtutem, & fortitudinem esse, teque nec animi, nec corporis laboribus defatigari; me miserum! te ista virtute, fide, probitate, humanitate, in tantas arumnas propter me incidisse. Tulliolamque nostram, ex quo patre tantas voluptates capiebat, ex eo tantos percipere luctus! nam quid ego de Cicerone dicam? qui cum primum sapere cepit, acerbissimos dolores, miserasque percepit, quas si, ut tu scribis, fato facta putarem, ferrem paulo facilius; sed omnia sunt mea culpa commissa, qui ab iis me amari putaham, qui invidebant: eos non sequebar, qui petebant. Quod si nostris consiliis usi essemus, neque apud nos tantum valuisset sermo aut stultorum amicorum, aut improborum; beatissimi viveremus: nunc, quando sperare nos amici jubent, dabo operam, ne mea valetudo tuo labori desit, res quanta sit, intelligo; quantoque fuerit facilius manere domi, quam redire; sed tamen; si omnes tribunos plebis habemus, si Lepulum tam studiosum, quam videtur, si vero etiam Pompejum, & Cæsarem, non est desperandum. De familia, quo modo placuisse amicis scribis, faciemus. De loco, nunc quidem jam abiit pestilentia, sed, quandiu fuit, me non attingit. Plancius, homo officiosissimus, me cupit esse secum, & adhuc retinet, ego volebam loco magis deserto esse in Epìro, quo neque Hispo veniret, nec milites; sed adhuc Plancius me retinet, sperat posse fieri, ut mecum in Italiam decedat, quem ego diem si videro, & si in vestrum complexum venero, ad

si & vos, & me ipsum recuperare; satis magnum mihi fructum videtur percepisse & vestre pietatis, & meæ, Pisonis humanitas, virtus, amor in omnes nos tantus est, ut nihil supra possit, utinam ea res ei voluptati sit: gloriæ quidem video fore. De Q. fratre nihil ego te accusavi, sed vos, cum præsertim tam pauci sitis, volui esse quam conjunctissimos. Quibus me voluisti agere gratias, egi, & me a te certiorum factum esse scripsi. Quod ad me mea Terentia, scribis, te vicum vendituram: quid, & obsecro te (me miserum) quid futurum est? &, si nos premet eadem fortuna, quid pueri misero fiet? Non quo reliqua scribere, (tanta vis lacrymarum est) ne te in eundem flumem adducam. Tantum scribo: si erunt in officio amici, pecunia non deerit: si non erunt, tu efficere tua pecunia non poteris. Per fortunas miseris nostras, vide, ne puerum perditum perdamus: cui si aliquid erit, ne egeat; mediocri virtute opus est, & mediocri fortuna, ut cetera consequatur. Fac valeas, & ad me tabellarios mittas, ut sciam, quid agatur, & vos quid agatis: mihi omnino jam brevis expectatio est. Tulliolæ, & Ciceroni salutem dic. Valere. D. ante diem vi. Kal. Dec. Dyrrhachii. Dyrrhachium veni, quod & libera civitas est, & in me officiosa, & proxima Italiæ: sed si offendet me loci celebritas, alio me conferam, & ad te scribam.

#### ARGUMENTUM.

*Brevitatem suarum litterarum excusat: Pisonis generi officia in se laudas: dolet Terentia vicem: rogat, ne suam dotem projicias, & ut valetudini servias.*

#### II. M. T. C. TERENTIÆ, TULLIOLÆ, ET CICERONI SUIS S. D.

**N**Oli parare, me ad quemquam longiores epistolas scribere, nisi si quis ad me plura scripsit, cui puro rescribi oportere, nec enim habeo, quod scribam: nec hoc tempore quidquam difficilius facio; ad te vero, & ad nostram Tulliolam non quo sine plurimis lacrymis

mis scribere, vos enim video esse miserrimas, quas ego beatissimas semper esse volui: idque præstare debui: & nisi tam timidi fuissetis, præstitissem. Pisonem nostrum merito ejus amo plurimum: eum, ut potui, per litteras cohortatus sum, gratiasque egi, ut debui. In novis tribonis pleb. intelligo spem te habere, id erit firmum, si Pompeji voluntas erit: sed Crassum tamen metuo; a te quidem omnia fieri fortissime, & amantissime video: nec miror: sed morreo casum ejusmodi, ut tantis tuis miseriis mea miseria subleventur: nam ad me P. Valerius homo officiosus scripsit, id quod ego maximo cum fletu legi, quemadmodum a Vestæ ad Tabulam Valeriam ducta esses. Hem mea lux, meum desiderium, unde omnes opem petere solebant! te nunc mea Terentia, sic vexari, sic jacere in lacrymis, & sordibus! idque fieri mea culpa, qui ceteros servavi, ut nos periremus? Quod de domo scribis hoc est de area: ego vero tum denique mihi videbor restitutus, si illa nobis erit restituta, verum hæc non sunt in nostra manu. Illud doleo, quæ impensa facienda est, in ejus partem te miseram, & despoliatam venire, quod si conficitur negotium, omnia consequemur; sin eadem nos fortuna premet, etiamne reliquias tuas misera præicias? obsecro te, mea vita, quod ad sumptum attinet, sine alios, qui possunt, si modo volunt, sustinere; & valetudinem istam infirmam, si me amas, noli vexare, nam mihi ante oculos dies noctesque versaris: omnes labores te excipere video, timeo, ut sustineas; sed video in te esse omnia. Quare, ut id, quod speras, & quod agis, consequamur, servi valetudini. Ego, ad quos scribam, nescio, nisi aut ad eos, qui ad me scribunt; aut ad eos, de quibus ad me vos aliquid scribitis. Longius, quoniam vobis ita placet, non discedam: sed velim quam sæpissime litteras mittatis, præsertim si quid est firmius, quod speremus. Valete, mea desideria, valete. Dat. III. Non. Octob. Thessalonicæ.

## ARGUMENTUM.

*Queritur, quod sua culpa & ipse, & omnes sui maximas in miseras inciderint: deinde ad varia capira respondet: sed ita dolenter, ut ideo a nonnullis, jure fortasse, tamquam mollis reprehendatur.*

## VI. M. T. C. TERENTIÆ TULLIOLÆ, ET CICERONI SUI S. D.

**A**ccepi ab Aristocrito tres epistolas, quas ego lacrymis prope delevi, conficior enim mœrore, mea Terentia: nec me mœx miseriæ magis excruciant, quam tuæ, vestraque. Ego autem hoc miserior sum, quam tu, quæ es miserrima, quod ipsa calamitas communis est utriusque nostrum, sed culpa mea propria est; meum fuit officium, vel legatione vitare periculum, vel diligentia, & copiis resistere, vel cadere fortiter, hoc miserius, turpius, indignius nobis nihil fuit, quare cum dolore conficior tum etiam pudore: pudet enim me uxori meæ optimæ, suavissimis liberis virtutem, & diligentiam non præstitisse, nam mihi ante oculos dies noctesque versatur squalor vester, & mœror, & infirmitas valetudinis tuæ: spes autem salutis pertenuis ostenditur. Inimici sunt multi, invidi pene omnes, ejicere nos magnum fuit, excludere facile est, sed tamen, quamdiu vos eritis in spe, non deficiam, ne omnia mea culpa cecidisse videantur. Ut tuto sim, quod laboras: id mihi nunc facillimum est, quem etiam inimici volunt vivere in tantis miseriis, ego tamen faciam, quæ præcipis. Amicis, quibus voluisti, egi gratias: & eas litteras Dexippo dedi: meque de eorum officio scripsi a te certiores esse factum. Pisonem nostrum mirifico esse studio in nos, & officio, & ego perspicio, & omnes prædicant. Dii faxint, ut tali genere mihi præsentî tecum simul, ac cum liberis nostris frui liceat: nunc spes reliqua est in novis tribunis pleb. & in primis quidem diebus: nam si inveterarit, actum est, ea re ad te statim Aristocritum misi, ut ad me continuo initia rerum, & rationem totius negotii posses scribere, cû Dexippo quoq; ita imperavi, statim

tim ut recurreret: & fratrem misi, ut crebro  
 tabellarios mitteret: nam ego eo nomine sum Dyrrhachii hoc tempore, ut quam celerrime, quod  
 agatur, audiam, & sim tuto, civitas enim hæc  
 semper a me defensa est, cum inimici nostri ve-  
 nire dicentur, tum in Epirum ibo. Quod scribis,  
 te, si velim, ad me venturam: ego vero, cum  
 sciam, magnam partem istius oneris abs te sustine-  
 ri, te istic esse volo: si perficitis, quod agitis, me  
 ad vos venire oportet: sin autem, sed nihil est  
 opus reliqua scribere; ex primis, aut ad summum  
 secundis litteris tuis constituere poterimus, quid  
 nobis faciendum sit, tu modo ad me velim omnia  
 diligentissime perscribas, etli magis jam rem,  
 quam litteras debeo expectare. Cura ut valeas,  
 & ita tibi persuadeas, mihi te carius nihil esse,  
 nec unquam fuisse. Vale mea Terentia, quam  
 ego videre videor: itaque debilius lacrymis.  
 Vale. pridie Kal. Dec. Dyrrachii.

## ARGUMENTUM.

*Scripta est hæc epistola non solum dolenter, sed etiam  
 molliter. Argumentum est multiplex, quia res-  
 pondet ad varia capita litterarum Terentiae.*

IV. M. T. C. TERENTIÆ, TULLIOLÆ, ET  
 CICERONI SUI S. D.

**E**Go minus sæpe ad vos do litteras, quam pos-  
 sum: propterea quod cum omnia mihi tempo-  
 ra sunt misera; tum vero, cum aut scribo ad vos,  
 aut vestras lego, conficior lacrymis sic, ut ferre  
 non possim, quod utinam minus vitæ cupidus fuif-  
 sem! certe nihil, aut non multum in vita malū  
 vidissemus. Quod si nos ad aliquam alicujus com-  
 modi aliquando recuperandi spem fortuna reserva-  
 vit; minus est erratum a nobis, sin hæc mala fixa  
 sunt: ego vero te quamprimum, mea vita, cupio  
 videre, & in tuo complexu emori; quando neque  
 Dii, quos tu castissime coluisti, atque homines,  
 quos ego servavi semper, nobis gratiam retule-  
 runt. Nos Brundisii apud M. Lenium Flaccum  
 die XIII. fuimus, virum optimum, qui periculum  
 fortunarum, & capitis sui pro mea salute neglexit:  
 neque legis improbissima poena deductus est, quo-

minus hospitii, & amicitia<sup>3</sup> jus, officium præsta-  
ret? Huic utinam aliquando gratiam referre possi-  
mus, habebimus quidem semper. Brundusio profe-  
cti sumus ad ii. Kal. Majas, per Macedoniam Cy-  
zicum petebamus, o me perditum! o me afflictum!  
quid nunc rogem te, ut venias, mulierem egram, &  
corpore, & animo confectam? non rogem? sine te  
igitur sim? opinor, sic agam; si est spes nostri redi-  
tus, eam confirmes, & re adjuves: sin, ut ego me-  
tuo, transactum est; quoquo modo potes, ad me fac  
venias, unum hoc scito: si te habebo, non mihi vi-  
debor plane periisse. Sed quid de Tulliola mea fiet?  
jam id vos videte: mihi deest consilium: sed certe  
quoquo modo se res habebit, illius misellæ & ma-  
trimonio, & famæ serviendum est. Quid Cicero me-  
us, quid aget? iste vero sit in sinu semper, & com-  
plexu meo. Non queo jam plura scribere: impedit  
mætor. Tu quid egeris, nescio, utrum aliquid te-  
neas, an (quod metuo) plane sis spoliata. Pisonem,  
ut scribis, spero fore semper nostrum, de familia  
liberata nihil est, quod te moveat. Primum tuis  
ita promissum est, te facturam esse, ut quisque esset  
meritus, est autem in officio adhuc Orpheus: præ-  
terea magnopere nemo; ceterorum servorum ea  
causa est, ut, si res a nobis abesset, liberti no-  
stri essent, si obtinere potuissent; sin ad nos per-  
tinerent, servirent, præterquam oppido pauci;  
sed hæc minora sunt. Tu quod me hortaris, ut a-  
nimo sin magno, & spem habeam recuperandæ sa-  
lutis, id velim sit ejusmodi, ut recte sperare pos-  
simus. Nunc misere quando tuas jam litteras acci-  
piam? quis ad me perferet? quas ego expecta-  
sem Brundusii, si esset licitum per nautas, qui  
tempestatem prætermittere noluerunt. Quod re-  
liquum est, sustenta te, mea Terentia, ut po-  
tes: honestissime viximus, florimus, non vi-  
tium nostrum, sed virtus nostra nos afflixit.  
Peccatum est nullum, nisi quod non una ani-  
mam cum ornamentis amisimus: sed, si hoc  
fuit liberis nostris gratius nos vivere; cetera,  
quanquam ferenda non sunt, feramus. Atque  
ego, qui te confirmo, ipse me non possum.  
Clodium Philetarum, quod valetudine oculo-  
rum impediatur, hominem fidelem, remisi.  
Sallustius officio vincet omnes spes. Cennius  
est.

est perbenevolus nobis : quem semper fore observantem . Sicca dixerat , semecum fore , sed Brundusio discessit . Cura , quoad potes , ut valeas : & sic existimes , vehementius me tua miseria , quam mea commoveri . Mea Terentia fidissima , atque optima uxor , & mea carissima Tulliola , & spes reliqua nostra Cicero , valete . Pridie Kal. Maji . Brundusio .

# ARGUMENTUM .

*Scriptis hanc aliquot annis post superiores , L. Pando , C. Marcello Coss. cum ex Provincia Romam rediret . Significat de navigatione sua , de litteris acceptis , de hereditate Prætiana .*

## V. M. T. C. TERENTIÆ , TULLIOLÆ SUIS S. D.

**S**I tu , & Tullia , lux nostra , valetis : ego , & suavissimus Cicero valemus . Prid. id. Octob. Athenas venimus ; cum sanè adversis ventis usi essemus , tardeque , & incommode navigassemus . De navi exeuntibus nobis Acastus cum litteris præsto fuit , uno , & vigesimo die , saepe strenue . Acepi tuas litteras , quibus intellexi te vereri , ne superiores mihi redditæ non essent . Omnes sunt redditæ , diligentissimeque a te perscripta sunt omnia : idque mihi gratissimum fuit ; neque sum admittatus , hanc epistolam , quam Acastus attulit , brevem fuisse , jam enim me ipsum expectas , sive nos ipsos : qui quidem quamprimum ad vos venire cupimus , etsi , in quam temp. venimus , intelligo , cognovi enim ex multorum amicorum litteris , quas attulit Acastus , ad arma rem spectare : ut mihi , cum venero , dissimulare non liceat , quid sentiam . Sed , quando subeunda fortuna est , eo citius dabimus operam ut veniamus , qui facilius de tota re deliberemus . Tu velim , quod commodo valetudinis tuæ fiat , quam longissime poteris , obviam nobis prodeas . De hereditate Prætiana , quæ quidem mihi magno dolori est ( valde enim illum amavi ) hoc velim cures ; si auctio ante meum advenum fiet , ut Pomponius , aut , si is minus poterit , Camillus nostrum negotium curet ; nos , cum venerimus , reliqua



per nos agemus; si tu jam Roma profecta eris, tamen curabis, ut hoc ita fiat: nos, si Dii adjuvabunt, circiter idib. Nov. in Italia speramus fore. Vos mea suavissima & optatissima Terentia, & Tulliola, si nos amatis, curate, ut valeatis. Athenis ad xv. Kal. Nov.

## A R G U M E N T U M.

*Excusat infrequentiam litterarum: mandat, ut creditoribus satisfiat: gratias actas nescio quia non miratur: Pollicem exspectat.*

VI. M. T. C. TERENCE SUÆ S. D.

**N**Ec scire est, cui litteras demus: nec rem habemus ullam, quam scribere velimus. Ex tuis litteris, quas proxime accepi, cognovi prædium nullum venire potuisse, quare videas velim, quomodo satisfiat ei, cui scis me satisfieri velle. Quod nostra tibi gratias agit, id ego non miror, te mereri, ut ea tibi merito tuo gratias agere possit. Pollicem, si adhuc non est profectus, quamprimum fac extrudas. Cura, ut valeas. Id. Quintæ.

## A R G U M E N T U M.

*Exponit, quæ fuerit molestiarum causa, quoque modo liberatus sit: deinde scribit de sua ad Pompejum navigatione.*

VII. M. T. C. TERENCE SUÆ S. D.

**O**Mnes molestias, & sollicitudines, quibus & te miserrimam habui, id quod mihi molestissimum est, Tulliolamque, quæ nobis nostra vita dulcior est, deposui, & ejeci, quid causæ autem fuerit, postridie intellexi, quam a vobis discessi. καλῶ ὄκρατον noctu ejeci. Statim ita sum levatus, ut mihi Deus aliquis medicinam fecisse videatur, cui quidem tu Deo, quemadmodum soles, pie, & caste satisfacias: idest, Apollini, & Æsculapio. Navim spero nos valde bonam habere, in eam simulatque conscendi. Hac scripsi, deinde conscribam ad nostros familiares multas epistolas, quibus te, & Tul-

Tulliolam nostram diligentissime commendabo . Cohortarer vos quo animo fortiore essetis , nisi vos fortiores cognoscerem , quam quemquam virum : & tamen ejusmodi spero negotia esse , ut & vos istic commodissime sperem esse , & me aliquando cum similibus nostri temp. defensurum . Tu primum valetudinem tuam velim cures : deinde tibi si videbitur , villis iis utare , quæ longissime aberunt a militibus . Fundo Arpinati bene poteris uti cum familia urbana , si annonæ carior fuerit . Cicero bellissimus tibi salutem plurimam dicit . Etiam atque etiam vale . Datum vii. Id. Jun.

## A R G U M E N T U M .

*Rogat uxorem , ut valetudinem curet : laudat ejus diligentiam : eaque , ut deinceps utatur , mandat .*

VIII. M. T. C. TERENTIÆ SUÆ S. D.

**S**I vales , bene est , ego quidem valeo . Valetudinem tuam velim cures diligentissime , nam mihi & scriptum , & nuntiatum est , te in febrim subito incidisse . Quod celeriter me fecisti de Cæsaris litteris certiorē , fecisti mihi gratum , item posthac , si quid opus erit , si quid acciderit novi , facies , ut sciam . Cura , ut valeas . Vale . Datum iv. Non. Jun.

## A R G U M E N T U M .

*Significat dolorem suum ex Dolabella generi sui , Tulliolæque filia valetudine .*

IX. M. T. C. TERENTIÆ SUÆ S. D.

**A**D ceteras meas miseras accessit dolor e Dolabellæ valetudine , & Tullia ; omnino de omnibus rebus nec quid consilii cupiam , nec quid faciam , scio . Tu velim tuam , & Tullia valetudinem cures . Vale .

## A R G U M E N T U M .

*Mandat , ut cū Attico colloquatur , & litteras mittat .*

X. M. T. C. TERENTIÆ SUÆ S. D.

**Q**UID fieri placeret , scripsi ad Pomponium serius quam oportuit , cum eo si loquuta  
S 6                      eris ,

eris, intelliges, quid fieri velim; apertius scribi, quando ad illum scripseram, necesse non fuit: de ea re & de ceteris rebus quamprimum velim nobis litteras mittas. Valetudinem tuam cura diligenter. Vale. VII. Id. Quinct.

## A R G U M E N T U M.

*Tulliam ad se venisse dicit: sibi autem in animo esse, Ciceronem filium ad Cæsarem mittere.*

XI. M. T. C. TERENTIÆ SUÆ S. D.

**S**I vales, bene est, ego valeo. Tullia nostra venit ad me prid. Id. Jun. cujus summa virtute, & singulari humanitate, graviore etiam sum dolore affectus; nostra factum esse negligentia, ut longe alia in fortuna esset, atque ejus pietas, ac dignitas postulabat. Nobis erat in animo Ciceronem ad Cæsarem mittere, & cum eo Cn. Sallustium; si profectus erit, faciam te certiore. Valetudinem tuam cura diligenter. Vale. XVII. Kal. Quinct.

## A R G U M E N T U M.

*Fere suum consilium reprehendit, quod, victo in Pharsalia Pompejo, in Italiam redierit; monet uxorem, ne ad ipsum eat.*

XII. M. T. C. TERENTIÆ SUÆ S. D.

**Q**UOD hos in Italiam salvos venisse gaudes, perpetuo gaudeas velim, sed perturbati dolore animi, magnisque injuriis, metuo, ne id consilii ceperimus, quod non facile explicare possimus; quare, quantum potes, adjuva: quid autem possis, mihi in mentem non venit. In viam quod te des hoc tempore, nihil est, & longum est iter, & non tutum: & non video, quid prodesse possis, si veneris. Vale. Datum pridie Non. Nov. Brundisio.

## A R G U M E N T U M.

*Permittit uxori, ut de nuntio remittendo consilium capiat ex tempore.*

XIII. M. T. C. TERENTIÆ SUÆ S. D.

**Q**UOD scripsi ad te proximis litteris de nuntio remittendo; quæ sit istiusvis hoc tempore,

pore, & quæ concitatio multitudinis, ignoro. Si metuentius iratus est, quies tamen ab Hlo fortasse nascetur, totum judicabis quale sit; & quod in miserrimis rebus minime miserum putabis, id facies. Vale. vi. Id. Quint.

## A R G U M E N T U M.

*Rogat uxorem, & filiam, considerent & ipsæ, an cum amicis, ab Urbe discedant, necne, adventu Cæsaris.*

XIV. TULLIUS TERENTIÆ, ET PATER TULLIOLÆ, DUABUS ANIMIS SUIIS, ET CICERO MATRI OPTIMÆ, SUAVISSIMÆ SORORI S. D.

**S**I vos valetis, nos valemus. Vestrum jam consilium est, non solum meum, quid sit vobis faciendum; si ille Romam modeste venturus est, recte in præsentia domi esse potestis: si homo æuens diripiendam urbem daturus est, vereor, ut Dolabella ipse satis vobis prodesse possit. Etiam illud metuo, ne jam intercludamini, ut cum velitis, exire non liceat. Reliquum est, quod ipsæ optime considerabitis, vestris similes femine sint ne Romæ: si enim non sunt, videndum est, ut honeste vos esse possitis. Quomodocumque nunc se res habet, modo ut hæc nobis loca tenere liceat, bellissime vel mecum. vel in nostris prædiis esse poteritis. Etiam illud verendum est, ne brevi tempore fames in urbe sit. His de rebus velim cum Pomponio, cum Camillo, cum quibus vobis videbitur, consideretis: ad summam, animo forti sitis. Labienus rem meliorem fecit, adjuvat etiam Piso, quod ab urbe discedit, & sceleris condemnat generum suum. Vos, meæ carissimæ animæ, quam sapissime ad me scribite, & vos quid agatis, & quid istic agatur. Quintus pater & filius, & Rufus vobis salutem dicunt. Valete. vii. Kal. Quint. Minturnis.

## A R G U M E N T U M .

*Dicit se mutasse consilium de mittendo ad Casarem Cicerone filio. Hac autem epistola videtur scripta post eam, quæ XI. loco impressa est.*

XV. M. T. C. TERENTIÆ SUÆ S. D.

**S**I vales, bene est, ego valeo. Constitueramus, ut ad te antea scripseram, obviam Ciceronem Casari mittere; sed mutavimus consilium, quia de illius adventu nihil audiebamus. De ceteris rebus, etsi nihil erat novi, tamen, quid velimus, & quid hoc tempore putemus opus esse, ex Sica poteris cognoscere. Tulliam adhuc mecum teneo. Valetudinem tuam cura diligenter. Vale. xii. Kal. Quintæ.

## A R G U M E N T U M .

*Argumentum est de litteris, & de Volumnia.*

XVI. M. T. C. TERENTIÆ SUÆ S. D.

**S**I vales, bene est: ego valeo. Etsi huiusmodi tempora nostra sunt, ut nihil habeam, quod aut a te literarum expectem, aut ipse ad te scribam: tamen nescio quomodo & ipse vestras litteras expecto; & scribo ad vos, cum habeo, qui ferat. Volumnia debuit in te officiosior esse, quam fuit; & id ipsum, quod fecit, potuit diligentius facere, & cautius. Quamquam alia sunt, quæ magis curemus, magisque doleamus: quæ me ita conficiunt, ut ii voluerunt, qui me de mea sententia detruserunt. Cura, ut valeas. Prid. Non. Jan.

## A R G U M E N T U M .

*Excusat se cur nihil scribat.*

XVII. M. T. C. TERENTIÆ SUÆ S. D.

**S**I quid haberem, quod ad te scriberem, facerem id & pluribus verbis, & sapius; nunc quæ sunt negotia, vides, ego autem quomodo sum affectus, ex Lepta, & Trebatio poteris cognoscere; fac, ut tuam, & Tullia valetudinem cures. Vale.

A R-

## ARGUMENTUM.

*Monet uxorem, & filiam, ut mature considerent, num Romæ tuto esse possint, & cum dignitate.*

XVIII. M. T. C. TERENTIÆ, & PATER SUAVISSIMÆ FILIÆ, CICERO MATRI, & SORORI S. D.

**C**onsiderandum vobis etiam atque etiam, animæ meæ, diligenter puto, quid faciatis, Romæne sitis, an mecum in aliquo tuto loco, id non solum meum consilium est, sed etiam vestrum. Mihi veniunt in mentem hæc: Romæ vos esse tuto posse per Dolabellam, eamque rem posse nobis adjumento esse, si qua vis, aut si quæ rapiaræ fieri cœperint; sed rursus illud me movet, quod video omnes bonos abesse Romæ, & eos mulieres suas secum habere, hæc autem regio, in qua ego sum, nostrorum est tum oppidorum, tum etiam prædiorum: ut & multum esse mecum, & cum abieritis, commode etiam in nostris prædiis esse possitis. Mihi plane non satis constat adhuc, utrum sit melius: vos videte, quid aliæ faciant illo loco femine, & ne, cum velitis, exire non liceat, id velim diligenter etiam atque etiam vobiscum, & cum amicis consideretis. Domus ut propugnacula, & præsidium habeat, Philotimo dicetis, & velim tabellarios instituatis certos, ut quotidie aliquas a vobis litteras accipiam; maxime autem date operam, ut valeatis, si nos vultis valere. viii. Kal. Feb. Formiis.

## ARGUMENTUM.

*Dolorem significat ex filie valetudine, & difficultatem, quominus possit propius accedere.*

XIX. M. T. C. TERENTIÆ SUÆ S. D.

**I**N maximis meis doloribus excruciat me valetudo Tullie nostræ, de qua nihil est quod ad te plura scribam; tibi enim æque magnæ curæ esse certo scio. Quod me propius vultis accedere, video ita esse faciendum: etiam ante fecissem; sed me multa impedierunt, quæ ne nunc quidem expedita sunt: sed a Pomponio expecto litteras, quas ad me quamprimum perferendas cures, velim. Da operam, ut valeas.

A R-

## ARGUMENTUM.

*Mandat, ut in Tusculano omnia sint parata ad hospites accipiendos.*

XX. M. T. C. TERENTIÆ SUÆ S. D.

**I**N Tusculanum nos venturos putamus aut no-  
nis, aut postridie, ibi fac ut sint omnia pa-  
rata, plures enim fortasse nobiscum erunt: &  
ut arbitror, diutius ibi commorabimur. Labrum  
si in balneo non est, fac ut sit: Item cetera,  
quæ sunt ad victum, & ad valetudinem neces-  
saria. Vale. Kal. Octob. de Venusino.

## ARGUMENTUM.

*Scribit, ut, quæ tempus postulabit, provideat, sibi que absenti administret, litterasque mittat.*

XXI. M. T. C. TERENTIÆ SUÆ S. D.

**S**I vales, bene est: ego valeo. Da operam,  
ut convalescas: quod opuserit, ut res, tem-  
pusque postulat, provideas, atque administres,  
& ad me de omnibus rebus quam sæpiissime li-  
teras mittas. Vale.

## ARGUMENTUM.

*Dicit, se tabellarios expectare, ut consilium capere possit.*

XXII. M. T. C. TERENTIÆ SUÆ S. D.

**S**I vales, bene est: ego valeo. Nos quotidie  
tabellarios vestros expectamus: qui si venerint,  
fortasse erimus certiores, quid nobis faciendum  
sit, faciemusque te statim certiores. Valetudi-  
nem tuam cura diligenter. Vale. Kal. Sept.

## ARGUMENTUM.

*Nondum se neque de Caesaris adventu, neque de  
ejus litteris quidquam scire dicit.*

XXIII. M. T. C. TERENTIÆ SUÆ S. D.

**S**I vales, bene est: ego valeo. Nos neque de  
Caesaris adventu, neque de litteris, quas  
Philotimus habere dicitur, quidquam adhuc cer-  
ti

ti habemus. Si quid erit certi, faciam te statim certiorum. Valetudinem tuam fac ut cures. Vale. iv. Id. Sext.

## A R G U M E N T U M.

*Scribit de litteris a Cesare acceptis, de ejus adventu, de obviam itione.*

XXIV. M. T. C. TERENTIÆ SUÆ S. D.

**S**I vales, bene est: ego valeo. Reddite mihi jam tandem sunt a Cesare litteræ, satis liberales: & ipse opinione celerius venturus esse dicitur: cui utrum obviam procedam, an hic eum expectem, cum constituero, faciam te certiorum. Tabellarios mihi velim quamprimum remittas. Valetudinem tuam cura diligenter. Vale. prid. id. Sext.



## LIBER XV.

## A R G U M E N T U M.

*Cum Parthi maximis copiis Euphratem, qui terminus erat imperii Romani, transissent, sollicitus Cicero de sua Provincia, item de reliquis, quæ ab impetu belli non longe abessent, monet, ut majores exercitus submittantur.*

I. M. T. C. PROCOS. S. D. COS. PRÆT.  
T R I B. P L. S. P. Q. R.

**S**I vos bene valetis, bene est: ego quidem valeo. Etsi non dubie mihi nuntiabatur, Parthos transisse Euphratem cum omnibus fere suis copiis: tamen, quod arbitrabar a M. Bibulo procos. certiora de his rebus ad vos scribi posse, statuebam mihi non necesse esse publice scribere ea, quæ de alterius provincia nuntiarentur. Postea vero quam certissimis auctoribus, legatis, nuntiis, litteris sum certior factus: vel quod tanta res erat, vel quod nondum audieramus, Bibulum in Syriam venisse, vel quia administratio hujus belli mihi cum Bibulo pene est communis; quæ ad me delata essent scri-



scribenda ad vos putavi. Regis Antiochi Com-  
 mageni legati primi mihi nuntiarunt, Partho-  
 rum magnas copias Euphratem transire coepisse;  
 quo nuntio allato, cum essent nonnulli, qui  
 ei regi minorem fidem habendam putarent, sta-  
 tuti expectandum esse, si quid certius afferretur.  
 Ad XIII. Kal. Octob. cum exercitum in Cili-  
 ciam ducerem, in finibus Lycaoniz, & Cappa-  
 dociz mihi litteræ redditæ sunt a Tarcondimo-  
 to, qui fidelissimus, socius trans Taurum, ami-  
 cissimulusque populi Romani existimatur: Paco-  
 rum, Orodis regis Parthorum filium, cum per  
 magno equitatu Parthico transisse Euphratem,  
 & castra posuisse Tybæ, magnumque tumultum  
 esse in provincia Syria excitatum. Eodem die ab  
 Jamblico, Philarcho Arabum, quem homines  
 opinantur bene sentire, amiculusque esse reip.  
 nostræ, litteræ de iisdem rebus mihi redditæ  
 sunt. His rebus allatis, etsi intelligebam so-  
 cios infirme animatos esse, & novarum rerum ex-  
 pectatione suspensos: sperabam tamen, eos, ad  
 quos jam accesseram, quique nostram mansuetu-  
 dinem, integritatemque perspexerant, amiciores  
 pop. Rom. esse factos: Ciliciam autem firmiorem  
 fore, siquitatis nostræ particeps facta esset, &  
 ob eam causam, & ut opprimerentur ii, qui  
 ex Cilicum gente in armis essent, & ut hostis  
 is, qui esset in Syria, sciret, exercitum populi  
 Rom. non modo non cedere his nuntiis allatis,  
 sed etiam propius accedere; exercitum ad Tau-  
 rum institui ducere. Sed, si quid apud vos au-  
 thoritas mea ponderis habet, in his præsertim  
 rebus, quas vos audistis, ego pene cerno, ma-  
 gnopere vos & hortor, & moneo, ut his pro-  
 vinciiis, serius vos quidem, quam decuit, sed  
 aliquando tamen consulatis. Nos quemadmodum  
 instructos, & quibus præidiis munitos ad tanti  
 belli opinionem miseritis, non estis ignari.  
 Quod ego negotium non stultitia obsecutus, sed  
 verecundia deterritus non recusavi: neque enim  
 unquam ullum periculum tantum putavi, quod  
 subterfugere malletm, quam vestræ auctoritati  
 obtemperare. Hoc autem tempore res se sic  
 habet, ut, nisi exercitum tantum, quantum ad  
 maximum bellum mittere soletis, mature in

has provincias miseritis ; summum periculum sit, ne amittendæ sint omnes hæ provincie, quibus vestigalia pop. Rom. continentur. Quamobrem autem in hoc provinciali delectu spem habeatis aliquam, causa nulla est, neque multi sunt: & diffugiunt, qui sunt, metu oblato: & quod genus hoc militum sit, judicavit vir fortissimus M. Bibulus in Asia; qui, cum ei permisissetis, delectum habere noluerit. Nam sociorum auxilia, propter acerbitem, atque injurias imperii nostri, aut ita imbecilla sunt, ut non multum nos juvare possint; aut ita alienata a nobis, ut neque expectandum ab iis, neque committendum iis quidquam esse videatur. Regis Dejotari & voluntatem, & copias, quantæcunque sunt, nostras esse ducor. Cappadocia est inanis, reliqui reges, tyrannique neque opibus satis firmi, nec voluntate sunt. Mihi, in hac paucitate militum, animus certe non deerit; spero, ne consilium quidem. Quid casurum sit, incertum est; utinam salutem nostram consulere possimus: dignitati certe consulamus. Valete.

A R G U M E N T U M.

*Exponit, quid in provincia, audito Parthorum adventu, egerit ad tuendam Provinciam, & socios in fide continendos: addit de Ariobarzane Rege ab insidiis liberato.*

L. M. T. C. PROCOS. S. D. COS. PRÆT.  
T R I B. P. L. S. P. Q. R.

**S**I vos bene valetis, bene est: ego quidem valeo. Cum pridie Kalen. Sext. in provinciam venissem, neque maturius propter iterum, & navigationum difficultatem venire potuissem; maxime convenire officio meo, reique publicæ conducere putavi, parare ea, quæ ad exercitum, quæque ad rem militarem pertinerent. Quæ cum essent à me cura magis, & diligentia, quanti facultate, & copia constituta, nuntiaque & litteræ de bello a Parthis in provinciam Syriam illato quotidie fere afferrentur: iter mihi faciendum per Lycaniam, & per Isauras, & per Cappadociam arbitratus sum; erat enim magna suspicio, Parthos, si ex Syria egredi, atque irrumperet in meam provinciam, conarentur.

iter

admonitu Senatus consuleret salutem suam; tum a  
me discessit in oppidum Cybistra. Postero au-  
tem die cum Ariarthe, fratre suo, & cum pa-  
ternis amicis, majoribus natu, ad me in castra  
venit; perturbatusque, & fletus, cum idem &  
frater faceret, & amici, meam fidem, vestram  
commendationem implorare cepit. Cum admira-  
rer, quid accidisset novi, dixit, ad se indicia  
manifestarum insidiarum esse delata, quæ essent  
ante adventum meum occultata, quod ii, qui ea  
patefacere possent, propter metum reticuis-  
sent: eo autem tempore, spe mei præsidii, complures  
ea, quæ scirent, audacter ad se detulisse: in  
his amantissimum sui, summa pietate præditum,  
fratrem dicere ea, quæ is me quoque audiente di-  
cebat, se sollicitatum esse, ut regnare vellet:  
id vivo fratre suo accidere non potuisse: se ta-  
men ante illud tempus eam rem nunquam in  
medium propter periculi metum protulisse.  
Quæ cum esset loquutus, monui regem, ut  
omnem diligentiam ad se conservandam adhi-  
beret; amicosque in patris ejus fide, atque  
judicio probatos hortatus sum, regis sui vi-  
tam, docti casu acerbissimo patris ejus, omni  
cura, custodiaque defenderent. Cum rex a me  
equitatum, cohortesque de exercitu meo postu-  
laret: etsi intelligebam vestro S. C. non modo  
posse me id facere, sed etiam debere: tamen,  
cum respub. postularet, propter quotidianos ex  
Syria nuntios, ut quamprimum exercitum ad  
Ciliciæ fines adducerem: cumque mihi rex, pa-  
tefactis jam insidiis, non egere exercitu populi  
Rom. sed posse se suis opibus defendere vide-  
retr; illum cohortatus sum, ut in sua vita  
conservanda primum regnare disceret: a quibus  
perspexisset sibi insidias paratas, in eos utere-  
tur jure regio: pœna afficeret eos, quos neces-  
se esset, reliquos metu liberaret: præsidio exer-  
citus mei ad eorum, qui in culpa essent, ti-  
morem potius, quam ad contentionem uteretur:  
fore autem, ut omnes, quando S. C. nossent, intel-  
ligerent, me regi, si opus esset, ex auctoritate  
vestra præsidio futurum. Ita confirmato illo,  
ex eo loco castra movi, & iter in Ciliciam fa-  
cere institui: cum hac opinione e Cappadocia

HOC EST ARGUMENTUM.

ARGUMENTUM.

*Narrat, quæ in Provincia gesserit: pro quibus rebus a Catone petit, ut in Senatu supplicationes sibi decernat.*

IV. M. T. C. IMP. M. CATONI S. D.

**S**umma tua auctoritas fecit, meumque perpetuum de tua singulari virtute iudicium, ut magni mea interesse putarem, & res eas, quas gessissem, tibi notas esse, & non ignorari a te, quæ æquitate, & continentia tuerer socios, provinciamque administrarem; his enim a te cognitis, arbitrabar facilius me tibi, quæ vellem, probaturum. Cum in provinciam pridie Kal. Sext. venissem, & propter anni tempus ad exercitum mihi confestim esse eundem viderer, biduum Laodiceæ fui, deinde Apameæ quatrimum, triduum Synnadis, totidem dies Philomeli: quibus in oppidis cum magni conventus fuissent, multas civitates æterbissimis tributis, & gravissimis usuris & falso ære alieno liberavi; cumque ante advenum meum seditione quadam exercitus esset dissipatus, quinque cohortes sine legato, sine tribuno mil. denique etiam sine censurione ullo apud Philomelum confedisent, reliquus exercitus esset in Lycaonia: M. Annejo legato imperavi, ut eas quinque cohortes ad reliquum exercitum duceret, coactoque in unum locum exercitu, castra in Lycaonia apud Iconium faceret. Quod cum ab illo diligenter esset actum, ego in castra ad vii. Kal. Sept. veni: cum interea superioribus diebus ex S. C. & evocatorum firmam manum, & equitatum satis idoneum, & populorum liberorum, regumque sociorum auxilia voluntaria comparavissem. Interim, cum exercitu lustrato iter in Ciliciam facere cœpissem; Kal. Sept. legati a rege Commagene ad me missi partumultuose, neque tamen non vere, Parthos in Syriam transisse, nuntiaverunt: quo audito, vehementer sum commotus cum de Syria, tum de mea provincia, de reliqua denique Asia. Itaque exercitum mihi ducendum per Cappadociæ regionem eam, quæ Ciliciam attingeret, putavi; nam si me in Ciliciam demissem,

Cil.

turmis, & a cohorte pratoria, quæ erat Epiphaneæ præsidii cauta, occisione occisum. Quare cum viderem, a Cappadocia Parthorum copias aversas non longe a finibus esse Ciliciæ, quam potui maximis itineribus ad Amanum exercitum duxi, quo ut veni, hostem ab Antiochia recessisse, Bibulum Antiochiæ esse cognovi; Dejotarumque confestim, jam ad me venientem cum magno, & firmo equitatu, & peditatu, & cum omnibus suis copiis, certiore feci, non videri esse causam, cur abesset a regno; meque ad eum, si quid forte novi accidisset, statim litteras, nuntiosque missurum esse; cumque eo animo venissem, ut utrique provinciæ, si ita tempus ferret, subvenirem; tamen id, quod jam ante statueram, vehementer interesse utriusque provinciæ, pacare Amanum, & perpetuum hostem ex eo monte tollere, agere perrexi; cumque me discedere ab eo monte simulassem, & alias partes Ciliciæ petere, abessemque ab Amano iter unius diei, & castra apud Epiphaneam fecissem; ad iv. id. Oct. cum advesperasceret, expedito exercitu ita noctu iter feci, ut ad iii. id. Oct. cum luce sceret, in Amanum ascenderem: distributisque cohortibus, & auxiliis, cum aliis Quintus frater legatus mecum simul, a iis C. Pontinius legatus, reliquis M. Annejus, & L. Tullius legati præfessent, plerosque nec opinantes oppressimus, qui occisi, caprique sunt, interclusi iuga. Eranam autem, quæ fuit non vici instar, sed urbis, quod erat Amani caput, itemque Sepyram, & Commorim, acriter, & diu repugnantibus, Pontinio illam partem Amani tenente, ex antelucano tempore usque ad horam dici decimam magna multitudine hostium occisa, cepimus, castellaque sex capta, complura incendimus. His rebus ita gestis, castra in radicibus Amani habuimus apud Aras Alexandri quatrimum: & in reliquiis Amani delendis, agrisque vastandis (quæ pars ejus montis mea provinciæ est) id tempus omne consumpsimus. Confestim his rebus, ad oppidum Eleutherocilicum Pindenisum exercitum adduxi, quod cum esset altissimo, & munitissimo loco, ab iisque incoleretur, qui ne regibus quidem unquam paruisent, cum & fu-

gitivos reciperent, & Par horum advenum adere-  
 rime expectarent; ad existimationem imperii per-  
 tinere arbitratus sum, comprimere eorum auda-  
 ciam, quo facilius etiam ceterorum animi, qui  
 alieni essent ab imperio nostro, frangerentur,  
 vallo & fossa circumdedi: sex castellis, castris-  
 que maximis sepsi; aggere, vineis, turribus op-  
 pugnavi: ususque tormentis multis, multis sa-  
 gittariis, magno labore meo, sine ulla molestia,  
 sumptu sociorum, septimo quinquagesimo die  
 rem confeci, ut omnibus partibus urbis distur-  
 batis aut incensis, compulsi in potestatem meam  
 pervenirent. His erant finitimi pari scelere, &  
 audacia Tibarani, ab his, Pindenisso capto,  
 obsides accepi: exercitum in hyberna dimisi.  
 Quintum fratrem negotio proposui, ut in vicis  
 aut captis, aut male pacatis exercitus colloca-  
 retur. Nunc velim tibi sic persuadeas si de his  
 rebus ad Senatum relatum sit, me existimatu-  
 rum summam mihi laudem tributam, si tu hono-  
 rem meum sententia tua comprobabis, idque &  
 etsi talibus de rebus gravissimos homines & ro-  
 gare solere, & rogari scio, tamen admonendum  
 potius te a me, quam rogandum, puto. Tu es  
 enim is, qui me tuis sententiis sapissime orna-  
 sti, qui oratione, qui predicatione, qui summis  
 laudibus in Senatu, in concionibus ad cælum ex-  
 tulisti; cuius ego semper tanta esse verborum pon-  
 dera putavi, ut, uno verbo tuo cum mea laude  
 conjuncto, binna consequi me arbitrarer. Te  
 denique memini, cum cuidam clarissimo, atque  
 optimo viro supplicationem non decerneres, dice-  
 re, te decreturum, si referretur ob eas res, quas  
 is consul in urbe gessisset. Tu idem mihi supplica-  
 tionem decrevist; rogato, non, ut multis, repu-  
 blica bene gesta; sed, ut nemini, republica con-  
 servata. Mitto, quod invidiam, quod pericula,  
 quod omnes meas tempestates & subieris, & multo  
 etiam magis, si per me licuisset, subire paratissi-  
 mus fueris; quod denique inimicum meum, tuum  
 inimicum putaris: cuius etiam interitum, ut fa-  
 cile intelligerem, mihi quantum tribueres, Milo-  
 nis causa in Senatu defendenda approbaris. A me  
 autem hæc sunt profecta, quæ ego in beneficii  
 loco non pono, sed in veri testimonii, atque su-  
 dicti

dicii; non ut præstantissimas tuas virtutes tacitus admirarer, ( quis enim id non facit? ) sed in omnibus orationibus, sententiis dicendis, causis agendis, omnibus scriptis, Græcis, Latinis, omni denique varietate litterarum mearum, te non modo iis, quos vidissemus, sed iis, de quibus audissemus, omnibus antelerrem. Quæres fortasse, quid sit, quod ego hoc nescio quid gratulationis, & honoris a Senatu tanti astinem; agam jam tecum familiariter, ut est & studiis, & officiis nostris mutuis, & summa amicitia dignum, & necessitudine etiam paterna. Si quisquam fuit unquam remotus & natura, & magis etiam ( ut mihi quidem ientire videor ) ratione, atque doctrina, ab inani laude, & sermonibus vulgi, ego profecto is sum. Testis est consulatus meus; in quo, sicut in reliqua vita, fateor ea me studiose sequutum, ex quibus vera gloria nasci posset: ipsam quidem gloriam per se numquam putavi expetendam) itaque & provinciam ornatam, & spem non dubiam triumphi neglexi. Sacerdotium denique, cum, quemadmodum te existimare arbitror, non difficillime consequi possem, non appetivi. Idem post injuriam acceptam ( quam tu reip. calamitatem semper appellas, meam non modo non calamitatem, sed etiam gloriam ) studui quam ornatissima Senatus, populique Romani de me iudicia intercedere. Itaque & augur postea fieri volui, quod antea neglexeram, & cum honorem, qui a Senatu tribui rebus bellicis solet, neglectum a me olim, nunc mihi expetendum puto. Huic meæ voluntati ) in qua inest aliqua vis desiderii ad sanandum vulnus injuriæ ) ut faveas, adiutorque sis, quod paulo ante me negaram rogaturum, vehementer te rogo; sed ita, si non jejenum hoc nescio quid, quod ego gessi, & contemnendum videbitur, sed rationale, atque tantum, ut multi nequaquam paribus rebus honores summos a Senatu consequuti sint. Equidem etiam mihi illud animadvertisse videor, ( scis enim quam attente te audire soleam ) te non tam res gestas, quam mores, instituta, atque vitam imperatorum spectare solere in habendis, aut non habendis honoribus. Quod si in mea causa consideraveris, reperies

me exercitu imbecillo contra metum maximū belli firmissimum præsidium habuisse æquitatem, & continentiam. His ego subsidiis ea sum consequutus, quæ nullis legionibus consequi potuissem: ut ex alienissimis sociis amicissimos, ex infidelissimis firmissimos redderem; animosque novarum rerum expectatione suspensos, ad veteris imperii benevolentiam traducerem. Sed nimis hæc multa de me, præsertim ad te a quo uno omnium sociorum querelæ audiuntur, cognosces ex iis, qui meis institutis se recreatos putant; cumque omnes uno prope consensu de me apud te ea, quæ mihi opatissima sunt, prædicabunt: tum duæ maxime clientelæ tuæ, Cyprus insula, & Cappadociæ regnum, tecum de me loquentur: puto etiam regem Dejotarum, qui uni tibi est maxime necessarius. Quæ si etiam majora sunt, & in omnibus sæculis pauciores viri reperti sunt, qui suas cupiditates, quam qui hostium copias vincerent; est profectio tuum, cum ad res bellicas hæc, quæ rariores, & difficiliora sunt, genera virtutis adiunxeris, ipsas etiam illas res gestas justiores esse, & majores putare. Extremum illud est, ut quasi dissidens rogationi meæ, philosophiam ad te allegem: quæ nec mihi carior ulla unquam res in vita fuit, nec hominum generi majus a Diis munus ullum est datum. Hæc igitur, quæ mihi tecum communis est, societas studiorum, atque artium nostrarum (quibus a pueritia dediti, ac devincti, soli propemodum nos Philosophiam illam veram, & antiquam, quæ quibusdam otii esse, ac desidii videtur, in forum, atque in rempub. atque in ipsam aciem pene deduximus) tecum agit de mea laude: cui negari a Catone fas esse non puto. Quamobrem sic tibi persuadeas velim: si mihi tua sententia tributus honos ex meis litteris fuerit, me existimaturum tum auctoritate tua, tum benevolentia erga me, mihi, quod maxime cupierim, contigisse. Vale.



## ARGUMENTUM.

*Excusat se, quod Ciceronis supplicationem non decreverit, & tamen decretam gaudet; seque de illo honorificentius dicit sensisse, quam eos, qui supplicationem decreverunt,*

V. M. CATO M. CICERONI IMP. S. D.

**Q**UOD & respub. me, & nostra amicitia hortatur, libenter facio, ut tuam virtutem, innocentiam, diligentiam cognitam in maximis rebus domi togati, armati foris, pari industria administrari gaudeam; itaque, quod pro meo iudicio facere potui, ut innocentia, consilioque tuo defensam provinciam, servatum Aribarzanis cum ipso rege regnum, sociorum revocatum ad studium imperii nostri voluntatem, sententia mea, & decreto laudarem, feci. Supplicationem decretam, si tu, qua in re nihil fortuito, sed summa tua ratione, & continentia reip. provisum est, diis immortalibus gratulari nos, quam tibi referre acceptum mavis, gaudeat quod si triumphus prerogativam putas supplicationem, & idcirco casum potius, quam te, laudari vis; neque supplicationem sequitur semper triumphus, & triumpho multo clarius est, Senatui judicare potius mansuetudine, & innocentia imperatoris provinciam, quam vi militum, aut benignitate Deorum retentam, atque conservatam esse: quod ego mea sententia censebam. Atque hæc ego idcirco ad te contra consuetudinem meam pluribus scripsi, ut, quod maxime volo, existimes, me laborare, ut tibi persuadeam, me & voluisse de tua maiestate quod amplissimum sum arbitratus, & quod tu maluisti, factum esse gaudere. Vale, & nos dilige, & instituto itinere severitatem, diligentiamque sociis, & reipublicæ præsta.

*Exponit eximia cum Catonis laude, quantam videri voluptatem ceperit ex ejus sententia, & ex gratulatione litterarum, petitque, ut sibi in adipiscendo triumpho adjutor sit, aut saltem, si adipiscatur, gaudeat.*

## VI. M. T. C. CATONI S. D.

**L**ætus sum laudari me ( inquit HecTOR, optator apud Nævium ) abs te, pater, laudato viro, ea est enim profecto jucunda laus, quæ ab iis proficiscitur, qui ipsi in laude vixerunt. Ego vero, vel gratulatione litterarum tuarum, vel testimoniis sententiæ dictæ, nihil est, quod me non assequutum putem: idque mihi tum amplissimum, tum gratissimum est, te libenter amicitiae dedisse, quod liquido veritati dares, & si non modo unus, verum etiam multi Catones essent in civitate nostrâ, in qua unum exstitisse mirabile est, quem ego currum, aut quam lauream cum tua laudatione conferrem? nam ad neum sensum, & ad illud sincerum, ac subtile judicium nihil potest esse laudabilius, quam ea tua oratio, quæ est ad me perscripta a meis necessariis. Sed causam meæ voluntatis ( non enim dicam cupiditatis ) exposui tibi superioribus litteris, quæ etiam si parum justa tibi visa est, hanc tamen habet rationem, ut non nimis concupiscendus honos, sed tamen si deferatur a Senatu, minime aspernandus esse videatur. Spero autem illum ordinem pro meis ob remp. susceptis laboribus, me non indignum honore, usitato præsertim, existimaturum. Quod si ita erit, tantum ex te peto, quod amicissime scribis ut, cum tuo judicio, quod amplissimum esse arbitraris, mihi tribueris, si id, quod naluero, acciderit, gaudeas; sic enim fecisse te, & sensitse, & scripsisse video: resque ipsa declarat, tibi illum honorem nostrum supplicationis fuisse jucundum, quod scribendo affuisti, hæc enim S. C. non ignoro ab amicissimis ejus, cujus de honore agitur, scribi solere. Ego, ut spero, te propediem videbo: atque utinam rep. meliore, quam timeo. Vale.

A R.

## ARGUMENTUM.

*Gratulatur Marcello de fratre patruele, Consule designato, petitque ab eo, ut sibi quam primum, annuo imperio finito, successor mitteretur.*

## VII. M. T. C. PROCOS. M. MARCELLO COS. S. D.

**T**u & pietatis in tuos, & animi in remp. & clarissimi, atque optimi consulatus, C. Marcello consule facto, fructum cepisse, vehementer gaudeo. Non dubito, quid præsentis sentiant; nos quidem longinqui; & a te ipso missi in ultimas gentes ad cælum mēhercule te tollimus verissimis; ac justissimis laudibus. Nam cum te a pueritia tua unice dilexerim; tuque me in omni genere semper amplissimum esse & volueris; & judicaris: tum hoc vel tuo facto, vel populi Romani de te iudicio, multo acrius, vehementiusque diligo; maximaque læticia affectior; cum ab hominibus præcelsissimis; virisque optimis; omnibus dictis, factis, studiis, institutis vel me tui similem esse audio; vel te mei; unum vero si addis ad præclarissimas res consulatus tui, ut aut mihi succedat quamprimum aliquis; aut ne quid accedat temporis ad id, quod tu mihi & S. C. & lege finisti; omnia me per te consequutum putabo. Cura, ut valeas; & me absentem diligas, atque defendas. Quæ mihi de Parthis nuntiata sunt, quia non putabam, a me etiam nunc scribenda esse publice; propterea ne pro familiaritate quidem nostra volui ad te scribere; ne, cum ad consulentem scripvissem, publice viderer scripvisse. Vale.

## ARGUMENTUM.

*C. Marcello de Consulatu gratulatur; suamque illi dignitatem commendat.*

## VIII. M. T. G. PROCOS. C. MARCELLO COS. DES. S. D.

**M**axima sum læticia affectus, cum audiivi te consulem factum esse: cumque honorem tibi Deos fortunare volo, atque a te pro tua; parentisque tui dignitate administrari.

nam cum te semper dilexi, anavique, quod mel-  
amantissimum cognovi in omni varietate rerum  
meorum: tum patris tui pluribus beneficiis,  
vel defensus tristibus temporibus, vel ornatus  
secundis, necesse est, ut & sim totus vester, &  
esse debeam: cum præsertim matris tuæ, gravissi-  
mæ, atque optimæ feminæ, majora erga salu-  
tem, dignitatemque meam studia, quam erant a  
muliere postulanda, perspexerim, qua propter  
a te peto maiorem in modum, ut me absentem  
diligas, atque defendas. Vale.

## A R G U M E N T U M.

*Gratulatur C. Marcello de filio Consule facto; erat  
autem Collega Ciceronis in auguratu; ac libros  
quoque de jure augurali composuit, lib. 2. de Div.*

IX. M. T. C. PROCOS. C. MARCELLO  
COLLEGÆ S. D.

**M** Arcellum tuum consulem factum, teque  
ea lætitia affectum esse, quam maxime  
optasti, mirum in modum gaudeo; idque cum  
ipsius causa, tum quod te omnibus secundissi-  
mis rebus dignissimum iudico: cujus erga me  
singularem benevolentiam vel in labore meo,  
vel in honore perspexi: totam denique domum  
vestram vel salutis, vel dignitatis meæ studio-  
sissimam, cupidissimamque cognovi. Quare gra-  
tulum mihi feteris, si uxori tuæ Junię, gravissi-  
mæ, atque optimæ feminæ, meis verbis eris  
gratulatus. A te id, quod consueisti, peto, me  
absentem diligas, atque defendas. Vale.

## A R G U M E N T U M.

*Commendat studiose suam existimationem Consuli  
Marcello in supplicatione dicenda.*

X. M. T. C. IMP. C. MARCELLO C. F.  
COS. S. D.

**Q**Uando id accidit, quod mihi maxime fuit  
optatum ut omnium Marcellorum, Mar-  
cellinorum etiam (mirificus enim generis, ac  
nominis vestri fuit erga me semper animus)  
quando ergo ita accidit, ut omnium vestrum  
studio tuus consulatus satisfacere posset, in quem  
meæ

meæ res geste, lausque, & honor earum potissimum incideret, peto a te id, quod facillimum factu sit, non aspernante (ut confido) Senatu, ut quam honorificentissimum S. C. litteris meis recitatis, faciendum cures. Si mihi tecum minus esset, quam est cum tuis omnibus, allegarem ad te illos, a quibus intelligis, me præcipue diligi. Patris tui beneficia in me sunt amplissima; neque enim saluti meæ, neque honori amicior quisquam dici potest: frater tuus quanti me faciat, semperque fecerit, esse hominem, qui ignoret, arbitror neminem; domus tua denique tota me semper omnibus summis officiis prosequuta est, neque vero tu in me diligendo cuiquam concessisti tuorum. Quare a te peto maiorem in modum, ut me per te quam ornatissimum velis esse; meamque & in supplicatione decernenda, & in ceteris rebus existimationem satis tibi esse commendatam putes. Vale.

## A R G U M E N T U M.

*Agit gratias Consuli Marcello, quod supplicationem sibi decreverit.*

XI. M. T. C. IMP. C. MARCELLO COS.  
S. D.

Quantæ tibi curæ meus honos fuerit, & quam idem exstiteris consul in me ornando, & amplificando, qui fueras semper cum parentibus tuis, & cum tota domo, etsi res ipsa loquebatur, cognovi tamen ex meorum omnium litteris. Itaque nihil est tantum quod ego non tua causa debeam, facturumque sim cum studiose, tum libenter, nam magni interest, cui debeas, debere autem nemini malui, quam tibi; cui me cum studia communia, beneficia paterna, tuaque jam ante conjunxerant; tum accedit, mea quidem sententia, maximum vinculum, quod ita remp. geris, atque gessisti, (qua mihi carius nihil est) ut quantum tibi omnes boni debeant, quominus tantundem ego unus debeam, non recusem. Quamobrem tibi velim ii sint exitus, quos mereris, & quos fore confido. Ego, si me navigatio non morabitur, (quæ incurrebat in ipsos Etesias propediem te, ut spero, videbo. Vale.

T. 5. A R.

## A R G U M E N T U M.

*Gratulatur de Consulatu ; petitque , ut operam det , ne quid sibi temporis ad annum provinciale munus addatur .*

XII. M. T. C. IMP. L. PAULO COS. DES  
S. D.

**E**T si mihi nunquam fuit dubium , quin te populus Romanus pro tuis summis in rempublicam meritis , & pro amplissima familie dignitate , summo studio , cunctis suffragiis consulem facturum esset : tamen incredibili læticia sum affectus , cum id mihi nuntiatum est : eumque honorem tibi deus fortunare volo ; a teque tua , majorumque tuorum dignitate administrari . Atque utinam præsens illum diem mihi optatissimum videre potuissem , proque tuis amplissimis erga me studiis , atque beneficiis tibi operam meam , studiumque navare . Quam mihi facultatem quando hic nec opinatus , & improvisus provincie casus eripuit ; tamen , ut te consulem rempub. pro tua dignitate gerentem videre possim , magnopere a te peto , ut operam des , efficias , ne quid mihi fiat injuriæ , neve quid temporis ad meum annum munus accedat , quod si feceris , magnus ad tua pristina erga me studia cumulus accedet . Vale .

## A R G U M E N T U M.

*Petit , ut de suis rebus gestis quam honorificentissime decernendum curet , suamque illi etiam ceteris in rebus existimationem commendat .*

XIII. M. T. C. IMP. PAULO S. D.

**M**Axime mihi fuit optatum Romæ esse tecum , vultas ob causas , sed præcipue , ut & in petendo , & gerendo consulatu meum tibi debitum studium perspicere posses ; at petitionis quidem tuæ ratio mihi semper fuit explorata : sed tamen navare operam volebam in consulatu vero cupio equidem te minus habere negotii : sed moleste fero , me consulem tuum studium adolescentis perspexisse ; te meum , cum id ætatis sim , perspicere non posse , sed ita fato nescio

nescio quo contigisse arbitror, ut tibi ad me ornandum semper detur facultas, mihi ad remunerandum nihil suppetat præter voluntatem. Ornasti consulatum; orhasti redditum meum; incidit meum tempus rerum gerendarum in ipsum consulatum tuum; itaque cum & tua summa amplitudo, & dignitas, & meus magnus honos, magnaque existimatio postulare videatur; ut a te pluribus verbis contendam, ac petam ut quam honorificentissimum S. C. de meis rebus gestis faciendum cures; non audeo vehementer a te contendere, ne aut ipse tua perpetua consuetudinis erga me oblitus esse videar, aut te oblitum putem. Quare, ut te velle arbitror, ita faciam: atque ab eo, quem omnes gentes sciunt de me optime meritum, breviter petam. Si alii consules essent, ad te potissimum, Paule, mitterem, ut eos mihi quam amicissimos redderes; nunc cum tua summa potestas, summaque auctoritas, notaque omnibus nostra necessitudo sit; vehementer te rogo, ut & quam honorificentissime cures decernendum de meis rebus gestis, & quam celerrime, dignas res esse & honore, & gratulatione; cognosces ex iis litteris, quas ad te; & ad collegam; & senatum publice missi; omniumque mearum reliquarum rerum, maximeque existimationis meæ procuracionem suscepam velim habeas: in primisque tibi curæ sit, quod abs te superioribus quoque litteris petivi, ne mihi tempus prorogetur. Cupio te consulem videre; omniaque, quæ spero, cum absens, tum etiam præsens, te consule, assequi. Vale.

ARGUMENTUM.

*Significat, se eâ facturum Fabii causa, qua Cassius rogatur; dolet se Cassium non vidisse ad Urbem ex Provincia redeuntem; rogat, operam det, ne quid sibi ad annuam Provinciam temperis prorogetur.*

XIV. M. T. C. C. CASSIO PROQUÆST.

**M** Fabium quod mihi amicū, tua commendatione das, nullum in eo facio  
T. S. qua-

quæstum; multi enim anni sunt, cum ille in ære  
 natus est, & a me diligitur propter summam suam  
 humanitatem, & observantiam, sed tamen, quod  
 te ab eo egregie diligi sensi, multo amicior ei sum  
 factus: itaque quanquam profecerunt litteræ tuæ,  
 tamen aliquanto plus commendationis apud me ha-  
 buit animus ipsius erga te mihi perspectus, & co-  
 gnitus. Sed de Fabio faciemus studiose, quæ ro-  
 gas. Tu multis de causis vellem me convenire po-  
 tuisses: primum ut te, quem jamdiu plurimi fa-  
 cio, tanto intervallo viderem: deinde ut tibi,  
 quod feci per litteras, possem præsens gratula-  
 ri; tum ut quibus de rebus vellemus, tu tuis,  
 ego meis, inter nos communicaremus: postre-  
 mo, ut amicitia nostra, quæ summis officiis ab  
 utroque culta est, sed longis intervallis temporum  
 interruptam consuetudinem habuit, confirmaretur  
 vehementius. Id quando non accidit, utemur  
 bono litterarum, & eadem fere absentes, quæ si  
 coram essemus, consequemur. Unus scilicet ille  
 fructus, qui in te videndo est, percipi litteris  
 non potest: alter gratulationis est, is quidem  
 exilior, quam si tibi te ipsum intuens gratularer;  
 sed tamen & feci ante, & facio nunc, tibi que  
 cum pro rerum magnitudine, quas gessisti, tum  
 pro opportunitate temporis gratulor, quod te de  
 provincia decedentem summa laus, & summa  
 gratia provinciæ prosequuta est. Tertium est,  
 ut id, quod de nostris rebus coram communi-  
 casset inter nos, conficiamus idem litteris.  
 Ego ceterarum rerum causa tibi Romam prope-  
 randum magnopere censeo: (nam & ea, quæ  
 reliqui, tranquilla de te erant, & hac tua re-  
 centi victoria tanta clarum adventum tuum fore  
 intelligo) sed, si quæ sunt onera tuorum; si  
 tanta sunt, ut ea sustinere possis, propera; ni-  
 hil tibi erit lautius, nihil gloriosius: si ma-  
 jora, considera, ne in alienissimum tempus ca-  
 dat adventus tuus; hujus rei totum consilium  
 tuum est: tu enim scis, quid sustinere possis,  
 si potes, laudabile, atque populare est: si pla-  
 ne non potes, absens hominum sermones facili-  
 us sustinebis. De me autem idem tecum his ago  
 litteris; quod superioribus egi, ut omnes tuos  
 nervos in eo contendas, ne quid mihi ad hanc

pro-



provinciam, quam & senatus, & populus annum esse voluit, temporis prorogetur. Hoc a te ita contendo, ut in eo fortunas meas positas putem. Habes Paulum nostrum nostri cupidissimum: est Curio: est Furnius, sic velim enitare, quasi in eo fiat mihi omnia. Extremum illud est de iis, quæ proposueram, confirmatio nostræ amicitiae: de qua pluribus verbis nihil opus est. Tu puer me appetisti: ego autem semper ornamento te mihi fore duxi, fuisti etiam præsidio tristissimis meis temporibus, accessit post tuum discessum familiaritas mihi cum Bruto tuo maxima; itaque in vestro ingenio, & industria mihi plurimum & suavitatis, & dignitatis constitutum puto. Id tu ut studio confirmes, te vehementer rogo, litterasque ad me & continuo mittas, & cum Romam veneris, quam sæpissime. Vale.

## A R G U M E N T U M.

*Probat suū consiliū de bello civili non renovando.*

XV. M. T. C. C. CASSIO S. D.

**E**tsi uterque nostrum, spe pacis, & odio civilis sanguinis, abesse a belli pertinacia voluit: tamen, quando ejus consilii princeps ego fuisset videor, plus fortasse tibi præstare ipse debeo, quam a te expectare, etsi, ut sæpe soleo mecum recordari, sermo familiaris meus tecum, & item mecum tuus adduxit utrumque nostrum ad id consilium, ut uno prælio putaremus, si non totam causam, at certe nostrum iudicium definiri convenire; neque quisquam hanc nostram sententiam vere unquam reprehendit, præter eos, qui arbitrantur, melius esse deleri omnino remp. quam imminutam, & debilitatam manere, ego autem ex interitu ejus nullam spem scilicet mihi proponebam, ex reliquis magnam. Sed ea sunt sequuta, ut magis mirum sit accidere illa potuisse, quam nos non vidisse ea futura, nec, cum homines essemus, divinare potuisse. Equidem fateor, meam conjecturam hanc fuisse, ut illo quasi quodam fatali prælio facto, & victores communi salutis consulo vellent, & victi suæ, utrumque autem positum esse arbitrabar in celeritate victo-

victricis; quæ si fuisset, eandem clementiam ex-  
 perta esset Africa; quam cognovit Asia, quam eti-  
 am Achaia, & (ut opinor) ipso legato; ac depre-  
 catore. Amissis autem temporibus; quæ plurimum  
 valent; præsertim in bellis civilibus; interposi-  
 tus annus alios induxit; ut victoriam sperarent;  
 alios; ut ipsum vinci contemnerent, atque horum  
 malorum omnium culpam fortuna sustinet. Quis  
 enim aut Alexandrini belli tantam mirram huic  
 bello adiunctum iri; aut nescio quem illum Phar-  
 nacem Asia terrorem illaturum putaret? nos ta-  
 men in consilio pari; casu dissimili usi sumus, tu  
 enim eam partem petisti; ut & consiliis interesses;  
 & (quod maxime curam leuat) futura animo pro-  
 spicere posses: ego; qui festinavi, ut Caesarem in  
 Italia viderem; (sic enim arbitrabamur) eumque;  
 multis honestissimis viris conservatis redeuntem;  
 ad pacem currentem; ut ajunt, incitarem; ab illo  
 longissime & absium, & absui: versor autem in  
 gentu Italia; & in urbis miserrimis quæstis;  
 quibus aliquid opis fortasse ego pro mea, tu pro  
 tua; pro sua quisque parte ferre potuisset; si au-  
 ctor affuisset. Quate velim pro tua erga me per-  
 petua benevolentia scribas ad me, quid videas;  
 quid sentias, quid expectandum; quid agendum  
 nobis existimes; magni erunt mihi tuæ litteræ;  
 atque utinam primis illis; quas Luceria mise-  
 ras; paruissem! sine ulla enim molestia digni-  
 tatem meam retinuissem. Vale.

## A R G U M E N T U M.

*Totatur in opiniones Epicureorum, idest in ipsum  
 Cassium; qui Epicuri sectam sequi cœperat.*

XVI. M. T. C. PROCOS. C. CASSIO S. D.

**P**uto te jam suppedere; cum hæc tertia jam  
 epistola ante oppressit; quam tu schedu-  
 lam, aut litteram; sed non urgeo: longiores  
 enim expectabo; vel potius exigam. Ego, si  
 semper haberem, cui darem, vel ternas in ho-  
 ra darem; sit enim nescio quid; ut quasi coram  
 adesse videre; cum scribo aliquid ad te: neque  
 id *κατ' ἐξ ἀλλοτρίων φαντασιῶν*; ut dicunt tui amici  
 flovi; qui putant etiam *διαποτικὰς φαντασίας*  
 spectis Carlanis excitari; nam; ne te fugiat,  
 Catinus

Catius Insuber Epicureus, qui nuper est mortuus, quæ ille Gargettius, & jam ante Democritus, *εἰδωλὰ*; hic spectra nominat, his autem spectris etiamsi oculi possent feriri, quod cum velis ipsa accutunt, animus qui possit, ego non video. Dòceas tu me oportebit cum salvus veneris, in mea ne potestate sit spectrum tuum, ut simul ac mihi collibitum sit de te cogitare, illud occurrat: neque solum de te, qui mihi hæres in medullis; sed, si insulam Britanniam cæpero cogitare, ejus *εἰδωλὸν* mini advolabit ad pectus; sed hæc posterius, tento enim te, quo animo accipias. Si enim stomachabere & moleste feres; plura dicemus, postulabimusque, ex qua hæresi vi hominibus armatis dejectus sis, in eam restituare, in hoc interdicto non solet addi, In hoc anno. Quare si jam biennium, aut triennium est, cum virtuti nuntium remisisti, delinitus illecebris voluptatis, in integro res nobis erit. Quanquam quicum loquor? cum uno fortissimo viro, qui, posteaquam forum attigisti, nihil festisti, nisi plenissimum amplissimæ dignitatis; in ita ipsa *αἰρέσει* metuo ne plus nervorum sit, quam ego putarim, si modo eam tu probas. Quid tibi in mentem venit, inquires? quia nihil habebam aliud, quod scriberem; de rep. enim nihil scribere possum, neque enim, quod sentio; libet scribere. Vale.

## A R G U M E N T U M.

*Queritur de tabellariorum importunitate, scribit de Syllæ morte; de rumoribus Hispanici belli, de Panfæ, de Cassi commoratione Brundisina.*

XVII. M. T. C. C. CASSIO S. D.

**P**Ræposteros habes tabellarios: etsi me quidem non offendunt; sed tamen, cum a me discedunt, flagitant litteras; cum ad me veniunt, nullas afferunt: atque id ipsum faceret commodius, si mihi aliquid spatii ad scribendum darent: sed petasati veniunt: comites ad portam expectare dicunt, ergo ignosce; alteras habebis, hæc breves: sed expecta *κατὰ περίπαιτον*. Etsi quid ego me tibi purgo, cum tibi ad me inanes veniant, ad te cum epistolis revertantur? Nos hic tamen ad te scribam aliquid,

P. Syl.

P. Syllam patrem mortuum habebamus, alii a latronibus, alii cruditate dicebant: populus non curabat; combustum enim esse constabat, hoc tu pro sapientia tua feres æquo animo, quam προτιωπον τήλειως amisimus. Cæsarem putabant moleste laturum, verentem, ne hasta refrixisset. Mindius Marcellus, & Attius pigmentarius valde gaudebant, se adversarium perdidisse. De Hispania novi nihil: sed expectatio valde magna; rumores tristiores, sed ἀδίσποτος Pansa noster paludatus ad 111. Kalend. Janu. profectus est, ut quivis intelligere potest, id, quod tu nuper dubitare cœpisti τὶ καλὸν δὲ αὐτὸ αἰσπεδὸν esse; nam, quod multos miseriis levavit, & quod se in his malis hominem præbuit, mirabilis eum virorum bonorum benevolentia prosequuta est. Tu quod adhuc Brundisii moratus es, valde probo, & gaudeo, & mehercule puto, te sapienter facturum, si ἀκαιοὶ σπυδαὸς fueris, nobis quidem, qui te amamus, erit gratum: &, amabo te, cum dabis posthac aliquid domum litterarum, mei memineris; ego nunquam quemquam ad te, cum sciam, sine meis litteris ire patiar. Vale.

## A R G U M E N T U M.

*Excusat brevitatē epistolæ festinatione tabellariis: scribit de statu Reipub. de Hispania, de Cassi absentia.*

XVIII. M. T. C. C. CASSIO S. D.

Longior epistola fuisset, nisi eo ipso tempore petita esset a me, cum jam iretur ad te: longior etiam, si ἀλύκρον aliquem habuisset. nam σπυδαίεν sine periculo vix possumus. Ridere igitur, inquires, possumus, non mehercule facillime: verumtamen aliam aberrationem a molestiis nullam habemus. Ubi igitur, inquires, philosophia? tua quidem in culina, mea molestissima est, pudet enim servire. Itaque facio, me alias res agere, ne convitium Platonis audiam. De Hispania nihil adhuc certi, nihil omnino novi. Te abesse, mea causa moleste fero; tua, gaudeo, sed flagitat tabellarius, valebis igitur, meque, ut a puero fecisti, amabis.

A R.

## ARGUMENTUM.

*Respondet ad duas epistolas, quæ ante proximam  
superiorem leguntur; maxime autem Epicurum,  
& Epicureos, quorum ipse in numero erat, &  
studio virtutis, & justitiæ laudat.*

## XIX. CASSIUS CICERONI S. D.

**N**on mehercule in hac mea peregrinatione  
quidquam libentius facio, quam scribo ad  
te, videor enim cum præsentē loqui, & joculari;  
nec tamen hoc usu venit propter spectra Catiana:  
pro quo tibi proxima epistola tot rusticos Stoicos  
regeram, ut Catium Athenis natum esse dicas.  
Pansam nostrum secunda voluntate hominum palu-  
datum ex urbe exiisse, cum ipsius causa gaudeo,  
tum mehercule etiam omnium nostrum, spero enim  
homines intellegendos, quanto sit omnibus odio  
crudelitas, & quanto amorī probitas, & clemen-  
tia; atq; ea, quæ maxime mali petant, & concu-  
piscant, ad bonos pervenire: difficile est enim  
hominibus persuadere τὸ καλὸν εἶναι αὐτὸ αἰρετὸν  
esse. ὁ δὲ οὐν, & ἀταραξίαν virtute, justiti-  
a, τὴν καλὴν parari, & verum, & probabile est;  
ipse enim Epicurus, a quo omnes Catii, & A-  
masinii, mali verborum interpretes profisciscun-  
tur, dicit. ἔστιν εἰδὼς, αἰεὶ τῇ κατὰ τὴν δι-  
καίαν ζῆν. Itaque & Pansa, qui εἰδὼς sequi-  
tur, virtutem retinet: & ii, qui a nobis φιλόδοξοι  
vocantur, sunt γιλόκαλοι, ἢ φιλοδίκαιοι, omnes-  
que virtutes & colunt, & retinent. Itaque Sylla  
(cujus judicium probare debemus) cum dissentire  
philosophos videret, non quæsit, quid bonum  
esset; & omnia bona coemit, cujus ego mortem  
forti mehercule animo tuli. Nec tamen Cæsar  
diutius nos cum desiderare patietur, nam habet  
damnatos, quos pro illo nobis restituat: nec  
ipse sectorem desiderabit, cum filium viderit.  
Nunc ut ad rempublicam redeam, quid in Hi-  
spaniis geratur, rescribe. Peream, nisi sollicitus  
sum ac malo veterem, & clementem dominum  
habere, quam novum, & crudelem experiri.  
Scis, Cnaus quam sit fatuus: scis, quomodo  
crudelitatem virtutem putet: scis, quam se sen-  
per a nobis derisum putet; vereor, ne nos ru-  
stice

*Nice gladio velit ἀντιπυκνῆσαι. Quid fiat, si me diligis, rescribe. Hui, quam velim scire, utrum ista sollicito animo, an soluto legas: sciam enim eodem tempore; quid me facere oporteat. Ne longior sim; vale, & me, ut facis, ama. Si Caesar vicit, celeriter me expecta.*

## ARGUMENTUM.

*Scribit, se ad illum mittere librum suum de perfecto Oratore: laudat in Sabina gente fidem, & probitatem: petit ab eo creberrimas litteras.*

XX. M. T. C. TREBONIO S. D.

**O** Ratorem meum (sic enim inscripsi) Sabino tuo commendavi. Natio me hominis impulit, ut ei recte putarem; nisi forte candidato- rum licentia hic quoque usus, hoc subito cognomen arripuit; et si modelus ejus vultus, sermoque constans habere quiddam a Curiis videbatur. Sed de Sabino satis. Tu, mi Treboni, quando ad amorem meum aliquantulum discendens addidisti; quo tolerabilius feramus ignitulum desiderii tui, crebris nos litteris appellato; atque ita, si idem fieri nobis; quanquam duarum causae sunt; cur tu frequentior in isto officio esse debeas, quam nos: primum quod olim solebant, qui Romae erant, ad provinciales amicos de repub. scribere: nunc tu nobis scribas oportet: res enim publica istic est: deinde, quod nos aliis officiis tibi absenti satisfacere possumus; tu nobis, nisi litteris, non video, quare alia satisfacere possis. Sed cetera scribes ad nos postea. Nunc hac primo cupio cognoscere; iter tuum ejusmodi sit; ubi Bru- tum nostrum videris; quamdiu simul fueris: deinde, cum processeris longius; de bellicis rebus, de toto negotio; ut existimare possimus, quo statu simus: ego tantum me scire putabo, quantum ex tuis litteris habebam cognitum. Cura, ut valeas, meque amet amore illo tuo singulari. Vale.

## ARGUMENTUM.

*Rogat, ut sui absentis desiderium crebris, & longis epistolis leniat; enumerat Trebonii erga se officia; exponit de Calvo jam mortuo quid sentiat.*

## XXI. M. T. C. TREBONIO S. D.

**E**T epistolam tuam legi libenter; & librum libentissime; sed tamen in ea voluptate hunc accepti dolorem, quod, cum incendisses cupiditatem meam consuetudinis augendæ nostræ, (nam ad amorem quidem nihil poterat accedere) tum discedis a nobis, meque tanto desiderio afficis, ut unam mihi consolationem relinquas, fore, ut utriusque nostrum absentis desiderium crebris, & longis epistolis leniatur, quod ego non modo de me tibi spondere possum, sed de te etiam mihi, nullam enim apud me reliquisti dubitationem, quantum me amares; Nam, ut illa omitam, quæ, civitate cæte, fecisti, cum mecum inimicitias communicasti, cum me conclusionibus tuis defendisti, cum quaestor in mea, atque in publica causa consulum partes suscepisti, cum tribuno pl. quaestor non paruisti, cui tuus præsertim collega pateret, ut hæc recentia, quæ meminero semper, obliviscar, quæ tua sollicitudo de me in armis, quæ lætitia in reditu, quæ cura, qui dolor, cum ad te curæ, & dolores mei perferrentur; Brundisium denique te ad me venturum fuisse, nisi subito in Hispaniam missus esses; ut hæc igitur omitam, quæ mihi tanti æstimanda sunt, quanti vitam æstimo, & salutem meam, liber iste, quem mihi misisti, quantam habet declarationem amoris tui? primum, quod tibi factum videtur, quidquid ego dixi, quod aliis fortasse non item; deinde, quod illa sive facta sunt, sive secus, sunt, narrantes te, venustissima, quin etiam, antequam ad me veniant, risus omnis pene consumitur. Quod si in his scribendis nihil aliud, nisi, quod necesse fuit, de uno me tamdiu cogitavisses; ferreus essem, si te non amarem; cum vero ea, quæ scriptura persequutus es, sine summo amore cogitare

gitare non potueris; non possum existimare, plus quemquam a teipso, quam me a te amari, cui quidem ego amori utinam ceteris rebus possem, amore certe respondebo, quo tamen ipso tibi confido me facturum satis. Nunc ad epistolam venio; cui copiose, & suaviter scriptæ, nihil est quod multa respondeam; primum enim ego illas Calvo litteras misi, non plus, quam has, quas nunc legis, existimans exituras: aliter enim scribimus, quod eos solos, quibus mittimus: aliter, quod multos lecturos putamus; deinde, ingenium ejus melioribus extuli laudibus, quam tu id vere potuisse fieri putas, primum, quod ita judicabam, acute movebatur, genus quoddam sequebatur, in quo judicio lapsus, quo valebat, tamen assequebatur, quod probaret. Multæ erant, & reconditæ litteræ: vis non erat, ad eam igitur adhortabar, in excitando autem, & in acuendo plurimum valet, si laudes eum, quem cohortere. Habes de Calvo judicium, & consilium meum, consilium, quod hortandi causa laudavi: judicium, quod de ingenio ejus valde existimavi bene. Reliquum est, ut tuam professionem amore prosequar, reditum spe expectem, absentem memoria colam, omne desiderium litteris mittendis, accipiendisque leniam. Tu velim tua in me studia, & officia multum tecum recordere, quæ cum tibi liceat, mihi nefas sit oblivisci; non modo virum bonum me existimabis, verum etiam te a me amari plurimum judicabis. Vale.



# LIBER XVI. <sup>443</sup>

## ARGUMENTUM.

*Cum rediret Romam Cicero ex Cilicia, agrum Tironem Libertum Patris reliquit: quem his fere omnibus epistolis rogat, ut valetudinem curet.*

I. TULLIUS, ET CICERO F. ET Q. TIRONI HUMANISSIMO, ET OPTIMO S. D.

**V**ide, quanta in te sit suavitas, duas horas Thyrei fuimus; Xenomenes hospes tam te diligit, quam si vixeris tecum. Is omnia pollicitus est, quæ tibi essent opus: facturum puto; mihi placebat, si firmior esses, ut te Leucadem deportares, ut ibi te plane confirmares: videbis, quid Curio, quid Lysoni, quid medico placeat. Volebam ad te Marionem remittere, quem, cum meliuscule tibi esset, ad me mitteres: sed cogitavi unas litteras Marionem asferre posse, me autem crebras expectare; poteris igitur, & facies, si me diligis, ut quotidie sit Acastus in portu: multi erunt, quibus recte litteras dare possis, qui ad me libenter perferant, equidem Patras euntem neminem prætermittam. Ego omnem spem tui diligenter curandi in Curio habeo, nihil potest illo fieri humanius, nihil nostri amantius, ei te totum trade: malo te paulo post valentem, quam statim imbecillum videre; cura igitur nihil aliud, nisi ut valeas, cetera ego curabo. Etiam atque etiam vale. Leucade proficiscens, VII. id. Nov.

## ARGUMENTUM.

*Scribit, se adversis ventis Corcyra teneri; hortaturque Tironem, ut se curet, nec nisi confirmatus naviget.*

II. TULLIUS, ET CICERO TIRONI SUO S. D.

**S**eptimum jam diem Corcyrae tenebamur, Quintus autem pater, & filius Euthroti; solliciti eramus de tua valetudine mirum in modum:

dum: nec mirabamur, nihil a te litterarum; his enim ventis istinc navigatur, qui si essent, non Corcyra non sederemus; cura igitur te & confirma, & cum commode, & per valetudinem, & per anni tempus navigare poteris, ad nos amantissimos tui veni. Nemo nos amat, qui te non diligit: carus omnibus expectatusque venies. Cura, ut valeas etiam atque etiam, Tiro postea. Vale. xv. Kal. Nov. Corcyra,

### ARGUMENTUM.

*Suum Tironis desiderium significat.*

### III. TULLIUS, ET CICERO MEUS, ET FRATER, ET FRATRIS F. TIRONI S U O S. D.

**P**AULO facilius putavi posse me ferre desiderium tui, sed plane non fero; & quamquam magni ad honorem nostrum interest, quamprimum ad urbem me venire: tamen peccasse mihi videor, qui a te discesserim, sed quia tua voluntas ea videbatur esse, ut prorsus, nisi confirmato corpore, nolles navigare, approbavi tuum consilium; neque nunc muto, si tu in eadem es sententia: sin, posteaquam cibum cepisti, videris tibi me posse consequi; tuum consilium est. Marionem ad te eo misi, ut aut tecum ad me quamprimum veniret, aut, si tu morarere, statim ad me rediret. Tu autem hoc tibi persuade, si commodo valetudinis tuae fieri possit, nihil me malle, quam te esse mecum: sin intelligas opus esse, te Patris, convalescendi causa, paulum commorari, nihil me malle, quam te valere. Si statim navigas, nos Leucade consequere; sin te confirmare vis; & comites, & tempestates, & navem idoneam ut habeas, diligenter videbis: unum illud, mi Tiro, videto (si me amas) ne te Marionis adventus, & hae litterae moveant, quod valetudini tuae maxime conducet, si feceris, maxime obtemperaris voluntati meae; hae pro tuo ingenio considera. Nos ira te desideramus, ut amemus, amor, ut valentem videamus, hortatur: desiderium, ut quamprimum e illud

illud igitur potius. Cura ergo potissimum, ut  
valeas, de tuis innumerabilibus in me officiis  
erit hoc gratissimum. 111. Non. Novemb. Vale.

## A R G U M E N T U M.

*Scribit de sua sollicitudine, suoque ad Alyziam  
accessu: rogat, ut valitudinem diligenter cures.*

## IV. TULLIUS TIRONI SUO S. D.

**N**on queo ad te, nec lubet scribere, quo  
animo sim affectus: tantum scribo, & tibi,  
& mihi maxime voluptati fore, si te firmum  
quamprimum videro, tertio die abs te ad Aly-  
ziam accesseramus, is locus est citra Leucadem  
stadia cxx. Leucade aut teipsum, aut tuas litte-  
ras a Marione putabam me accepturum. Quan-  
tum me diligis, tantum fac, ut valeas, vel  
quantum te a me scis diligi. Nonis Nov. Alyzia.

## A R G U M E N T U M.

*Rogat, ut omni cura valetudini serviat.*

V. TULLIUS, ET CICERO, ET Q. PATER,  
ET FILIUS TIRONI SUO S. D.

**N**os apud Alyziam, ex quo loco tibi lit-  
teras ante dederamus, unum diem com-  
morati sumus quod Quintus nos consequutus  
non erat; is dies fuit Non. Nov. inde ante lu-  
cem proficiscentes ante diem viii. id. Nov.  
has litteras dedimus. Tu si nos omnes amas, &  
præcipue me, magistrum tuum, confirma te:  
ego valde suspenso animo exspecto, primum te  
scilicet, deinde Marionem cum tuis litteris;  
omnes cupimus, ego in primis, quamprimum  
te videre, sed, mi Tiro, valentem. Quare ni-  
hil properaris: satis quotidie videro, si vale-  
bis; utilitatibus tuis possum carere; te valere  
sua causa primum volo, tum mea, mi Tiro.  
Vale.

## ARGUMENTUM.

*Fere tota est hortatio ad curandam valetudinem.*

VI. TULLIUS TIRONI SUO, ET CICERO,  
ET Q. PATER, ET Q. F. S. D.

**V**arie sum affectus tuis litteris, valde priore pagina perturbatus, paulum altera recreatus: quare nunc quidem non dubito, quin, quoad plane valeas, te neque navigationi, neque vix committas, satis te mature videro, si plane confirmatum videro. De medico & tu bene existimari scribis, & ego sic audio; sed plane curationes ejus non probo, jus enim dandum tibi non fuit, cum κακός μανεσς esses, sed tamen & ad illum scripsi accurate, & ad Lysoneni; ad Curium vero, suavissimum hominem, & summi officii, summæque humanitatis, multa scripsi, in his etiam ut, si tibi videretur, te ad se transferret. Lyso enim nosset, vereor, ne negligentior sit; primum, quia omnes Græci, deinde, quod cum a me litteras accepisset, mihi nullas remisit; sed cum tu laudas, tu igitur, quid faciendum sit, iudicabis. Illud, mi Tiro, te rogo, sumptui ne parcas ulla in re, quod ad valetudinem opus sit. Scripsi ad Curium, quod dixisses, daret, medico ipsi puto aliquid dandum esse, quo sit studiosior. Innumerabilia tua sunt in me officia, domestica, forensia, urbana, provincialia, in re privata, in publica, in studiis, in litteris nostris, omnia viceris, si, ut spero, te validum videro. Ego puto, te bellissime, si recte erit, cum quaestore Mellinio decursurum, non inhumanus est, tecum, ut mihi visus est, diligit, & cum valetudini tuæ diligentissime consulueris, tum mi Tiro, consulto navigationi: nulla in re jam te festinare volo, nil daboro, nisi ut salvus sis, sic habeo, mi Tiro, neminem esse, qui te amet, quin idem te amet, & cum tua, & mea maxime interest, te valere, tum multis ego que. Adhuc, dum mihi nullo loco deesse vis,

vis, nunquam te confirmare potuisti, nunc te nihil impedit, omnia depone, corpori servi, quantam diligentiam in valetudinem tuam contuleris, tanti me fieri a te judicabo. Vale, mi Tiro, vale, vale, & salve. Lepta tibi salutem dicit, & omnes. Vale. VII. Id. Nov. Leucade.

## A R G U M E N T U M.

*Idem argumentum, ut Tiro valetudinem curet.*

VII. TULLIUS, ET CICERO, ET Q. Q.  
TIRONI S. D.

**T**ertiam ad te hanc epistolam scripsi eadem die, magis instituti mei tenendi causa quia nactus eram, cui darem, quam quod haberem, quod scriberem. Igitur illa quantum me diligis, tantum adhibe in te diligentia. Ad tua innumerabilia in me officia adde hoc, quod mihi erit gratissimum omnium, cum valetudinis rationem, ut spero, habueris, habeto etiam navigationis, in Italiam cunctibus omnibus ad me litteras dabis, ut ego euntem Patras neminem praeemitto: cura, cura te, mi Tiro, quando non contigit, ut simul navigares; nihil est quod festines: nec quidquam cures, nisi ut valeas. Etiam atque etiam vale. VII. Id. Nov. Actio, vesperi.

## A R G U M E N T U M.

*Etiam Q. Cicero significat, quanta cura sibi Tironis valetudo sit.*

VIII. Q. CICERO TIRONI S. D.

**M**agna nobis est sollicitudini valetudinis, nam tametsi qui veniunt, *ἀνθρώπων* nuntiant; tamen in magna consolatione ingens inest sollicitudo, si diu a nobis abfuturus es, is, cujus usum, & suavitatem desiderando sentimus; attamen, quanquam videre te tota cogitatione cupio;

tamen te penitus rogo, ne te tam longæ navigationi & viæ per hyemem, nisi bene firmum committas: neve naviges, nisi explorate; vix in ipsis tectis, & oppidis frigus infirma valetudine vitatur, nedum in mari, & viæ sit facile abesse ab injuria temporis.

Ἰνικός κ' ἀπεπῶ πρώτῃ περὶ μὲν τῶν

inquit Euripides, cui tu quantum credas, nescio: ego certe singulos ejus versus singula testimonia puto. Effice, si me diligis, ut valeas, & ut ad nos firmus, ac valens quamprimum venias. Ama nos, & vale. Q. F. tibi salutem plurimam dicit.

## ARGUMENTUM.

*Navigationis descriptio, & ad curandam valetudinem benevolentiae plena cohortatio.*

### IX. TULLIUS, ET CICERO TIRONI S U O S. D.

**N**Os a te, ut scis, discessimus ad iv. Non. Nov. Leucadem venimus ad viii. Id. Nov. ad vii. Actium: ibi propter tempestatem ad vi. Id. morati sumus, inde ad v. Id. Corcyram bellissime navigavimus. Corcyra fuimus usque ad xvi. Kal. Dec. tempestatibus retenti, ad xv. Kal. a portu Corcyreorum ad Cassionem stadia cxx. processimus, ibi retenti ventis sumus usque ad ix. Kal. interea qui cupide profecti sunt, multi naufragia fecerunt, nos eo die cœnati solvimus, inde Austro lenissimo, caelo sereno, nocte illa & diē postero in Italia ad Hydruntem ludibundi pervenimus: eodemque vento postridie (id erat ad vii. Kal. Dec.) hora quarta Brundisium venimus: eodemque tempore simul nobiscum oppidum introiit Terentia, quæ te facit plurimi. Ad v. Kal. Dec. servus Cn. Plancii Brundisii tandem aliquando mihi a te expectatissimas litteras reddidit, datas Id. Novemb. quæ me molestia valde levarent; utinam omnino liberassent, sed tamen Asclapo medicus plane confirmat, propediem te valentem fore, nunc quidem ego te hortor,

ut

ut omnem diligentiam adhibeas ad convalescendum: tuam prudentiam, temperantiam, amorem erga me novi: scio, te omnia facturum, ut nobiscum quamprimum sis; sed tamen ira velim, ut ne quid properes. Symphoniam Lysonis velim vitales, ne in quartam hebdomadam incideres. Sed quando pudori tuo maluisti obsequi, quam valetudini, reliqua cura. Curio misi, ut medico honos haberetur, & tibi daret, quod opus esset; me, cui iussisset, curaturum; equum, & mulum Brundisii tibi reliqui. Romæ, vereor, ne ex Kal. Jan. magni tumultus sint, nos agemus omnia modice. Reliquum est, ut te hoc rogem, & a te petam, ne temere naviges, solent nautæ festinare quæstus sui causa, cautus sis, mi Tiro: mare magnum, & difficile tibi restat, si poteris, cum Mescinio: (caute is solet navigare) sin minus, cum honesto aliquo homine, cujus auctoritate navicularius moveatur. In hoc omnem diligentiam si adhibueris, teque nobis incolumem præstiteris; omnia a te habebo. Etiam atq; etiam, noster Tiro, vale. Medico, Curio, Lysoni de te scripsi diligentissime. Vale, salve.

## I A R G U M E N T U M.

*Rogat, ut præter valetudinem nihil curet: addit de adventu suo ad Urbem: de statu Reip. civilibus discordiis perturbato, de triumpho suo, de præfectura Campana.*

X. TULLIUS, ET CICERO, TERENTIA, TULLIA, Q. Q. TIRONI S. D.

**E**T si opportunitatem operæ tuæ omnibus locis desidero; tamen non tam mea, quam tua causa doleo, te non valere; sed quando in quartanam conversa vis est morbi; (sic enim scribit Curius) spero, te diligentia adhibita, etiam firmiorem fore. Modo fac id, quod humanitatis tuæ est, ne quid aliud cures hoc tempore, nisi ut quanti commodissime convalescas. Non ignoro, quantum ex desiderio labores: sed erunt omnia facilia, si valebis, festinare te nolo, ne nauseæ molestiam suscipias

zger, & periculose hyeme naves. Ego ad urbem accessi pridie Non. Jan. obviam mihi sic est proditum, ut nihil fieri potuerit honoratius, sed incidi in ipsam flammam civilis discordiæ, vel potius belli: cui cum cuperem mederi, & ut arbitror, possem, cupiditates certorum hominum (nam ex utraque parte sunt, qui pugnare cupiant, impedimento mihi fuerunt. Omnino & ipse Cæsar amicus noster, minaces ad Senatum, & acerbas litteras miserat, & erat adhuc impudens, qui exercitum, & provinciam invito Senatu teneret, & Curio meus illum incitabat. Antonius quidem noster, & Cassius nulla vi expulsi, ad Cæsarem cum Curione profecti erant, posteaquam Senatus consulibus, prætoribus, tribunis plebis, & nobis (qui proconsules sumus) negotium dederat, ut curaremus, ne quid republica detrimenti caperet, nunquam maiore in periculo civitas fuit: nunquam improbi cives habuerunt paratiorem ducem, omnino ex hac quoque parte diligentissime comparatur. id sit auctoritate, & studio Pompeji nostri, qui Cæsarem fero cæpit timere. Nobis inter has turbas Senatus tamen frequens flagitavit triumphum; sed Lentulus Cos. quo majus suum beneficium faceret, simul atque expedisset, quæ essent necessaria, de republica dixit se relaturum. Nos agimus nihil cupide; eoque est nostrâ pluris auctoritas. Italiæ regiones descriptæ sunt, quam quisque partem tueretur, nos Capuam sumpsimus, hæc te scire volui. Tu etiam atque etiam cura, ut valeas, litterasque ad me mittas, quotiescunque habebis, cui des. Etiam atq; etiam vale.

## ARGUMENTUM.

*Deplorat statum Reipub. & initia bellorum civilium exponit: tum suam in Tironem benevolentiam significat.*

### XI. TULLIUS TIRONI SUO S. D.

**Q**uo in discrimine versetur salus mea, & bonorum omnium, atque universæ reipublicæ, ex eo scire potes, quod domos nostras, & pa-



& patriam ipsam vel diripiendam, vel inflammandam reliquimus; in eum locum res deducta est, ut nisi quis Deus, vel casus aliquis subvenerit, salvi esse nequeamus. Equidem, ut veni ad urbem, non destiti omnia & sentire, & dicere, & facere, quæ ad concordiam pertinerent: sed mirus invaserat furor non solum improbos, sed etiam eos, qui boni habentur, ut pugnare cuperent, ne clamante, nihil esse bello civili miserius; itaque cum Cæsar amentia quadam raperetur; & oblitus nominis, atque honorum suorum, Ariminum, Pisaurum, Anconam, Arretium occupasset; urbem reliquimus, quam sapienter, aut quam fortiter nihil attinet disputare, quo quidem in casu simus, vides, feruntur omnino conditiones ab illo, ut Pompejus eat in Hispaniam: delectus qui sunt habiti, & præsidia nostra dimittantur: se ulteriorem Galliam Domitio, citeriorem Considio Noniano (his enim obtigerunt) traditurum, ad consulatus petitionem se venturum: neque jam velle absentis rationem haberi sui: se præsentem trinundinum petiturum; accepimus conditiones, sed ita, ut removeat præsidia ex iis locis, quæ occupavit: ut sine metu de his ipsis conditionibus Romæ Senatus haberi possit; id ille si fecerit, spes est pacis, non honestæ, (leges enim imponuntur) sed quidvis est melius, quam sic esse, ut sumus: si autem ille suis conditionibus stare noluerit; bellum paratum est; ejusmodi tamen, quod ille sustinere non possit, præsertim cum a suis conditionibus ipse fugerit; tantummodo ut eum intercludamus, ne ad urbem possit accedere, quod sperabamus fieri posse, delectus enim magnos habebamus: putabamusque, illum metuere, si ad urbem ire cœpisset, ne Gallias amitteret, quas ambas habet inimicissimas præter Transpadanos, ex Hispaniaque sex legiones, & magna auxilia, Afranio, & Petrejo ducibus; habet a tergo. Videtur si insaniet, posse opprimi, modo ut urbe salva: maximam autem plagam accepit, quod is, qui summam auctoritatem in illius exercitu habebat, T. Labienus, socius sceleris esse noluit, reliquit illum, & nobiscum est, multique idem facturi esse

dicuntur. Ego adhuc oræ maritimæ præsum & Formiis, nullum majus negotium suscipere volui, quo plus apud illum meæ litteræ, cohortationesque ad pacem valerent, sin autem erit bellum; video, me castris, & certis legionibus præfuturum. Habeo etiam illam molestiam, quod Dolabella noster apud Cæsarem est. Hæc tibi nota esse volui: quæ, cave, te perturbent, & impendant valetudinem tuam. Ego A. Varroni, quem cum amantissimum mei cognovi, tum etiam valde tui studiosum, diligentissime te commendavi; ut & valetudinis tuæ rationem haberet, & navigationis, & totum te susceperet, ac tueretur, quem omnia facturum confido: recepit enim, & mecum loquutus est suavissime. Tu quando eo tempore mecum esse non potuisti, quo ego maxime operam, & fidelitatem desideravi tuam, cave, festines, aut committas, ut aut æger, aut hyeme naviges; nunquam ego sero te venisse putabo, si salvus venaris: adhuc neminem videram, qui te postea vidisset, quam M. Volusius, a quo tuas litteras accepi: quod non mirabar, neque enim meas puto ad te litteras tanta hyeme perferri, sed tua operam, ut valeas: &, si valebis, cum recte navigari poteris, tum naviges. Cicero meus in Formiano erat, Terentia, & Tullia Romæ. Cura, ut valeas. iv. Kal. Febr. Caput.

### ARGUMENTUM.

*Narrat, quam periculosum sit Tironi post morbum in viam se dare, exigitque solitam ejus operam in studiis.*

### XII. CICERO TIRONI S. D.

**E**Go vero cupio te ad me venire, sed viam timeo, gravissime ægrotasti, inedia, & purgationibus, & vi ipsius morbi consumptus es, graves solent offensiones esse ex gravibus morbis, si qua culpa commissa est, jam ad id biduum, quod fueris in via, dum in Cumanum venis, accedent continuo ad rediendum dies quinque. Ego in Formiano ad iii. Kal. esse volo:  
ibi

ibi te ut firmum ostendam, mi Tiro, effice: litterulæ meæ, sive nostræ tui desiderio oblanguerunt; hac tamen epistola, quam Acastus attulit, oculos paululum sustulerunt. Pompejus erat apud me, cum hæc scribebam, hilare, & libenter ei cupienti audire nostra dixi, sine te omnia mea muta esse; tu, musis nostris, para, ut operas reddas, nostra ad diem dictam fient, docui enim te, fides ἰσχυρὸν quod haberet. Fac plane ut valeas: nos ad summum. Vale. xiv. Kal. Jan.

## ARGUMENTUM.

*Suam de Tironis valetudine sollicitudinem significat.*

## XIII. TULLIUS TIRONI S. D.

**Æ**gypta ad me venit pridie id. Aprilis. Is etsi mihi nuntiavit, te plane febri carere, & belle habere; tamen, quod negavit, te potuisse ad me scribere, curam mihi attulit: & eo magis, quod Hermia, quem eodem die venire oportuerat, non venerat: incredibili sum sollicitudine de tua valetudine: qua si me liberaris, ego te omni cura liberabo. Plura scriberem, si jam putarem libenter te legere posse. Ingenium tuum, quod ego maximi facio, confer ad te mihi, tibi que conservandum. Cura te etiam atque etiam diligenter. Vale.

Scripta jam epistola, Hermia venit. Accepi tuam epistolam vacillantibus litterulis: nec mirum, tam gravi morbo. Ego ad te Ægyptam misi (quod nec inhumanus est, & te visus est mihi diligere) ut is tecum esset, & cum eo coquum, quo uterere. Iterum vale.

## ARGUMENTUM.

*Tirone agrotante, litterarum suavitate, & fru-  
ctu se carere dicit; eumque rogat, ut omnem  
curam ad convalescendum adhibeat.*

## XIV. TULLIUS TIRONI S. D.

**M**enandrus postridie ad me venit, quam exspectaram, itaque habui noctem plenam timoribus, ac miseriis. Tuis litteris nihilo sum.

factus certior, quomodo te haberes, sed tamen sum recreatus. Ego omni delectatione, litterisque omnibus careo, quas ante, quam te videro, attingere non possum. Medico mercedis quantum pascet, promitti iubeto, id scripsi ad Mummium: audio, te animo angi, & medicum dicere, ex eo te laborare; si me diligis, excita ex somno tuas litteras, humanitatemque propter quam mihi es carissimus, nunc opus est, te animo valere, ut corpore possis, id cum tua, tum u. ea causa facias, a te peto. Acastum retine, quo commodius tibi ministretur; conserva te mihi; dies promissorum adest, quem etiam repræsentabo, si adveneris. Etiam atque etiam vale. III. id. hora III.

## A R G U M E N T U M.

*Hortatio ad morbum depellendum.*

## XV. TULLIUS TIRONI S. D.

**O**Mnia a te data mihi putabo, si te valentem videro: summa cura expectabam adventum Menandri, quem ad te miseram. Cura, si me diligis, ut valeas, & cum te bene confirmaris, ad nos venias. Vale. IV. id. Aprilis.

## A R G U M E N T U M.

*Gratias agit, & gratulatur de Tirone manumisso.*

## XVI. QUINTUS MARCO FRATRI S. D.

**D**E Tirone, mi Marce, ita te, meumque Ciceronem, & meam Tulliolam, tuumque filium videam, ut mihi gratissimum fecisti, cum eum, indignum illa fortuna, nobis amicum, quam servum esse maluisti; mihi crede, tuis, & illius litteris perlectis, exilui gaudio, & tibi & ago gratias, & gratulor, si enim mihi Statii fidelitas est tantæ voluptati; quanti esse in isto hæc eadem bona debent, additis litteris, sermonibus, humanitate, quæ sunt his ipsis commodis potiora? amo te omnibus equi-

equidem maximis de causis ; verum etiam propter hanc, vel quod mihi sic, ut debuisti, nuntiasti, te totum in litteris vidi. Sabini pueris & promisi omnia, & faciam. Vale.

## A R G U M E N T U M.

*Reprehendit Tironem, quia scripserat, Valetudini fideliter inserviando; eumque rogat, ut omnino valetudini inserviat.*

## XVII. TULLIUS TIRONI S. D.

**V**ideo quid agas, tuas quoque epistolas vis referri in volumina; sed heus tu, qui *πανών* esse meorum scriptorum soles, unde illud tam *ἀκρως*, Valetudini fideliter inserviando? unde in istum locum. Fideliter, venit? cui verbo domicilium est proprium in officio, migrationes in alienum multæ: nam & doctrina, & domus, & ars, & ager etiam fidelis dici potest; ut sit, quomodo Theophrasto placet, verecunda translatio; sed hæc coram. Demetrius venit ad me, quo quidem comitatu *ἀφαιμίλιστα*, satis scis, tu cum videlicet non potuisti videre: cras aderit: videlicet igitur: nam ego hinc perendie mane cogito. Valerudo tua me valde sollicitat: sed inservi, & fac omnia, tum te mecum esse, tum mihi cumulatissime satisfacere putato. Cuspicio quod operam dedisti, mihi gratum est, valde enim ejus causa volo. Vale.

## A R G U M E N T U M.

*Scripserat Cicero in titulo epistolæ, Tullius Tullio Tironi: Quod Tiro omittendum rescripsit ad invidiam vitandam. De hoc, aliisque de rebus scripta est hæc epistola.*

## XVIII. TULLIUS TIRONI S. D.

**Q**uid igitur? non sic oportet? equidem censeo sic, addendum etiam, *Suo*. Sed, si placet, invidia vitetur; quam quidem ego

sæpe contempsi. Tibi *διαφύσσειν* gaudeo profuisse, si vero etiam Tusculanum, Dii boni, quanto mihi illud erit amabilius! Sed, si me amas: quod quidem aut facis, aut perbelle simulas; quod tamen in modum procedit: sed, ut est, indulge valetudini tuæ, cui quidem tu adhuc, dum mihi deservis, servisti non satis: ea quid postulet, non ignoras? *πέψιν, ἀλαπίαν, πείρηματον, σίμμετρον, τέρψιν, εὐλυσίαν, κοιλίαν*. Fac bellus revertare, non modo te, sed etiam Tusculanum nostrum plus amem. Parrhedrum excita, ut hortum ipse conducat: sic olitorem ipsum commovebis. Helluo nequissimus H. S. clo. dabat, nullo aprico horto, nullo emissario, nulla maceria, nulla casa, iste nos tanta impensa derideat? calface hominem; ut ego M. Orhonem; itaque abutor ooronis. De Crabra quid agatur, etsi nunc quidem etiam nimium est aquæ, ramen velim scire. Horologium mittam, & libros, si erit sudum; sed tu nullos ne tecum libellos? an pangis aliquid Sophocleum? fac opus appareat. A. Ligurius, Cæsaris familiaris, mortuus est, bonus homo, & nobis amicus. Te quando expectemus, fac ut sciam. Cura te diligenter. Vale.

## ARGUMENTUM.

*De litteris, de Demetrio, de Aufidiano nomine.*

## XIX. TULLIUS TIRONI S. D.

**E**Xspecto tuas litteras de multis rebus, te ipsum multo magis. Demetrium redde nostrum, & aliud si quid potes boni. De Aufidiano nomine nihil te hortor: solo tibi curæ esse: sed confice, & si ob eam rem moraris, accipio causam: si te id non tenet, advola. Litteras tuas valde expecto. Vale.

## ARGUMENTUM.

*De valetudine curanda, de libris componendis,  
de olitore, de reditu Tironis.*

## XX. TULLIUS TIRONI S. D.

**S**ollicitat (ita vivam) me tua, mi Tiro, valetudo: sed confido, si diligentiam, quam instituisti, adhibueris, cito te firmum fore. Libros compone, indicem cum Metrodoro habebit; quando ejus arbitratu vivendum est. Cum olitore, ut videtur. Tu potes Kalendis spectare gladiatores, postridie redire; & ita censeo, verum, ut videbitur. Cura te, si me amas, diligenter. Vale.

## ARGUMENTUM.

*Propensionem animi, studiumque ad virtutem significat, & de pradio empto gratulatur.*

## XXI. CICERO F. TIRONI SUO DULCIS. S. D.

**C**um vehementer tabellarios expectatam quotidie, aliquando venerunt post diem xi. & vi. quam a vobis discesserant; quorum mihi fuit adventus optatissimus; nam cum maximam cepissem læticiam ex humanissimi, & carissimi patris epistola; tum vero jucundissimæ tuæ litteræ cumulum mihi gaudii attulerunt. Itaque me jam non pœnitebat, intercapedinem scribendi fecisse, sed potius lætabar, fructum enim magnum humanitatis tuæ capiebam ex silentio mearum litterarum; vehementer igitur gaudeo, te meam sine dubitatione accepisse excusationem. Grates tibi, optatosque esse, qui de me tumores afferuntur, non dubito, mi dulcissime Tiro; præstaboque, & enitar, ut in dies magis magisque hæc nascens de me duplicetur opinio. Quare, quod polliceris, te buccinatorem fore existimationis meæ, firmo id, constantique animo facias licet; tantum

tum enim mihi dolorem, cruciatumque attulerunt errata ætatis meæ, ut non solum animus a factis, sed aures quoque a commemoratione abhorreant, cujus te felicitudinis, & doloris participem fuisse, notum exploratumque est mihi, nec id mirum; nam cum omnia mea causa velles mihi successa, tum etiam tua: socium enim te meorum commodorum semper esse volui. Quando igitur tum ex me doluisti, nunc, ut duplicetur tuum ex me gaudium, præstabo. Cratippo me scito non ut discipulum, sed ut filium esse conjunctissimum; nam cum audio illum libenter; tum etiam ejus propriam suavitatem vehementer amplector: sum totos dies cum eo, noctisque sæpenumero partem, exoro enim, ut mecum quam sæpissime cœnet. Hac introducta consuetudine, sæpe inscientibus nobis, & cœnantibus, obrepit; sublataque severitate philosophiæ, humanissime nobiscum jocatur: quare da operam, ut hunc talem, tam jucundum, tam excellentem virum videas quam primum. Nam quid ego de Bruttio dicam? quem nullo tempore a me parior discedere: cujus cum frugi, severaque est vita, tum etiam jucundissima convictio, non est enim sejunctus jocus a philologia, & quotidiana συζήτηση, huic ego locum in proximo conduxi, & ut possum, ex meis angustiis illius sustento tenuitatem. Præterea declamitare Græce apud Cassium institui: Latine autem apud Brutium exerceri volo, utor familiaribus, & quotidianis victoribus, quos secum Mitylenis Cratippus adduxit, hominibus & doctis, & illi probatissimis, multum etiam mecum est Epicrates, princeps Atheniensium, & Leonides, & horum ceteri similes. τὰ μὲν γὰρ καὶ ἡμᾶν τὰδε. De Gorgia autem quod mihi scribis, erat quidem ille in quotidiana declamatione utilis, sed omnia postposui, dummodo præceptis patris parerem. διαπρόβω enim scripserat, ut eum dimitterem statim, tergiversari nolui, ne mea nimia σφαδὴ suspicionem ei aliquam importaret: deinde illud etiam mihi succurrebat, grave esse, me de judicio patris judicare, tuum



tamen studium, & consilium gratum, acceptumque est mihi. Excusationem angustiarum tui temporis accipio: scio enim quam soleas esse occupatus. Emisse te pradium, vehementer gaudeo: feliciterque tibi rem istam evenire cupio. Hoc loco me tibi gratulari, noli mirari, eodem enim fere loco tu quoque emisse te fecisti me certiozem: habes ubi deponenda tibi sint urbanitates, rusticus Romanus factus es. Cum ego mihi nunc ante oculos tuum jucundissimum conspectum propono, videor videre e mentem te rusticas res, cum villico loquentem, in lacinia servantem ex mensa secunda semina. Sed (quod ad rem pertinet) me tum tibi defuisse, æque, ac tu, doleo; sed noli dubitare, mi Tiro, quin te sublevaturus sim, si modo fortuna me; præsertim cum sciam, communem nobis emptum esse istum fundum. De mandatis quod tibi curæ fuit, est mihi gratum: sed peto a te, ut quam celerrime mihi librarius mittatur, maxime quidem Græcus: multum enim mihi eripitur operæ in exscribendis hypomnematis. Tu velim in primis cures, ut valeas, ut una *εὐφρολογῶμεν* possimus. Antherum tibi commendo. Vale.

## A R G U M E N T U M.

*Prima pars hujus Epistolæ est de valetudine curanda, reliquæ variis de rebus.*

## XXII. TULLIUS TIRONI SUO S. D.

**S**pero ex tuis litteris tibi melius esse, cupio quidem certe, cui quidem rei omni ratione cura ut intersias, & cave suspiceris, contra voluntatem meam te facere, quod non sis mecum, mecum es, si te curas; quare malo te valetudinituz deservire quam meis oculis, & auribus: etsi enim & audio te & video libenter: tamen hoc multe erit, si valebis, jucundius. Ego hic cæso, quia ipse nihil scribo: lego autem libentissime, tu istic, si quid librarii mea manu non intelligent, monstrabis, una omnino interpositio

dis.

difficilior est, quam ne ipse quidem facile legere soles, de quadrimo Catone. De triclinio cura, ut facis. Tertia aderit; modo ne Publius rogatus sit. Demetrius iste nunquam omnino Phalereus fuit, sed nunc plane Bilienus est, itaque te do vicarium, tu eum observabis. Etsi, verumtamen. De illis: nosti cetera: sed tamen, si quem cum eo sermonem habueris, scribes ad me, ut mihi nascatur epistolæ argumentum, & ut tuas longissimas litteras legam. Cura, mi Tiro, ut valeas; hoc mihi gratius facere nihil potes. Vale.

## A R G U M E N T U M.

*Hortatur; ut professionem conficiat: scribitque sibi esse in animo amicitiam Antonii conservare.*

XXIII. TULLIUS TIRONI  
S. D.

**T**U vero confice professionem, si potes, etsi hæc pecunia ex eo genere est, ut professione non egeat: verumtamen Balbus ad me scripsit, tanta se epiphora oppressum, ut loqui non possit, Antonius de lege, quid egerit: liceat modo rusticari. Ad Bithynicum scripsi; de Servilio tu videris qui senectutem non contemnis, etsi Atticus noster quia quondam me commoveri *παύσει* intellexit, idem semper putat, nec videt, quibus præfidiis philosophiæ sepius sim, & hercule, quod timidus ipse est *διποθεύεις*, ego tamen Antonii inveteratam sine ulla offensione amicitiam retinere sane volo, scribamque ad eum: sed non ante, quam te videro, nec tamen te avoco a *syngrapha*, *γέρν' ἑνύμω*. Cras exspecto Leptam: etenim ad ejus rutam pulegio mihi tui sermonis utendum est. Vale.

## ARGUMENTUM.

*Argumentum hujus epistolæ est de ratiphibus .*

## XXIV. TULLIUS TIRONI

S. D.

**E**T si mane Harpalum miseram; tamen; cum haberem, cui recte darem litteras, etsi novi nil il erat, iisdem de rebus volui ad te sæpius scribere: non quin considerem diligentiz tuæ sed rei me magnitudo movebat. Mihi prora & puppis ( ut Græcorum proverbium est ) fuit a me tui dimittendi, ut rationes nostras explicares. Officio, & Aurelio utique satisfiat. A Flamma, si non potes omnem, partem aliquam velim extorqueas, in primisque, ut expedita sit pensio Kal. Jan. de attributione conficies, de repræsentatione videbis. De domesticis rebus hætenus, de publicis omnia mihi certa, quid Octavius, quid Antonius, quæ hominum opinio, quid futurum putes. Ego vix teneor, quin accurram, sed scilicet litteras tuas expecto: & scito, Balbum tuum fuisse Aquini, cum tibi est dictum, & postidie Hirtium. Puto utrumque ad aquas. Sed quod egerint, Dolabellæ procuratores fac, ut admoneantur. Appellabis etiam Papiam. Vale.

## ARGUMENTUM.

*Litteras a Tirone quam creberrimas requirit .*

## XXV. CICERO F. TIRONI SUO

S. D.

**E**T si justa, & idonea usus es excusatione intermissionis litterarum tuarum; tamen, id ne sæpius facias, rogo; nam, etsi de reipublicæ rumoribus, & nuntiiis certior fio, & de sua in me voluntate semper ad me perscribit pater: tamen de quavis minima re scripta a te ad me epistola semper fuit gratissima; quare, cum in primis tuas desiderem litteras, noli committere,

re, ut excusatione potius expleas officium scribendi, quam assiduitate litterarum. Vale.

### ARGUMENTUM.

*Suaviter Tironem accusat, quia litteras non miserat: rogatque, ut omnino etiam sine argumento scribat.*

### XXVI. Q. CICERO TIRONI SUO S. D.

**V**erberavi te cogitationis tacito duntaxat convicio, quod fasciculus alter ad me jam sine tuis litteris perlatus est; non pores effugere hujus culpæ pœnam te patrono. Marcus est adhibendus: isque diu, & multis lucubrationibus commentata oratione vide ut probare possit, te non peccasse. Plane te rogo, sicut olim matrem nostram facere memini, quæ lagenas etiam inanes obsignabat, ne dicerentur inanes aliquæ fuisse, quæ furtim essent exsiccata: lic tu, etiam si, quod scribas, non habebis, scribito tamen, ne furtum cessationis qualivisse videaris, valde enim mihi semper & vera, & dulcia tuis epistolis nuntiantur. Ama nos, & vale.

### ARGUMENTUM.

*Invehitur in Consules designatos, Hirtium, & Pansam: b. nevolentiam suam in Tironem significat.*

### XXVII. Q. CICERO TIRONI SUO S. D.

**M**irificam mihi verberationem cessationis epistola dedisti; nam quæ parcius frater perscripserat, verecundia videlicet, & prope-ratione, ea tu, sine assentatione, ut erant quæ me scripsisti: & maxime de consulibus designatis; quos ego penitus novi libidinum, & languoris effeminatissimi animi plenos, qui nisi a gubernaculis recesserint, maximum ab universo nau-

naufragio periculum est . Incredibile est , quæ  
 ego illos scio , oppositis Gallorum castris , in-  
 æstivis fecisse : quos ille latro , nisi aliquid fir-  
 mius fuerit , societate viciorum deliniet . Res est  
 aut tribunitiis , aut privatis consiliis munien-  
 da , nam isti duo vix sunt digni , quibus alteri  
 Cæsenam , alteri Cossutianarum tabernarum fun-  
 damenta credas . Te ( ut dixi ) tero in oculis .  
 Ego vos ad 111. Kal. videbo ; tuosque oculos ,  
 etiam si te veniens in medio foro videro , dis-  
 suaviabor . Me ama . Vale .

F I N I S .

GR Æ-

# GRÆCARUM VOCUM

Quæ in his Epistolis inter legendum lectorem  
linguæ Græcæ, imperitum morari possent.

## Interpretatio Latina.

Πολιμικώτερον, seip. peritiorum.	Pag. 36
κομικός μάρτυς, comicus testis, idest, non ve- rus: ut aurum comicum.	41
ἔξοχον, excellentia.	61
δύναμις, generis præstantia, seu bonitas. ibid.	
παρ' ἐμοῖς καὶ ἄλλοι. Οἳ καὶ ἐμὲ τιμῶσιν, μά- λιστα καὶ μητίετα Ζῶς. Apud me sane & alii sunt, qui me honorabunt, maxime autem consilia. rius Jupiter, seu consilio valens.	ibid.
φιλάτιος, accusandi, seu criminandi cupi- dus.	ibid.
Ἐπικύρειον, Epicureum.	56
ἐπρωδύεται, dissimulare, dissimulante	100
qui.	81
ἐπρωδόμενος, dissimulans, dissimulantes	104
quens.	ibid.
Ἰλαυν' εἰς Ἀθήνας, Nocturnam Athenas, scilicet por- tans.	134
ἔτι δ' ἀρετῇ ἰδρωτὰ θεοὶ προπάρρηθον ἰθὺς κατ' Ἀθάνατοι, Ante virtutem, sudorem posuerunt Dii immortales.	154
πολιτοῦσθαι, administrare rempublicam.	170
φιλοθέωρον, spectandi cupidum.	142
Νίκωνος περὶ πολυφγίας, Niconis de edacita- te.	177
γίλωτα παρδώνιον, pisum Sardonium.	181
δυσκρικά. καὶ δυσεντερικά παῖδον, urinæ, & inte- stinorum difficultates.	ibid.
δυσεντερίαν, intestinorum difficultatem, seu in- testinorum morbum.	ibid.
λιότης, frugalitatem, vel tenuitatem vi- tus.	282
διάρροια, ventris profluvium.	ibid.
χοίρει μὲν, usu quidem?	184
κτήσει δὲ, possessione vero.	ibid.
ἑξάπαις, urbanitas, vel comitas.	186

α' κυ-

ἀκυρὸν, ineptum.	ibid.
ἀμφιβολία, ambiguitas.	ibid.
ὑπερβολή, sermonis exsuperantia, seu superlatio.	ibid.
παράγραμμα, inversio litterarum.	ibid.
παραπροσδοκίαν, præter expectationem.	ibid.
ἐντεχνα, artificialia.	ibid.
σύνταγμα, opus.	192
διδασκαλίαν, doctrinam.	ibid.
ἰώλος, obsoleta.	214
ἑλκυστότως, latenter, vel obscure.	215
πολιτείας, civitatum gubernandarum rationes.	
ibidem.	
γλαυκὴ εἰς Ἀθῶνας noctuam Athenas.	216
περί θωατῶν, de iis, quæ fieri possunt.	ibid.
κατὰ Διόδορον κρίνειν, secundum Diodorum judicare.	ibid.
τῶν ἀθωατῶν, de numero earum rerum, quæ fieri non possunt.	ibid.
κρίσις, judicium.	ibid.
Χρυσίππεια, Chrysippeum.	ibid.
κατὰ Χρυσίππυ θωατὸν, quod secundum Chrysippum fieri potest.	ibid.
σὺν τε δὺ ἐρχομένοι, simulque duo euntes.	219
ἀποπροηγμένον, rejectum.	ibid.
πολλοὶ μαθηταὶ κρείττονες διδασκάλων, multi discipuli præstantiores magistris.	ibid.
ἐβελίζει, verum notat, ac jugulat, vel delect.	222
τε ποιῆται, poetæ.	ibid.
παρεμβεβλημένοι, inserti, seu subdititii, vel inculcati.	ibid.
συμβιότιον, convivium, vel convivorem.	ibid.
ἐποφθεγμάτων, sententiarum brevium & acutiarum.	230
προεχόμενας, quæ proponi solent, antequam quis disputationem aliquam explicandam suscipiat.	244
ἐκμαθεῖς, qui discunt jam grandes natu, seu qui sero discunt.	235
ἀτόλγμα, quod non successit.	236
οἱ σοφοί: ἄθρο' ῥήμων ἴση, sapiens, rectiloquus eris: idest, suo quamque rem nomine appellabis.	239
ἐμπόσια, computationes.	240

συνδείπια, concœnationes.	ibid.
Κύρις παιδείαν, Cyri institutionem.	241
ζήτημα, questionem,	242
πτολίποθον, urbium everforem, seu expugnato- rem.	257
ὄργανον, instrumentum.	297
σκιαμαχίαι, pugnae umbratiles, five simulacra pugnae.	ibid.
λακωνισμόν, brevitatem sermonis.	305
φιλοσοφούμενα, quæ a philosophis tractantur, ac disputantur.	307
Πάλτοϊ, proprium loci nomen.	324
πατρίδα ἐμὴν μάλλον φιλοῦν, patriam meam ma- gis amans.	326
ὑπερῖον μοῖσις, liberior in loquendo, & ni- mis libere suo quamque rem nomine appel- lans.	331
πάντα περὶ πάντων, omnia de omnibus.	335
τυραννοκτόοι, tyrannicidæ.	336
ὑπομνήματισμόν, decretum, vel monumen- tum.	346
ἀλλ' ἐμὸν ἔποτε θυμὸν ἐπὶ ἐνθισσιν ἔπειθιν, sed meum nunquam animum in peccatore infle- xit.	359
ἄλκιμος ἔσσο, ἵνα τίς σε καὶ ὀφιδόνων εὖ ἔπη, strenuus esto, quo te & posterorum, qui se- ro nascentur, aliquis laudet.	ibid.
ὥς, ἵφελ' ἡ ἐκάλυψε μέλαινα, sic nebula occulta- vit atra.	ibid.
Μὴ μὰν ἀσπευδεῖγαι καὶ ἀκλειῶς ἀπολοῖ μιν, ἀλλὰ μέγα ρέζας τί, καὶ ἔσσο μέγιστοι πυθισθαι; Ne vero sine studio, & sine gloria peream, sed magnum quid cum fecero, quod vel a posteris audiatur.	ibid.
Εὐριπίδης, Euripidis.	ibid.
Μισῶ σοφιστὴν ἔστις ἔχ' αὐτῷ σοφός. Sapientem odī, qui sibi non est sapiens.	ibid.
ἔμα πρὶσσω καὶ ὀπίσσω, simul a fronte, & a tergo.	ibid.
αἰεὶν ἀοριδύειν, καὶ ὑπεύροχον ἔμμεναι ἄλλων, sen- per strenue se gerere, & præstantem esse aliis, seu principem aliorum.	ibid.
διοίκησιν, provinciae administrationem.	384
ὀποθήκας, hypothecas, pignora, quæ in rebus inimicis consistunt.	387



- πρεῖς διοικήσεις, tres provinciales administrationes, diœceses. 393  
 χολὴν ἀκρατον, bilem puram. 408  
 Εὐσεβὴν, & Philoromum Ὀσιβῶν, & φιλο-  
 ρομῶν, pium, & amicum Romanorum, 418.  
 κατ' εἰδῶλων φαντασίας, secundum spectrorum  
 visiones, seu simulacrorum. 436  
 διανοητικὰς φαντασίας, in intelligentia positas  
 visiones. ibid.  
 εἰδῶλα, simulacra, vel spectra. 437  
 εἰδῶλον, spectrum, vel simulacrum. ibid.  
 αἰρίσει, sceta. ibid.  
 πάντα περὶ πάντων, omnia de omnibus, seu pro  
 omnibus. ibid.  
 πρόσωπον πόλεως, personam civitatis. 438  
 ἀδίσποτοι, sine auctore, vel sine domino, id  
 est, incerti. ibid.  
 τὸ καλὸν δι' αὐτὸ αἰρετὸν, honestum propter  
 seipsum eligendum, seu expetendum. ibid.  
 ἀκινέσπεδος, non studens rebus inanibus, sive  
 abhorrens a studio rerum inanum. ibid.  
 φλύσρον, garrulum. ibid.  
 σπουδάζειν, seria scribere, vel res serias age-  
 re. ibid.  
 τὸ καλὸν δι' αὐτὸ αἰρετὸν, honestum per se ex-  
 petendum. ibid.  
 ἡδονῶν, voluptatem. ibid.  
 ἀταραξίαν, perturbationis vacuitatem, id est,  
 animi tranquillitatem. ibid.  
 τὸ καλῶν, bono, & honesto. ibid.  
 οὐκ ἔστιν ἡδέως, ἀνδρὶ τῷ καλῶς, ἢ δικαίως ζῆν.  
 non potest jucunde vivi, nisi honeste, ac ju-  
 ste vivatur. ibid.  
 φιληδονοί, voluptatis studiosi, seu cupidi. ibid.  
 φιλόκαλοι, ἢ φιλοδίκαιοι, honesti amantes, &  
 justitiae studiosi. ibid.  
 ἀντιμυκτηρίσαι, vicissim irridere, & subfanna-  
 re. 440  
 κακυστόμαχος, malo stomacho, & imbecil-  
 lo. 446  
 ἀκίδημα μὲν, χρονιώτερον δέ, periculi qui-  
 dem expertia, sed diuturniora. 447  
 ψίχος, ἢ λεπτὸν χροτὶ πολυαιώστατον, fri-  
 gus autem tenui, & macilento cor-  
 pori.

pori inimicissimum, seu infestissimum. 448  
ἐπυμον, veritatem, veram nominis originem.

451.

καίων, regula.

455

ὀχυρον, ineptum.

ibid.

σφωμίλασα, me a colloquio segregavi.

ibid.

διαφόρησις, gestationem.

456

πέψιν, ἀλυπίαν, περιπατον σὺμμετρον, πέψιν,

δύλαϊαν κοιλίας, concoctionem, quietem,

seu laboris, ac lassitudinis vacuitatem, de-

ambulationem convenientem, frictionem, so-

lutionem alvi.

ibid.

συζητήσῃ, conquisitione.

458

τὰ μὲν ἔν καὶ ἡμᾶς τὰδε, quæ igitur ad nos

pertinent, hæc sunt.

ibid.

διαδ' ὀφείλω, aperte, diserte.

ibid.

σπαδὴ, studium, contentio.

ibid.

συμφιλογεῖν, una commentari, vel una in lite-

ris versari.

459

παγκοῖς, repentinis, & inanibus terroribus.

460

θορυβοποιεῖ, tumultum ciet, tumultum exci-

tat.

ibid.

γένη κνήμης, genu tibia, subintell. ἰγγύτιον,

idest propius.

ibid.

514438 A

I N.

# I N D E X

Horum, ad quos Epistolæ, quæ hoc volumine continentur, sunt scriptæ.

*Ubi plures Epistolæ ad unum scriptæ ordine sequuntur, earum prior, & posterior iis numeris, quæ hac virgula (---) connexi sunt, indicantur.*

## A

Acilio	Pag. 373
Alieno	399
Ampio Balbo	148. 274
Q. Anchario	366
Antonio	105. 286. 287
Appio Pulchro	55. 57. 76
Appulejo	381
Aristo	<u>362</u>

## B

Basilio	152
Bithynico.	153
Bruto, & Cassio	284
Bruto	288. 289. & seq.

## C

A. Cæciliæ	137. 144
C. Cæsari	164
P. Cassio	383
Caninio Sallustio	47
C. Cassio	311. 313. 314. 315. 316. 317. 318. 319
M. Catoni	<u>420</u>
Ciceroni	<u>83. 93. 99.</u> 103. 110. 118. 119. 184. 219. 220. 261. 264. 266. 268. 275. 280. 282. 288. 292. 294. 300. 301. 305. 305. 308. 321. 465. 427. 438.
Cluvio	351

C. Cælio Calvo	50
M. Cælio Rufo	44
Consulibus, Prætoribus, Trib. pleb. Sen. populoque Rom.	415
Q. Cornificio	343
Crassipedi	154
L. Culleolo	378
M. Curio	189
C. Curioni	29
C. <u>Curtio</u> Præduccano	388

## D

Dolabellæ	222. 225
Domitio.	<u>157</u>

## E

T. Fabio	123
M. Fabio Gallo	178. 180. 181
T. Turfano	145
C. Furnio	270. 271

## Q

Q. Gallio.	380
Gallo.	<u>181.</u> 182

## L

P. Lentulo	<u>L.</u> 15
M. Lepido	273
Leptæ	153. 155
Q. Ligario.	150. 151
M. Licinio	108
L. Lu-	

**L.** Lucejo 112. 116. 119  
Lucio Mescinio 128

**M**

**M.** Marcello 93. 429.  
430. 431.

**M.** Mario 158. 164

**Matio** 306

**Memmio** 345. 347

**L.** Messinio 128

**Q.** Metello 100. 103. 104

**Munatio** 388

**L.** Munatio Planco 243.

244. 247. 248. 253. 255.

253. 259. 262. 263. 264

**N**

**P.** Nizidio 95

**O**

**M.** Oppio 310

**P**

**Papirio Pato** 217. 242

**L.** Paulo 432

**Q.** Philippo 396. 397

**Cn.** Plancio 97. 99

**L.** Planco, *Vide* Mu-

natio Planco.

**Cn.** Pompeio 107

**Pontifici Max. S. P. PL.**

**Q. R.** 284

**Q**

**Quatuor viris, & De-**  
**curionibus Fregella-**  
**nis** 398

**R**

**Regi** 384

**Rufo** 124. 125

**M.** Rutilio 353

**S**

**P.** Servilio Isaurico 391.

393. 394. 395. 396.

**Servitio Sulpitio** 77. &

scq. 361. usque ad 370.

**C.** Sextilio Rufo 382

**P.** Sextio 106. 122

**Silio** 381. 389. 390. 391

**P.** Sulpitio 399

**T**

**Terentia** suz 408. 409.

410.

**Terentia, & Tulliola,**

**& Ciceroni,** suis 401.

402. 404. 405. 407.

**M.** Terentio Varroni.

213. 219.

**Q.** Thermo 49. 384. 385

**Tpranio** 155. 156

**C.** Trebatio 165. usque

ad 178.

**Trebianio** 145. usque ad

148.

**C.** Trebonio 273. 440. 441

**Tironi** 461. 462

**T.** Titio 120. 398

**C.** Titio Rufo 388

**A.** Torquato 130. usque

ad 135

**V**

**L.** Valerio Jurisconsulto

28

**Q.** Valerio Orca 348.

349. 359

**Varroni** 13. *Vide* Te-

rentio.

**Vatinio Imp.** 110. 111

**Volumnio** 186. 187





BNCF.

B.12.6.83



